

Digitized by the Internet Archive  
in 2019 with funding from  
Wellcome Library

<https://archive.org/details/b30523965>



BARTHOLOMAEI de MOOR

VERIS OECONOMIAE ANIMALIS,

*seu potius*

HUMANAE, PRINCIPIIS INNIXAE

**PATHOLOGIAE**

**C E R E B R I**

DELINEATIO PRACTICA:

*in qua,*

**MORBORUM SOPOROSORUM,**

*per notas characteristicas,*

**D I S T I N C T I O:**

*nec non*

**S P A S M O R U M**

ACCURATIORE DISTRIBUTIO

*traditur.*




A M S T E L A E D A M I,

Excudit **GERARDUS BORSTIUS**, Bibliopola.

clō Ip cciv.



304403





*Nobilissimis & Splendidissimis*

ACADEMIÆ LUGD. BATAVÆ  
C U R A T O R I B U S

D. JACOBO BARONI DE WASSENAER ,  
Toparchæ in Obdam , Hensbroek , Wochmeer , Spier-  
dyk , Zuidwyk , Kernchem , Twikelo , Lage &c. Ordini  
Equestris Nobilium Hollandiæ Primicerio , ut & regii  
Elephantæ in Daniâ Socio , Equitatus fœderatarum civi-  
tatum Præfecto , Sylvæ ducis & arcium ejus Gubernato-  
ri , ad Potentissimos Poloniæ & Borussiæ Reges , ac Se-  
renissimum Electorem Hanoveranum , pluresque Ger-  
maniæ Principes nuper Legato.

D. HUBERTO ROSEBOOM, JCto,  
Toparchæ in 's Grevelsregt , & Supremæ Hollandiæ Curiae  
Præsidi.

D. HERMANNO van den HONAART, JCto,  
Viro Consulari urbis Dordraci , ejusque causa in delega-  
tos Præpotentium Hollandiæ Ordinum allecto , Aggerum  
Alblefferwaerde Comiti.

UT ET AMPLISSIMIS GRAVISSIMIS

*Post varias dignitates Hagæ vel Amstelædami Consulari  
nomine administratas, nunc denuo.*

URBIS LUGDUNO-BATAVÆ  
C O N S U L I B U S

D. CONRADO RUYSCH, JCto, & præfidi.  
\* 2 D. JA-

D. JACOBO VROMAN.

D. ARNOLDO WITTENS, JCto.

D. JOHANNI ELEMEN, JCto.

& Consultissimo.

D. JOHANNI van den BERG, JCto,

Viro Consulari Illustribus Curatoribus à Secretis.

BARTHOLOMAEUS de MOOR

S. P.



*Raxin medicam, hu-  
manarum artium u-  
tilissimam, præce-  
denti seculo à nonnul-  
lis illustratam, ab aliis pessimè  
ha-*



*habitam, suo nitori restituere, in transitu præjudicia quædam Philosophica evellere, sum aggressus. Opus non minus utile ac necessarium, quam ingens & arduum. Quis enim facile omnes, sub speciosâ sese occultantes larvâ, errores detegere? Quis loco falsarum opinionum veritatem exactè perspicere, eamquè ita proponere valeat, ut nequaquam repudietur? Hæ cogitationes non ita difficulter à molesto hoc scrutinio me abster-*

rere potuissent, nisi ΔΥΣΚΟΛΑ ΤΑ  
ΚΑΛΑ existere, jam dudum mon-  
nuissent Antiqui. Excutien-  
dus itaque fuit veteris, & dif-  
ficultas calcar subdere debuit a-  
liquid audendi. Ea est verita-  
tis vis, ut non tantum præju-  
dicatas evellat opiniones, sed  
& assensum extorqueat. Tan-  
tâ sum usus animi moderatione,  
adeo claram in partes vocare  
conatus sum demonstrationis e-  
videntiam, ut de felici successu  
aliquam conceperim mente opi-  
nio-



nionem. Non est tamen ea temporum felicitas, non is hominum candor, ut veritas nuda ficticiis præferatur opinionibus. Non omnes aliorum conatum sunt æqui censores. Advocandus ergo erat, more hoc tempore usitato, aliquis Patronus. Cum autem, quem eligerem potissimum, dubitarem, opportune Vos occurristis Viri Illustres, quos reliquis omnibus præferendos esse judicavi. Qui Patroni meliores, quam hi, quorum sapien-



*pietiae & prudentiae Patriae  
Patres, curam Universitatis,  
toto orbe inclytæ, demandan-  
dam judicaverunt? Vos eâ e-  
stis humanitate, ut, benè de  
studiis mereri conantes, benevolo  
soleatis excipere vultu. Vos a-  
deo in Medicinam propenso estis  
animo, ut ad hanc publicè do-  
cendam evocaveritis Viros eru-  
ditione conspicuos, longo praxe-  
os usu expertes, famâ claros,  
numero plures. Suscipite ergo  
patrocinium hominis, qui in ma-  
te-*



*teriâ difficillimâ, facem juniori-  
bus præferre conatur. Quod si  
Vos per otium hæc meâ inspicere,  
atque opinionibus album adjice-  
re calculum volueritis, nullus  
dubito, quin plures in meam itu-  
ri sint sententiam. Valete V. J.  
& Patriæ, Academiæ, Fami-  
liis vestris vivite diu felices, in-  
clyti. Iterum Valete.*

# BENEVOLE LECTOR.

**N**on scripturientis seculi intemperies, non vanus inclarefcendi ardor, non alios infectandi proterva libido, non nova dogmata protrudendi vesana cacoethes; sed de Medicinâ benè merendi, & proximo inserviendi studium, me ad editionem qualiscunque hujus operis impulerunt. Vidi diu & dolui, musteas & pravo nixas fundamento in artem eximiam irrepsisse opiniones: vidi satis latè serpsisse contagium: itaque cogitandum fuit de remedio, & medicinâ Medicinæ adhibendâ. Non existimavi aliter vanas, lubricas, præjudiciis variis innixas, imo & noxias opiniones, posse evelli, quam si vera, solida, è praxi petita & praxi accommodata omnium subjicerentur oculis dogmata. Qui accuratius ea, quæ apud practicos occurrunt, examinaverit, is facile animadvertet, ficulneis pleraque quæ traduntur, innixa esse fundamentis. Ita non pauci scripserunt quasi in praxi planè essent hospites, quasi eam à limine vix salutâssent: ego ita scribere sum conatus, ut omnibus fieret manifestum, me praxin non oscitanter exercuisse.

Non sum is, qui adeo mihi plaudam, quasi ego solus omnes evellere zizanias, omnes corrigere nævos, potuerim. Novi plurimum requiri operam, novi veritatem temporis esse filiam, eamque non nisi sensim in apricum proferri; verum est aliquid glaciem frangere: est aliquid, aliis ad altiora contendentibus addere calcar: est aliquid, aliis exemplo præire.

Quemadmodum enim de re Anatomicâ & Botanicâ optimè meruerunt illi, qui ea, quæ diligenti scrutinio detexissent, publici fecerunt juris, quamvis multa restent investiganda; ita etiam utilissimum est, ea, quæ ad illustrandam  
praxin



## P R Æ F A T I O.

praxin diligens docuit observatio, aliis non invidere, quamvis industriæ hominum emunctæ naris copiosa relinquatur messis.

Duo mihi videbantur in Pathologia cerebri imprimis confusa & intricata: Soporosorum nempe affectuum doctrina, & Spasmodorum distributio. Ergo in id incubui, ut *Soporosos affectus* per notas characteristicas à se mutuo distinguerem, *Convulsionum* accuratiorem proponerem tabulam.

Invenies hic, Lector amice, non tantum morbos cerebri è veris causis explicatos, Indicationes, nisi me fallit animus, utiles & genuinas, denique medicamenta selecta, non otiosè in musæo excogitata, sed gustui grata, assumptu facilia, utilitate summa. Norunt illud Pharmacopæi, quorum petitioni annuens ego aliquas communicavi descriptiones, quas in officinis suis paratas habent, quibusque utuntur non sine successu.

Erat mihi mens quasdam subjungere observationes; affectuum capitis non contemnenda exempla, & curationis felices successus clarissimè ob oculos ponentes; verum cum opus nimium incresceret, mutanda fuit sententia, & in aliud tempus reservandæ observationes. Quamvis enim delineationem non tantum, sed & totum opus in chartam coniecissem, cum primas paginas typographo excudendas traderem, ita tamen usu venit, ut mea quotidie ad incudem revocans, quædam immutanda, quædam corrigenda, quædam latius explicanda, non pauca etiam nova capita adjicienda fuerint. Si ergo, Lector Amice, quædam occurrant non satis limata, non satis copiosè explicata, nec arido pumice expolita, velim mihi des veniam. Non sumus semper animo æque præsentī, non suggerit memoria continuo ea, quæ in praxi fuerunt observata. Deinde urgente typothetâ non potui, juxta præceptum Horatianum, no-



## P R Æ F A T I O.

num in annum mea premere, sed non rarò extemporanea in chartam fuerunt conjicienda, & typis mandanda: excusum jam erat capitis principium, sub prælo sudabat altera, componenda erat pars tertia. Non id eò dico, ut magnam mei concitem opinionem, odi jactantiam, metior me meo pede: verum necessum fuit hæc monere, ut mihi ignoscat candidus Lector, si quædam occurrant, quæ accuratius potuissent à me exarari.

Omnem diligentiam adhibui, ut veritatem nudam, speciosorum figmentorum repudiato fuco, clarissimè ob oculos ponerem: veritatem nusquam volens deferui. Quod si alicubi dormitaverim, quod si ab erroribus omnino me tueri non potuerim, tantum apud me tamen semper valebit veritas, ut eam iterum amplecti, vel sponte, vel monitus, sim paratissimus.

Philosophiam Medicinæ non esse nimium admiscendam sum persuasus; judicavi tamen utile quæstionem, quæ possit videri philosophica, pertractare: nempe de *Sensorio communi*, cujus non una fuit ratio. Cum enim mihi per occupationes, philosophica, quæ plura habeo, edere non liceat, hæc quæstio tanti mihi visa est momenti, ut ejus explicationem diutius premere non videretur conveniens. Deinde, cum in Medicinâ sæpius Sensorii communis fieret mentio, detegendum erat, quid hoc nomine intelligi debeat? Denique quum *Hippocrates* in libro de Morbo sacro, & *Galenus* non uno in loco ea habeant, quibus ex hujus quæstionis explicatione, clarissimum affulget jubar, non videbatur inutile eam accuratius scrutari. Tandem cum eadem à *Willisio*, *Laurentio Donkers*, *Guernero Neuhausen* &c. esset pertractata materia, ad Medicinam non minus possit videri spectare, quam ad Philosophiam. An rem acu tetigerim, aliorum esto judicium.

Non



## P R Æ F A T I O.

Non possum non monere juniores, si cum fructu in hisce legendis versari velint, utile esse, non obiter hæc mea inspicere, sed diligenter à capite ad calcem perlegere, ita enim quæ uno in loco brevius sunt tradita, alio uberius explicata, imo incultata, invenient. Novi quam facile in evolvendis medicorum lucubrationibus obrepat tedium: ipse illud experiendo non semel didici. Dedi ergo operam, pro virili, ut hæc mea sine fastidio legerentur.

Tu interim, Lector candide, conatibus meis fruire, & fave. Quod si mea non ingrata Viris esse ingenuis animadvertam (omnibus enim placere difficile) id mihi calcar addet plura audendi, & exorsam pertexendi telam, Vale.



# INDEX CAPITUM

## I D E Æ

### PRAXEOS MEDICÆ NOVÆ.

	C A P U T. I.	
<i>De Cephalalgia.</i>		p. 1.
	C A P U T. II.	
<i>De Vigilis nimis.</i>		44
	C A P U T. III.	
<i>De Vertigine.</i>		78
	C A P U T. IV.	
<i>De Phrenitide.</i>		105
	C A P U T. V.	
<i>De Melancholia.</i>		130
	C A P U T. VI.	
<i>De Mania.</i>		170
	C A P U T. VII.	
<i>De Soporosis affectibus in genere : &amp; in specie de Comate &amp; Caro.</i>		188
	C A P U T. VIII.	
<i>De Lethargo.</i>		240
	C A P U T. IX.	
<i>De Hydrophobia.</i>		261
	C A P U T. X.	
<i>De Paralyfi.</i>		279
		CA-



# INDEX CAPITUM.

## CAPUT. XI.

*De Convulsione in genere ; Emprostotono , Opistotono ,  
& Tetano in specie.* 339

## CAPUT. XII.

*De Affectu malè Tetano existimato : Lumbagine di-  
cendo.* 358

## CAPUT. XIII.

*De Morbo caduco , Epilepsiâ vulgò dictâ.* 361

## CAPUT. XIV.

*De Epilepsiis symptomaticis febrilibus.* 443

## CAPUT. XV.

*De Epilepsiâ pedissequâ Dolorum , Purgationum , Vul-  
nerum & Ulcerum.* 463

## CAPUT. XVI.

*De Epilepsiâ pedissequâ Repletionis , & Hemor-  
rhagiæ.* 475

## CAPUT. XVII.

*De Epilepsiâ Hystericâ.* 483

## CAPUT. XVIII.

*De Epilepsiâ Hypochondriacâ.* 511

## CAPUT. XIX.

*De Subsultibus , & Convulsionibus in somno.* 531

## CAPUT. XX.

*De Spasmo Flatulento dicto , vulgo de Kramp.* 535

CA-

# INDEX CAPITUM.

## CAPUT. XXI.

*De Convulsionibus particularibus, ac in specie, de Vomitu, & Convulsione maxillæ inferioris.* 540

## CAPUT. XXII.

*De Motibus convulsivis.* 551

## CAPUT. XXIII.

*De Incubo.* 559

## CAPUT. XXIV.

*De Catalepsi.* 566

## CAPUT. XXV.

*De Apoplexia.* 586





BARTHOLOMAEI DE MOOR  
I D E A E  
PRAXEOS MEDICAE  
N O V A E

*Veris Oeconomia humana principiis*

I N N I X A E

L I B E R P R I M U S

Pathologiam Cerebri continens.

---

C A P U T P R I M U M.

De Cephalalgia.



AGGREDIMUR explicationem affectuum capitis, à symptomate frequentissimo initium fumentes, dolore ejus Cephalalgia dicto. Hic autem mirari libet, quomodo in affectu sæpissimè occurrente explicando hætenus cæcutiverint medici. Ne quis me frustra hæc dixisse existimet, legat ea quæ de hoc symptomate passim tradiderunt auctores, & videat num accuratum ex eorum scriptis formare possit conceptum de verâ Cephalalgia naturâ. Non sufficit enim dixisse: causa ejus est intemperies cum vel sine materiâ, causa ejus est sanguis, pituita, bilis, melancholia: quæro enim quomodo sanguis, pituita, bilis, melancholia producant hunc dolorem? Nec minus à veritate sunt aliena, quæ de coagulatione circulantium liquorum, obstructione, sale sui juris facto, nec ritè diluto afferuntur.

Obscura  
hætenus  
Cephalalgia  
explicatio.

A

No-



Id breviter  
ostenditur.

Nolim hisce refutandis diu immorari, verum non erit inutile breviter ostendere quam ficulneis hæc omnia innitantur fundamentis: ita apparebit quid mihi calcar addiderit, ad hanc ideam veris fundamentis innixam publici juris faciendam. Dico ergo, si hi humores producant Cephalalgiam, necesse erit eos adesse in capite, rogo itaque, unde & qua viâ ad caput fuerint delati? Quod pituitæ, quod melancholiæ est receptaculum, & quomodo rapiuntur ad cerebrum, quomodo iterum pristinas repetunt sedes? Quis ductus biliosos, quis melancholicos in capite detexit? An vero per cerebri substantiam extra vasa effunduntur? Si vero hæc intelligenda sint de sanguine, aut de uniuscujusque temperamento & ἰδιοσυγκρασίᾳ, quare dolores hi non sunt perpetui? Temperamentum enim non faciliè immutatur.

De coagu-  
latione hu-  
morum &  
liquore ner-  
voso.

Coagulatio humorum ut inde sequatur obstructio & quies non datur, uti postea satis clarè apparebit; etenim à motu sanguinis universali vita, à particulari calor, color, sensus dependent. Ubi quies sanguinis adest hæc omnia pereunt, uti in Gangræna & Sphacelo est manifestum. Quæ de liquore nervoso aut succo nutritio traduntur æquè à veritate distant; nullus enim datur liquor nervosus à spiritibus animalibus diversus, hi autem Cephalalgia producendæ non sunt apti. Succus nutritivus in cerebro elaboratus, per nervos distribuendus merum est figmentum.

De solu-  
tione conti-  
nui.

Nec minus absurda sunt quæ de solutione continui tradunt auctores. *Cephalalgia* dicitur esse *tactus in partibus membranosis à solutione continui facta, molestia & corruptio*. Dico enim solutio continui est vulnus, id quod è collatione definitionis vulneris est manifestum. Sive enim à re externa secante vel pungente unitatis producat solutio, sive etiam à causis internis, continui solutio necessario est vulnus. Quæro igitur, quomodo humores hi producent solutionem continui? Quomodo pituita, humor lentus, vulnerabit partes capitis vel internas vel etiam externas? Si bilis vulneri producendo est aptus, quid ni folliculum fellis, ubi ingenti continetur copiâ, erodit? Cur in dextro hypochondrio non producit dolorem continuum? Quæ sunt illa falia sui juris facta, quæ vasa vulnerare sunt apta?

Et in omni

Novi sanguinem posse aliquando vasa cerebri disrumpe-  
re;



pere; verum tum ille in Cerebri substantiam effunditur, nec Cephalalgiam paucarum horarum, sed Apoplexiam lethalem producit? Diligenter quoque illud observandum est, sanguinem quâ sanguinem non producere illam continui solutionem, nec quatenus dicitur biliosus, aut pituitosus, aut melancholicus, sed quatenus copia sua, mole & motu seu *Pressione*, quam docuimus esse efficacissimam, vasa dilacerat. Raro tanta est humorum in corpore nostro acrimonia, ut canales, quibus naturaliter contineri debent, erodant. Sanguis in specie est liquor temperatissimus, ordinariè linguam minimè vellicans, nec acrimonia sua vasa lædens. Quomodo enim venis tenuissimis liquor corrodens contineri posset? Nec est quod mihi Hæmoptoen quispiam objiciat; numquam produceretur Hæmoptoe, nisi aut sanguinis copia, aut vasorum distensio nimia, aut eorundem inflammatio, aut tussis, aut pressio sanguinis, pulmonis vasis tenuibus repetitis pulsibus vim inferens, accederent. Novi etiam cancrum dari exulceratum, novi dari cariem ossium variam, verum sunt hæc dissimilia exempla; loquor enim jam de sanguine per venas & arterias circulante, cujus liquorem ratione temperamenti adeo esse proportionatum existimo arteriis & venis quibus continetur, ut vasis hisce solutionem continui non inducat. Verum non opus est hoc adeo urgere in hac materia, quum manifestissimum sit Cephalalgiam aliquando per paucas tantum horas vexare & tum iterum plane cessare, nec longo tempore recurrere. Quod si solutio continui in Cephalalgia habeat locum, necessum esset in partibus membranosis excitari vulnus & quidem peramplum toto capite affecto, atqui iterum brevi momento idem ad cicatricem perducere. Quid? quod in iis qui sæpe dolore capitis infestantur necessario magna inveniretur cicatricum copia? Quamvis autem negem genus capitis doloris esse solutionem continui, quia ea in omni dolore capitis non adest, minimè tamen eo inficias aliquando in capitis partibus interioribus absque præcedente læsione externa adesse solutionem continui. Postmodum demonstrabo Apoplexiam oriri à ruptione vasorum: aliquando ulcera observata sunt in cadaveribus. Vid. *Bonet. sepul. obs.* 78. &c. Verum ea quæ rarius & in *ῥαυαίμοις* casibus occurrunt,



runt, statuenda non sunt universaliter locum habere. Imo quia hic plane alia solutio continui locum habet quam in ordinariâ Cephalalgîâ, ideo, generaliter loquendo, capitis dolor non est solutio continui.

De tactûs  
corruptione.

Male igitur dicitur continui solutio Cephalalgia, male eadem statuitur excitari à sanguinis temperie: non minus male dicitur *tactûs corruptio*. Non nego omnes sensus ad tactum posse reduci: verum nego quando perceptio doloris in mente nostra excitatur à causa revera dolorem efficiente, tum dici posse tactum esse corruptum. Ego existimo tum tactum potius dicendum esse corruptum si voluptatem tanquam dolorem, aut dolorem tanquam voluptatem, frigus instar caloris, calorem instar frigoris menti nostræ representaret. Non minus necessarium est dolorem nobis tanquam dolorem repræsentari, quam sensum defectus cibi aut potus in nobis producere famem & sitim.

Quomodo  
capitis dolor  
soleat inva-  
dere.

Ut ergo certius aliquid & evidentius statuamus, operæ pretium est attendere ad productionis modum & symptomata obvia. Sæpissime Cephalalgia Febrium continuarum aut intermittentium est symptoma. Non raro contingit aliquem sub dio veris aut æstatis tempore radiis solaribus expositum, aliquamdiu obambulare, interim in ipso exercitio vel paulo post, gravi dolore capitis corripui. Notissimum quoque est post potum vini aut cerevisiæ generosioris caput male mulctari. Denique virgines pallidi coloris si in loco calidiori, ubi homines plures sibi mutuo adsunt, aliquamdiu commorentur, si corpus vehementius moveant, facile & sæpissime de capitis dolore conqueruntur. Comites plerumque gravioris capitis doloris sunt pulsatio arteriarum in temporibus molesta, & gravitas capitis, quam antiqui *καρσιβαρία* dixere, adeo ut capite erecto sedere molestum sit, nisi caput fulciatur. Levamen aliquod afferre solent somnus, quies, potus *Thee* calidè sumptus. Qui causas Cephalalgiae veras explicaturus est, tales debet statuere, ut omnia hæc phænomena necessario nexu cum illis cohæreant; uti in sequentibus à me clarissime explicabitur. Sin autem hæc cum causis, de quibus disputatum est, conferantur, manifestum erit nullum inter hæc apparentia, in praxi obvia, & causas vulgo explicatas esse nexum. Quid? An febris produ-  
cit



cit humorum horum triadem aut quaternionem? An obambulation & exercitium illud potest, & quidem tam cito? An si omnes simul humores non producant, unum aliquem aut generabunt, aut ad caput rapient? An locus calidior, an hominum congressus idem efficiet? An vero miscella variorum humorum venis & arteriis contenta aut inquinabitur, aut putrescet à modo memoratis causis?

Hæc si quis diligenter expendat putem apertissimum esse nec sanguinem quàm sanguinem, nec sanguinem quatenus dicitur biliosus, pituitosus aut melancholicus, umquam producere Cephalalgiam. Quemadmodum enim statim evici sanguinem non producere solutionem continui, ita etiam hic contendendo sanguinem, quatenus vasis suis venis & arteriis continetur, non producere dolorem: neque enim pungit, aut vellicat, aut erodit vasa uti vidimus, quandoquidem est liquor blandus particulis suis oleosis & pinguibus particulas acres facile demulcens. Adde quod hæ causæ in sanguine aliam capitis temperiem brevi momento non introducant, neque etiam introductam expugnent. Deinde nulla datur in sanguine fermentatio aut effervescencia, uti postmodum in tractatu de Febribus fiet manifestum. Denique sanguis illorum qui sibi satis sani videntur & munia sua quotidiana obeunt, sæpe longe magis à naturali constitutione distat quam illorum, qui in Cephalalgiam atque morbos & quidem periculosos incidunt, uti alibi monui. Tandem sanguinis temperamento minime immutato, si agitatio tantum introducatur major aut ab exercitio, aut assumptis, aut aëris dispositione excitatur repente dolor, manifesto argumento non à sanguinis dispositione & temperamento, uti vulgo considerari solet, sed ab ejus motu, & ad circulationem commode absolvendam ineptitudine oriri dolorem capitis.

Sanguis non est causa Cephalalgiae juxta auctorum mentem.

Probe hæc tenenda sunt; ex scriptis enim auctorum patet, illos à particularum sanguinis dispositione, à sulphure, à sale, dispositione acida, succo pancreatico sanguini admisto, bile, & sic porro, varios deducere morbos, varias febres, quasi ex iis cordis aut interior vasorum superficies malè afficeretur, irritaretur, &c. quum tamen hæc à veritate longe sint aliena. Non est quoque negligendum capitis dolorem esse periodi-

Ulterior confirmatio.



cum, affligere data aliqua occasione, tum iterum remittere & omnino desinere, postmodum iterum excitandum. Quod si dispositio sanguinis biliosa, pituitosa, melancholica, uti vulgo habetur, produceret Cephalalgiam, omnes omnino homines capitis dolore vexarentur & semper, quandoquidem singuli alicujus sunt temperamenti: illud autem temperamentum, quodcumque demum statuatur, producit capitis dolorem. Deinde Cephalalgia ab hisce causis producta eousque perseveraret, donec universa sanguinis massa, adeoque ipsum temperamentum esset emendatum. Jam autem temperamentum nativum non facile immutari apertissimum est. Cum ergo hæc experientiæ sint contraria, sanguis nec quatenus est sanguis, nec quatenus hujus aut illius humoris affluxu est immutatus, neque quatenus fermentatione aut effervescentia fictitiis exagitur Cephalalgiam producit.

Veræ capitis  
doloris cau-  
sa?

Si ergo hæc causæ dolorem non inferant, quæ itaque hujus symptomatis erit causa? Doloris capitis causa est sanguinis pressio vel aucta, vel imminuta, vel denique partium solidarum vitium.

Lucem hic  
affert doctri-  
na de pres-  
sione san-  
guinis.

Plurimorum errorum in Medicina fons est ignoratio circulationis sanguinis. Cum motum sanguinis non haberent per spectum, & sanguinem tanquam vasis suis contentum solummodo considerarent, necesse habuerunt effingere causas alias à veritate longe remotas. Post detectam circulationem sanguinis varii quidem errores sunt emendati, verum cum efficacia hujus circuitus obiter tantum consideraretur, in *cogitationibus meis de Instauratione Medicinæ* conatus sum demonstrare, quæ esset *vis sanguinis* è corde singulis pulsibus magno impetu in arterias repletissimas expulsi. Docui, nisi me fallit animus, evidentissimè à SANGUINIS PRESSIONE omnes humanæ oeconomix functiones esse deducendas. Ab ejusdem pressionis vitio, non neglectâ singularum partium structurâ, in sequentibus apparebit morbos & symptomata esse deducenda.

Pressio au-  
cta causa do-  
loris capitis  
in Febribus.

Pressio sanguinis aucta in Febribus causa est doloris capitis symptomati. Ut hoc intelligatur, oportet considerare membranarum cerebri & cranii structuram, deinde pressionem ipsam cum insigni dilatatione & æstu conjunctam, denique mu-



mutationem, quæ sanguini accidit à validâ & febrili pressione; verum breviter, quoniam uberior harum rerum tractatio ad doctrinam de Febribus pertinet.

Membranæ cerebri gaudent copiosissimis vasis arteriosis, tam majoribus quam etiam minoribus, id quod apertissimum est. Imprimis autem observandum est hæc vasa in minutissimas fibrillas esse diremptas, adeo ut si horum diameter cum unica sanguinis guttula comparetur, proportio sit futura admodum exigua. Quid quod ipsa corticalis cerebri substantia constet ex subtilissima vasorum textura? Pericranium itidem est membrana exquisiti sensus, & numerosissimis arteriis irrigata.

Membrana-  
rum cerebri  
textura.

Pressio sanguinis tanta est efficacia, ut vires, quas stupendas in hominibus & animalibus conspiciamus, ab hac potissimum dependeant. Quod si ordinaria pressio in sanis tantum valeat, quid fiet si ea præter naturam insigniter augeatur? Quid? si sanguis dilatatione vasa magis repleat, magis distendat? Quid? si intestinus motus calorem nostrum produ- cens & fovens intendatur? Si loco caloris moderati succedat æstus summus? Ab hisce causis dependent ægrotorum vires stupendæ, adeo ut pluribus hominibus sanis aliquando diffi- cile sit unicum febricitantem lecto continere.

Pressio-  
vis.

Ab hac pressione, dilatatione, & æstu tota sanguinis massa non tantum multum immutatur, verum serum ipsum, sanguinis pars fluidissima, ita degenerat à solita suâ tenuitate, ut in gelatinam spississimam quasi excoquatur. Apparet hoc sæpenu- mero in sanguine V. S. educto, ubi videre licet superficiei caseosæ substantiæ instratam crustam admodum tenacem, quæ vix cultro dividitur. Revera autem hanc substantiam esse serum inspissatum dubitabit nemo, qui aliquoties serum san- guinis igni imposuit; illud enim semper & quidem citissimè in gelatinam concrevit. Soleo ego hanc sanguinis crasin appel- lare dispositionem inflammatoriam: quandoquidem in Pleu- ritide & similibus morbis sanguis talis apparet naturæ. Hic in transitu libet monere illos falli, qui urinam non aliter con- siderant quam sanguinis serum, quum inter hæc duo insignis intercedat differentia.

Sanguinem  
ejusque se-  
rum immu-  
tat.

Hisce



Repletio,  
distensio &  
pulsatio cau-  
sa doloris  
capitis.

Hisce præmissis facile concipi potest si sanguinis pressio intendatur, si vasa numerosissima per membranas exquisiti sensus dispersa magis repleantur, magis distendantur, facile posse oriri dolorem capitis insignem. Præcipuè cum vasa majora & minora cranio tam arcte adiaceant, ut non pauci sulci in cranio sint exsculpti, vasorum ramificationis exhibentes vestigia. Sanguis hæc vasa non permeat instar fluminis à fontibus ad mare decurrentis, sed à pressione & pulsu cordis vehementi eò propellitur, id quod dolorem non parum auget, unde ægri de dolore pulsatorio, præcipuè in temporibus, ubi arteriarum insignes rami decurrunt, conqueruntur. Pulsatio hæc ideo forsan major est, quandoquidem arteriarum plurimi ramuli, cranio vicini, & in infantibus pervii sensim oblitterantur, uti illud in futuris cranii est manifestum. Si autem sanguis sit redditus minus fluidus, si serum ejusdem multum sit inspissatum, manifestum est eum ineptiorem esse ad prompte permeandum minutissimas arteriarum fibrillas, non tamen ideo minuitur frequentia & impetus contractionis cordis, adeoque vis vasis & membranulis infertur, atque dolor excitatur.

Hæc in Fe-  
bribus lo-  
cum habent.

Cum ergo Febrium essentia in sanguinis pressione præternaturam aucta consistat, uti suo loco demonstrabitur, non mirum, si & à pressione, & ab expansione & ab æstu producatür sæpenumero Cephalalgia symptomatica.

Plethora  
causa dolo-  
ris capitis, &  
quomodo ?

Quod si sanguis mole sit auctus, in Plethora dicta, tum ille vasa & membranas nimium replet & extendit, præcipuè accedente causa aliqua externa, atque ita capitis dolorem infert cum ejusdem gravitate. Cum enim progressus sanguinis fiat à majoribus vasis versus minores propagines arteriolarum, donec in minutissimas fibrillas, quibus membranæ cerebri, admodum exquisiti sensus abundant, perventum sit, cumque impetus contractionis cordis & pulsus in minimis etiam fibrillis sese exerat, facile concipimus à nimia sanguinis copiâ, si motus accedat insolitus, posse excitari Cephalalgiam. Hinc ii qui V. S. sunt assueti, incipiente vere & æstate sæpe conqueruntur caput sibi dolere, scotomias oculis obversari, se vertigine corripi, imo metuere ne concidant. Hinc iidem ad V. S. confugiunt, qua peracta levamen percipere solent.

Quod



Quod si quis tempore verno sese radiis solaribus exponat, sub dio deambulet, ab exercitio incalescat, is dolore capitis facili negotio corripitur. Exercitium enim pressionem & rarefactionem sanguinis multum adauget, radii solares caput ferientes mirum in modum eandem illam expansionem intendunt, hinc Cephalalgia. Sedatur autem ille dolor quiete moderata, sanguinis pressionem nimiam atque ejusdem rarefactionem compescente.

Quomodo radii solares Cephalalgiam producant.

Ab ebrietate itidem oritur capitis dolor, quandoquidem à potu generosiori sanguis magis expanditur, spiritus plures generantur, qui in cor copiosius influentes contractionem ejus adeoque sanguinis propulsionem intendunt.

Ebrietas.

A nimia ciborum assumptione producit etiam Cephalalgia, tum quoniam à largiori chyli versus sanguinem affluxu vasa magis replentur, tum quandoquidem dilatatio & pressio sanguinis intenduntur, unde membranæ & vasis cerebri inferitur aliqua vis. Accedit & alia causa, nempe ventriculus nimium expansus, qui mole sua & onere premens vasa descendencia occasionem præbet motui versus caput majori.

Ingluvies.

Quod autem ab exercitio, calore solis, æstatis, vini potu &c. hic indolorem capitis incidat, alius non item, dependet tum à viscerum vigore, sanguinis majori aut minori copiâ, consuetudine, imprimis etiam à sanguinis dispositione, & fluiditate. Si enim sanguis sit satis mobilis, si promptissime minima vasa permeare possit, licet ejus motus paululum intendatur, licet genio indulserit quis, non magnam exinde percipit molestiam: sin autem sanguis à corde & vasis majoribus versus minora iteratis pulsibus fortiter adactus, non tam facile, nec tam cito per minimos illos tubulos progrediatur, molestus orietur pulsationis sensus, & dolor capitis major aut minor. Pulsatio hæc, uti vidimus, in temporibus solet esse major, ob vasa majora & cranio accumbentia. Comes quoque hujus doloris est capitis gravitas, quandoquidem arteriæ magis distentæ & repletæ partes vicinas, adeoque cerebrum ipsum magis premunt. Premuntur autem præcipue partes cerebri exteriores seu corticalis ejusdem substantia, tum quod membranæ sit magis vicina, tum etiam quod vasis gaudeat copio-

Quare unus facile corripitur dolore capitis, alius non item?



fissimis. Premitur autem substantia corticalis versus medullarem, unde gravitatis sensus, in somnum propensio & à somno levamen.

Quomodo  
ligatura af-  
ferat leva-  
men?

Levamen etiam non contemnendum sentiunt ægroti à ligaturâ strictiori, quandoquidem vasa aliquomodo fulciuntur, cohibetur quoque aliqua ratione sanguinis motus & expansio præcipuè si partes exteriores afficiantur.

Atque  
etiam potus  
Thee.

A potu. *Thee* optimè habent Cephalalgia laborantes, quandoquidem à particulis aqueis diluitur sanguis, adeoque fluidior redditur & magis aptus ad prompte permeandum minimas arteriarum fibrillas absque molestiâ. Ab ejusdem potus particulis amaricantibus, adstringentibus, spirituosus facilius per vasa capillaria transitus promovetur.

Conclusio,  
majorem  
pressionem  
esse causam  
hujus  
doloris.

Ex hisce igitur constat, pressionem majorem esse sæpenu-mero causam Cephalalgiae. Constat causas pressionis majoris itidem esse capitis doloris causas. Manifestum est ea, quæ juvant, non alia conducere ratione, nisi quatenus molestæ pressionis succurrunt.

Pressio  
imminuta.

Jam porro ostendendum est pressionem minorem quoque producere Cephalalgiam. Habet illud locum in virginibus pallidi coloris, sedentariam vitam agentibus, quibus menses subsistunt, denique Chlorosi laborantibus. Habet hoc quoque locum in aliis subjectis; verum sufficere arbitratus sum, si in magis manifesto exemplo rationem Cephalalgiae hujus dilucidè ob oculos ponerem.

Differentia  
constitutio-  
nis sanguinis  
in hoc &  
superiori  
casu.

Nemo facile inficias iverit in hoc casu circulationem sanguinis segnius peragi, cum sanguinis ad circulationem debitè absolvendam constitutio non sit satis apta. Mentionem superius quoque fecimus sanguinis ad permeandum tenuissimas fibrillas inepti, verum hic alia occurrit ineptitudo. Tum enim considerabamus sanguinem, quatenus ab æstu febrili ita immutatur, ut non possit adeo prompte permeare minima vasa, quam quidem illud requirit pressio aucta præter naturam & febrilis: hic autem consideramus ineptitudinem ad circulationem adeo celeriter absolvendam, quam vulgo in sanis ea fieri assolet.

Morbus

Talem sanguinis ineptitudinem tum in aliis casibus tum  
etiam



etiam in morbo virgineo habere locum è causis facile colligitur, virginis.  
& effectū.

Sedentariam agunt vitam, adeoque sua segnitie cordis contractionem validam non suscitant. Concurrunt sæpe aliæ quoque causæ, nempe noxiis aliquando cibis, oryza cruda, creta, carbonibus vescuntur, adeoque ventriculum ineptum reddunt ad chylum sufficienter elaborandum. Non parva quoque hujus rei causa est, hoc tempore, potus aquei nimia, quotidiana & repetita ingurgitatio. Accedit aliquando somnus protractior, mæstitia, curæ. Ab hisce ergo causis producitur sanguis ad circulationem ordinariam debite absolvendam ineptior.

Ejus causæ.

Eundem illum sanguinem ad circulandum esse ineptum effecta ostendunt. Facies pallida & tumida arguit sanguinem esse magis viscidum. A visciditate oritur defectus evacuationum ordinarium : quod enim est viscidum per tubulorum admodum exilium orificia effluere non potest. Ab eadem illa visciditate anhelatio ortum habet, & difficilior sanguinis per pulmonis vasa exigua transitus, unde compressio arteriæ asperæ & respiratio celerior. Ab eadem illa visciditate oritur pulsatio visibilis & vehemens in arteriis colli; replentur enim magis vasa majora & pulsant, quia minimas fibrillas non permeant satis celeriter.

Effecta.

Quanta autem sit connexio horum omnium cum doctrina de pressione sanguinis, patebit manifestius, si effecta pressionis ordinariæ & naturalis in memoriam revocemus. Effecta hujus sunt calor, particularum sanguinem componentium attritio & comminutio, unde dependet fluiditas. Itaque si pressio imminuatur & minor adsit calor, particulæ chylosæ versus sanguinis massam delatæ erunt minus subtiles, minus exaltatæ. Male digestus hic chylus sanguini nutrimentum suppeditat simile, cujus segnior progressus, & ad motum ineptitudo repletionem & distensionem cerebri membranis est molestus; neque enim absque difficultate minimas pervadit arteriolas. Idem ille sanguis ventriculi membranas replens appetitus languidioris, & digestionis imperfectioris est causa. Adeo ut, quemadmodum in Philosophia docetur in omnimotu fieri circulum, hic etiam quidam veluti fiat circulus, chylus imperfector, sanguinem

Connexio  
horum cum  
doctrina de  
pressione  
sanguinis.



nem similem, sanguis itidem imperfectior, digestionem in ventriculo minus perfectam efficit.

Explicatur  
causa doloris  
capitis in  
virginibus  
Pallidi coloris.

Ab eâdem illa vitâ sedentaria sanguinis copiam multum augeri sæpenumero contingit, præcipue si appetitus non sit prostratus. Cum enim exercitium deficiat, non est mirum si humores accumulentur; ab exercitio multi humores dissipantur, exercitium plenitudinem imminuit. Eadem illa sanguinis quantitas multum augetur à suppressis aut parcius fluentibus menstruis evacuationibus: hinc circa illud tempus dolor intendi solet. Nempe naturæ conatus ad eruptionem illam promovendam in sanguine agitationem, & in pulsu frequentiam efficit: unde mirum videri non debet, si pressione per universum corpus auctâ, cerebri vasa eam persentilcant & molestia afficiantur. Intermediis etiam temporibus sæpe affligit dolor, accedente imprimis causa externa adjuvante, quandoquidem & copia & lentor adest, quæ diximus accedente pressione esse doloris causas. Probè hoc tenendum est, licet dispositio sanguinis dolori efficiendo idonea adsit, tamen hanc sese potissimum exerere, quando pressio sanguinis aliquomodo intenditur. Ita tales virgines, si celerius corpus moveant, si ex inferiori loco in superius conclave, vel altiores contignationes adscendant, statim cordis palpitationem, vel molestiam in collo, in capite pulsationem persentiscunt. Sæpe itidem tales è sacris concionibus reduces, ab exercitio, igne, hypocausto calefactæ, à suavi odore aut etiam foetore malè affectæ Cephalalgia corripuntur. Quippe in his omnibus sanguinis pressio magis solito augetur, cumque arteriæ cerebri ejusque membranarum vix sufficiant commodè transmittendo sanguini debilius commoto, præ ejusdem Centore & vasorum capillarium angustia: non possunt non malè habere, si pressio admodum debilis paululum solum intendatur; hinc enim repletio, extensio, pulsatio, dolor, capitis gravitas. Nec est quod quispiam putet me oblitum esse eorum quæ superius dixi, statuendo causam hujus capitis doloris esse minorem pressionem, cum jam videar statuere pressionem majorem. Quamvis enim pressio in hoc casu intendatur, respectu subjecti debili pressione assueti, tamen totum hoc negotium à minori pressione dependet. Ut illud intelligatur, oportet



tet comparare virginem vegetam & robustam quiescentem, cum tali de qua nunc agimus, itidem quiescente: atque iterum virginem vegetam sese loco moventem, & hanc sese loco moventem, in utroque casu manifestum est circulationem virginis Chlorosi laborantis esse segniorem. Et hoc est quod auctores quoque observarunt, de febre alba hujus morbi comite scribentes, illam dici albam quod pulsus frequentia febrem mentiatur, cum illa non consistat in caloris augmento, sed potius defectu & oppressione. Deinde minor sanguinis motus intestinus causa est quare sanguis motum progressivum segnius & cum difficultate absolvat: quemadmodum videmus calorem omnino requiri ut transcolationes liquorum spissiorum peragantur. Gummata aceto non dissolventur, nec transcolationi evadent apta nisi accedat calor: ut crystalli Tartari colligantur, aqua in qua Tartarus est solutus, calide filtratur. Motus minor intestinus causa est quare sanguis reddatur minus mobilis: minus mobilis circulationem non nisi cum aliqua difficultate circulationis absolvit. Ergo si adsit sanguinis copia & lentor, facile orietur Cephalalgia, si eorum sanguis aliquomodo agitetur, quamvis universaliter rem considerando pressio non sit admodum vehemens; vis tamen aliqua infertur vasis. Adeo ut modus productionis hujus symptomatis, veritatem ætiologiæ à me propositæ confirmet.

Ea quæ de virginum pallidi coloris cephalalgia dixi, aliquomodo etiam locum habent in Cephalalgia scorbutica, & quæ è ventriculi debilitate oritur. Si enim sanguinis constitutio sit scorbutica, h. e. lenta & ad motum inepta, aut si talis reddatur à chylo minus quam par est elaborato, facile contingit eum difficilius per arterias carotides circulari, adeoque dolorem, & pulsationem in temporibus molestiam producere.

Nullam vaporum è ventriculo, utero, intestinis, liene adscendentium facio mentionem, cum hi capitis dolorem producere non possint, pugnat id cum structura partium. Infimus enim venter undique peritoneo & diaphragmate, cerebrum cranio & meningibus arctissime septum, vapores nec mittere nec admittere possunt. Non nego tamen partium solidarum tam medii quam infimi ventris vitia posse aliquid facere ad capitis

De Cephalalgia scorbutica.

Nulli vapores ad caput elevantur.



dolorem producendum : verum illud ex eo contingit quod vel sanguinis constitutionem vel motum immutent. Aeo ut mihi diligenter animo volventi ea quæ in praxi quotidie occurrunt, hæc visa sint veritati & experientiæ maximè convenire, causas in sanguine latentes omnes complecti, & ad veram praxin sternere commodissimam. Posset quidem sanguinis ad rarescendum aptitudo inter causas enumerari; verum omnis sanguis ad sese dilatandum esset aptus : necessum tantum est ut hæc dispositio sese exerat, quod tum à causis externis, tum à febre contingit, uti in superioribus est explicatum.

Partium  
solidarum  
vitium.

Restat ut videamus quomodo cerebri vitium excitare possit capitis dolorem; hæc enim tertia est causa doloris capitis. Ita à commotione cerebri, ab equitatione vehementi, à vectione in curru per vias duras & incommodas facile oriri potest capitis dolor. Hac ratione enim vis infertur parti nobili, & ad majorem corporis & sanguinis motum accedit cerebri ejusque membranarum concussio, & in duras cranii partes impulsus, unde oritur doloris sensus.

Confor-  
matio par-  
tium.

Contingit etiam aliquando conformationem partium solidarum causam esse capitis doloris vehementis. Ita Willisius refert se egregii viri cranium dissecurisse, cujus carotidem dextram intra cranium emergentem plane osseam, seu potius lapideam invenisse, vertebralem triplo majorem. Circa initium ægrotudinis hic ægrotus conquestus erat de atroci capitis dolore circa latus sinistrum, cujus causam statuit Willisius quod sanguis Carotide dextra exclusus, cum primum in sinistram impetuosius irrueret, membranam distenderit. *Willis. Anat. Cerebr. c. 7. Vicissim p. 43.* Ab eâdem causâ dependet dolor capitis post vulnera capitis graviora sæpius vexans. Quamvis enim vulnera talia diu cicatrice sint obducta, tamen per intervalla exacerbatur capitis dolor, quia scilicet quædam vasorum ramificationes sunt omnino occlusæ, in quarum locum sanguis per alios tubulos magis obliquos sibi viam fecit, cumque hi non sint æque recti aut commodi, minima causa motum sanguinis intendens dolorem excitat.

Capitis re-  
frigeratio.

Contingit etiam sæpenumero cerebrum & caput refrigerari, unde affectus Catharrofi, Coryza & capitis dolor produ-  
cun-



cuntur. Nempe ubi à frigore vasa aliquomodo constringuntur, sanguis difficilius per vasa arteriosa minima circulatur, illique vim infert, unde pulsatio & dolor. Similis capitis dolor excitatur aliquando per consensum, si quis pedes habuerit valde refrigeratos, quandoquidem frigus illud sanguini, & ope sanguinis cerebro communicatur.

Postquam causas doloris capitis explicuimus, restat ut etiam hujus affectus descriptionem subjungamus, *Cephalalgia est molesta capitis sensatio imprimis a sanguine motu suo vasis & membranis exquisiti sensus vim inferente.* Cum dolor sit inter eas res, quarum clariorem habemus sensum & conceptum, quam qui ulla definitione explicari possit, sufficere arbitratus sum, si generaliori vocabulo sensationis molestæ uterer ad naturam ejus qualicumque modo explicandam. Differentia sensationis molestæ, cum ea à vulnere, ulcere, pruritu oriri possit, petenda est à causis hanc sensationem producentibus. Causa doloris capitis generalis est sanguinis motus, & hinc fere in omni capitis dolore molesta adest pulsatio, nunc major nunc minor. Imo quando partium solidarum vitium capitis dolorem producit, sæpe ideo is excitatur quòd sanguini circulaturo impedimentum aliquod objicitur, sanguinis motum progressivum in aliquibus ramis difficiliorem reddens. Ubicumque autem talis difficultas occurrit, statim eo loci solet excitari pulsatio molesta.

Dixi illum dolorem imprimis esse adscribendum sanguinis motui, quandoquidem sanguis est causa ordinaria & frequentissima capitis dolorum. Sunt tamen causæ etiam rarius occurrentes, & tamen Cephalalgias excitantes. Reperiuntur aliquando vermes non parvam molestiam inferentes, cujus exemplum & figuram exhibui. *Vide quoque Boneti Sepulchretum, Obs. 115. 116. 117. 118. 119.* Eodem modo caries ossium dolorem diuturnum infert aliquando & gravem, uti illud in lue Venerea est manifestum. Caries etiam locum habet aliquando post vulnus. *Vid. Boneti Sepulchretum Obs. 105. &c.* Aliquando humor virulentus intra cranii lancinas continetur. *Vid. eundem Obs. 102. item 106, 107.* Similes causæ plures dari possunt, verum hisce non putavi esse inhærendum, quandoquidem & rarius occurrunt, & facile intelligitur hasce causas do-

Cephalalgia descriptio verior.

Causæ doloris capitis minus frequentes.



lorem debere producere, cum non satis explicatum esset ab auctoribus, quomodo causæ ordinariæ agerent.

Vis illata  
Partibus exquisiti sensus.

Rationem addidi quare à sanguine in partibus exquisiti sensus excitetur dolor, sc. quia illis vis infertur. Probavimus antea non dari hic solutionem continui; neque enim paucarum horarum spatio vulnus infligitur, & absque ulla medicamentorum impositione sanatur. Nam addo non esse necesse adesse solutionem continui ubi adest dolor. Luxavit aliquis membrum quodpiam, nullo apparente vulnere, extenditur membrum luxatum validè & excitatur dolor insignis, quæ est ratio doloris? Non vulnus aut solutio continui, quia luxatio & vulnus toto cælo distant; sed violenta extensio partibus vim inferens. Dolores foeminam parturientem invadunt, an causa doloris est solutio continui? Minime quidem meâ sententiâ, quandoquidem loquor jam de prima invasione, antequam secundinæ separentur, antequam ullus maneat sanguis, est tamen dolor & quidem insignis: unde oritur is? A distensione violenta partium exquisiti sensus. Similis est ratio Colicæ, Pleuritidis, & hæc violenta distensio sufficit ad dolorem producendum. Dolor excitatus nos monet, ut caveamus ne incontinui solutionem aut graviora mala incidamus. Hæc enim est corporis nostri textura artificiosissima, ut quamdiu operationes & functiones naturaliter peraguntur, nullus excitetur dolor, imo aliqua inde exsurgat delectatio. Violentia, vis partibus illata, ope nervorum deferatur ad sensorium commune, atque sensum doloris excitat. Non est tamen existimandum dolores statim cessare, ubi violentæ istius distensionis vis definit. Quemadmodum quispiam defatigationis molestiam postridie magis sentit, quam in ipso exercitio, ita etiam in crapula dolor capitis sese postmodum magis manifestat. Causa tamen utriusque est vis partibus corporis nostri illata: vim intulit motus vehementior & aliquamdiu continuatus.

Sanguinis vis.

Quomodo sanguis vim auferat vasis in superioribus explicatum est. Tantum addendum est sanguinis vim esse majorem, quam vulgo sibi homines imaginantur. Numquid ea vis est eximia sanguinis, quod infantem exilem ad viri proceritatem faciat excrescere? Quod non tantum partes molles carnem, arte-



arterias, venas, sed & ossa in latitudinem & longitudinem vehementer extendat? Verum de hac re alibi fusius egi, sufficit observasse sanguinem, cujus tanta est vis, si præternaturaliter in partes teneras irruat, satis esse efficacem ad distensionem, pulsationem & dolorem excitandum.

Progredior ad explicandas capitis doloris differentias. Cephalalgia ratione causarum dividitur in eam quæ oritur vel à nimia pressione vel etiam à pressione imminuta, atque adeo sanguinis ad circulandum minori aptitudine. Hæc igitur vel pedissequa est Febris albæ & morbi virginei, vel Scorbuti, vel etiam aliarum partium vitii, imprimis ventriculi. Cephalalgia vel universum caput infestat, vel aliquas solummodo ejus partes, ideoque vel universalis vel particularis dici potest. Illa iterum est, vel cito transiens & generali Capitis doloris nomine exprimi solet, vel diu perseverans & Cephalæa dicitur. Particularis qui & partialis dici potest, vel exteriores partes capitis infestat vel interiores. Cephalalgia partes capitis exteriores affligens potissimum oritur quando arteriæ carotidis ramus exteriores ad pericranium dispersi afficiuntur, sc. quando sanguis per eorum ramulos circulandus, minus facilem inveniens transitum, vehementius illos distendit. Sæpe id accidit ob frigus externè susceptum, in coryza &c. Ita contingit illos, qui tempora emplastro aliquo calefaciente tegere sunt soliti, si quando illud negligant, corripì Cephalalgia. De Cephalalgia partes interiores & cerebri membranas occupante non est quod multa adjiciam, cum ea facile intelligatur ex iis quæ superius disputavi. Hæ duæ species in Cephalalgia universali complicantur.

Differentiæ  
doloris ca-  
pitis.

Particularis capitis dolor iterum dividendus est, quod sc. vel dimidiam ejus partem occupet, vel partem multo minorem. Quando dimidia pars afficitur tum dicitur Hemicrania, quando aliquod parvum spatium, cui dolor veluti infixus hæret, afficitur, dicitur Clavus: inter has duas species adhuc alia intermedia statui potest sc. quæ nec dimidiam capitis partem omnino, nec quæ spatium aliquod adeo exiguum instar clavi occupat, sed vel majus vel minus spatium. Ita Gabelcho-

Quotuplex  
sit dolor ca-  
pitis parti-  
cularis?



circa tempora. *Cent. IV. obs. 48. vid. quoque obs. 47. Cent. VI. 15.*

Transitio.

Actum fuit de Cephalalgia universali, jam illæ doloris species, quæ peculiari nomine gaudent, paucis explicandæ.

Cephalæa.

Cephalæam putem maxime affligere cacochymicos, vel hisce aut illis morbis particularibus, diuturnis tamen, obnoxios. Et enim prava hujus aut illius visceris dispositio, non tantum sanguinis dispositionem ad motum seu fluiditatem, sed & motum ipsum immutare potest. Quippe ubi sanguini aliquod occurrit obstaculum notabile, in hac vel illa parte difficultatem transitus efficiens, statim in universo corpore circulatio & pressio intenduntur. Illud apparet in inflammationibus, vulneribus, contusionibus, quibus febris vel major vel minor solet succedere. Itaque si prava sanguinis dispositio, si prava viscerum dispositio motum sanguinis intendant, si febriculæ lentæ diu affligentes pulsum frequentiore & sanguinis pressionem majorem producentes, excitentur, non mirum est si cerebri membranæ nimium distentæ doloris sensum ope nervorum ad sensorium commune deferant. Si sanguinis copia & cerebri vitium, aut capitis imbecillitas accedant, facilius, & frequentius & gravius affliget Cephalæa. Cephalæa quoque oritur sæpissime à conformationis morbis membranarum cerebri, vel etiam vasorum. Ita Carotides arteriæ induratae, aquæ collectio sub piâ matre, & arenula in glandula pineali post mortem repertæ sunt in cadavere Elizabethæ Joppen, à *Regnero de Graaf* dissecto. Vid. *Bonet. Sepulchret. obs. 88.* Vide quoque eundem *obs. 84. &c.* Cephalæa quoque oritur à calculo in cerebro nato. *Obs. 112, 108, 109. &c.* A nodis, tuberculis, phlegmone & abscessu oriri capitis dolores lethales auctor est *Willisus de Anima Brutorum p. 11. c. 2.*

Hemicrania.

Hemicraniae causam putem præcipuè à cerebri unius lateris, ejusque arteriarum dispositione pendere, unde etiam dolor alterum tantum capitis hemisphærium occupat. Hujus rei exemplum notabile superius è *Willeſio* allatum est. Itaque si alterius lateris arteriæ carotides vel vertebrales ita sint dispositæ, vel figuratæ, ut majorem sanguinis impetum excipiant, aut si alterum capitis latus sit valde refrigeratum, aut ita affectum, ut transmittendo celeriter sanguini sit minus idoneum, hinc



potest oriri Hemicrania. Hoc ut facilius intelligamus considerare oportet, quo pacto una pars corporis nostri non raro præ cæteris afficiatur. Ex. gr. hic pedibus est æger, ille lumine læsus, hic Pleuritide, ille colicâ affligitur. Erysipelas nunc manum, nunc caput, nunc pedem corripit. Nempe dolor & irritatio majoris affluxus spirituum & sanguinis causa est, adeo ut ad dolorem producendum in una parte potius quam in alia, sufficiat levissima causa transitum difficiliorem efficiens: hæc molestia extemplo ad cerebrum defertur, unde major affluxus spirituum, pulsus vel major vel frequentior, repletio & extensio vasorum dolorem producentes. Putabimusne non posse eodem modo cerebri partem dimidiam affici, incolumi permanente alterâ? Et hæc est causa quare Hemicrania gravius affligat, & difficilius cedat medicamentis. Ubi non tantum sanguinis major est affluxus, sed & partium solidarum prava dispositio non ita facilè causa morbi tollitur.

Eodem modo putem in ea capitis doloris specie quæ clavi nomine gaudet, glandulas aliquas cerebri à quacunque causa malè esse affectas, unde circa eum locum difficilior sanguinis progressus, gravitas, pulsatio & dolor oriuntur. Ubi partem aliquam instar palmæ manus occupat dolor, illud contingere observavi, quando à vulnere ea pars antea fuisset læsa, atque emplastrum eo loci impositum profuisse; hærebat nempe malum in partibus exterioribus. Clavus.

Faciunt Practici quoquè mentionem doloris capitis per essentiam, seu *ιδιοπάθειαν*, vel per consensum seu *συμπάθειαν*. Dolorem capitis per essentiam statuunt, quando materia dolorem excitans in capite est genita; per *συμπάθειαν* quando materia ad caput fertur. Verum si hæc stricte velimus intelligere, raro occurret capitis dolor idiopathicus, quandoquidem plerumque dolor oritur à sanguine qui in cerebro non est genitus. Ignorabant circulationem sanguinis adeoque non satis distinctè hæc potuerunt determinare. Dicemus ergo dolorem capitis idiopathicum eum, qui à capitis dispositione & sanguinis motu producitur. Per consensum autem quando partium in medio vel infimo ventre sitarum perversa dispositio, sanguinem male afficiens, causa est doloris



capitis. Est & alia doloris capitis species, quæ nocte potissimum luè Venerea affectos corripere solet, verum de ea hoc loco agere non est necesse, cum hujus explicatio à totius affectus explicatione pendeat. Non est necesse etiam specialioribus & rarioribus casibus immorari, tum quod de hisce iudicium ferri non possit, nisi omnibus circumstantiis diligenter expensis; tum quod Ideam praxeos scribenti ordinaria tantum pertractanda sint.

Signa.

Signa ex ipso ægrotantium relatu cognoscuntur. Quamvis enim multi reperiantur admodum stupidi, dolor tamen acutus querelas extorquere solet. Eos autem, quorum mens laborat, capitis dolore vexari non dicimus, quum perceptio doloris sit nulla; quamvis enim quis Apoplexia correptus ante paroxysmum conquestus sit de capitis dolore, in ipso paroxysmo advocatus medicus Apoplexiæ, non autem capitis dolori medicinam facere studet.

Signa causarum.

Causa autem Cephalalgiam produciens tum ex relatu tum è signis investigatur. Externas causas vel ægroti vel adstantes narrare solent. Febris signum est pulsus præter naturam frequentior, quo igitur hic est magis agitated, quanto major adest æstus, tanto graviolem esse febrem iudicamus. Febres etiam urinæ colore intenso sese prodere solent. Cacoehymicorum urinæ aqueæ & vix coloratæ sunt, sæpe etiam tenues & ad albedinem vergentes.

Signa differentiarum.

An caput doleat per idiopathiam, an vero per consensum exinde sciri potest, quod in dolore per idiopathiam nulla adsint signa viscerum malè affectorum. In dolore per consensum viscerum aliquorum malè affectorum signa attendenti fiant manifesta. Itaque ventriculi, uteri, hepatis malè affectorum signa, item & vermium ex propriis locis peti debent.

Prognosis.

Prognosis ita institui potest. Cephalalgia levior, ab externis tantum producta causis periculo vacat: vehemens autem cum capitis gravitate, à nimia sanguinis copia producta admodum suspecta est; Apoplexiæ enim aut Convulsionis prænuncia existit, uti mihi non semel videre licuit. Huc pertinet Hippocratis effatum in Coacis. Οἷσι κεφαλαλγίαι ἢ ἤχοι ἀπυρέτοισι, ἢ σκοτοδινίῃ, ἢ φωνῆς βραδύτης, ἢ νάρκη χειρῶν ἢ ἀποπλήκτες,



πλήκτες, ἢ ἐπιληπτικὰς προσδέχῃ τέρας ἔσεσθαι, ἢ ἐπιλήσμονας. Vid. *Duretum*. p. 89. Vide quoque *Aph.* 51. l. vi. De Cephalalgia in febribus excitata iudicium ferre oportet, diligenter consideratâ febris naturâ, & expensis reliquis circumstantiis. Quamvis crapula exhalare soleat, ebrietatem nonnunquam tamen excipiunt Convulsiones & mors repentina. Vide *Forestum* & *Schenkium*. Cephalæa plerumque non ita facile cedit, ut & Hemicrania. Clavus quidem molestus non tamen periculosus esse solet. Diarrhæa capitis doloribus super-veniens utilis.

Indicationes hujus affectus generales sunt, sanguinis pressio-  
nem nimiam compescere, progressum ejusdem per vasa capil-  
laria faciliorem reddere, cerebri vitia quantum pote curare,  
& dolorem mitigare.

Indicationes  
generales.

Curatio pro causarum varietate, variè instituitur. Si à ni-  
mia sanguinis copia oriatur Cephalalgia, si καρηλαρία adsit aut  
vertigo V. S. optimum est remedium. Nihil enim promptius  
& tutius nimiam sanguinis quantitatem imminuit quam V. S.  
Non nego inediâ & exercitio continuatis posse etiam minui  
sanguinem; verum sæpe periculum est in mora & nisi statim  
venienti morbo occurrat medicus, facilis in gravissima sym-  
ptomata est prolapsus. Hujus rei exempla animadversione di-  
gnissima refert *Galenus* in libro de V. S. adversus Erasistra-  
tæos Romæ degentes, quorum ipse fuit oculatus testis, quam-  
vis aliter sentientium pertinaciam frangere non potuerit. Vi-  
cit tamen veritatis vis, & pluribus seculis opinio absurda eo-  
rum, qui V. S. omnino damnabant, sepulta jacuit, donec à  
Chymicis, & præcedenti seculo ab iis, qui in eorum castra  
transierunt, revocaretur. *Willisus* habet exemplum, Cephalal-  
giæ à phlegmone & abscessu cerebri, estque hujus sententiæ,  
morbum ab initio forsan per phlebotomiam curabilem, post-  
ea lethalem evasisse. Vid. Ipsum *de Anima Brutorum* p. 11. c. 2.  
*Galenus* refert medicum quinquagenarium, cum jam septimam  
noctem ægrotaret, sibi ipsi venam incidisse, antequam amico-  
rum quispiam ad se veniret, & dolorem conquievissè. *Lib. XII.*  
*Meth. med. c. 1.*

Curatio per  
Venæ Se-  
ctionem.

In variis partibus pro causarum varietate instituitur V. S.

Ubi insti-



tuenda?

si nihil præter generalem evacuationem intendat medicus in brachio, neglecto venarum discrimine, eam institui jubet. Si mensium suppressio eandem flagitet, saphœna vel alia aliqua in pede vena pertundi solet. Si animus sit speciatim capiti prospicere, vena frontis pertusa opem non contemnendam præstat, uti mihi videre licuit in ancillâ sæpius gravi Cephalalgia dive-xatâ. Solebat huic vena frontis admodum esse tumida, id quod mihi occasionem præbuit eo loci V. S. imperandi.

Quomodo  
ea juvet?

Ratio autem quare V. S. juvet è superioribus est manifesta. Causa doloris nimia est repletio, nimia distensio vasorum. His itaque sublati, causa quoque doloris continens tollitur.

De Cucur-  
bitulis.

Venæ sectionis vicariæ sunt cucurbitulæ, non tam promptè quidem, nec tam commodè, attamen copiosè sanguinem extrahentes, si plures & sæpius imponantur. Harum usus est, quando quis à V. S. omninò abhorret, cucurbitulas non ita expavescit. Sunt enim quædam tali ingenio præditæ, ut V. S. nulla ratione admittant, à cucurbitulis minus alienæ. Cucurbitulas, *ut auxilium minus vehemens, ita magis tutum* dixit Celsus. l. II. c. II. Possunt applicari diversis partibus, scapulis, dorso, manibus, cruribus.

De Hirudi-  
nibus.

V. S. & cucurbitulis substituuntur quoque hirudines. Quamvis enim apud nos usus earum ferè exoleverit, in Hispaniâ tamen ad Cephalalgiam adhibentur cum insigni successu. Suctu enim illo videtur dolor quasi extrahi, & Cephalalgia magis magisque minui. Non solum exfugunt hirudines sanguinem in summa cute hærentem, sed & universum corpus evacuant. *Paræus* dixit eas non tantum à parte cui applicantur, sed & vicinis & distantibus attrahere. l. x. c. 62. Juvant non tantum eodem modo quam V. S. sed habent hoc peculiare, quod sensim & suctu sanguinem evacuent. Suctus autem ille sanguinem allicit versus eam partem, cui hirudines sunt applicatæ, adeoque impetus sanguinis, in Cephalalgia, nec non variis aliis capitis affectibus, majori vi versus superiora delatus, hoc modo à capite avertitur. Hoc monendum esse duxi, ut ratio levaminis, quod ab his animalculis percipitur, esset manifesta: & quid suctus posset animadverteretur. Qui sanguinis evacuatione blanda indigent, atque hisce uti voluerit, is successum inve-



inveniet non contemnendum. De hirudinibus disputantem non tantum in capitis, sed & aliarum partium morbis, vide *Zacutum Lusitanum* de medicorum principum historia l. i. h. 4. cujus hæc sunt verba : *Quo ferè pro topico utebatur antiquitas; nam post celebrata præsidia universalia, ad hoc tanquam ad sacram anchoram, veteres, necessitate quadam coacti, accedebant.*

Quantitatem sanguinis educendi medicus prudenter determinabit habita ratione ætatis, consuetudinis, virium, evacuationum suppressarum. &c.

Quantum sanguinis detrahendum?

Veram causam Cephalalgiae febres comitantis in superioribus esse explicatam, è juvantibus & nocentibus facile intelligitur. Adversus Cephalalgiam, quæ est symptoma febrium diversarum, multum juvat V. S. Cujus rei ratio est, quod nihil sanguinis pressionem nimiam & expansionem promptius compescat quam V. S. V. S. tempestivè instituta unico ictu non semel & febrem & capitis dolorem jugulavit. Itaque Medicus prudens, ubi ea requiritur, eandem non negliget. In quibus autem febribus sit secunda vena, in quibus non, è doctrinâ de Febribus, postmodum tradenda, evadet manifestum.

De Cephalalgia febrili.

Nimia sanguinis pressio etiam imminuitur, si causa eandem producat & ulterius productura tempestivè tollatur. Causa est nimia ventriculi repletio, & chyli particulis spirituosissimum onusti propulsio versus sanguinem, si dolor & *καρνηβασία* ab ebrietate oriantur. Itaque in hoc casu vomitorium exhibuisse utilissimum est, præcipuè si adsit nausea. Pulverem sequentem præscribit *Willisius*.

Ab ingluvie.

Rx. Sulphur Antimonii gr. iv.

Resin. Jalapp. gr. v.

Cremor. Tartar. gr. vj.

Simul terantur vel cum q. s. Conserv. Violar.

F. Bolus.

Ebrietatis à *Vini* sp. productæ comites sunt sopor, *καρνηβασία*, Lipothymia & sic porro, adeo ut tales videantur mox exspiraturi. In hoc casu prodest aquæ frigidæ potus aut acidulæ ubi eæ haberi possunt. Hujus rei exemplum, ut & curationis extemporaneæ historiam putem me alibi retulisse. De Ingluvie postmodum agam.

Ab ebrietate.

Ma-



Ventriculi  
& Cerebri  
consensus.

Magnus ventriculi cum cerebro est consensus. Non quod cæca sit inter has partes sympathia, aut quod vapores è ventriculo sublatis condensentur in capite tanquam alembico; sed quod cibus malè subactus chylum exhibeat crudiores, qui sanguini commixtus & rarefactus cerebri vasa nimium extendit, minus commodè capillares tubulos permeat, nec adeo vividos producit spiritus animales: accedit quod cerebrum sit viscus molle, copiosissimo sanguinis affluxu irrigatum, unde non mirum si ventriculi debilioris, & sanguinis minus subacti noxam luat. Ergo si nimio onere gravatus ventriculus molestiam pariat, promptè evacuandus est. Id aliquando succedit assumendo aliquid *spiritus vini* in non assuetis; ita enim ventriculus ad excretionem per superiora excitatur, aliquando etiam, præsertim si nausea adsit, vomitorium lenius exhibere convenit; ita enim citissimè causa mali tollitur. Atqui illud in universâ praxi diligenter tenendum est, ut, juxta Hippocratis præceptum Aph. 21. l. 1. *natura eo ducatur quo maxime vergit, & per loca convenientia*, ne scilicet perperam in usum vocentur medicamenta. Frustra enema capiti externè applicatur, cum podici injici debuisset, id quod aliquando rusticum fecisse memoriæ proditum est. Frustra capiti prospicitur si ventriculus nimio oneri succumbat. *Gabelchoverus* in dolore capitis per consensum ex stomacho præscripsit Rad. Mech. pulv. ʒij cum insigni successu. Cent. 1. Obs. 86. *Theodorus Majerne* præscribit *Vitrioli albi* ʒj dissolvendam in Ptisana vulgari ʒiv vel ʒvj. & post singulos conatus exhibet haustum posseti parati cum *Floribus Chamæmeli*.

Purgantia  
aloëtica.

Quod si minus tuto possit exhiberi vomitorium, purgantia etiam sunt usus egregii præcipue *Aloëtica*, quorum amaror ventriculo est amicus. Itaque conveniunt *Elect. Hieræ pieræ*, pulv. *Hieræ Galeni*, *Pilulæ Mastichinæ*; *Russi*, *Hieræ cum Agarico*, *Pilulæ Crapulares* in *Pharmacopoea Bateana* descriptæ. Ex.gr.

℞. *Mass. Pilul. de hier. c. Agar.* ʒss

*Trochisc. Alhand.*

*Diagrid. ad gr. ij*

*Cum El. prop.*

*F. Pilulæ. no. v.*

*Ma-*



Majerne præscribit

℞. *Mass. Pilul. Coch. minor.* ʒß

*Calomelan.* ʒj

*Ol. Roris mar. gr.* ij.

*F. Pilula pro I dosi.*

Pressio sanguinis nimia à radiis solaribus & exercitio plerumque negligi solet, quum illa quiete & somno facile superetur, nec diu affligere soleat.

Dolor capitis à radiis solaribus.

Progressus per vasa capillaria redditur facilius si pressio imminuatur, si dispositio sanguinis inflammatoria superetur, si sanguis reddatur satis fluidus.

Progressus sanguinis per vasa capillaria quomodo reddatur facilius?

De pressionis imminutione in superioribus est actum, hic tantum monendum est, faciliorem effici transitum si pressio sufflaminetur, quandoquidem ideo molestia & dolor percipitur, quod pressio à tergo sit major, quam ut satis promptè vasa minima permeare possit sanguis, hinc distensio, pulsatio, dolor.

pressionis imminutione.

Inflammatoria dispositio sanguinis emendatur V. S. diluentibus, sudoriferis temperatis.

Inflammatoriæ dispositionis emendatione.

Venæ sectionem in dispositione inflammatoria multum emolumentum afferre in Pleuritide, Peripneumonia & similibus morbis patebit, adeoque hic indigitasse sufficit. Tanta est V. S. necessitas, ut ea non uno nomine conveniat, pluribus satisfaciat indicationibus.

Venæ sectione.

Diluentia, serum sanguinis ad gelatinæ consistentiam inspissatum, iterum ad priorem liquiditatem reducunt. Talia sunt aquea omnia, Cerevisia recens & tenuis, Apozemata atque Julapia, quorum basis est aqua. Cum enim aqua numquam sola coctione inspissetur, illa, hoc modo inspissata, diluere potest. Diluentia hæc simul æstum temperant, qui plerumque insignis est in dispositione inflammatoria.

Diluentibus.

Sudorifera temperata ad sanguinis illam dispositionem corrigendam multum valent: id quod ex eo manifestè colligitur, quod post sudoris blandam eruptionem omnia symptomata soleant esse mitiora. Non conveniunt quælibet sudorifera, quandoquidem ea quæ ex aromaticis, magna copia congestis, constant, magis obesse solent, & dispositionem illam inflammatoriam magis intendere. Itaque conveniunt, *Aq. Alexphar.*

Sudoriferis.

D

Pro-



*Prophylact. Acetum Sambucinum, Sal. Prunella, Absinth. Tartar. Card. Bened. Antimon. diaphoret. Antifebrile Concharum, Decoctum Ambrosianum, Decoctum ad sitim, Pharmac. Bat.* Ad sudorem melius movendum hisce medicamentis commodissimè & utilissimè adduntur *opiata*; etenim ægro à jactationibus continuis abstinente & quietè somnum capiente optimè ac copiosissimè sudor erumpere solet. Verum de his omnibus in sequentibus ex professo erit agendum.

Sanguinem  
fluidum  
reddenti-  
bus.

Sanguis redditur fluidus, si in usum vocentur aquea, incidentia, attenuantia medicamenta, circumstantiarum diligenti habita ratione. Conveniunt hic imprimis *Cichoracea, Sonchus, Taraxacum*, deinde *acetosa, acetocella, trifolium acetosum*: *Lapis prunella* hoc in casu etiam egregiè prodest, ut & potus *Thee* cujus jam ante facta est mentio. Dum hæc usurpantur danda est opera, ut alvus fervetur aperta. Quandoquidem autem in morbis inflammatoriis non semper tuto usurpantur purgantia, insistendum mitioribus. Talia sunt primas vias evacuantia, clysteres, suppositoria, medicamenta blandè laxantia. Hæc prudenter in usum vocari & subinde repeti debent.

De Curatio-  
ne Morbi  
virginei.

Alia autem ratio est sanguini fluiditatem conciliandi, quando virgineo morbo aut scorbutico quis affligitur. In hoc enim casu non tam aqueis, quam aromaticis, incidentibus, sale volatili abundantibus est utendum, præmissis universalibus, uti loquuntur medici.

Univer-  
salibus. V. S.

Universalia hic præmittenda sunt V. S. & purgatio. Venæ sectio non semper est instituenda, itaque attendere oportet, an evacuationes solitæ sint suppressæ, & an insignis adsit plethora, an vires satis constant? tum enim instituenda est V. S. alias eam omittere oportet.

Emeticis.

Purgatio vel per superiora procuratur, vel per inferiora. Per superiora excitatur *Vino Emetico*, vel *Aqua Benedicta Rulandi*, vel etiam *Tartaro Emetico*, &c.

Purganti-  
bus.

Per inferiora purgantia sunt etiam non contemnendi usus, imprimis si talia eligantur quæ simul incidunt & attenuant. Talia sunt *pilule de Ammoniaco magistrales* Pharmac. Bat. p. 79. item *Pilule Pavii, Pilule de Sagapeno, Pilule Cephalicæ Fernellii*, quas ipse miris modis in Cephalalgia laudat. *Willisus* sequentes



quentes commendat :

℞. *Pil. de Succin.* ʒß.

*Resin. Jalapp.* gr. iv.

*Balsam. Peruvian.* q. s.

*F. Pilulas* no. iv. *sumat* iij.

Apud *Minsigtum* exstat descriptio *pilularum Cephalicarum*, quibus se sæpe usum esse in Aula Cæsareâ testatur *Hoeferus*. Idem quo tempore sumendæ sint pilulæ disputat; verum meo judicio hora sumendarum pilularum non potest exactè determinari: possunt illæ & manè & meridie & vesperi commodè usurpari: medicus judiciosus facile tempus determinabit habita circumstantiarum ratione. Nec sufficit semel exhibere medicamentum aliquod laxans, sed id data occasione est repetendum. Quemadmodum alvi fluxus capitis dolorem aliquando tollit, ita etiam purgantia multum profunt.

Alvus  
aperta est  
servanda.

Præmissis igitur universalibus non negligenda sunt incidentia. Locum hic habent imprimis *Cephalica*, *Stomachica*, *Uterina*, *Antiscorbutica*, *Chalybeata*, *Salia Volatilia*, *Olea aromatica*. *Elixir vitæ majus & minus Quercetani*, *Aqua Cephalica Bateana*, *Aq. Theriacalis* tam simplex quam composita. *Tinctura Succini*, *Castorei*, *Croci*, *Elixir. prop. Sp. Vini succinatus*. Formulæ variæ ex hisce addito convenienti vehiculo facillimè concinnari possunt. Ex gr.

Incidentibus.

℞. *Aq. Puleg.* ʒiij

*Menth.* ʒj ß

*Theriacal. f.* ʒj

*Tinctur. Castor.* ʒij

*Sal. Volat. ol.* g. xv.

*Land. op.* gr. j.

*Ol. Cort. Arant.* g. v.

*M.*

Hujus mixturæ sumat subinde æger duo cochlearia.

*Rhusnerus* Observ. i. commendat hunc pulverem

℞. *Castor* ʒij. *Puleg.* ʒj. *Cinnamom.* ʒß

*Caryophyllor* ʒj. *F. Pulvis*

qui detur ex jusculo carnis præmisso purgante.

Utilis quoque est *Haustus à Grulingio* præscriptus.

D 2

℞. *Syr.*



℞. *Syr. Pomor. Borstorph.*  
*de Fumar. ad ʒß*  
*Sp. Cochlear.*  
*Nasturt. ad ʒß*  
*Tartar. rectific. ʒj*  
*Aq. Violar.*  
*Borrag.*  
*Capill. Vener. ad ʒj*  
*M.*

Quamvis enim ea, quæ de bile, pituitâ, melancholiâ in capite alteranda habet, sint frivola, hoc medicameotum tamen non est contemnendum.

Cerebri vitia quomodo corrigenda?

Dixi etiam cerebri vitia quantum pote esse corrigenda; neque enim hæc unius sunt generis. Reptatus vasorum diversus quemadmodum è certis signis cognosci non potest, ita etiam curationem non admittit. Eadem fere est glandularum induratarum ratio, nisi quod medicamenta incidentia modo laudata possint esse alicujus usus. Si autem refrigeratio difficiliorem progressum sanguinis aut Cozyram produxerit, ea calefacientibus expugnanda. Utile in hoc casu est suffimigium è *Succino, Mastiche, Gariophyllis, Styrace, Benzoino*. Ex. gr.

℞. *Succin. alb. ʒj*  
*Mastiches elect. ʒj*  
*Benzoini. ʒß.*

*F. Pulvis grossus.*

Laudem meretur etiam in hoc casu *Aqua Regina Hungaria* dicta, à Medico vel etiam Pharmacopæo, lucri parum studio, dextrè præparata. Est hæc in Cephalalgia eximii usus, si ve naribus admota, aut etiam attracta, si ve etiam temporibus applicata. Est enim *Rosmarinus* planta cephalica, sanguinem attenuans, refrigeratas partes calefaciens, spiritus animales excitans. Quod si Cephalalgia oriatur, vel saltem foveatur à colluvie serosa ventriculos cerebri replente, sternutatoria mitiora è plantis cephalicis parata multum profunt. Ex. gr.

℞. *Fol. Majoran.*  
*Rorismarin.*  
*Thymi. ad ʒj*

*Fl.*



*Fl. Lil. conv. 3ß*

*F. Pulvis.*

Ubi Cephalalgia à partibus externis malè affectis originem habet, iis imprimis est prospiciendum; si caput fuerit minus tectum, & frigus susceptum, partes constringens, transitum sanguinis reddat difficiliorem, caput modicè tegendum est, adeo ut frigus superetur. Utimur varii generis & variæ formæ tegumentis: ea quæ ex lana conflata sunt frigus magis arcent. Utile quoque est fasciâ aliquâ lata, aut tegumento capitis apto blandè constringere caput; ita enim non tantum fulciuntur partes & vasa, sed & extensio & pulsatio vasorum aliquomodo reprimitur, adeoque dolor sedatur. Si tempora nuda huic malo occasionem præbuerint, emplastra iis sunt imponenda calefacientia. In eum finem laudantur *Mastiche*, *Gummi Tacamahacæ* cum *Ol. Gariophyllorum*. Utile quoque est *emplastrum Catharrhale* in Pharmacopœâ Bateanâ descriptum.

Externa in  
usum vo-  
canda.

Quod si hæc non sufficiant, Cucupha è cephalicis parata vertici imponatur. Commode adhibentur *Rad. Ireos Flor. Fol. sicc. Majoran. Calamenth. Origan. Thymi, Rosæ rubræ, Cort. Winteran. Mastix, Garyophilli*. Valet etiam multum pellis Talpæ vertici imposita, & ubi madida reddita est, renovata.

Cucupha.

Dolor sedatur hypnoticis & narcoticis intra & extra usurpatis, nec non medicamentis variis externis tum blandioribus, tum etiam acrioribus.

Hypnoti-  
ca.

Imprimis oportet cautum esse medicum in exhibendis hypnoticis & narcoticis ubi caput male affectum est, ne ægrotum in graviora conjiciat mala. Si æger ergo sit Comatosus, vertigine aut *καρῆλαρία* affectus, non temere sunt exhibenda narcotica, ne in Lethargum aut Carum incidat ægrotus. Si autem vigiliæ simul infestent, si universalis sufficienter sint usurpata, si vires constent, si nec puer nec senex sit ægrotus, tutius in usum vocantur. Conveniunt *Emulsio è semine & Syrius è Cortice papaveris albi decoctus. Laudanum opiatum, Tinctura Opii, Pilula pacificæ, Laudanum cydoniatum.*

Cautela.

Externe temporibus linimentum inungitur ad dolorem sedandum. Concinnantur quoque Frontalia, & oxyrrhodina & fronti imponuntur ad dolorem leniendum, & somnum con-

Externa  
hypnotica.



ciliandum. Laudantur in hunc finem *Unguentum Alabastrinum*,  
*Popul. Unguentum Cephalalgicum Bateanum*.

℞. *Unguent. Popul.* ℥j  
*Opii Thebaic. Ol. Solan. dissolut.* gr. v.  
*Caphura.* gr. iij

M. inungat tempora ager.

Verbena.

Inter medicamenta externa ad capitis dolorem imprimis  
 laudatur *verbena*. Hanc herbam è collo suspendi jussit *Forestus*,  
 ego malim nuchæ applicari: applicatur quoque nuchæ splen  
 recens mactati animalis calens ex. gr. ovis. Eodem modo  
 usurpantur radices *Pastinaca domestica* raspatae & aceto subactæ.

Supplanta-  
 lia.

Pedibus quoque varia subligantur, ex gr. *Tinca viva media*  
 dissecta sanguinolenta plantis pedum subjicitur. Item *halec*  
*salitus*, & *passer*. Eodem modo *columba viva* dissecta pedibus  
 applicatur.

Frontalia.

Superius mentionem feci frontalium somnum provocan-  
 tium, verum eadem possunt in usum vocari non addendo opia-  
 ta. Hujus generis talem habet formulam *Timeus*.

℞. *Aq. Rosac.* ℥iij  
*Verben.* ℥jß  
*Succi Rosar. rubr.* ℥j  
*Acet. Rosac.* ℥ß  
 M.

Sequens fatus est *Fernelii*

℞. *Aq. Plantag. Rosar.*  
*Solatr. aa* ℥ij  
*Aceti.* ℥jß  
*Caphur.* ℥ß  
 M.

*Gabelchoverus* refert se ægrotum unum atque alterum resti-  
 tuisse *Usu pilul. aur. Div. & seq. Epithematis*.

℞. *Aq. Betonic.*  
*Verben. Fl. Chamom. ad* ℥ij  
*Ol. Rosac.* ℥iv  
*Aqua & aceti. Rosac. ad* ℥j  
 M.

Applicatur quoque fronti *placenta rosacea*, quæ aceto irrorari  
 potest vel *Calendula* vel *Rutaceo*. Ab-



Absolvimus indicationes superius propositas, tum ne à consueto tramite discederemus, tum ut confirmaremus explanationem à nobis propositam. Nulla enim major datur probatio veritatis sententiæ cujuscunque, quam si ea inveniatur exactissimè quadrare cum praxi quotidiana. Verum cum causæ cephalalgiae admodum variæ sint, difficile est junioribus scire qua methodo singulis hisce indicationibus sit satisfaciendum. Etenim si quis sibi imaginetur singulis hisce indicationibus seorsim, & eo, quo propositæ sunt, ordine esse satisfaciendum, is longè fallitur. Nam & pressio imminuitur, & inflammatoria dispositio tollitur, & sanguis redditur fluidior eadem formulâ. Nempe idem medicamentum, & diluere, & æstum temperare, & sudorem movere potest, & tum maximè prodest medicus ægroto, quando judiciose unicâ formulâ pluribus satisfacit indicationibus. Eodem modo non est tum demum confugiendum ad medicamenta externa, quando medicamenta interna omnia sunt in usum vocata, sed simul dum interna usurpantur etiam externa adhibentur. Ex gr. versatur aliquis in paroxysmo febrili orto, ex dispositione inflammatoria, fitit, caput dolet, eodem tempore exhibetur ex. gr. Haustus sudoriferus, præscribitur decoctum diluens, sanguinem fluidum reddens, & sudoriferum: pedibus subjiciantur supplantalia. Ut ergo hæc idea praxeos junioribus possit esse majori usui, consultum duxi in quibusdam casibus specialibus docere, qua ratione hæc in usum vocari debeant.

Applicatio  
præcepto-  
rum specia-  
lis.

Ponamus igitur medicum vocari ad ægrum laborantem tertiana vernali, cui comes est levior Peripneumonia, cum siti, æstu, *καρνηλαρία*, in ipso paroxysmo ante administrata aliqua medicamenta. Quid aged?

Curatio  
*καρνηλαρία*  
febrilis.

Nihil hoc in casu est utilius V. S. verum ea differenda est usque dum paroxysmus remittat vel intermittat, itaque statim in usum vocabit diluentia & blanda sudorifera, omissis opiatibus eo usque dum fuerit secta vena, & pedibus subjiciet supplantalia. Itaque exhibeat hos vel similes pulveres.

In paro-  
xysmo.

℞. *Antimon. Diaphoret.*

*Ocul. Cancr. ppt.*

*Lapid. Prunell.*

*Flor.*



*Flor. Papav. errat.*

*Sacchar. perlar aa. ʒß*

*F. Pulvis, pro ij dosibus.*

Ut sitis restinguatur, ut simul medicamentum sudoriferum vehiculo gaudeat, præscribatur vel julapium vel tale Apozema.

*℞. Rad. Scorzonera ʒj*

*Althea recentium ʒß*

*Fol. Tussilag.*

*Scabiosæ*

*Taraxaci cum toto. ad m.j*

*Flor. papav. errat. p.j*

*Coq. f. a. ex aq. pura colat. ʒj Add.*

*Syr. Violac. f. ʒj*

*Lapid. Prunell. ʒj.*

*M.*

Vides in uno medicamento & diluentia, & sudorifera, & sanguinem fluidum reddentia simul jungi. Sub finem paroxysmi statim injiciatur Enema hoc vel simili modo præparatum.

*℞. Decoct. Emollient. & Carminant. ʒx*

*Elect-Diacathol.*

*Diaphoenic. ad ʒj*

*Sal. com. ʒj.*

*M. F. Enema.*

Extra Pa-  
roxysmum.

Finito paroxysmo, rejecto enemate, & ægroto paululum recreato secetur vena, & sanguis educatur, ratione habita ætatis, virium, temporis anni, fatis copiosè; morbi enim inflammatorii uberiores requirunt evacuationem. Si prima vice non satis copiose sit eductus sanguis, repeti potest V. S.

Post V. S. æger reficiatur aliquo leviori juscule cum Endivia &c.

Tum ratio haberi debet instantis paroxysmi, & præscribi iterum & sudorifera febrifuga dicta temperata, non neglectis opiatibus, imprimis si tussicula vexet. Itaque Præscribi potest hæc aut similis mixtura

*℞. Aq. Hyssop. ʒij*

*Fenic. ʒj.*

*Prophylact. ʒij*



*Oc. Cancr. ten. pulv.* ʒß

*Cremor diaphoret.* ʒj

*Land. op. gr.* iij.

*Syr. Papav. errat.* ʒß

*M.*

Hujus mixturæ sumat subinde duo cochlearia. In paroxysmo, nuchæ applicetur splen ovillus, ad sitim sedandam utatur Apozemate præscripto.

Declinante morbo & signis concoctionis apparentibus in urina, semel atque iterum purgetur vel infusione è *Sennâ* & *Rhabarbaro* vel hoc similive haustu. Declinante morbo.

*Rx. Elect. Cholagogi Sylv.* ʒijß

*Cremor. Tartar.* ʒß

*Aq. Hyssop. q. s.*

*M. F. Haustus.*

*Gabelchoverus* in capitis dolore pestilenti præscripsit

*Rx. Pilul. Coch.* ʒj.

*Spec. de Hiera picr. Gal.* ʒij

Cum aq. Euphrag. F. Pil. xv. deglutiat cum *Syr. Ros. sol.* Lavabat pedes decocto *fol. & fl. Euphrag. Verben. Orig. Absinth. Serpill. Betonic.* Venam secabat in pede cephalicam, & æger convaleuit. *Vid. Cent. 11. Obs. 81.* Ego tamen in hoc casu prætulifsem infusionem blandam.

Si ab ebrietate orta fuerit Cephalalgia, ea abstinencia, potu *Thee*, & spiritu *Sal. Armon.* optime tollitur, ut & somno. Quod si ingluvies accesserit, & anxietates magnæ vexent, ut & nausea, vomitorium blandum exhiberi poterit. *Gabelchoverus* laudat vomitum in iis qui facile vomunt: præscripsit Potiunculam quæ *Cent. 111. obs. 72.* videri potest. Si Convulsiones comitentur eorum habenda ratio, ut docebitur. Vide hac de re Hippocratem *lib. 11. de morbis XXI 1.2,3,4. &c.* Ventriculo sufficienter evacuato ciborum euchymorum & eupeptorum, nec non vini assumptio moderata iterum prodest. Subita mutatio periculosa. Cephalalgia à repletione.

Atque hæc dicta sufficiant de ea Cephalalgia specie quæ oritur à nimia sanguinis pressione, superest ut de alia etiam specie agamus quæ oritur à minori pressione adeoque hanc consequente

*Curatio Cephalalgia à minori pressione.*



te sanguinis lentore. In hoc autem morbo non est quod de methodo curandi multum simus solliciti, cum non sit morbus acutus, sed chronicus, in quo pro circumstantiarum varietate curatio etiam variat. Si à suppressis menstruis ortum habeat malum, in pede statim prima quoque occasione instituitur venæ sectio. Si alvus satis sit laxa, non opus est exhibere purgans, pulvis chalybeatus optime conveniet.

℞. *Limatur. chalyb. puriss. vel etiam*  
*Chalyb. juxta methodum Quercetani*  
*ppt. ℥ss*  
*Sem. Apii. ʒj ss*  
*Macis ʒij*  
*Cort. Winteran. ʒj*  
*M. F. Pulvis.*

Sumet singulis matutinis temporibus dimidium cochleare cum vino. Si somnus non sit sufficiens, loco medicamentorum opiatorum, quæ in hoc casu non admodum amo, potest assumi *Orvietanum*, *Mithridatium*, *Theriaca Androm.* sub horam somni.

*Pilulis.*

Quod si fluxus albus simul vexet frequenter purgandum cum Mercurialibus.

℞. *Mass. Pilul. Mastich.*  
*Mercur. dulc. aa. ʒss*  
*Trochisc. Alhaud. ʒss*  
*Cum Tinctur. Croci.*  
*F. Pilul. no. xij*

*pro iij dosibus.*

*Decocto è*  
*Lignis.*

Interim usurpari potest decoctum è lignis, in fluxu albo majoris usus quam medicamenta adstringentia.

℞. *Rad. Sals. parill. ʒij*  
*Rasur. Lign. Guajac. ʒvj*  
*Lign. Sassafras. ʒj*  
*Liquerit. ʒij*

*Post debitam infusionem Coq. s. a. ad LXXX.*  
*colatura detur pro Decocto.*

*sumat ter de die ʒvj & amplius.*

*Medica-*  
*mentis*

Dum hæc fiunt capiti est prospiciendum, & imponenda  
*pel-*



*pellis talpa* vertici, vel *Cucupha*, vel *Frontale* causam morbi re-  
spiciens: externum frigus imprimis vitandum est. externis.

Progredior ad Cephalæam affectum incommodum & diffi-  
cilem, quippe huic malo obnoxii facile è leviori causa exter-  
na in novum paroxysmum incidunt, qui non ita facile tolli-  
tur. Quod si corporis constitutio sit pituitosa, si pressio &  
comminutio sanguinis imbecillior & minor, si consuetæ eva-  
cuationes sint suppressæ, eodem modo procedere oportet ut  
mox innuimus. Quanto autem constitutio difficilior expu-  
gnatu est, tanto diligentius in id incumbere debet Medicus, ut  
omnibus modis succurrat laboranti, & eligat medicamenta  
maxime efficacia. Locum hic habet *Hartmanni* monitum.  
*In Cephalæa seu doloribus capitis quibuscunque imprimis usus Aqua  
benedicta ventriculo jejuno statâ dosi exhibitæ multum prodest. Ga-  
belchoverus* hæc præscripsit pilulas.

Rx. Pil. Coch. ʒj

Aur. ʒj

Troch. Alhand. gr. iv.

Cum aq. beton.

F. Pilulæ xv. quas deglutiat cum ʒvj

Syr. Ros. sol.

Examinandum etiam num aliqua fraus lateat; deluditur enim  
aliquando medicus. Vocatus ego sum aliquando ad virginem  
fatis sanam, assidue sese lecto continentem, quandoquidem  
capite erecto sese sedere posse negabat. Urina sanorum erat  
similis, pulsus fatis moderatus, nisi quando in eo esset ut in-  
sultus majores simularet; tum enim vel respiratione cohibitâ,  
vel animi pathemate forsan, pulsus aliquomodo immutaba-  
tur. Cum ego fraudem suspicarer, jussi ut etiam alvi excre-  
menta fervarentur, quorum inspectio me confirmabat in  
meâ opinione, sanam hanc simulare morbum. Excrementa  
enim alvina naturalis constitutionis erant, bene figurata, co-  
lorata, non compacta, quemadmodum illud in morbofis ob-  
servari solet: ut paucis absolvam, sanorum excrementis quam si-  
millima. Hæc plurimos medicos consuluerat, sed, ut illa  
dictitabat, absque ullo successu; verum postea sponsum &  
maritum nacta à querelis abstinuit, pulchra prole facta parens.



Similem mihi historiam ex aliorum relatu intelligere licuit. Vidi ego imposturam longe magis impudicam, quam referre non est hujus loci. Oportet ergo medicum esse cautum, quandoquidem imposturis aliquando deluditur. Inspectio facum alvinarum magni est usus in tali casu, quæ si debito modo habeant, & alia signa respondeant, fraus animadverti potest.

Amplius  
de Cepha-  
læa.

Ut ad Cephalæam revertar. Ego putem in affectione hac diuturna, aliquando non inveniri debitam proportionem inter sanguinem, per minimos arteriarum ramusculos circulandum, & fibrillas ipsas. Nempe si sanguis movendus non sit satis fluidus, & facile expansioni obnoxius, fibrillæ autem vasorum admodum exiguæ, non est mirum si à levi causa facile ingruat Cephalæa. Examinandum igitur num plethora adsit? Num solitæ evacuationes suppressæ? Num vitam sedentariam agant ægroti? Num vertigo infestet? An palpitationes cordis cum difficili respiratione & pectoris oppressione vexent? Etenim causa morbi ritè animadversa facilius evadit curatio. Ad fibrillarum dispositionem autem & sanguinis proportionem quod attinet, quamvis illa prima fronte videatur naturalis, & correctionem respuere, attentius tamen mihi hac de re cogitanti subiit, posse forsan industria etiam constitutionem hanc aliquomodo emendari. Nempe videmus opifices sub die, sole fervente vehementer corpus exercere ad sudoris copiosam eruptionem, nec tamen conqueri de capitis dolore. Si vitæ eorum genus consideres, vescuntur cibo multo, difficilioris concoctionis, & sæpius robusti sunt, atque athleticè valent. Videtur mihi à veritate non esse alienum minimos arteriarum ramusculos, à continua & vehementi pressione sanguinis, particulis crassioribus & solidioribus constantis, extendi & ampliari, adeo ut sensim assuescant transmissioni talium particularum, atque illis reddantur magis proportionati. Posset ergo remedium esse eximium adversus Cephalæam, si exercitio majori corpus sensim assuescat; ita enim sanguinis particulæ minus comminutæ magis attererentur, & cerebri vascula evaderent magis apta transmittendo sanguini. Illud autem subito fieri non potest absque insigni incommodo: omnis subita mutatio est periculosa, & sæpe noxia.

In



In Hemicrania non tantum sanguinem respicere oportet, sed & cerebri ipsius dispositionem. Commendant quidam arteriotomiam in temporalibus. Hac hemicraniam desperatam esse curatam refert *Paræus l. xvi. c. 4.* eandem laudat *Riverius l. i. c. 16.* Verum cum ea afferri videam, quæ cum experientiâ pugnant, dubitare liceat, an ii qui arteriotomiam ita celebrant, eam institutam viderint. Dicunt enim sanguinem cum impetu & saltu profilire, nullum in ea esse periculum, ac per quatrimum deligationem esse detinendam. Cum impetu sanguinem profilire novi, cum saltu sive subsultim nego, ubi tantum paucæ unciae detrahuntur: illud tantum contingit ubi sanguis universus ferè est exhaustus. Hæc vera esse hisce oculis ego met vidi. Nullum esse periculum ex arteria in temporibus secta, hætenus non observavi. Tractavi aliquando vulnus in temporibus cum duobus chirurgis, ubi arteria erat læsa. Cohibitus quidem erat sanguis, verum hæmorrhagia semel atque iterum, & quidem post plures dies cum summo vitæ periculo, recrudit. Donec tandem, non sine magno molimine, sanguis omnino cohiberetur, & vulnus ad cicatricem perduceretur. Sanguinis emendatio perficitur eodem modo, quemadmodum in superioribus est explicatum. Conveniunt hic quoque *decocta Lignorum*, quemadmodum in multis aliis affectibus capitis. Hoc tempore quo hæc scribo est mihi ægra tremore divexata, quæ etiam è tali decocto magnum sensit juvamen. Cum autem tam commodè venæ sectione sanguis evacuari possit, non est quod ad arteriotomiam confugiamus. Post detectam circulationem sanguinis novimus venas non posse sanguinem effundere, quin simul arteriæ depleantur. *Constitit nulli via nota magno.*

De Hemicranîâ.

Si ventris infimi affectus jungantur, illi etiam respiciendi. Conveniunt quoque *olea stillatitia Succini, Juniperi, Cortic. Arantiorum* sanguinem attenuantia adeoque transitum promoventia, & internè in parva quantitate & repetitis vicibus, externè nuchæ aut temporibus inuncta. *Franciscus Joël Euphorbium* cum aceto vini levigatum, & in formam *linimenti* redactum, dolentique parti capitis illitum hemicranîæ multum auxiliari testatur.

Infimus venter respiciendus.



tur. Commendat hic plura externa remedia quæ suis utilitatibus non carent, & apud prædictum auctorem videri possunt. *Gabelchoverus Fol. Absinth. m. ij. Rad. Bryon. ℥j* decoquit in aqua, novam spongiam illi intingit & loco dolenti sæpe applicat. Inde æger se inungit *Unguento Alabastrino*, non neglecta lotionem pedum è *Fol. Serp. Orig. Fl. Chamom. Beton. aa. m. j. Baccar. Junip. m. β. sem. Carui. zij.* & refert ab horum remedium administratione dolorem mox cessasse. Ego imprimis commendo folia *Tabaci Brasiliæ* naribus partis affectæ immissa; ita enim non tantum serum copiosum è naribus elicitur, sed aliquando in non assuetis vomitus concitatur, in Hemicrania insignis usus. Crediderim etiam profuturum, si vesicatorium temporibus & quidem lateris affecti applicetur. *Epithema Lotichii* vide capite sequenti.

Opiatorum  
Usus &  
abusus.

Ubi, reliquis medicamentis parum proficientibus, perseverat capitis dolor, ad *opiata* confugere oportet; verum cautè, uti jam monui. Multi enim opiata non ferunt, cujus rei rationem mihi inquirenti, non alia major occurrit quam plethora insignis, & morbi inflammatorii ante celebratam V. S. Loquor jam de ægrotis quibus vires constant; nam viribus attritis ægrotos facile in Carum præcipitari, notissimum est. Quidam etiam opiata non ferunt propter particularem solidorum partium constitutionem; ita ego tractavi ægrotam capitis dolore molestissimo vexatam, quam ego crediderim à suppressione vel pariori mensium fluxu laborasse vasorum in cerebro nimia dilatatione. Quemadmodum ergo semper, ita in hoc casu medici prudentia & iudicium requiritur.

Clavus.

Ea quæ de Hemicrania dixi etiam in Clavo locum habent. Nempe præter universalia, topica medicamenta in usum sunt vocanda. Locum hic habet sacculus à *Framiseo Joële* præscriptus :

℞ *Serpilli*  
*Pulegii*  
*Betonie.*  
*Majoran.*  
*Verben.*  
*Fol. Lauri*

*Sissim.*



*Sisimbr. aa. m. j*

*Flor. Chamemili*

*Melilot.*

*Anethi aa. m. ß.*

*Concisa* insuantur sacco & coquantur in aq. & acet. p. æ. q. f. & expresso sacco à superflua humiditate imponatur calidus loco dolenti.

Quemadmodum in pluribus morbis, ita etiam in Cephalalgia sex rerum non naturalium exacta habenda est ratio. Si enim ab externis causis excitetur Cephalalgia, facile patet nisi hæ removeantur dolorem non facile iri sublatum. Quantum autem valeant causæ hæ ex observationibus practicorum constat. Cephalalgia ab ardore solis obortæ, itidem ab exercitio, ab aqua frigida, ab ebrietate, vino, coitu, sanguine menstruo retento exempla habet *Forestus l. ix. Obs. 1, 2, 3, 4, 7, 27, 28, 29. 41. &c.* Itaque in id incumbendum est medico, ne frustra medicamentis torqueatur æger, ubi diæta sola symptoma superare potest.

Diæta.

Aeris differentias, mutationes, tempora anni diligenter observavit *Hippocrates* in libris de *Aeribus*, aquis, locis, Diæta, morbis popularibus. &c. Aer aliquando magis prodest quam exquisitissima remedia. Solus aer nonnunquam Cephalalgiam producit, uti in superioribus vidimus. Experiuntur hoc plures qui ex aëre puriori in graviolem translati ejus noxam lunt. Itaque ad aeris constitutionem attendere oportet medicum. In genere aer sit purus, non subterraneus, non foetens: non odoratus, non halitibus, carbonum nidore, aut fumo inquinatus. Deinde aer sit obscurus, non illustratus radiis solaribus: capitis dolore vexati nimium splendorem non ferunt. Denique sit temperatus, nec nimium calidus, nec nimium frigidus. Cubiculum in quo decumbit ægrotus sit spatiosum, tabulatum sit elevatum, in quod data occasione liberior aer possit admitti. Tandem aer sit quietus, à strepitu, clamoribus, imo & confabulationibus sonoris remotus.

Aeris consideratio generalis.

Quandoquidem tamen Cephalalgia plures sunt differentia, accuratè ad causas hujus symptomatis est attendendum, & harum respectu in specie de aeris constitutione judicandum. Itaque

Aeris consideratio specialis.

si . . .



si à nimio ejus æstu in Capitis dolorem quis inciderit, temperatior est eligendus. Dico temperatiorem esse eligendum; etenim si repente aliquis in frigidum, humidum aut subterraneum aërem transferatur, non minus hujus subitæ mutationis poenas dabit, quam si admodum æstuans avidius frigidam hausisset. Si quis in febribus de capitis dolore conqueratur, frigidior aër, atque aquæ gelidæ affusione, aut aceti odore temperatior redditus, convenit. Possunt quoque herbæ & flores convenientes æstatis tempore cubiculo inferri. Vitanda in hoc casu amicorum turba, tum quod aër reddatur calidior & impurior, tum quod silentium ægrotos plurimum juvet. In Cachexiâ & Chlorosi aër calidior & ficcior optimè convenit. Itaque eligendum est cubiculum elevatum, pavimentum ligneum, vitandum marmoreum. In hoc casu mutatio aëris plurimum conducit.

Vestimenta & tegumenta non sunt negligenda.

In rerum non naturalium enumeratione nulla vestimentorum & tegumentorum facta est mentio; cum tamen hæc ad sanitatis conservationem & morborum productionem plurimum faciant. Verum placuit Medicis antiquioribus, res non naturales dictas, septenario numero complecti, ut scilicet numero non minus quam nomenclatura à septem rebus, naturalibus dictis, differrent. Quamvis autem in hoc censu omiſſa sint vestimenta & tegumenta, nobis ideo negligenda non sunt. Imo eorum discrimen ideo exactius examinandum est, cum ad hoc symptoma producendum & expugnandum plurimum faciant. Vestimenta ad sanguinis circulationem ac pressionem promovendam aut impediendam magni sunt momenti. Calor externus vestimentorum calorem nostrum nativum suscitatur, quia pressionem, expansionem, comminutionem, vim elasticam sanguinis intendit, atque hominem ab externis aëris injuriis immunem præstat. Vestimentorum defectus hominem frigori magis obnoxium reddit, atque non tantum aëris injuriis exponit; verum etiam omnibus morbis à tardiori & impedita circulatione originem ducentibus. Tegumenta & stragula ad sudores eliciendos, promovendos, cohibendos multum possunt, prout nempe vel plura vel pauciora adhibentur. Itaque pro temporum anni ratione, pro varia aëris constitutione ea vel



vel augeri vel minui debent. Generalis illa regula, quod omnis subita mutatio sit periculosa, hic quoque locum habet.

Ut autem in specie de capitis tegumentis aliquid dicamus, hic locus exigit. Nempe caput ab aëris injuriis, quantum pote, defendendum est. Imprimis diēi & noctis habenda est ratio. Probè notandum nos ordinarie nocte pluribus tegumentis opus habere quam de die, non tantum quod nocturnum frigus, sed etiam ipse decubitus illud exigant. Utimur enim non tantum lecto plumis animalium repleto, ideoque calorem nostrum multum augente, verum etiam stragulis pluribus & quidem gravioribus aut densioribus. Ubi autem totum corpus ita incalescit, & sanguinis expansio ac motus, nec non lymphæ refluxus versus cor promoventur, necessum est ut caput & aures patulæ adversus aëris injurias muniantur, ne quis in capitis dolorem & coryzam incidat. Imprimis illud observandum est iis, qui caput non tam ornare quam onerare solent capillamento futili. Illis opera est danda ut nocte caput probè tegant, ne imprudentiæ suæ dent poenas. Consuetudo tamen etiam multum potest, adeoque ejus & hic habenda est ratio. Refert *Herodotus* Persarum capita admodum fragilia fuisse, Ægyptiorum autem firma, *Lib. III. c. 12.* Hujus rei hæc reddebatur ratio, quod statim à pueris Ægyptii radere capita incipiant, & cranium ac caput reddere compactum. Persæ autem à principio assuefiunt operire caput, gestantes pilea tiasque. Quicquid sit, illud verissimum est σκιστροφίαν tum universo corpori, tum capiti plurimum obesse. Utinam illud à parentibus diligentius observaretur!

De tegumentis capitis in specie.

Cum in superioribus de cibo & potu, horumque abstinentia & ingluvie sit actum, non est necesse eadem hic repetere. Illud tamen omittere nolui, perversam opinionem plerorumque animis jam dudum infedis, scilicet *acida* omnia cane pejus & angue vitanda esse. Nempe publici juris facti sunt libelli linguâ vernaculâ, acidorum usum mirè proscindentes. Hi homines non considerant distinguendum esse usum ab abusu, nec valere consequentiam; quidam abutuntur acidis, ergo omnibus omnino ab acidis abstinendum est. Hic argumentandi modus vitiosissimus est. Itaque ne hac in parte præjudicium vulga-

De Cibo & Potu.



re nos transvorsum rapiat, oportet considerare, non tantum acida appetitum acuere, & digestionem ciborum multum juvare, sed & ipsum aceti acris odorem spiritus animales recreare, eosdemque languentes excitare. Ideo spiritus vini abusus multum nocet, quandoquidem fermentum ventriculi obtundit & appetitum prostermit. In febribus acutis, malignis & Peste acida & acetum multum profuisse adeo manifestum est, ut confirmatione non egeat. Dicam aliquid quod nostrum negotium, de quo hoc capite agimus, proprius spectat: nempe potator strenuus ubi pridie plus satis incaluisset mero, & *κα-  
ρησάπια* vexaretur haustu largiori *succi Limonum* puri, qualis è *Guinea* affertur, conceptum venis ardorem restinguere solebat absque ullo incommodo. Narratum hoc mihi fuit à viro fide dignissimo, & oculato teste. In febribus itaque, in appetitu languente, post liberaliorem usum spiritus vini, acidorum usus multum emolumenti afferre potest. In morbo virgineo multum nocent acida, nocet nimia aqueorum ingurgitatio, imprimis *Tinctura Thee*. Nocet quoque *oryza*, *carbonum*, *creta* assumptio, sacchari abusus. Prodest *vinum generosum*, *salvium*, *enulatum*, *chalybeatum*.

De somno  
& vigilia.

Somnus & vigilia utraque, si modum excedant, mala sunt. *Hipp. Aph. 3. §. 11.* Non tamen horum in omnibus capitis affectibus eadem est ratio. In capitis doloribus à defatigatione, crapula, ut & febribus somnus protractior juvat, uti in superioribus quoque monui. In pituitosâ autem constitutione somnus protractior nocet, brevior prodest. Hæc confirmantur tum experienciâ, tum etiam ratione. In febribus quippe, defatigatione & similibus post somnum sufficientem multum nos recreatos esse & sentire & confiteri solemus. E contrario virgines obstructionibus vexatæ, à somno protractiori pejus habent. Nempe in hisce casibus somnus prodest: quando sanguinis motus & expansio compesci debent; nocet quando ejus tardior motus, & ad circulandum per minima vasa ineptitudo, majorem agitationem postulant.

De motu  
& quiete.

De motu & quiete idem esto judicium: somnus enim decubitus & quietem exigit: vigiliæ quieti finem imponunt, & nos ad motum excitant. Motus appetitum acuit, digestionem



nem promovet, ventriculum & cerebrum roborat, contra viscerum obstructions & languores diuturnos summum est remedium. Itaque motus & exercitium omnino commendandum, nisi aut febris, defatigatio aut nimia sanguinis commotio obstiterint.

In omnibus capitis affectibus alvus semper libera servanda, quippe hæc pigrior excrementa multum accumulatur, intestina, ventriculum imo & caput multum gravat; sanguinem quoque minus defæcatum reddit. Hinc videmus commutationem fæcum alvinarum in febribus optimum præbere signum. Quippe si fæces obscuri coloris & compactæ reddantur minus compactæ, si earum color magis ad flavedinem vergat, si alvus reddatur fluidior, spes sanitatis recuperandæ affulget. Hinc enim concludimus æstum febrilem imminui, bilis secretionem promoveri. Quid? quod Crisis febrium aliquando fiat per diarrhæam? Potatores illi quibus post ebrietatem alvus solet reddi laxior, ab intemperantiâ minus læduntur. Adeo ut in hisce casibus copiosior & ad Diarrhæam vergens evacuatio alvo adstrictiori sit præferenda. In Chlorosi tamen alvum lubricam non semper amo: nimia viscerum debilitas, & fibrarum relaxatio hanc excitare potest.

De excretis  
& retentis.

Animi affectus uti semper, ita etiam hic moderandi veniunt. Ira, furor brevis, spiritus animales & sanguinem exagitat, itaque animus regendus est, ut pareat non imperet. Morbis longioribus, qualis est Chlorosis, solet comes esse tristitia, quæ tamen plurimum nocet. A tristitiâ sanguinis tum pressio, tum expansio impediuntur. A tristitiâ ipsæ vasorum fibræ contrahuntur, atque ita excretio impeditur, suppressio redditur pertinacior. Cum autem capitis dolor, has affligens, ab hisce causis dependeat, manifestum est animi affectus perversos hic respiciendos esse. Quæ de tristitia dixi etiam locum habent in metu & terrore. A terrore non semel suppressa sunt menstrua antea ritè fluentia; nec mirum, cum terror subito invadat, & non tantum spiritus & sanguinem, sed ipsas non raro partium solidarum fibras malè mulctet. Animus tranquillus & suâ sorte contentus, animus hilaris & lætus in præsens, ad sanitatis conservationem & restitutionem

De animi  
Pathematibus.



nem plus potest, quam magno molimine undique conquifita medicamentorum farrago.

## C A P U T S E C U N D U M.

### *De Vigiliis nimis.*

Descriptio  
Vigiliarum  
nimiarum.

Ea expli-  
catur.

**V**IGILIAE nimiae sunt, sine sufficiente somno, nimis protractum, involuntarium atque molestum sensuum internorum & externorum exercitium.

Non tantum externorum sed & internorum sensuum facio mentionem, quamvis non ignorem sensuum internorum functiones in somno nequaquam cessare. Mens nostra activa est, spiritus animales in continuo sunt motu, atque tum etiam agunt quum minimè agere videntur. Dormientes somniamus, hoc est, cogitamus aliquando quidem vana, adeo ut nec pes nec caput uni reddatur formæ, aliquando tamen talia quorum memoriam exactam frustra vigilantes exoptamus. Fateor somnum & vigiliam sibi mutuo opponi; verum non est necesse hominem dormientem privari omnino iis exercitiis quibus vigilans fuerat usus, sufficit si eadem peragat alia ratione. Sufficit ut somnus externorum sensuum exercitium sufflaminet, ex quo sequitur internos remissius, absque animi intentione, absque defatigatione, absque molestia agere, & commercium, quod inter utrosque vigilantibus intercedit, interrumpi, unde manifestum evadit in quo oppositio potissimum consistat. Quiescit equus quando plaustrum non amplius trahit, quando habenis solutus per patentes campos libere spiritum trahit, quamvis non omnino conquiescat, sed huc & illuc comitando pabulum quærat. In descriptione igitur vigiliarum nimiarum internorum quoque sensuum fuit facienda mentio, non tantum quod hi nimis vividè tum agant, verum etiam quod molestia, quæ continuas vigilias comitatur, ex eo originem ducat, quod spirituum animalium motus nimius alias post alias excitet cogitationes, perceptiones, imaginationes, ratiocinationes, unde nos admodum defatigari sentimus. Pertinet hæc defatigatio præcipuè ad sensus internos; nam quantum ad ex-  
ternos



ternos, illi aliquando vix afficiuntur: nempe quando æger oculis clausis in obscuro cubiculo decumbit, ubi nullus strepitus auditus organa, nullus sapor linguam, nullus odor nares feriunt. Cum ergo in molesto hoc symptomate sensus interni præcipuè, non nisi secundariò sensus externi afficiantur, amborum fuit facienda mentio. Quemadmodum post nimis diu continuatum motus voluntarii exercitium sequitur lassitudo, ita nimis diu continuatarum vigiliarum comes est defatigatio. Agimus autem hoc loco non de iis vigiliis quæ sponte, ad negotia quædam expedienda, sani protrahunt, sed de vigiliis morbosis quando ægri, quantumvis cupidi, in somnum non solvuntur, oculisve aut pectore accipiunt noctem. Opponuntur vigiliæ sanorum & ægrorum sibi invicem, quod in vigiliis ordinariis, post somnum moderatum, cum voluptate quadam sensuum externorum & internorum exercitio fruamur, in nimiis involuntarie & cum molestiâ: quemadmodum concoctioni sufficienti & celeri sanorum opponitur δυσπεψία & βραδυπεψία ægrorum. Interrumpit somnus sensuum externorum exercitium, remittit internorum; continua & proportionata illa vicissitudo summi usus, sanos nos & ad negotia obeunda alacres reddit: alterutrius defectus vel imminutio nimia morbosum est & in morbis molestum symptoma.

Quamvis vigiliarum natura ex iis, quæ de somno antea disputavi, aliquomodo intelligatur, operæ pretium tamen mihi videtur ex obviis ad minus obvia procedere, ut tanto distinctius sanarum ingenium, causas & curationem morbosarum assequamur.

Tractationis ordo.

Observamus itaque ex inedia etiam maximè sanorum somnum multum imminui, uti & potu *Thee* copiosiori, circa vesperam sumpto: imprimis autem ex iis quæ sensus externos vividè afficiunt, nec non ab animi affectibus, ut & nervorum irritatione atque dolore vehementiori. Horum omnium causas si exactè perspiciamus facilis evadet vigiliarum tam naturalium quam præternaturalium explicatio.

Vigiliæ sanorum.

Cum ab inediâ dilatatio & pressio sanguinis, ad cerebri corticalem substantiam blandè versus partes medullares deprimentam necessariæ, multum debilitentur, commeatus spirituum

Ab inedia.



animalium versus sensuum externorum organa non satis diu interruptitur. Præter causas hæc negativas accedit & positiva: in inediâ quippe protracta fibrillæ interioris tunicæ ventriculæ nerveæ moleste vellicantur, tum à salivâ continuè deglutitâ, tum ab attritu & respiratione continuis, nec non partium adjacentium mole. Tandem accedit & illud, quod nempe arteriæ aortæ truncus descendens, à ventriculi repleti onere more solito non prematur, unde sanguis versus partes superiores solito minus; versus inferiores liberius propellitur.

A potu  
Thee.

Imaginantur sibi aliqui potum aquæ, Tincturâ herbæ *Thee* imprægnatæ, impedire somnum, ex eo quod sc. spiritibus abundet, vel quod vapores è ventriculo versus caput adscendentes supprimat, quarum rationum neutra vera est. Nolim inficias ire in herba *Thee* latitare aliquas particulas spirituosas; verum earum non est tanta copia, ut hisce potissimum adscribi debeat vigilantia. Rogo enim quo indicio quis probet, dari tantam spirituum abundantiam? Num sapore, num odore, num effectu sese produnt? Verum neque sapor aromaticus, neque odor est penetrans. Effectus unicus est vigilantia; verum ille alio modo commodius explicari potest, uti statim videbimus. Posito autem non concessio in herba *Thee* inesse magnam particularum spirituosarum copiam, illæ à largiori aquæ puræ affusione ita diluuntur, ut in potus aquei censum potius sit adsciscendus hic liquor, quam in spirituosum aut aromaticum. Hæc est etiam ratio quare noceat multis vitam sedentariam agentibus, aut laborantibus debilitate ventriculi. Vaporum figmentum frigidius est, quam ut necesse sit illud multis refutari. Cerebrum non tantum undique ossea galea & meningibus arctissimè inclusum est; verum etiam ipsa foramina in inferiori parte non hiant, sed diligentissimè obturata sunt, adeo ut vaporibus denegatus sit versus cerebrum liber com meatus. Communicatio, quæ capiti cum partibus inferioribus intercedit, fit ope arteriarum, venarum, nervorum & vasorum lymphaticorum, hi autem omnes tubuli non vaporem, sed liquorem appropriatum vehunt. De vaporibus pluribus differentem vide *Sneiderum de somno l. II. c. 3.*

Quomodo

Si ergo hisce causis alacritas, quam post potum *Thee* experimur



rimur non possit adscribi, videamus quæ sit vera hujus ratio? id contin-  
 Nempe herba *Thee* saporem amaricantem & adstringentem gat?  
 linguæ nostræ exhibet. Amaræ particulæ incidunt & at-  
 tuant, adstringentes sanguinis nimiam dilatationem impediunt,  
 utræque à copiosâ aqua diluuntur. Itaque potus copiosior calidi  
 hujus liquoris sanguinem diluit, particulas sibi mutuo cohæren-  
 tes dissolvit absque manifestâ dilatatione, unde sequitur, illum  
 minimas arteriarum fibrillas facilius subire, ac commodius  
 permeare, neque corticalem cerebri substantiam sufficienter  
 deprimere. Cum autem à contrariis causis somnus oriatur,  
 non mirum si sublatis causis effectus quoque tollatur. Cum-  
 que sanguis tenuior productioni spirituum sit magis idoneus,  
 spiritus producentur tenuiores & mobiliiores, præcipue si  
 particulæ nonnullæ accedant spirituosæ, quas dixi non esse ad-  
 modum copiosas, planè abesse nequaquam affirmavi. Ergo à  
 sanguine minus deprimente, minus dilatato, spiritus mobili-  
 ores producente oritur, quod potus *Thee* aliquomodo abigat  
 somnum.

Cum ea quæ sensus externos validè afficiunt è somno quo-  
 que profundo dormientes excitare valeant, non mirum si ea-  
 dem somnum, nondum artus occupantem, abigant. Ita ex-  
 perimur nos somnolentos, nec tamen somno indulgere cupi-  
 dos posse variâ ratione vigilias continuare. Quamvis enim no-  
 stri arbitrii non sit semper dormire, aut semper vigilare :  
 quamvis non sit durabile quod alterna requie caret, possumus  
 tamen vel diutius vigilare, vel somnolentiæ indulgere, hinc vi-  
 gilia laudi, inertia vituperio ducitur. Diligenter enim illud  
 tenendum est, hominem respectu somni & vigiliæ sese sæpe  
 habere instar stateris, qui in æquilibrio positus levi momento  
 in hanc vel illam partem vergit : quod si autem uni vel alteri  
 lanci pondus exiguum superaddatur, diu in illo remanet situ,  
 in quo, à pondere adjecto, fuit constitutus. Proportio est  
 quædam inter spirituum animalium motum cerebrum elevan-  
 tem atque vigilias excitantem, & sanguinis impetum cerebri  
 corticalem substantiam deprimentem. Ubi proportio hæc ad-  
 est & remanet, mutua vicissitudine sese excipiunt somnus &  
 vigilia : ita tamen ut vigiliarum tempore facile aliquis in som-  
 num

Vigiliæ sa-  
 norum ab  
 iis quæ sen-  
 sus externos  
 validè affi-  
 ciunt.



num labatur à calore solis, ignis, quiete, leni murmure, cogitationibus languidis : somni tempore iterum quis facile excitetur, si spiritibus languidis à causa externâ & insolitâ agitatio nova & vehementior concilietur.

Illustratio  
præceden-  
tium.

Proportionis hujus consideratio in artis operibus ex.gr. Barometris etiam cernitur & est magni usus. Nempe non sufficit ad Barometris constructionem habere tubulum vitreum altera parte clausum & argento vivo repletum, nec non vasculum aliquod mercurio itidem onustum ; verum oportet ut inter hæc duo debita intercedat proportio.

Ejusdem  
causæ varius  
potest esse  
effectus.

Probè etiam observandum est eandem causam respectu diversæ suæ activitatis diversa imò contraria posse producere phænomena. Diximus statim calorem externum producere somnum ; idem ille calor si sit nimius, si non caloris sed æstus nomine sit appellandus, non tam alliciet quam abiget somnum : vel si somnus non plane abigatur, is erit turbulentus & inquietus. Eadem est defatigationis & plurium aliarum causarum ratio. Hæc ideo diligenter meminisse oportet, ne nobis imaginemur contrariorum effectuum, semper contrariâs debere esse causas.

Vigiliæ ab  
animi affe-  
ctu.

A pluribus animi affectibus somnus excutitur ; verum longum esset singulos examinare, itaque sufficiet in specie de gaudio & metu egisse ; hisce enim intellectis, de reliquis non difficulter judicabimus. In gaudio major est dilatatio orificiorum cordis, major quoque pulmonum, sanguinis majori ferviens expansioni, dilatatio, copiosior spirituum animalium productio nova, eorundem major motus & veluti exultatio quædam. Cum autem ad somnum producendum concurrant, & corticis cerebri depressio, & languidior spirituum animalium motus, facile est intellectu, spirituum copiam majorem, & motum extraordinarium impedire cerebri depressionem sufficientem ad producendum somnum. In metu homines animum celerem nunc huc nunc illuc dividunt, in partes rapiunt varias, & per omnia versant. Anxia illa agitatione spiritus animales perciti, impediunt quo minus cerebrum fatis deprimi possit. Accedit aliquando cogitatio de fugâ : cum autem cogitationibus corpus nostrum respicientibus conjungantur



gantur determinationes spirituum versus illas partes quorum ministerio opus habemus, hinc accidit, ut quotiescunque fugam meditamur, spiritus versus pedes & crura copiosius amendantur. Itaque quamdiu spirituum agitatio vehementior, illorum versus musculos influxus validior, horumque perceptio vivida continuantur, somno locus non conceditur, quandoquidem in somno hic influxus vel interruptitur vel debiliter peragitur. Jungitur nonnumquam timori imaginatio vivida imminentis periculi, extendens & expandens cerebrum, id quod somno maximè est contrarium. Imprimis autem instantis mortis metus in naufragio, morbis & similibus casibus, homines requiescere non finit. Nempe agitant tum miseros mortales conscientiae stimuli, & cujus aculeos sanus contempsit, ejusdem tanto acutiores moribundus persentiscit. In genere, in omnibus animi pathematibus vehementior adest spirituum animalium agitatio, vehementior cordis & sanguinis motus tum in toto corpore, tum in pulmonibus, unde somnus aut minus aut magis abigitur.

Cum irritatio nervorum in pruritu, solutio continui in dolore, vulneribus, ulceribus, spiritus animales continuo excitent, nervorum principia non comprimuntur sufficienter; sed spiritus animales continuo versus partem affectam influunt: hinc iterum molestiae sensus ad sensorium commune defertur, adeo ut somnus debeat sequi vel interruptus, vel paucus, vel nullus.

Ab irritatione nervorum.

Consistunt itaque vigiliae sanorum in blandâ cerebri totius explicatione, spirituum animalium jugi agitatione per universi cerebri tubulos, distributione per patentia nervorum orificia ad tensionem eorundem debitam, functiones viscerum & motus voluntarios ritè absolvendos, nec non eorundem, ab objectis externis & visceribus, versus cerebrum propulsione ad sensationes varias in mente excitandas.

Vigiliarum descriptio.

Non opus est hisce diutius immorari, cum omnia quæ ad vigilias naturales pertinent, ex iis quæ jam explicata sunt, mihi satis superque manifesta videantur. Necessarium autem erat, distinctè vigiliarum protractarum causas naturales, effecta potus *Thee*, ut & animi pathematum exponere, quando-

Transitio.



quidem hisce perspectis, facilius & rectius judicamus de statu præternaturali, effectu medicamentorum, nec non juvantibus & nocentibus.

Causæ vigi-  
liarum præ-  
ternatura-  
lium.

Jam ad vigiliarum præternaturalium causas transeamus, quas duplices statuo, alteras à deficiente cerebri compressione dependentes, à nimia spirituum agitatione alteras. Quamvis enim utraque hæc causa sæpe concurrat, potest tamen & debet clarioris explicationis gratia, jam hæc, jam autem illa tanquam primaria considerari.

Spirituum  
motus ni-  
mius.

Spirituum motus est nimius in febribus continuis, ardentibus, malignis & similibus, quandoquidem à vehementiori & sæpius repetitâ pressione, cujus signum est pulsus præternaturam frequentior, major est particularum sanguinis agitatio, major spirituum productio & motus. Deinde in causo & similibus, major observatur æstus. Si autem æstus externus nimius in sanis somnum abigat, quanto magis idem faciet æstus præternaturalis adeoque magis molestus. A spiritu ergo hoc motu nimio non tantum oriuntur vigiliæ nimix, de quibus hic agimus, verum etiam, accedentibus aliis causis, Coma vigil, Phrenitis, Mania, Melancholia, de quibus in sequentibus erit agendum.

Reddit æ-  
gros fer-  
oces.

A nimia hac spirituum animalium agitatione ægroti aliquando, satis alias mansueti, ferociunt ac vehementibus corripuntur animi pathematibus, quæ iterum spirituum illum motum intendunt & continuant diutius. Quemadmodum sanorum vigiliæ à passionibus excitantur, ita etiam præternaturales vigiliæ. Tum autem dicuntur præternaturales, quando functiones lædunt & diutius perseverant. Ad has referendæ sunt eæ quæ in affectibus hystericiis & hypochondriacis non raro vexant. Hi paroxysmi aliquando à passionibus oriuntur, sæpe eos comitatur animus meticulosus, expansiones intestinorum & vigiliæ. Hæ à præcedentibus differunt, non adest talis ferocia, atque aliter tractandæ veniunt. Vide *Hoeferi Herculem Medicum* p. m. 200.

Animi pas-  
siones.

Nempe in passionibus cor in consensum trahitur, vehementius movetur, sanguinem minus placide expellit adeoque majori productioni spirituum suppeditat pabulum, agitationi etiam stimulum.

Ex-



Excitatur etiam spirituum motus nimius à partibus corporis nostri variis male affectis, inflammatis, irritatis, distentis, ruptis. Ita Cephalalgia, Pleuritidi, Peripneumonia, Tussi Arthritidi, calculo renum & vesicae, dolori colico, alvi dejectionibus, Tenefmo, tumoribus variis, Paronychia, vulneribus atque ulceribus comites solent esse vigiliae pertinaces. Verum in hisce casibus affectus vigiliam producentes considerari solent & debent, non neglecto interim symptomate urgente.

Inflammationes, & diversarum partium morbi.

Deficiens cerebri depressio vel à spiritibus, vel à sanguine habet ortum. A spiritibus; quando illi nimium cerebrum expandunt, adeoque sanguini, cerebrum depressuro, & somnum producturo resistunt. Verum hæc causa re ipsa non differt à spirituum agitatione, de qua egimus, quandoquidem illa ipsa agitatio quæ expandit cerebrum, ea ipsa quoque resistit cerebri depressioni. Cum itaque hæ causæ modo considerandi solum differant, sufficient ea quæ in superioribus sunt explicata.

Deficiens cerebri depressio à spiritibus oritur.

A sanguine deficiens cerebri depressio habet ortum, ab ejus majore vel minore defectu, ab ejusdem tenuitate, ab ejusdem impetu, cui sæpe æstus solet esse comes, vel defectu particularum alimentarium.

Vel à sanguine

Sanguine existente paucò à quacunque demum causa, V.S. inedia, evacuationibus nimis, minor arteriarum adest repletio, facilius sanguinis per minimas arteriolarum ramificationes transitus, adeoque minor depressio exterioris cerebri corticis versus partem medullarem, unde somnus minor. Verum hæc causâ positâ, non ponitur necessario hic effectus, quandoquidem talis potest adesse spirituum languor, ut, quamvis debilis sit sanguinis pressio, debiles & pauci spiritus facile cedant pressioni non admodum validæ, adeoque homines in somnum prolabantur.

Paucò,

Sanguis est tenuior in quibusdam à peculiari temperamento: redditur tenuior à copioso aqueorum abusu, vel ab ejusdem majori pressione, vel à separationis defectu. Ita videmus in quibusdam sanguinem esse valde aquosum, adeo ut, si necessitate cogente is fuerit eductus, pars caseosa ipsa non sit ita rubra,

Tenuiore,



rubra, uti illud ordinariè videre solemus, eademque innatet fero copioso. Aqueorum liquorum copiosam assumptionem reddere sanguinem tenuiorem in superioribus vidimus. Hi liquores multo magis nocent si ejus abusu gaudentes agant vitam sedentariam; quandoquidem enim exercitio carent, transpiratio est minor, minor & debilior pressio, adeoque & minor secretio particularum aquearum. Ita ego tractavi matronam copioso potui *Thee* assuetam, quæ ordinariè, malè disposita, vexabatur vigiliis protractis: non tantum illa, sed & infans, quem primo partu (ni fallor) erat enixa, tum sanus tum æger paucissimi erat somni. Novi in hoc casu quasdam esse somnolentas; verum tum aliæ circumstantiæ solent concurrere, nempe ventriculi debilitas, ejusdemque minor coctio, evacuationum solitarum suppressio, sanguinis copia. Adeo ut hæc exempla minimè evertant id quod antea asserui, tenuitatem sanguinis causam esse minoris depressionis cerebri, adeoque vigiliarum.

Impetuosè  
moto.

Impetus sanguinis locum habet in animi diversis passionibus, febribus, inflammationibus: in hisce posterioribus casibus ingens solet adesse æstus. Prima fronte hæ causæ videntur debere producere somnum, quandoquidem major agitatio & dilatatio sanguinis aptæ natæ sunt deprimere cerebrum; verum in hisce casibus secus sese res habet. Nempe ad somnum naturalem producendum requiritur blanda cerebri depressio, agitatio & expansio sanguinis moderatæ: cum autem in hoc casu omnia sint violenta, cumque vasis insuper inferatur vis à copiâ & expansione sanguinis, non tam allicitur quam excutitur somnus. Contingit tamen quandoque in febribus infestare somnum præternaturalem, si nempe spiritus sint exhausti, sanguis abundans & à naturali statu multum remotus, cerebrum flaccidum: neque enim necesse est causas somni & vigiliarum præternaturalium semper existere plane contrarias, sæpe sunt sibi mutuo affines & subcontrariæ, unde contingit vigiliis protractis & Phrenitidi succedere in eodem morbo repentè Carum.

Carente par-  
ticulis ali-  
mentariis.

Defectus particularum alimentarium locum habet in inediâ, quæ in sanis non potest esse diuturna, cum ægroti eam facilius ferant.



ferant. Hujus rei rationes sunt plures: nempe ventriculus ab ejus fermento non vellicatur, expansio & æstus sanguinis arterias, per ejus tunicas copiosè dispersas, replens, plenitudinis efficit sensum, denique pinguedo ipsa corporis nostri sanguini iterum permixta ejus nimiae penuriae prospicit. Cum autem chyli recentis novus commeatus ad somnum non tantum homines disponat, verum etiam eundem requirat, facile concipimus, defectum particularum alimentarium vigilias producere satis protractas. Hæc est causa, quare plures sanos vigilando unus ægrotus & superet & vexet, ipse, ut videtur, vigilias facilius ferens.

Hic singulis explicatis jam evadit manifestum, sæpe plures causas concurrere, unde tum vigiliæ difficiliter superantur. Nempe in Febribus sibi invicem junguntur spirituum animalium nimia agitatio, nimia cerebri expansio, minor cerebri depressio, sanguinis impetus, particularum alimentarium defectus. Possunt etiam jungi variarum partium corporis nostri dolores aut inflammationes, adeoque irritatio nimia nervorum & agitatio spirituum.

Causæ plures sæpius concurrunt.

Nullam hic intemperiei cerebri vel cum, vel sine materia facio mentionem, quandoquidem intemperies sine materiâ non magis datur quam accidens sine substantia, cujus est accidens. A nihilo nihil fit naturaliter nec in macrocosmo nec in microcosmo. Creationis alia est ratio. Excogitatae sunt hæ distinctiones, quum sanguinis ignoraretur circulatio, qua defectâ novum jubar toti affulsit Medicinæ. Quantum autem ad intemperiem cum materiâ, illa potissimum à sanguine dependet, vel ab humoribus à sanguine secretis, ex. gr. sero copioso in capite hærente, qualia exempla videre licet apud Bonetum in Anatomia practica Tit. de Dolore capitis. Observat. xxv. xxxv. &c. Non negandum quoque est vitium organicum posse producere vigilias protractas, veluti Phlegmonem meningum, vasa plurimum distenta, &c. Vid. Bonet. Anat. pract. l. i. s. i. c. 6. Tale quid procul dubio latuit in cerebro matronæ supra vicennium dolore capitis divexatae, quæ aliquando durante paroxysmo per aliquot dies nihil somni capere potuit. Vid. Willis. de Anima brutor. p. 2. c. 2. Verum quales-

Rejiciuntur causæ falsæ.



cunque demum hæ causæ sint, activitas earum in hoc consistit quod vel circulationem sanguinis naturalem, vel spirituum motum placidum immutent, vel dolorem excitent, & hoc pacto vigilias protractiores producant.

Vigiliarum  
differentiæ.

Progredior jam ad vigiliarum præternaturalium differentiæ. Harum præcipua est, quod vigilie aliæ sint idiopathicæ, aliæ per consensum vexent.

Vexant vel  
per idiopa-  
thiam.

Idiopathicæ vigilie sunt illæ quæ ab affectu peculiari cerebri dependent; per consensum reliquæ omnes. Ita in superioribus vidimus vel serum inundare cerebrum, vel vasa admodum esse dilatata, & tales causæ procul omni dubio plures occurrunt; verum cum occasio crania illorum post mortem aperiendi non semper detur, in quibus medicus aliquid singulare ante mortem observavit, hinc difficile determinatu est, qua ratione cerebrum affectum vigilias protractas efficiat. Deinde solent ordinariè adhuc symptomata ingruere alia, antequam ægrotus pereat, adeo ut tum illa quæ tandem ægrotum sustulerunt, sint manifestiora, quam illa quæ principio morbi & vigiliis protractis dederunt ansam. Utilissimum tamen est hanc distinctionem observasse, præcipuè junioribus medicis, qui vitia partium fluidarum imprimis considerare, solidarum negligere vel non animadvertere solent. Nempe si ego sim certus talem affectum in partibus hæere solidis qui medicamentis expugnari nequeat, non enecabo ægrotum nil profuturis, imo sæpe plus nocituris, medicamentis; sed diætæ habebō exactam rationem, & symptomata lenire conabor. Ad vigilias per idiopathiam vexantes referri quoque possunt vigilie ab animi affectu pendentes, quia scilicet inordinatus spirituum à perceptione objecti nobis noxii vel utilis excitatus causa est perturbati sanguinis motus & vigiliarum. In eo autem summum est discrimen quod affectiones partium solidarum vix aut ne vix quidem tolli possint, cum spirituum hic motus major facile compesci possit, si statim advocetur medicus, & rationis dictamen sequi patiens velit.

Vel per con-  
sensum.

Vigilie per consensum vel ab affectu universali vel à particulari dependent. Affectum universalem voco febrem, quia hæc pressione nimia & dilatatione sanguinis universum corpus affli-



affligit, atque symptomatibus variis, inter quæ sunt etiam vigiliæ, miseros mortales excruciat. Hæ vigiliæ in praxi frequentissimè occurrunt, & sublatâ febre, causâ scilicet primariâ, evanescere solent. Vidit id *Fernelius*, qui inter symptomata febrium, quam inter affectus particulares, de vigiliis tractare maluit. Particulares affectus varii sunt, omnia scilicet quæ dolorem excitant & ingentem molestiam, Calculus renum, vesicæ, tussis, diarrhæa &c.

Differunt etiam vigiliæ quod aliæ sint consuetæ, aliæ minus consuetæ. Nempe quidam ordinariè vel ob peculiare temperamentum, vel consuetudinem sunt somni parcissimi; quidam contrario admodum somnolenti. Huc spectat, ex. gr. senes sæpe magnam noctis partem vigilando transmittunt, cum juvenes & pueri se vix excitari patiantur. Itaque si quis ordinariè parcius dormiat, ille etiam ægrotus, vigiliis magis erit obnoxius: saltem non mirabitur medicus si talem de vigiliis morbosus conquerentem audiat. E contrario si quis somnolentus de vigiliis protractioribus conqueratur, facile iudicabimus causam satis gravem tales producere vigilias. Differunt etiam vigiliæ, quod aliæ sint minus, aliæ magis protractæ. Aliæ viros, aliæ mulieres affligunt, senes aliæ, aliæ juvenes vel pueros.

Aliæ differentia.

Signis in hoc affectu non est opus: conqueruntur ægroti ipsi de molesto hoc symptomate: quibus loquelæ usus est denegatus, infantes nempe ploratu somnûm sibi excuti satis superque indicant. Magis necessarium est expiscari num affectus sit primarius num symptomaticus. Cerebri partes solidas malè esse dispositas exinde cognoscimus, quod vigiliæ sint pertinaces, quod absque causâ manifestâ ingruant, quod medicamentis aliis non cedant, quod opiata medicamenta difficulter ferant (hoc tamen & ab aliis causis dependere potest) quod morbi alii absint quibus hoc symptoma adscribi possit. Passiones animi vel è relatu ægri vel adstantium cognoscuntur, vel è sagaci conjecturâ, nempe absentia aliarum causarum quibus hæ vigiliæ insolitæ, repentinæ, & pertinaces adscribi queant. A febre produci vigilias ex eo apparet quod febris adsit, quod ea dolorem capitis vel similia producat symptomata,

Signa.



mata, quod alii morbi absint, denique quod in paroxysmo febrili potissimum vigiliæ sese exerant. Reliqui morbi è propriis signis innotescunt.

Prognosis.

Prognosis juxta causarum varietatem vanè institui debet. Vigiliæ ab affectu in partibus solidis vix corriguntur, nisi sit contusio, vulnus, aut ulcus partes exteriores occupans; verum, juxta ea quæ antea explicata sunt, non agimus hic de vigiliis quæ ab infortunio dependent, quamvis caput afficiatur, cum solutionis continui explicatio & curatio sit alius loci. Nempe si vasa sint dilatata, si membranæ cerebri corrumpantur &c. Ad hos affectus curandos non multum potest medicus nisi natura manifestè opem ferat. Sunt autem hæ affectiones tanto periculosiores quanto sunt magis inveteratæ, & quanto graviora adfunt symptomata. Vigiliæ ab animi affectu eorundem naturam sequuntur, recentes facile curantur si causa possit removeri: inveteratæ alios morbos, alia inducunt symptomata, quæ aliquando tam altas egerunt radices ut ea tollere non sit in medici manu. De vigiliis à febribus dependentibus, prognosis fieri debet juxta naturam febris ipsius, cujus explanationem jam necdum trado. Illud tamen omittendum non est vigilias admodum pertinaces in febribus præbere malignitatis indicium, adeoque has debere esse admodum suspectas. Prædictio vigiliarum ab aliis morbis productarum sequitur naturam illius morbi, cujus sunt symptomata. Vigiliæ affligentes eos qui sunt parcissimi somni, minus periculosæ sunt, cæteris paribus, iis quæ somnolentos valde torquent. Reliquis immorari non est necesse.

Indicationes.

Indicationes sunt vel generales vel speciales; generales sunt quæ sanguinis & spirituum respiciunt motum, speciales affectum à quo symptomata hæc dependent. Generales ergo sunt spirituum motum compescere, sanguinis molem & impetum imminuere, eumque ad depressiones cerebri aptum reddere, denique parti laboranti suppetias ferre. Speciales respiciunt morbum in partibus solidis, qui non irritandus, sed magis sedandus vel expugnandus est: Febrem, qui curandus est, habita diligenti ratione malignitatis si ea adsit: alios morbos, quorum quisque pro ejus ingenio tractandus est.

Cura-



Curatio igitur respicit spirituum nimium motum qui omnino cautè compescendus. Medicamenta quæ illud efficiunt dicuntur hypnotica & narcotica, gradibus differentia: prior species tantum somnum; posterior etiam torporem & stuporem inducit. Quamvis varia in hac medicamentorum classe recenseantur simplicia, maximi tamen usus sunt Papaver & Opium. Opium præstantissimum medicamentum, si modo à perito artifice debite præparatum, prudenter in usum vocetur, ubi necessitas id requirit. Fuit hoc tanto in pretio olim ut Mesue Electuarium, quod Opii & aliorum simplicium æquales partes recipit, non dubitaverit *ἀθανάσιος* immortalitatis nomine insignire. Similis compositio, verum è pluribus simplicibus concinnata, atque eodem nomine gaudens existat Nicolai. Non tantum hoc nomine sed & *Requietis*, atque *Tryphera*, nec non à *salute* petitis appellationibus, donata sunt medicamenta opiata. Omitto de *Theriaca* & *Mithridatio* verba facere, quorum compositio ut ut antiquissima, etiamnum, non sine insigni successu, ubique decantatur & obtinet.

Curatio.

Non est inficias eundem plures tales compositiones esse inconcinneas, ob magnam & ridiculam medicamentorum farraginem; verum tanta est opii efficacia, ut illæ ipsæ compositiones non caruerint sæpe laudabili effectu. Nempe ex præiudicio existimabant Opium esse frigidum, & in eo toti erant ut illius frigiditatem corrigerent, addebant itaque Piperem, Euphorbium, Pyrethrum, & similia quæ non semper ex usu sunt ubi Opium requiritur, imo nocent ubi inflammationes viscerum dolorem excitant & vigilias, id quod non rarò contingit. Ne ergo semper in eodem hæreamus luto, manifestum mihi videtur tum ex odore, tum è sapore Opium non esse frigidum sed calidum, adeoque frustra laborari in ejus correctione per medicamenta valde acria. Dicet forte aliquis: unde tum vis somnifera deducenda erit? Respondeo vim illam non à caliditate aut frigiditate, sed à particulis è quibus componitur esse deducendam. Non est mea mens hic Opii instituere anatomiam, aut exactè determinare è quibus particulis præcisè, & qua proportionem constet: sufficiet observasse illud constare è particulis amaricantibus & tenacibus simul junctis, quorum

Opium.



rum ea est efficacia ut expansionem sanguinis augendo impediant nimiam fluiditatem. Ulterius non pergo in determinatione particularum opii, tum quia hæc ad medicam explicationem sufficiunt, quæ non considerat res prout sunt, sed respectivè quatenus corpus nostrum afficiunt: tum quia difficillimè potest iniri calculus, ex quibus particulis præcisè constet res, quali proportionem, & quæ sit eorum activitas in corpore nostro, quomodo in ventriculo immutentur, quæ particulæ ad sanguinem deferantur, quæ sit harum activitas, & ad universum sanguinem proportio. Quod si autem in hisce determinandis malè calculum ponamus, & tamen talibus medica dogmata inædificare velimus, facile apparet hanc rationem artem utilissimam & maximè necessariam erroribus repleri, ægrotos pluribus infortuniis exponi. Et si rem exactâ judicii lance trutinemus, est illa corpuscularis Physica propriè pars Philosophiæ non Medicinæ, & si quando in Medicinam transfertur illud potius sit illustrationis gratiâ, & tum Medicus agit Philosophum.

Est calidum.

Verum è diverticulo in viam. Dixi *Opium* esse calidum, constare ex partibus amaricantibus & tenacibus. Quamvis hæc sint minimè dubia, juvat tamen ea paucis probare. Calidum esse arguit ejus odor gravis, ut & sapor manifestus. Idem sapor amarorem & tenacitatem, hanc insuper tactus evincit. Expansionis vim inesse opio ex iis quæ dicta sunt, tum ex eo apparet, quod *Turcis* in prælia ituris audaciam inspiret, denique quod egregium sit sudoriferum. Tenaces particulæ gustu etiam discernuntur, nec non tactu: sive enim opium crudum contrectes, sive illud dissolvas, sive etiam illud in mortario contundere satagas, manifestè apparet particulas ejus esse valdè tenaces. Hinc jam sequitur, si sanguis hisce particulis imbutus, ad caput deferatur, vasa ejus minima deberi & expandi & repleri, quia tenax & amaricans ille succus sanguini commixtus progressum ejus per subtilissimas ramificationes aliquomodo sufflaminat. Ita videmus liquores glutinosos per columnam difficilius transmitti. Hæc ipsa autem difficultas transeundi per vasa minima eorundemque repletio, depressionis corticalis cerebri substantiæ est causa, in qua somnum efficiendi vim con-



consistere, ex iis quæ alibi disputavimus, clarissimum est. Deinde particulæ hæc sese spiritibus animalibus admiscentes, iisdem veluti compedes injiciunt, unde ad motum minus apti & segniores evadunt, adeoque debiliores quam ut depressioni cerebri validiori resistant. Et hæc mihi videtur vera esse causa, quare opium (& similis est reliquorum medicamentorum narcoticorum ratio) somnum producat. Qui plura de Opio desiderat is consulat *Wedelii Opiologiam*, & *Matthiæ Tilingii Anchoram salutis* &c.

Quandoquidem autem ejus improvidus usus, non tantum somnum, sed & ejus sortem, mortem sæpissimè accersivit, breviter adjiciendæ sunt quædam cautelæ, ut appareat quando tutius, quando minus tutè illud in usum vocari possit. Usus ergo *Opii* suspectus est.

Eo cautè  
est uten-  
dum.

1. In Epilepsia & morbis convulsivis: quare autem hoc ita sese habeat, non est jam explicandi locus, illud apparebit liquidò ex iis quæ de Epilepsia in sequentibus tradentur. Jam tantum adjicere lubet, si Epilepsia & morbi convulsivi ortum suum deberent variis particulis acerbis adeoque spasmodicis, si contractio violenta muscutorum esset adscribenda explosioni, non tantum non deberent obesse, sed & summe prodesse opiata. Cum autem hæc contrario modo sese habeant, præjudicium ingens oritur contra illam hypothefin. Paulo aliter sese res habet in affectibus hysteris, quandoquidem ibi non tantum convulsiones considerandæ veniunt, quæ sæpe absunt, sed & flatulentia & expansio intestinorum, sæpe etiam animi affectus.

Suspectus  
ejus est usus  
in variis ca-  
sibus.

2. In vertigine & morbis soporosis, quorum explicatio quoque in sequentibus tradetur.

3. Quibus vasa cerebri sunt vel nimium dilatata vel etiam repleta, quemadmodum illud post mortem non semel observatur, quod per se manifestum est.

4. Ante universalia, præcipuè ante V. S. celebratam in Pleuritide & Peripneumonia. Hujus rei exemplum exstat in Observationibus ad calcem adjectis. Ratio hujus rei est in promptu: quandoquidem in hisce morbis est quædam transitus per minimas arteriarum propagines difficultas, cum interim motus & pressio sanguinis à celeriori cordis contractione inten-



dantur. Difficultas hæc sese exerit in parte cujus nimia repletio homines miseros in summas conjicit angustias. Nempe pulmo, pectoris cavitatem replens, arctis circumscribitur limitibus, unde sequitur, si vasa arteriosa nimium distendantur, arteriæ alperæ cartilagine & fistulam proportionaliter debere coarctari, quod sine insigni oppressione non contingit. Et hæc est vera ratio summarum anxietatum, quæ molestissimè nonnumquam ægrotos exercent, & plerumque è falsis principiis male explicantur. Præmissâ autem V. S. ad irritationem-compescendam, tussiculam sedandam, dolorem demulcendum, somnum alliciendum cum summo successu in usum vocantur. Hæc esse verissima in praxi versati medici satis superque norunt, in juniorum gratiam tamen fuerunt inculcanda.

5. Suspectus est *Opii* usus & sæpe noxius infantibus, ob cerebrum flaccidius, & spiritus debiliores in somnum magis proclivibus.

6. Prudentem quoque medicum esse oportet in exhibendo opio senibus, aut illis quorum vires sunt valde attritæ. Ratio per se patet, quandoquidem opii efficacia major est, ubi vires ad illi resistendum sunt minores.

Minus suspectus in sequentibus.

Prodesse insigniter solet opii usus.

1. Post præmissâ universalia.
2. In principio morbi, ubi animi affectus originem morbo dedit.
3. In doloribus vehementibus; tum enim non est metus ne ægrotus in somnum nimis diuturnum, vel profundum incidat, quandoquidem dolor continuo spiritus excitat, & somnum discutit.
4. In irritatione & tussi.
5. In Dysenteria & diversis alvi fluxûs speciebus.
6. In Nephritide, calculo Renum & Vesicæ quando tutum non est potentiora diuretica in usum vocare, aut ad lithotomiam confugere.

Longum esset singula recensere. In genere ubi ægri sunt robusti, in ætatis vigore constituti, satis tutò in usum vocari possunt opiata; non est tutum semper in illorum usu diu continuare. Hæc de Opio adjicere locus hic videbatur postulare.

Egit



Egit hoc titulo etiam de hac materiâ *Sennertus*, qui refert *Platero* insigni medico opii usum fuisse satis familiarem. Vestigia ejus preffit *Franciscus de le Boe Sylvius*.

Quamvis concinnatio formularum non sit difficilis, cum Laudanum Opiatum & per se forma pilulari, possit præscribi, & fere omnis generis medicamentis, Mixturis, Bolis, Pulveribus, Emulsionibus. &c. admisceri, adjecimus tamen aliquam in juniorum gratiam. Forma pilulari hæc ratione simpliciter præscribitur.

Formulæ.

Rx. Laud. op. gr. j  
F. Pilula. no. j

Rx. Laud. Cydoniat. gr. ij  
F. Pilula no. j

Rx. Laud. op. gr. iiij  
F. Pilula no. ij

Qui à Laudano abhorrent in usum vocant Pilulas de Cynoglossa vel Styrace.

Rx. Mass. Pilul. de Cynogloss. gr. viij  
F. Pilula. no. ij

Qui pilulas deglutire non possunt in usum revocare possunt *Tincturam Opii*.

Laudatur aqua hypnotica *Dorncrellii*; verum ego eam exiguam ad somnum conciliandum judico esse virium. Quamvis enim hypnotica medicamenta descriptioni sint addita, hæc tamen destillationi non sunt apta, cum illorum vis non communicetur destillato, sed in fundo remaneat. Tales descriptiones in Chymia minimè versatis imponunt, à peritioribus ridentur, quippe sonant vitium percussæ. Quod si aqua hæc, loco alius liquoris, ad præparationem Emulsionis adhibeatur, ut ipse fecit *Dorncrellius*, tum admitti potest. Ejus igitur formula est sequens.

Aqua hypnotica  
Dorncrelly.

Rx. Aq. Hypnotic. ℥j  
Sem. papav. alb. ℥iij  
Melon. excort. ʒj  
Amygdal. dulc. excort. ʒij

Misce & fiat s. a. Emulsio pro iiij vicibus. Huic addi potest *Syrupus Violarum*. &c.

H 3

Quod



Quod si hæc voto non satisfaciat efficacior potest concinnar  
sequens :

*Rx. sem. Cucum. Melon. Papav. alb. aa. ℥℥*  
*Cum aq. decoct. Hord. F. s. a. Emulsio ad. ℥xx*  
*Add. Syr. Diacod. ℥vj Laud. op. gr. ij*  
*Aq. Cinnamom. ℥j*  
*M.*

Sennertus hoc modo præscribit potiones.

*Rx. Aq. Rosar. Borrag. aa. ℥j*  
*Cinnamom. ℥ij*  
*Margarit. ppt. ℥℥*  
*Laud. opiat. gr. ij vel iij*  
*M.*

*Rx. Aq. Papav. Solan. aa. ℥j*  
*Succini ppt. ℥℥*  
*Essent. Papav. ℥ij*  
*Laud. op. gr. ij*  
*Syr. Violar. ℥iij*  
*M.*

Ejusdem est Bolus sequens

*Rx. Conserv. Violar. ℥ij*  
*Laud. op. gr. iij*  
*M.*

Rolfincius hoc modo præscribit

*Rx. Emulsionis Rosatæ vel Violatæ Mynsigt. ℥iv*  
*Add. Laud. opiat. gr. iij.*  
*Margarit. ppt. gr. vj*  
*M.*

Tillingius laudat pulverem Bald. Timei von Guldenklee, cujus  
hæc est descriptio. Vid. Tilling. p. 111. c. 7.

*Rx. Magister. Smaragd.*  
*Hyacinth.*  
*Perlar. or.*  
*Corall. rubr. aa. ℥j*

*Laud. opiat. ℥j*

*Misce in mortario lapideo exactissime &*

*F. Pulvis. Dos. ℥j hora somni.*



Verum non sufficit perspectum habere, quæ sint *Opii* vi-  
res, quomodo spirituum motus possit sedari; verum etiam ob-  
servandum est quæ causæ spirituum animalium motum nimium  
producant. Aliter sedanda est agitatio à febre ardente pro-  
ducta, aliter ea quæ est symptoma affectionis hystericae.

giliarum  
examinan-  
da.

In Febribus itaque non statim est confugiendum ad narcotica  
potentiora, nisi ipsius febris habita fuerit ratio, & præmissis  
universalibus.

Febres.

Rectè itaque *Walsmadius* in praxi Cas. LXVII. primo præ-  
scribit Enema, tum venam tundit in brachio, tum ad sedan-  
dam sanguinis effervescentiam (ut ipse loquitur) progreditur.

℞. Aq. Card-bened.

C. C. citrat.

Ulmar. aa. ℥ij

Tinctur. Rosar. recent. ℥jss

Syr. Papav. errat. ℥ss

M.

Tum demum accedit ad Emulsionem & pulverem nitratum.

℞. Serm. 4. frig. maj. excort. aa. ℥ij

Aq. Papav. errat. C. C. citrat. Endiv. Lactuc. aa. ℥jss

F. s. a. Emulsio Add.

Oc. Cancr. ℥ss

Juleb Rosar. ad gratiam. pro iij dosibus.

℞. Nitri ppt gr. viij

Corall. rubr. ppt

Lapid Cancr. aa. ℥ss

F. Pulvis pro j dosi.

Non est tamen necesse in debilioribus hisce subsistere, verum  
necessitate urgente, & viribus ægroti non admodum attritis, li-  
cet ad potentiora confugere, qualis est sequens Emulsio *Sen-  
nerti* laudata à *Tillingio*. p. 304.

℞. Amygdal. dulc. ℥ij

Sem. papav. alb. ℥j

Aq. Violar. Nymphae aa. ℥jss

F. s. a. Emulsio, in qua dissolve

Laudan. opiat. gr. iij Add.

Margarit. ppt. gr. v.

M.

Utile



Utiles quoque sunt pilulæ sequentes Ejusdem.

℞. *Land. op. gr.* ijß *vel gr.* iij

*Magister. corall. rubr.* iij

*F. Pilulæ. no.* iij

*Julius Cæsar Claudinus in Empyrica rationali præter pilulas de Cyneglossa præscribit*

℞. *Requiei Nicolai.* ʒj

Malignæ.

Quod si febris maligna causa sit vigiliarum nimiarum, una fidelia, quod ajunt, duo possunt dealbari parietes, scilicet poterit mixturæ, aquam *Alexipharmacam* recipienti, commodè admisceri *Laudanum Opiatum*, & hac ratione & malignitati & vigiliis occurri. ex. gr.

℞. *Aq. Ruth.*

*Meliss. aa.* ʒij

*Alexipharmac.* ʒjß

*Cremor. diaphoret.* ʒij

*Oc. Cancr. ten. pulv.* ʒj

*Land. op. gr.* iij

*Julap. Rosac.* ʒvj

*M.*

Hujus subinde duo aut tria exhibeantur cochlearia. Sequentem haustulum in simili casu præscripsit *Lotichius L. 1. c. 8. Obs. 8.*

℞. *Aq. Bugloss.*

*Lactuc.*

*Borrag. aa.* ʒj

*Cinnamom. cum aqq. cord. ppt.* ʒij

*Os. de C. C.*

*Lapid. Bezoar. occid. aa.* ʒß

*Syr. de Papav.* ʒj

*Land. op. gr.* jß

*Ol. still. Citri. gr. v.*

*M. F. Haustus.*

Quod si debilitas insignis, cum pulsu parvo suspecta reddant opiata, utilis est pulvis, quo in febre malignâ cum inquietudinibus feliciter usus est *Riverius*.

℞. *Sal. Prunell.* ʒß

*Cam-*



*Camphor. ʒß**M. F. Pulvis,*

qui dividatur in iv. partes, quarum unam capiat tertiâ quaque horâ. *Obs. 18. l. 11. Vide quoque Ejusdem Prax. Med. l. XVII. sect. 111. c. 1.*

Quod si vero cum affectione hypochondriaca aut scorbutica jungantur vigilæ, tum medicamentis hystericis & flatum discutientibus jungenda sunt opiata, ex, gr.

Affectio  
hypochon-  
driaca.

*℞. Aq. Puleg. ʒijß**Hyster. ʒvj**Tinctur. Castor. ʒjß**Sal. Volat. Succin. gr. v.**Land. op. gr. iij.**M.*

Potest quoque ad imitationem *Mesues* præscribi *Athanasia*, hoc pacto

*℞. Rad. Gentian. Angelic.**Fol. Laur. Hyssop.**Eupator. Cannabin.**Sem. Apii**Thlaspios.**Baccar. Lauri**Croci**Myrrha elect.**Boli Armen. vera**Opii Thebaici, aquæ puræ decoctione soluti & iterum inspissati. aa. ʒß**Mellis despumati. ʒxv**Vini Hispanici q. s.**F. s. a. Electuarium.*

Hujus vires sunt egregiæ, uti ego non semel sum expertus.

Extant quoque apud auctores variæ aquæ somniferæ; verum quandoquidem descriptiones sunt satis inconcinnae, libet aliam subjungere, magni usus in affectibus *Hypochondriacis* & *Hystericis*.

*℞. Rad. Angelic. ʒij**Valerian.**Enul. Camp. aa. ʒj**I**Fol.*



*Fol. Hyssop. Puleg. aa. m. ij*  
*Matricar. Salvia. aa. m. ss*

*Granor. Junip.*  
*Sem. Levistic. aa. ʒjss*

*Apii.*  
*Carui. aa. ʒss*

*Garyophyllor.*  
*Cinnamom.*

*Macis aa. ʒij*  
*Cubebæ.*

*Flaved. Cort. Arant. aa. ʒss.*

*Concisis & contusis affunde sp. Vini Gallici ℥x. macerentur per dies 8  
tum distillentur in MB. donec stria oleosa disparere incipiant. In li-  
quore destillato infunde per xiv. dies.*

*Opii Thebaici ʒij*  
*Croci Britannic. ʒj*

*Colatura servetur in vase vitreo probe obturato. Dicatur Aqua  
Theriacalis minor.*

*Fredericus Deckers, Professor Lugdunensis melancholico, plures  
noctes infomnes traducenti, præscripsit.*

*℞. Aq. Betonic. Fl. Tilia. aa. ʒij*  
*Fenic. Vite Matthiol. Antepilept. Lang. aa. ʒss.*

*Sp. Sal. Armon. ʒss forte. gr. x.*

*Tinctur. Castor. gr. x. forte ʒss*

*Fl. Hyperic. ʒj*

*Laud. op. gr. iv*

*Ol. succin. gr. v*

*Syr. Stachad. ʒj*

*M.*

Venæ  
sectio.

Sanguinis moles promptissimè tollitur V. S. quæ idcirco in  
vigiliis protractis est magni usus. Copia sanguinis universo  
corpori, tum cerebro ipsiusque membranis est molesta, uti  
superiori capite vidimus. Hinc contingit Vigiliis comitem  
esse Cephalalgiam. Non tantum autem ad Cephalalgiam, sed  
& somnum alliciendum facere V. S. ex eo perspicuum est,  
quod à V. S. homines soleant esse in somnum proclives, adeo  
ut necesse sit aliquando illorum spiritus varia ratione excitare  
fi



si somnum abigere studeamus. Quamvis enim in sanguinem immediatè agat V. S. cum imminuendo, agit tamen mediatè in spiritus animales itidem V. S. Nempe sanguis non tantum pabulum præbet spiritibus, sed & impetum & efficaciam. Ergo propriè loquendo spirituum motum nimium compescunt, primariò anodyna, hypnotica, narcotica, adeoque de illis egimus in superioribus: secundariò illud facit V. S. uti dictum est. Quamvis autem secundariò spirituum motum compescat V. S. non est tamen existimandum, primò debere spiritus compesci, tum demum respectu sanguinis institui V. S. Venæ sectio est inter remedia universalia collocanda, quæ rectissimè auctores animadverterunt specialibus esse præmittenda. Id si negligatur vera medendi methodus invertitur. Quid? quod *Opii* usus ante V. S. celebratam sæpius in magnas conjiciat angustias ægotantem?

In Febris igitur continuis & ardentibus, ægroto existente plethorico, sanguis V. S. necessario educendus est. Etenim si vasa in pressione ordinaria omnino repleta sint, non potest non pressio præternaturalis & nimia, sanguinis expansione comitata, insignem universo corpori & imprimis cerebro ejusque vasis creare molestiam. Huic causæ & symptomatibus exinde originem ducentibus medetur citissimè ac tutissimè V. S. Quanto enim magis molesta hæc pressio imminuitur, tanto magis intestinus sanguinis motus, tanto magis æstus, tanto magis expansio vasorum molesta, imo tanto magis febrilia imminuuntur & præcaventur symptomata. Non quod in V. S. ipsa, hoc est, tam diu quam sanguis è vena aperta effluit, circulationis celeritas imminuatur; ea enim tum videtur aliquomodo augeri, ut scilicet vas exhaustum iterum repleatur; verum cum parte sanguinis evacuata, reliquo majus concedatur spatium, revera pressio & æstus imminuuntur, & pulsus ægotantis antea frequentior postmodum evadit moderatior & minus frequens. Hujus rei indicium manifestissimum occurrit in Pleuritide; etenim eo ipso momento quo sanguis educitur, dolorem & anxietates imminui ægroti & sentiunt & fatentur. Insigne autem levamen, quod V. S. præstat, est liberior respiratio, non tantum ab imminuta inflammatione, quæ tardius

Ea locum  
habet in fe-  
bribus.



dius contingit, sed præcipue à depletione vasorum pulmonalium ortum habens. Hæc enim sanguine nimium repleta, vesiculas pulmonis, imo ipsam tracheam arteriam nimium comprimunt, adeoque respirationem difficiliorem reddunt. Hæc est vera ratio anxietatum summarum, quæ perversè ab halitibus & vaporibus deducuntur, id quod velim juniores diligenter animadvertere. *Riverius l. 1. Obser. 47.* habet historiam Episcopi *Nemausensis* quinquagenarii, febre continuâ & maligna laborantis, cum vigiliis perpetuis ad septimum usque diem, huic quinquies fuit secta vena, & sanguis satis copiosè eductus, bis à duobus aliis medicis, ter postquam ipse esset advocatus. Feliciter pristinae sanitati restitutus est æger.

Purgantia  
quoque  
profunt

Quamvis promptissimè sanguinis copiam. V. S. minuat, minuit tamen quoque eandem purgatio, imprimis repetita. Requiritur illa sæpius in vigiliis nimis, nisi obstet dispositio, vel morbus inflammatorius. Hac ratione exhauriuntur impuritates primarum viarum, quæ alias facile molestias pariunt. Memini me in vigiliis protractis quoque præscripsisse Enema cum summo successu. Horum formulas capite sequente proponam.

V. S. in  
sanguinis  
copia.

Ut ad vigiliis nimias revertar, in hisce aliquando sanguinis copia crebro molesta imminuenda est, licet illa non nisi diligenti factò examine manifesta fiat. Hujus rei recens habeo exemplum in matrona Rotterodamensi, quam medicus ordinarius adeo non judicabat abundare sanguine, ut putaret ipsam melius habituram, & robustiorem futuram, si menstrua omnino cessarent, adeoque ejus fluxus supprimendi mentionem fecerat apud ægrotam, quæ tamen prudens annuere noluit. Ratio quæ illum in hanc impulerat sententiam, erat debilitas, & deliquium animi sæpius recurrens. Cum autem ego diligenter animadvertissem ægrotam esse vertiginosam, cordis palpitationibus obnoxiam, atque venas admodum tumidas: deinde menstrua diu parcius fluxisse fœminæ in vigore ætatis constitutæ, facile intellexi non inopiam sed copiam sanguinis esse molesta, nec leipothymiam à defectu sanguinis in corde, sed à vertigine & repletione vasorum deducendam, nec dubitavi V. S. in pede imperare, quæ etiam tanto cum successu est celebrata, ut ab hoc uno remedio cuncta symptoma-

ta



ta fuerint mitigata, & somnus (vexaverant enim quoque vigiliæ) provocatus.

Impetus sanguinis non tantum ab ejus copia, & febris, sed & ab animi pathematibus dependet, adeoque ad hæc quoque curam dirigere oportet. In genere ad animi pathemata vehementia & repentina V. S. valere usus docuit. Itaque hæc, si nihil est quod impediatur, in usum vocari potest. Cum autem in hoc casu non tantum sanguinis impetus sit major, sed & spirituum animalium, simul in usum vocanda sunt quæ spiritus animales nimium agitados delinire in superioribus diximus. Nihil animum reddit magis tranquillum, nihil spirituum motum nimium blandius compescit, quam somnus placidus. Exhibeatur itaque pilula è *Laudano opiato*, vel *Laudanum liquidum Cydoniatum*, vel etiam *Laudanum Tartarifatum*. En adhuc aliam formulam

Quæ cura  
conveniat  
animi pathematibus in  
genere?

℞. *Cochenilia*, *Nitri anodyn.* aa. ʒss  
*Laud. op. gr. j. syr. Diacod.* ʒj  
*Aq. Meliss. q. s.*  
*M. F. Haustus.*

Quicumque his vestigiis insistere volet, is inveniet ab exigua dosi, in non assuetis Opio, effectum consequi non contemnendum.

Quemadmodum repentina commotio eandem generalem curam exigit, ita respectu specialium pathematum animi, curandi ratio multum discrepat. Aliter tractandus est, cui tumida bile turgēt hepar: aliter qui est animo tristi & abjecto. Non est hujus loci de affectibus in specie agere. Oportet observare, an animi pathemata habeant adjunctam orificiorum cordis, ut & vasorum pulmonalium explicationem, an vero contractionem. Explicatio & dilatatio cordis, adeoque gaudium moderatum & tranquillum corpori nostro est utilissimum; in id igitur, quantum pote, medico incumbendum, ut ad illum statum ægrotus & commotus reducatur. Fit illud prudenti colloquio, vel etiam medicamentis, utraque debent esse opposita illi excessui ad quem vergere laborantem animadvertimus. Si ergo nimia cordis adsit dilatatio & sanguinis orgasmus, *opiata* & *hypnotica* jungantur medicamentis nimium mo-

In specie.



tum compescantibus. Profunt in hoc casu *Plantago*, *sempervivum majus*, *portulaca*, *millefolium*, *rosa rubra*. *Lapis. prunellæ alumen febrifugum*, *nitrum Corallatum*, *Spir. Vitrioli*, *Salis, Nitri*. *Pulvis Pannonicus rubens*. Composita varia ex his & similibus præparari possunt.

℞. Rad. & fol. *Plantag.* m. iij

*Herb. Portulac.* m. ij.

*Flor. Rosar. rubr.* p. j.

*Capit. Papav. alb.* ℥jss

*Coq. s. a. ex aq. pura colat.* ℥xxx Add.

*Syr. Diacod.* ℥j

*Sp. Vitriol. q. i. ad gratam aciditatem.*

Cui formula haustus magis arridet, is sequenti uti potest.

℞. *Succi Plantag. depurat.* ℥ijss

*Lapid. prunell.* ℥ss

*Syr. Diacod.* ℥ss

*M. F. Haustus.*

qui potentior fieri potest, si id necessitas postulet, additis aliquot guttis *Tincturæ Opii*.

Si vero animus abjectus & constrictionis cordis animi pathemati jungatur, medicamentis opiatis misceri debent spirituosæ. Ex gr.

℞. *Aq. Meliss.* ℥ij

*Theriacal. min.* ℥j

*Tinctur. Croci.* ℥j

*Opii. gt. x.*

*Sal. Volat. C. C. gr. vj*

*Syr. Rubi idæi* ℥ss.

*M.*

Sumat æger hujus mixturæ partem dimidiam, postmodum cochleatim continuando. Huc pertinent ea quæ superius laudavi, ubi affectioni hypochondriacæ junguntur vigiliæ.

Sequitur ut videamus quo pacto sanguis ad depressionem cerebri possit reddi aptior. Id fit exhibendo cibaria quæ facilis sunt digestionis, & somnum blandè alliciendi vi prædita. Talia sunt ea quæ ex *hordeo*, ejusque *farina*, *alicâ avenaceâ* & similibus præparantur. Hæc satis sunt manifesta ex iis quæ superius

Quomodo  
sanguis  
ad depres-  
sionem ce-  
rebri redda-  
tur magis  
aptus?

de



de causis vigiliarum diximus. Si enim inedia in fanis vigiliarum sit causa, non est mirum si ægroti, appetitu prostrato laborantes, & ab omni ciborum usu abstinentes in somnum sint minus proclives. Non tamen omnibus vigilantibus indifferenter sunt exhibendi cibi. In morbis acutis, quo corpora plus nutriveris, eo magis læseris. Idcirco *Hippocrates* scripsit de victu acutorum. Diæta commoda igitur potissimum commendanda est iis, qui à morbo chronico languent. Si abusus potus aquei *Tinctura Thee*, potus *Coffe* sanguinem aquosiores, & ad depressionem cerebri reddiderit ineptiores, is paulatim subtrahendus est. Quod si appetitus langueat, is *spirituosus*, *Vinis medicatis*, *Elixir. proprietatis*, *Extracto Absinthii*, *Spiritu cochlearia*, exercitio moderato est excitandus. Utilia quoque sunt in hunc finem acida varia, & condimenta ex acidis præparata. Imo aliquando appetitui aliquid est indulgendum; videmus enim hoc pacto nonnumquam eundem prostratum excitari. Mihi aliquando ova *Sturionis condita* profuerunt.

Ultimum, cujus inter indicationes generales feci mentionem, est parti laboranti succurrere. Itaque cum caput & cerebrum in hoc casu malè mulctentur, iis etiam prospiciendum est medicamentis topicis. *Folia lactuæ* capiti imposita & sæpe renovata in vigiliis somnum conciliaffe dicuntur, ubi ne opiata quidem contulerant. Præparantur quoque *Emulsiones* externè capiti applicandæ. Sequens *Sennerti* non est inconcinna.

Medica-  
menta ex-  
terna.

℞. Sem. Lactuæ. ʒij. papav. alb. ʒv

Nucleor. Persicor. ʒij

Aq. Lactuæ, Papav. alb. aa. ʒijß anethi. ʒj

F. Emulsio pro Epithemate.

*Gabelchoverus* refert *Michaelen Kullenbachium* per tres septimanas febre Ungarica laborantem cum dolore capitis gravissimo & vigiliis, sequenti remediorum usu ad pristinam valetudinem rediisse.

℞. Syr. de Papav. simpl.

Aq. Lact. sem. anis. aa. ʒijß

M.

Capiti applicet sequens Epithema.

℞. Aq. Verben. Lact. Fl. Lil. conv. aa. ʒvj

Ab-



*Absinth.**Acet. Rosar. aa. ℥j**Ol. Nymphaea. Camom. aa. ℥vj**M. pro Epithemate capitis.*

Obs. 34. Cent. v. vid. quoque Obs. 22, 23, 46. &amp;c.

*Epithema hypnoticum Mynsichti hoc modo componitur.**℞. Aq. Rosar. fragrantiss.**Lactuca. aa. ℥iv**Opii spagyr. ppt. ℥j**Croci orient. ℥ss**Spong. in arbusto rosar. nat. ℥j*

Misce dissolvendo fideliter, postea mixtura imbuta lintea temporibus tepidè applicentur, naresque madefiant, unde protinus dormire incipiunt.

*Lotichius l. 1. obs. 3.* refert sese cum successu præscripsisse sequens *Oxyrrhodinum*

*℞. Ol. Rosar. ℥j**Acet. ros. ℥ss.**Aq. Rosar. ℥vj**Camphora**Croci aa. ℥j**Opii aut. dissolut. ℥ss**M. F. Frontale.*

In affectibus Hypochondriacis utile potest esse *Epithema Lotichii*, quo is feliciter in Hemicraniâ est usus. Est autem descriptum Lib. 2. Obs. 3. hoc modo

*℞. Aq. Vitæ compos. è spec. arom. ℥jss**Simplic.**Salvia. aa. ℥j**Opii Acet. sol**Camphor.**Croci aa. ℥j**M. diligenter ad vitrum.*

Et quoniam hæmicraniæ facta est mentio, quæ etiam aliquando vigiliarum est causa, eam experimento muliebri sanatam vide apud *Zacutum Lusitanum* Histor. Med. Lib. 1. histor. 7.

Non incommodè quoque poribus applicari possunt *Em-plastra*



*plastra hypnotica.* Talium descriptionem unam atque alteram habet *Sennertus l. i. p. ii. c. i.* Possunt quoque similia ex tempore præscribi, si nempe *Opium* alicui emplastro cephalico commisceatur. Qui plures medicamentorum externorum formulas desideratis *Sennertum*, *Hartmannum*, *Riverium*, *Lotichium*, *Tillingium* consulere potest.

Quamvis parti affectæ non admoveantur, capiti tamen conferunt lotiones pedum, adeoque hoc loco, ubi de medicamentis externis agimus, earum quoque meminisci oportet. Præparantur eæ ex *Foliis Lactuc. Violar. Solani, Nymphaeæ, Capit. Papav. alb. Fl. Verbasc. Meliloti, rosar, hyoscyam.* Sequens formula est *Sennerti.*

Lotiones  
pedum.

℞. *Fol. Lactuc. alkekeng. solani.*  
*Malv. Violar. aa. m. ij.*  
*Flor. rosar. nymph. aa. m. j.*  
*Melilot. m. ℞.*  
*Capit. Papav. alb. no. xij.*  
*Summit. anethi m. j.*  
*Cort. Mandrag. ℥j.*

*Coq. in aq. pro lotionem pedum.*

Ego in Vigiliis protractis, & affectu hystericæ passionis æmulo aliquando feliciter usus sum *Herb. Absinth. Abrotan. Puleg. Rutæ Sem. Levistic.* Pluribus nominibus hæc conducere possunt. Sive enim consideres hoc pacto lymphæ & sanguini fluiditatem majorem conciliari, sive etiam particulas aqueas sanguinis & spirituum animalium æstum compescere, sive etiam sudoris ope excretionem particularum acrium fieri utilissimam, sive etiam sanguinem ad depressionem moderatam cerebri reddi aptiorem, saltem illud constat experientia, hæc feliciter & cum successu in usum vocari.

*Franciscus Hildesheim* inter empyrica ex *Octavio Horatiano*, *Empyrica.* præscribit p. 413.

℞. *Opii gr. iij*  
*Myrrh.*  
*Rutæ,*  
*Thuris aa. q. s.*

Effice cum *cera* pastillos scrupulares, & impone umbilico,  
 K tam



tam fomnum præstant, quam alvum movent. Habet is plures medicamentorum tum internorum tum externorum formulas, quæ apud eundem videri possunt. Vide quoque *Claudinum* in *Empyricâ rationali* l. III. c. 9.

Qua ratio-  
ne specia-  
libus indica-  
tionibus sit  
satisfacien-  
dum?

Restat ut videamus qua ratione sit satisfaciendum speciali-  
bus indicationibus. Si ergo diligenti facto examine nullum sit  
dubium quin vitium aliquod in conformatione, atque partibus  
solidis lateat, quod curationem non admittit, scilicet vel tu-  
mor, vel tumores scirrofi, vel dilatatio nimia vasorum, vel  
simile quid, æger incassum multis medicamentis non est fa-  
tigandus. Præcipuè diætæ exacta habenda est ratio, & sym-  
ptomatibus occurrendum. Oportet meminisci, hæc confor-  
mationis vitia non ideo obesse, quod ex.gr. parvula aliqua ce-  
rebri portio producendis spiritibus animalibus sit ineptior,  
sed præcipuè, quod hac ratione sanguinis circulatio non sine  
molestiâ possit absolvi, id quod ad vitam & sanitatem quam  
maximè est necessarium. In eo enim mihi videtur valdè elu-  
cere summi Creatoris & sapientia & potentia, quod cum ef-  
ficacissima pressio circulationem absolvat, uti alias fufius de-  
monstravi, ea tamen peragatur absque ullo molestiæ sensu in  
fanis, imo cum quadam jucunditate. Qua ratione enim ho-  
mo motui voluntario perficiendo esset aptus, nisi sanguis va-  
lidè premeretur? Qua ratione continuam effugeret molestiam,  
continuos dolores, nisi hæc absolverentur blandissimè? In  
hoc ergo consistit, ex hoc oritur molestia & prima labes ma-  
li, quod ex.gr. tumor comprimat vasa arteriosa & transitum  
sanguinis reddat difficilem, unde pulsatio molesta & reliqua  
oriuntur symptomata. Si ergo nimia plethóra producat vel  
minetur graviora accidentia, ea est minuenda, non, quod hac  
ratione malum possit expugnari, sed symptomata præcaveri.  
Si sanguis nimium æstuet aut expandatur, huic medicina est  
facienda, si ille idem ad motum, sit ineptior, fluidus est  
reddendus. Quomodo singula hæc fieri debeant & in præ-  
cedentibus est dictum, & dicetur in sequentibus. Sufficit  
hoc loco inculcasse id, in quo cardo totius hujus rei vertitur, cum  
hæc, quod ego quidem sciam, ab auctoribus non annoten-  
tur, cum tamen sint scitu utilissima. Experientiâ enim didi-  
ci,



ci, homines posse laborare diu affectu aliquo in partibus solidis & tamen superstitibus esse si benè tractentur, posse itidem malè sedula curâ citius tolli. Exemplum hujus rei habeo recens in ægroto, noctem inquietam sæpe numero traducente, qui cum tuberculis pulmonum laboraret, à me tamen aliquandiu fuit conservatus. Postmodum extra urbem profectus à medico hæc ignorante, & mea salutaria & humanissima monita contemnente, perversè tractatus non diu superfuit. Me autem rectè calculum posuisse ex eo erat manifestum, quod omnia juxta prognosin à me diu ante factam, præter spem autem vanam, qua ipsum lactaverat alter, evenerunt. Si serum in cerebro hæreat copiosum illius educationi, si vulnera, illorum curationi est incumbendum.

Si febris producat vigilias, id quod est frequentissimum, in curatione magis febris ipsa, quam vigiliæ considerandæ sunt. Si febris tollatur, facile evanescunt vigilias, febre neglecta vigiliis debite occurri non potest. Sublata causa tollitur effectus. Nihil autem impedit & febris & vigiliarum curationi simul incumbere, id quod aliquando necessarium, imprimis quando vigilias sunt urgens symptoma.

Febris tollenda.

Si malignitas jungatur, huic est occurrendum. Fit illud præcipue per sudorifera. Sudor si copiose profluat, melius habere solent ægri, & citius à vigiliis molestis liberari. Verum qua ratione Febri & malignitati resistendum sit, postmodum erit dicendum, in doctrina de Febribus.

Malignitati resistendum.

Si alii morbi Pleuritis, Peripneumonia, Dysenteria, Calculus producant vigilias protractas, illorum curationi imprimis est incumbendum. Possunt hæc videri per se nota, uti revera sunt, non tamen ideo à me prætereunda, quandoquidem in hæc obvia aliquando impingitur. Hujus rei unicum referam exemplum. Vocatus fui aliquando ad ægrotam vigiliis molestissimis, febre, & Peripneumoniâ leviori laborantem. Peripneumoniam medicus, qui ipsam tractaverat, non videbatur animadvertisse, & in usum vocasse medicamenta opiata satis efficacia. Tantum autem aberat ut ægrotam in somnum incideret, ut è contrario sese expositam videret summis anxietatibus. Postquam ita noctem insomnem & molestissimam tra-

Alii morbi expugnandi.



duxisset, ego sequenti die advocor, video neglectam esse Peripneumoniam, ad hujus curationem me statim accingo, & ita brevi tempore placidè dormit, & restituitur ægrota.

Diæta.  
Aër.

Restat ut paucis videamus, qualis diæta vigilantibus sit præscribenda. Aër sit purus & temperatus, in febribus ad frigiditatem, in morbis hypochondriacis ad caliditatem vergens. Cubiculum, in quo decumbit æger, sit obscurum, & à strepitu remotum, præcipuè in febribus, & morbis malignis; in hoc autem posteriori casu caminus sit apertus, & ignis in foco luceat. Per pavimentum effundatur acetum, accendatur etiam pulvis pyrius. In morbis & angustia pectoris requiritur cubiculum spatiosum, minimè subterraneum.

Tegumen-  
ta.

In tegumentis requiritur mediocritas. Nimia tegumentorum moles æstum intendit, anxietates sæpe adauget, adeo-  
qui somnum excutit. Stragulorum penuria sudoris eruptionem impedit, cum tamen ea criticè sæpe morbum jugulet. Tempestatis anni, & consuetudinis hic aliqua habenda est ratio.

Cibus &  
Potus.

Cibus & potus hic multum possunt. In omnibus morbis acutis, & vigiliis, inde ortum ducentibus, tenuissima convenit diæta. Abstinendum ab aromaticis & spirituosus. In morbis chronicis, convenienti & facilis digestionis nutrimento sanguis ad cerebri moderatam depressionem reddendus est aptus, uti superius quoque indicatum est. In morbis scorbuticis spirituosæ & vinum conveniunt. Nempe ubi sanguinis vigor imminutus est, ubi ventriculus languet, nisi in usum vocentur quæ visceribus debilibus robur addere valeant, diu protrahetur malum pertinax. Existimant quidam in vino ejusque spiritu reperiri vim & particulas narcoticas, quod mihi videtur à veritate esse alienum. Effectus hic non particulis opiatis & narcoticis, verum pressioni & dilatationi sanguinis majori tribuendus est. Dilatationem sanguinis sequitur repletio major vasorum minimè molesta, & somnus. Accedit quod hi liquores non tantum curas abigant, sed & particulæ eorundem spirituosæ, non satis adhuc subactæ, admisceantur spiritibus animalibus, unde in principio quidem major excitatur agita-  
tio,



tio, postmodum autem torpor, ad motum & cerebri expansionem ineptitudo.

In morbis acutis quies est necessaria, ita tamen ut ne ægroti statim in principio nimium lecto mancipientur; illud enim sæpe non parum nocet. Observavi enim homines, in re lauta constitutos, quum sanitatem & vitam ament, statim in principio lectum & decubitum amplecti, vix aut ne vix quidem federe, cum tamen repentina illa mutatio, absque urgente necessitate, sæpissimè noceat: adeo ut Scyllam vitantes in Charybdim incidant. Stoicorum erat præceptum *secundum naturam vivere*. Id quod *Seneca* ad *Lucilium* scribit, hic quoque locum habet. *Cum rerum natura delibera. illa dicet tibi se & diem fecisse, & noctem* Ep. 3. Ego dico: in principio morbi, ubi vires constant, sede: modica defatigatio somnum allicit, abigit continuus decubitus, decumbendi tum erit tempus ubi morbi status & vires debiles sessioni reluctabuntur. In morbis hypochondriacis & chronicis exercitium, equitatio, vectio, navigatio, ambulatio ad modicam sudoris eruptionem plurimum profunt.

Motus & quies.

De somno & vigilia non opus est ut disputemus, cum jam in eo simus toti, ut somnum moderatum, post vigiliis protractas, alliciamus.

Somnus & vigilia.

Alvum liberam & potius laxam quam adstrictam exigunt vigiliæ pleræque, nisi ortum suum debeant Dysenteriae, Diarrhææ aut similibus morbis. Non raro contingit, post copiosiore alvi depositionem, ægrotos in somnum placidum incidere, atque hinc magis juvari quam ab assumpto opio. Inter excreta sudores quoque recensentur, magni usus in caussone & febribus malignis. Sudoris excretioni affinis est, & aliquando jungitur urinæ copiosior evacuatio, in hoc casu imprimis utilis. In affectibus hystericeis semper menses respiciendi: oleum & operam facile perdet medicus, si hosce negligat.

Excreta & retenta.

Quemadmodum vigiliæ, ita plurimi alii morbi, ad pathologiam cerebri pertinentes, à passionibus animi dependent. Itaque ut resistent monendi sunt ægroti. Facile quidem cum valemus recta consilia ægrotis damus, sed tamen nisi recta consilia & ratio valeant, miser est ægrotus, infelix medicus

Animi pathemata.



qui suæ industriæ commendatum miserum , à passionum impetu continuo transvorsum rapi & videt , & dolet , & tamen à molesta hac commotione revocare non potest. Præter ea quæ superius explicata sunt , prudentes amici , sapientia colloquia , lectio librorum non futilium , sed utilium multum possunt.

## CAPUT TERTIUM.

*De Vertigine.*

Vertiginis  
descriptio  
vulgaris.

Examina-  
tur.

**D**Escribitur Vertigo quod sit *falsa conversionis & circumgyrationis imaginatio , ab inordinato & circulari spirituum animalium , in cerebri parte anteriori , motu exorta.*

Verum multi Vertigine correpti & metuentes ne cadant , probè norunt objecta externa non circumgyrari , sed sentiunt oculis veluti circumfusam caliginem , & impotentiam quandam sese erectos sustinendi , adeo ut fulcimento egeant ne concidant. Hinc adeunt medicum , conqueruntur de ægritudine , & curationi incumbunt. Deinde , postquam accuratior cerebri anatomia docuit , ventriculos ejus non esse spirituum animalium promptuaria , sed eosdem in inane veluti spatium definere , constat , spiritus in tubulis cerebri medullaribus contineri , atque ex iisdem in nervos derivari , hinc per universum corpus propelli. Cum autem hi ductus sint admodum exigui , & motus spirituum animalium progressivus continuus , concipi non potest , quomodo circumgyratio ibi locum habere possit. Quæ de cerebri anteriori parte dicuntur , etiam innituntur præjudicio antiquorum , sensus internos certis quibusdam cerebri partibus tribuentium. Verum è sequentibus apparebit , nervos opticos , non cerebrum affici , causam autem efficientem esse sanguinem arteriis carotidibus contentum. Non est ergo Vertigo falsa imaginatio , non produci-  
tur à spirituum animalium circumgyratione , neque etiam in cerebri parte anteriore.

Tractatio-  
nis ordo.

Antequam autem de vera causa vertiginis agamus , prius considerandum est , certis quibusdam sensationibus , deter-  
mina-



minatum spirituum animalium in musculos influxum, certis quibusdam passionibus diversam cordis agitationem & pressionem, ut & in diversas partes spirituum influxum comitari. Deinde quomodo ii qui sese circulariter aliquandiu circumegerunt, vel cadant necessariò, vel saltem in casum sint proclives? Tum facile patebit, quomodo conspectum ex alto, & animum timidum comitentur titubatio, vertigo & aliquando casus. Hisce præmissis causa vertiginis vera fiet manifesta.

Certis quibusdam sensationibus jungi determinationem spirituum constantem, patet, si quis animadvertat nos palpebras immotas continere non posse, si aliquis subito ingruat, tanquam colaphum inflicturus, quamvis probè noverimus illud tantum animi gratia fieri. Eodem modo repentinum motum manus, ante faciem alterius sequitur nictatio oculorum.

Certis quibusdam sensationibus jungi certas spirituum determinationes.

Passiones animi comitari sanguinis & spirituum agitationem & determinationem diversam, patet ex irâ, sanguinem & spiritus in oculos, faciem, vocis & respirationis organa, cum impetu insolito, determinante. Eodem modo videmus pudibundorum faciem rubore suffundi, metuentium pallore. In metu spiritus versus pedes determinantur, cum impetu & confuso motu. Hæc omnia ita naturalia sunt, & ordinaria, ut quamvis voluntas sese opponat, non possit tamen ea pro libitu immutare: ex. gr. mallet aliquis faciem pudoris indicia minimè prodere, ne alius rem latentem detegat; tantum tamen abest ut possit ruborem suppressere, ut eo ipso signa pudoris fiant manifestiora.

Passionibus agitationem & determinationem diversam.

Hisce ritè perpensis, jam porro intelligimus, spiritus & sanguinem, si sæpe eodem modo impellantur, & versus easdem partes, exinde facilitatem oriri per eisdem ductus, & versus easdem partes, commodè influendi: quemadmodum Philosophi dicunt, habitum esse qualitatem adventitiam ad operandum cum facilitate, eumque acquiri crebris actionibus. Ubi autem in motus introductus & aliquandiu continuatus est, non est in nostro arbitrio eum statim suppressere, aut alium introducere. Hinc est, quod, si quis sese aliquandiu in orbem circumegerit, & voluerit sese repentè reprimere, necesse ha-

Spiritus & sanguis solent retinere aliquandiu eundem motum & determinationem eandem.



habeat vel titubare, vel cadere: nempe determinatio spirituum plane requiritur alia, ad musculos successivè inflandos & remittendos, quam ad eosdem simul & æqualiter tendendos, hinc fit, quod ubi prior illa determinatio aliquamdiu continuata est, altera subito introduci non possit, priori planè abolitâ: adeo ut in vacillante, ut ita dicam, spirituum determinatione, & ambigüâ musculorum tensione, atque flacciditate, homo necessariò vel titubet vel cadat.

De unione  
mentis cum  
corpore.

Non est hujus loci, ulterius hæc Philosophicè & fusè explicare, sufficit si in memoriam revocemus, hæc ita sese habere, atque illud oriri ex arctissimâ unione animæ & corporis. Nempe mens non cogitat, non vult, non ratiocinatur, nisi mediantibus spiritibus animalibus: corpus nihil patitur, objecta in sensuum externorum organis nullum excitant motum, quin mens illud percipiat, & spiritus determinet, prout impressiones sensuum illud requirunt. Cumque omnes nostri conservationem & utilitatem amemus, hinc perceptionibus, quæ nostrum commodum aut incommodum respiciunt, statim junguntur passionibus cum majori vel minori sanguinis & spirituum commotione. Cumque hæc sæpe fiant, & ferè eodem modo, hinc oritur facilitas & consuetudo influxus spirituum versus has aut illas partes, prout perceptiones variæ illud requirere videntur. Ita videmus nos aliquando, per plateas obambulantes & de rebus feriis agentes, obvios salutantes iterum salutare, cum tamen paulo post neutrius simus memores, tanquam si spiritus spontè & automaticè motus illos corporeos peragerent. Mens nostra, motus omnis expers, tantum agit cogitando & volendo, adeoque nullum motum excitare in corpore, nullum suppressere potest: omnis ejus potestas consistit in voluntate, atque hujus tantum in determinatione spirituum versus has aut illas partes, à qua sanguinis motus semper, vel plerumque saltem, immutatur. Spiritus animales voluntati obediunt, si organa omnia ritè sint disposita, nisi adeo vehemens introductus sit motus alius, ut is statim immutari non possit.

Quomodo  
circumgy-  
rationis sen-  
sus in nobis  
excitetur?

Circumgyrationis sensus in nobis excitatur naturaliter, si objecta externa in orbem circumgyrentur, si nos ipsi corpus  
no-



nostrum celeriter circumagamus, vel si subito caput circumducamus. In omnibus hisce casibus manifestum est, tunicæ retinæ, adeoque nervi optici, fibrillas successive ab aliis & aliis objectis moveri, unde tum in nobis excitatur circumgyrationis sensus.

Ubi autem in loco edito, aut præcipitio, constituti, celeriter versus inferiora respicimus, fibrillæ nervorum opticorum, à variis objectis, successive afficiuntur, tanquam à corporibus in orbem actis. Hujus rei ratio est, quia, quo altius sumus elevati, tanto longius, tanto plura objecta prospiciamus & cernimus. Si itaque repente & ferè perpendiculariter terram respiciamus, objecta illa omnia quæ in rectâ lineâ, ad horizontem usque, occurrunt, successive, quasi celerrimo gyro circumrotata, nobis repræsentantur, adeoque vertiginis sensum in nobis efficiunt. Cum autem illum sensum comitetur consideratio altitudinis, in qua consistimus, & periculi, in quo versamur, & defectus fulcri, metus repente ingruens determinat spiritus, spontè versus musculos crurum contententes, confuse in musculos nunc hos, nunc autem alios. Turbulentus ille spirituum influxus, flacciditatem musculorum antagonistarum comitem habet, nec rationis imperium, sed passionis sequitur impetum: unde necessario & vacillatio & casus. Ut enim erecti stemus, musculorum æqualis & constans requiritur tensio, quæ hic planè desideratur.

Quomodo  
illud fiat, ubi  
è loco edi-  
to prospici-  
mus?

Vertiginis itaque morbosæ causæ erunt, quæcumque fibrillas nervorum opticorum successive ita movere possunt, ut circumgyrationis sensus in nobis excitetur, vel quæ impediunt spirituum æqualem & sufficientem in musculos influxum. In priori specie spiritus patiuntur seu afficiuntur, in posteriori non agunt debite. Prioris speciei causa ordinaria est sanguis, extraordinaria partes solidæ, vel excrementa à sanguine secreta, quorum tamen ἐνέργεια in eo potissimum videtur consistere, quod sanguinis circulationem aliquomodo immutando, pressionis impetum aliquomodo invertant. Posterioris causa sunt spiritus vel motu turbulento, vel defectu peccantes. Singulas has causas breviter percurramus.

De Verti-  
gine mor-  
bosâ.

Sanguis vel copia suâ vertiginem producit vel repletionem  
L vaso-

Ejus causæ



funt fanguinis copia.

vasorum nimia. Sanguinis nimiam copiam producere vertiginem apparet in iis, qui ob Plethoram vere soliti sunt ad V. S. recurrere. Si hi V. S. differant, sentiunt, non tantum capitis gravitatem, sed & scotomiam oculis obversantem, aliquando gravem Vertiginem, quæ illos cogit ad V. S. confugere, qua instituta statim symptomata hæc imminuuntur. Quod si accedat calor aëris cito augmentum capiens, tum hi pejus habere solent, quandoquidem repletio vasorum major est ubi à calore sanguis subito dilatatur.

Repletio vasorum in febribus.

Eadem illa causa in febribus sæpe vertiginem producit, quando scilicet sanguinis copia, ob dilatationem morbosam, arterias nimium replet. Nempe arteriarum carotidum rami interni non tantum adjacent proxime nervis opticis, sed eosdem quasi ambiunt, hi ergo nimium repleti, nimium expansi, premunt nervos opticos à parte inferiori versus superiorem in orbem, quandoquidem pulsatio cordis & arteriarum, à majoribus vasis versus minora progrediens successivè, fibrillas nerveas impellit, unde circumgyrationis excitatur sensus.

In morbis Hypochondriacis, & Scorbuticis.

Producit quoque sanguis, repletionem nimiam, vertiginem in Hypochondriacis & Scorbuticis. Quamvis enim sanguis, ob nimiam copiam & dilatationem, vasa etiam repleat, distinguenda tamen est repletio vasorum, de qua nunc agimus, à priori, quandoquidem planè aliam agnoscit causam. Nempe in Hypochondriacis & Scorbuticis sanguis, ad motum ineptior, minimas arteriarum ramificationes non satis celeriter permeat, unde rami majores, & quidem nervis opticis adjacentes, magis replentur, nervos proximos premunt, & ita vertiginem excitant. Pressio sanguinis continua est, si ergo sanguis non sit satis aptus ad motum progressivum satis prompte absolvendum, cor contractione iteratâ & validâ sanguinem versus superiora impellens, causa est, cur nervorum optico- rum fibrillæ exteriores successive comprimantur. Concurrit in hoc casu sæpe ventriculi debilitas. Vide *Forestum l. x. obs. 49.* Solent hi homines esse meticulosi, unde sanguinis & spirituum motus excitatur turbulentus, symptomata hæc graviora efficiens, uti in sequentibus videbimus.

Confirmat.

Optime hæc cum experientia quadrant. Si quis enim plethori-



thoricus aliquandiu pronus corpus & præcipuè caput versus terram inclinet, elevatus percipiet sese vertigine correptum, manifesto argumento, à nimia repletione arteriarum cerebri, & per consequens, compressione nervorum opti-<sup>tio præce-</sup>corum, pro-<sup>dentium, ab</sup>cedere hanc affectionem. Videmus etiam vertiginem sæpe <sup>experientia.</sup> præcedere Apoplexiam & Convulsiones: horum morborum signum esse oculos immotos & visum abolitum, postmodum ostendetur: unde patet, vertiginem, cum sit minor gradus graviorum symptomatum, exteriores tantum opti-  
corum nervorum fibrillas afficere in orbem, Apoplexiam & convulsiones eisdem vehementius comprimere, adeoque eorum functiones ad tempus planè abolere. Patet etiam hinc quæ sit connexio inter Vertiginem & Apoplexiam, cum hæc sit omninò obscura, si vertigo tantum consideretur tanquam falsa imaginatio, à spirituum in orbem motu, producta.

Consentiunt hæc etiam cum Etymologia vocabuli. Symptoma hoc Græci vocant *σκότωμα* & *σκοτόδιον*, indicantes in hoc casu visum obtenebrari, & ex illa obscuracione oriri vertiginis sensum. Quanto enim vividius fibrillæ nervorum opti-  
corum à radiis luminis moventur, & quanto motus ille minus impeditè ad sensorium defertur commune, tanto clarior luminis sensus in nobis efficitur. Ubi autem aut nervi debilius afficiuntur, aut sensus ille non potest satis commodè ad interiora deferri, tanto minor est claritas, tanto major obscuritas. Cum autem ob compressionem nervorum motus debilius & perversè ad interiora deferatur, hic nascitur *σκότωμα* & *σκοτόδιον*. In Apoplexia totalis est obtenebratio, & sensuum omnium abolitio, ob omnimodam compressionem, aliqua & minor compressio, qualis in vertigine occurrit, gradus quidam est ad Apoplexiam.

E vocis Etymologiâ.

Vidimus causas compressionis ordinarias, examinandæ sunt extraordinariæ, nempe quæ aliquando, rarius tamen, occurrunt: hæ sunt vitia solidarum partium. Nempe si vasa cerebri sint nimium dilatata, facile comprimuntur nervi optici, & excitatur vertigo. Ita vesiculæ aqueo humore refertæ, adeoque progressivum sanguinis motum impedi-  
vertiginem possunt. Quod si sanies aut serum effundatur in cere-

Vitia solidarum partium.



cerebri substantiam, aut aqua limpida ventriculos cerebri repleat, facile excitari potest Vertigo. Horum omnium exempla in Anatomia practica *Boneti* videri possunt. Nullum est dubium, si copia daretur dissecandorum cadaverum, ubi mortem præcessit pertinax nec ullis remediis cedens vertigo, quin semper aliquod in partibus solidis vitium, vel saltem excrementa copiosius congesta invenirentur in cerebro. Coniungimus enim vitia solidarum partium in uno eodemque paragrapho, quandoquidem non semper licet hæc vitia per signa minimè dubia à se mutuo distinguere.

Spiritus  
peccant tur-  
bulento  
motu.

Diximus causam vertiginis quoque esse spiritus, qui duplici ratione peccare possunt vel turbulento motu, vel inopia. Turbulento motu peccant in ebriis, qui etiam sæpe redduntur vertiginosi non tantum, sed & rediguntur ad tantam motus impotentiam, ut nec pes nec manus officium faciant suum. Idem illud in passionibus animi obtinere potest. Novi in hisce casibus sanguinem quoque affici, imo, sine respectu ad sanguinem, hæc vertiginis species intelligi non posse, ad causas tamen vertiginis distinguendas utile iudicavi in hisce casibus spiritus respicere, quandoquidem eorum motus turbulentus manifestus est. Altera ratio est, quandoquidem titubationis & lapsus causa non tam in sanguine, quam in spiritibus latet: sanguis enim satis aptus esset ad musculos tendendos, si spiritus ordinatè & debitè in fibrillas nerveas musculorum determinarentur, quandoquidem autem turbulento motu, & veluti desultoriè moventur spiritus, ob æqualis musculorum tensionis defectum, cadunt.

Et inopiâ.

Peccant quoque spiritus inopiâ & debilitate. Hujus debilitatis & inopiæ manifesta occurrunt exempla in iis, qui, post morbum gravem, convalescunt. Hi enim ubi oculi à radiis luminis vividius afficiuntur, ubi per plateas primum incedunt, ubi hominum turbæ insolitæ occurrunt, ubi fulcimento aut fulciente destituuntur, statim aut vertiginosi redduntur, aut titubant, aut cadunt. Causa est quod lumen, aut objecta externa insolita, spiritus magis commoveant, qui cum sint debiles non possunt æqualiter fibras musculorum tendere, quod ad erectionem, aut successive & ordinatè in easdem

in-



influere, id quod ad progressum requiritur. Similis est ratio vertiginis ab inediâ.

Quamvis autem causas singulas in specie explicasse sit utilissimum, observandum tamen est plures ad vertiginem causas plerumque concurrere. Simulac vertiginis principia aliquis sentit, incipit timere ne paroxysmus ille fiat gravior, incipit timere ne cadat; metus, animi pathema, & sanguinem commovet & spiritus turbulentè versus pedes determinat, turbulentus hic motus nunc hos nunc illos musculos inflat, adeo ut hinc vacillatio sequatur, aut casus. Quod si æger sit hypochondriacus, aut aliquando ceciderit, commotio hæc sanguinis & spirituum est major. Hypochondriaci enim solent esse meticulosi; illi autem qui aliquando ceciderunt, sibi illud idem impendere facile sunt persuasi, ergo à minori spirituum robore & turbulento motu eorum, symptomata ingravescent. Qui sæpe vertigine corripiuntur animum facile despondent, unde sanguinis & spirituum sequitur debilitas. In animi pathematibus & ebrietate, non tantum spiritus, sed & sanguis commoventur. Adeo ut apertissimum sit omnes has species sibi mutuo varie copulari, in omnibus casibus spiritus non determinari constanter versus illos musculos, qui ad æqualiter corpus sustinendum sunt destinati, aut ad progressum ordinatum & firmum requiruntur. Videmus insuper quomodo vertigo è veris ac minime fictitiis causis explicari possit, omiſſis quæſtionibus inutilibus. Quæſtionum inutilium, & dissentientium opinionum sylvam videre licet apud Schneiderum de Vertigine, adeo ut non malè affirmet, c. 5. *Jamdudum Franciscus Sanches pronunciavit nihil sciri, verissimè si hic & ea expenderet, quæ ab auctoribus vertiginis naturam interpretantibus prolata in lucem fuerunt, quibus nox caliginosa huic Scotomati objicitur. Hæc veterum juniorumque scientia est similis illi picturæ, quæ amat obscurum, nec unquam volet hæc sub luce videri.*

Causæ plures concurrunt.

Restat ut subjungamus descriptionem vertiginis nostris principiis accommodatam. Est ergo *Vertigo pressio successiva fibrillarum nervorum opticorum, circumgyrationis sensuum in mente excitans, & spiritus debilitans, aut confuse versus musculos determinans.* Hæc descriptio ex antedictis cum sit clarissima, ad differentias progrediemur.

Vertiginis descriptio vera.



Differen-  
tia.

Vertigo alia est per Idiopathiam alia per Sympathiam. In priori censu imprimis recenseri meretur Vertigo, quæ à vitio solidarum partium habet originem; tum enim cerebrum primario afficitur, sanguis & viscera possunt satis bene sese habere. Ad eandem classẽ pertinet vertigo quæ ab humoribus serosis, &c. in cerebro congestis habet originem. Hujus insigne exemplum refert *Platerus* in observationibus, p. 101 & 102. Referenda ad hanc eandem classẽ est vertigo, quæ à sanguinis nimia quantitate originem ducit. Quamvis enim sanguis toti corpori prospiciat, quamvis assiduâ vicissitudine locum mutet, cum tamen copię ipsius noxam luat cerebrum, cum signa abundantię nimię per vertiginem sese prodant, hæc species recte etiam ad idiopathicam vertiginem refertur. Vertiginis reliquæ species ad symptomaticas sunt ablegandæ: quippe ea quæ affectionem hypochondriacam aut scorbuticam aut etiam ventriculum debilem sequitur, tanquam symptoma prioris affectionis considerari, hæc etiam eodem modo curari debet. Ad symptomaticam vertiginem etiam referri debet ea, quæ sæpenumero in febrium continuarum principio observari solet. Nempe non rarò contingit, ægrotos, in febribus conqueri de vertigine & capitis dolore molesto, quorum præludia etiam sani senserunt, verum neglexerunt. Hujus natura ex antedictis facile percipietur, si in mentem revoce-  
mus, sanguinem in febribus majori impetu premi in arterias universi corporis, adeoque etiam in arterias carotides: eundem sanguinem magis expandi, atque ita distendere easdem arterias, unde tum necessariò sequitur circularis pressio filamentorum nerveorum optici nervi, adeoque vertiginis sensus. Symptoma hoc gravius affligere solet, si concurrat nimia repletio, & minatur Epilepsiam aut motus convulsivos nisi ipsi tempestivè V.S. occurratur. Hoc velim juniores medicos diligenter considerare, quandoquidem talia ab auctoribus non satis inculcantur, cum tamen sint verissima, & in praxi utilissima. Ad symptomaticam vertiginem quoque pertinet ea, quæ sæpe in declinatione morbi vexat. Difficile posset videri quomodo id contingat, verum res evadet manifesta, si præter ea, quæ superius jam adduximus considere-  
mus,



mus, id sæpe accidere iis, quibus, quantumvis plethoricis, in principio non fuit secta vena. Hinc serum sanguineum evehitur in consistentiam gelatinæ spississimæ, sanguis evadit ad circulandum ineptior. Considerandum etiam est, ob spirituum paucitatem nervos esse flaccidiores: itaque si ab exercitio sanguis in majorem concitetur motum, ob difficiliorrem per arteriarum cerebri filamenta transitum, facile replebit majores, & nervis opticis adjacentes arteriæ carotidis ramos: hi facile nervos opticos in circulum prement, cumque etiam muscoli ob spirituum inopiam sint flaccidiores, & vertigo & titubatio, & aliquando lapsus facile sequentur. Dixi ab exercitio sanguinem in majorem motum concitari, id quod cum experientiâ mirè quadrat; si enim quis pulsum talium debiliū examinet ante motum, ubi quieti sedent, & ubi tantum semel atque iterum per cubiculum obambularunt, is summam inveniet in pulsu & respiratione differentiam, manifesto argumento sanguinem premi vehementius per minimas arteriarum propagines, præcipuè autem noxa sentitur in cerebro, ob constitutionem eam quam explicuimus. Differentia alia sumitur à symptomatis hujus gravitate: adeoque tres vertiginis gradus, potius quam species, ab auctoribus describuntur. Horum primus *δῖν* & *ἰλιγ* dicitur, quum omnia, quæ sese oculis offerunt, circumagi videntur. Secundus *σκότωμα* & *σκοτόδι* seu vertigo tenebrosa appellatur, quando oculi simul, velut offusa caligine, obscurantur. Tertius gradus nomine proprio caret, verum est gravissimus, ubi sc. laborantes concidunt & prolabuntur, nisi ipsis protinus subveniatur. Hi gradus revera distingui possunt, verum observandum vocabula sæpe promiscuè usurpari, ne quis sibi imaginetur majorem, quam quæ revera datur, apud auctores antiquos *ἀνέλθειαν*.

Non omittenda est alia differentia ab auctoribus, quod ego quidem sciam, non satis animadversa, in praxi tamen non contemnendæ utilitatis, ea est, quòd vertigo aliquando cum nausea continuâ & symptomaticâ, aliquando absque insigni nausea vexat. Nempe ubi vomitus aut nullus, aut criticus adest, tum medicamenta efficaciora ad saburram ventriculi &



intestinorum exhauriendam in usum vocari possunt, ubi autem vomitus hic molestus vexat, tum blandius & per epistemon potius evacuandum.

Plures possent addi à variis circumstantiis petitiæ differentiæ, quod alia vertigo sit recens alia inveterata, alia hæreditaria, alia adscititia, alia in vigore ætatis constitutorum, alia senum, alia consueta, alia minus consueta, verum ubi medicus ad ægrotum vocatur, hæc statim primo intuitu evadunt manifestæ, adeo ut illis immorari non sit necesse.

Signa vertiginis.

Signa è relatu ægrotorum patent, vel si quis hominem, absque causâ manifestâ, titubantem videat aut cadentem, is facile judicabit talem vertigine esse correptum.

Causarum.

Difficilius est judicium, quæ causa vertiginem producat? itaque statim inquirendum an Plethora adsit? Hæc sese signis ab auctoribus propositis manifestam reddit: ego è praxi didici duo aliquando comitari & Plethoram & Vertiginem, quæ sicco pede transmittenda non sunt. Alterum est vasa oculorum admodum tumida, adeo ut ramificationes, quæ in statu sano oculis non subjiciuntur, statim sese offerant, tanquam si quis leviori Ophthalmia sit correptus: alterum anxietates & oppressiones pectoris insignes, quibus aliquando aut tremor aut palpitatio cordis jungitur. Postquam hæc observassem, inveni eadem à *Frambesario* in canonibus medicis, & aliis non esse omninò neglecta; verum cum ad hæc vulgò non attendatur, ea hic esse proponenda omnino judicavi; confirmant etiam superius à me propositam sententiam. Si enim vasa minima oculum perreptantia ita repleantur, ut tumida reddantur & admodum manifesta, nonne exinde rectissime concludemus, vasa meninges & cerebrum irrigantia eodem modo tumere, & tumore suo nervorum compressionem, ac leviozem aut graviozem producere vertiginem? Si sanguis vasa pulmonis ita distendat, ut arteriæ asperæ propagines, per eundem dispersæ, comprimantur, atque adeo sequatur insignis oppressio, quid mirum, si arteriæ cerebrum perreptantes nimia sua repletionem nervis vicinis sint molestæ? Si sanguis pulmonem difficilius permeet, ubi aer & respiratio ejusdem motum progressivum adjuvant, quid mirum, si vasa



vasa cerebri copiosissima nimiae repletioni & symptomatibus, ab eadem repletionem oriundis, sint exposita? Si nimia vasorum pulmonalium repletio ansam det palpitatiōi & tremori cordis, quid mirum, si vertigo gravior aliquando præcedat convulsionem vel morbos convulsivos?

Ubi affectio hypochondriaca, hysterica aut scorbutica vexat, admodum verisimile est vertiginem, tanquam symptoma, ab hisce morbis dependere. *Willisius* recte vertiginem inter symptomata Scorbuti enumerat, quod miror *Engalenum* omisisse. Horum autem morborum signa è propriis, locis petenda sunt.

Quandoquidem morbi solidarum partium non, nisi diligentibus adhibito examine, innotescunt, prudentem oportet esse medicum, ne quicquam pronuntiet, nisi ex indiciis manifestis de veritate omnino sit persuasus. Examinandum est, an symptoma hoc possit produci à morbo, cujus censetur sequela? Datur semper respectu gravitatis & diuturnitatis aliqua proportio inter morbum ejusdemque accidentia. Non mirum est ex. gr. si dolor, & ardor, & tumor adsint, ubi adest inflammatio; verum ubi inflammatio imminuitur minora sensim evadunt hæc symptomata. Non est mirum, si post usum Cantharidum quis conqueratur de ardore, dolore & insigni menjendi difficultate, ubi autem assumptæ aut impositæ non sunt cantharides, & tamen vexant eadem symptomata, necesse est ut causæ alii satis gravi hæc adscribantur. Itaque si morbus & causæ, à quibus deducebatur vertigo, evanescant, vertigo autem æque gravis perseveret, & absque causâ manifestâ exacerbetur, admodum verisimile est, causas hujus mali in partium organicarum malâ dispositione latere. Alterum signum est si medicamenta contra vertiginem efficacia, nullum vel exiguum afferant juvamen. Si enim medicamenta, vitia fluidarum partium emendantia, contra hanc vertiginis speciem, nullius sint utilitatis, admodum credibile est vitium solidarum partium latitare. Et hæc quidem mihi videntur signa maximè demonstrativa vertiginis à partium solidarum vitio, quibus possent addi duo minus quidem demonstrativa, probabilitate tamen omni non destituta, quorum alterum est,

Vitii partium solidarum.



si medicamenta opiata non ferant, alterum si vomitu sæpius absque vitio ventriculi recurrente miserè torqueantur ægroti. Verum, uti dixi, probabilitate hæc non carent, possunt tamen etiam hæc alias agnoscere causas. Non inutile tamen videbatur hæc in transitu monuisse.

Seri in ca-  
pite collecti.

Serum in capite collectum esse nemo facile deprehendet, nisi ad omnia symptomata accuratè attendat; etenim obscurum hujus rei est indicium. Itaque signa ferosi humoris sub cranio delitescantis hæc non sunt negligenda. Dolor capitis gravativus, aut acutus, aut pertinax, nulla vel exigua febre comite: somnus profundus, motus convulsivi, stupor. Contigit aliquando foeminam conquestam esse de vesica aqua plena, eo vergente, quocumque inclinaret caput. *Vid. Boneti Anat. pract. c. I. f. I. obs. 18. append. I.* signum etiam non contemnendum præbet, si quis de languore conqueratur absque aliâ manifesta causâ, & caput frigoris sit impatiens: adest enim in hisce casibus capitis debilitas. *Vid. Bonet. l. c. obs. 32. & 34.* Suspicionem quoque præbet, si quis catharrali per nares profluvio obnoxius, eo privetur, subsequente capitis dolore, vel gravitate, vel vigiliis, vel somnolentia aut simili affectu. Contingit etiam aliquando ægrotum de fluctuatione in capite conqueri. *Bonet. l. I. f. XI. obs. I.*

Turbulenti  
spirituum  
motus.

Turbulentus spirituum motus pulsu sese prodit: simulac enim aliquis gravius commovetur, statim spiritus in cor, præcordia, pulmonem influunt, adeoque pulsum variè immutant, quæ immutatio tactu explorari potest. Deinde quando commotio non ita gravis est ut usum loquelæ adimat, ægri ipsi aut adstantes ea quæ evenerunt narrare solent. Ebrietas variis signis sese prodit, quæ enumerare non est necesse.

Languoris.

Languoris & vertiginis post morbum diuturnum indicia sunt admodum manifesta; præterquam enim quod ægri & adstantes de debilitate insigni conquerantur, medicus ipse è pulsu, dispositione corporis, voce, sermone, incessu, &c. facile animadvertit vires esse attritas, & inde vertiginem habere ortum.

Expansio-  
nis sanguinis  
nimia.

Expansio nimia sanguinis, vertiginem in febrium principio producens, tum è signis febrem adesse testantibus, tum è calo-



caloris & æstus indiciis, è lingua, pulsu, urina cognoscitur, quæ in pyretologia docentur.

Prognosis ita institui potest. Vertigo à sola plethora originem ducens, si ei tempestivè occurratur, periculo vacat, & brevi sanatur: ea quæ hysteriis aut hypochondriacis accidit difficilioris est curationis, atque magis vel minus periculosa, pro natura morbi à quo dependet. Vertigo à partium solidarum vitio, & organicarum mala conformatione nunquam omnino tollitur; serosa colluvies cerebro molesta, quamvis aliquando difficulter, tolli tamen potest. Vertigo febrilis sequitur naturam febris à qua dependet. Vertigo ea quæ tantum circumgyrationis sensum producit, facilius est curatu eâ quæ visum etiam obtenebrat, & hæc adhuc facilius eâ quæ ægrotum ad casum impellit. Vertigo ab *Hippocrate* inter morbos seniles & hyemales recensetur in Aphorismis.

Indicationes generales in Vertigine sunt: Plethoram imminuere, repletionem nimiam vasorum hypochondriacam curare, in affectu partium solidarum prudenter procedere, turbulentum motum spirituum sedare, debilitatem corrigere. Differunt quidem hæ indicationes ab iis quæ apud auctores occurrunt, verum si quis indicationum naturam diligenter perpendat, & ea quæ à medicis traduntur examinet, is facile judicabit, quæ in praxi majoris sint utilitatis. Memini me alicubi in *Plateri* praxi legisse, facultatem læsam nullam suppeditare indicationem practicam, ita etiam hic affirmare liceat; si vertigo sit læsa imaginatio, nullam hinc depromi indicationem medicam, nisi ut ille melius sibi rem imaginetur. Spirituum in orbem agitatio indicaret ejusdem sedationem, sedatio medicamenta hypnotica & narcotica postulat, atqui tantum abest ut hæc convenient, ut in plerisque speciebus etiam noceant, imo spiritus potius sunt excitandi, uti in sequentibus videbimus.

Cura vertiginis à nimia sanguinis copiâ V. S. perficitur, eâque solâ sæpe hic affectus tollitur. Oportet autem ut hæc pro ratione plenitudinis instituatur satis larga. Quærent auctores quo tempore, an in paroxysmo, an extra paroxysmum debeat secari vena? Alexander Massarias putat, in accessio-



*ne vertiginis, sive ea brevis sive longa fuerit, nullo modo sectionem venæ convenire, præterquam in declinatione, quia sc. agroti eo tempore vires habeant debiliores.* Verum si rem ipsam consideremus facile patebit in paroxysmis levioribus omni tempore posse institui V. S. in paroxysmis gravioribus nullam esse interponendam moram. Si enim Vertigo sæpe Epilepsiam aut Apoplexiam minetur, quanto gravior erit vertigo, tanto majus Epilepsiæ aut Apoplexiæ imminet periculum, secabitur ergo vena statim, ne differendo æger in majus periculum, in gravius incidat symptoma. Deinde si necessitas cogat sæpe in morbis convulsivis, & Apoplexia secare venam, multo magis licebit in vertigine ubi tot symptomata gravia non urgent simul. Quod si autem vertigo sit febrium symptoma, præstat intermissionis vel remissionis tempus expectare, nisi insigne immineat periculum.

In qua vertiginis specie conveniat?

Majoris utilitatis videtur si examinemus in qua vertiginis specie conveniat V. S. in qua autem minime? 1. Convenit ergo V. S. in vertigine à Plethorâ & compressione nervorum opticorum originem ducens; ita enim promptissimè causa hujus mali tollitur. Ubi ergo nullus alius est morbus à quo producatür vertigo, nulla alia prava dispositio unde deduci possit vertigo, ubi signa plethoræ adsunt manifesta statim in usum vocetur V. S. larga. 2. Convenit etiam V. S. in commotione graviore, præcipuè si ab ea majus impendat periculum. 3. Convenit tandem V. S. ubi vertigo admodum gravis Epilepsiam aut Apoplexiam minatur, licet suspicio sit non puram Plethoram, seu sanguinem laudabilem, sed & tenaciorem & scorbuticum replere vasa. 4. Convenit ubi consuetæ evacuationes sunt suppressæ. 5. Convenit etiam in principio febrium cum vertigine graviore. 1. Non requiritur V. S. in vertigine quæ ab affectu scorbutico aut hypochondriaco habet ortum. In hoc enim casu repletio non ducit originem à copiâ, sed à prava sanguinis dispositione, ab ejusdem minori vigore. Quod si sanguinis accesserit copia, aut evacuationes sint suppressæ: tum secanda quidem est vena non autem ob dispositionem hypochondriacam, sed ob rationes jam superius enumeratas. 2. Non est secanda vena ob partium soli-



solidarum vitium, quandoquidem V. S. id curare non potest. Contingit tamen non raro in hoc casu secandam esse venam, quando sc. metus est ne pressio sanguinis à tergo vi sua vasa nimium distendat, aut graviora inducat symptomata. Potest enim sanguinis abesse copia nimia, si ea consideretur proportionaliter ad universum corpus: potest tamen eadem esse nimia respectu particularis illius dispositionis, & respectu symptomatum inde oriundorum. Quemadmodum ergo symptomata gravia suppeditant indicans quod dicitur urgens, ita etiam in hoc casu vis illata partibus illi ferendo minimè aptis aliquando V. S. requirit, licet illa conformationis vitium corrigere minime valeat. 3. Non requiritur in vertigine ab ebrietate, nisi ea sit ita gravis ut convulsionem inducat, aut alia graviora symptomata. 4. Non requiritur in debilibus aut à morbo gravi emergentibus. Quamvis enim revera neglecta V. S. in principio potuerit esse causa gravioris morbi, & huius symptomatis, non tamen ideo ea intempestivè in usum est vocanda. Ego saltem non libenter ad V. S. recurro in morbi declinatione, aut viribus valde attritis; tum enim ea mortem accelerasse non semel est visa.

Quæritur etiam quæ vena sit incidenda? Respondeo, diverso respectu & diversarum circumstantiarum ratione aliam atque aliam posse secari venam. Si tantum intendatur evacuatio generalis, vena brachii qualiscumque secari potest. Si menses substituerint saphæna secetur: eadem illa vena etiam manibus secari potest, si rationes nonnullæ id exigere videantur. Si particularis quoque expetatur evacuatio, quamvis ea proprie loquendo, non detur, potest secari vena frontis, aut similis.

Quæ vena  
sit secanda?

Disputat de Arteriotomiâ post aures è *Galeno Alexander Massarias*, verum rectè concludit eam non semper convenire. Ego existimo eam numquam ob solam vertiginem esse instituendam. Omitto jam arteriotomiam difficiliorem esse quam Phlebotomiam, illud putem ego esse manifestissimum, præiudicio & ignorance circulationis sanguinis inniti hoc remedii genus. Putabant nempe per arterias aliquando calidum vaporosumque spiritum ferri, ideoque credebant se dissecando

De Arte-  
riotomiâ.



arterias hæc multum juvare ægros. Verum non spiritus sed sanguis defertur per arterias, & si exteriores secantur rami, sanguis tanto majori copia versus interiores feretur, adeoque causam mali adaugebit. Arteriotomia ergo tantum juvat quatenus massam sanguineam imminuit, dissectio ramorum exteriorum sanguinem versus interiores cogit, sectio & curatio arteriarum difficilius peragitur, ergo arteriotomia ad vertiginem postponenda est venæ sectioni, quæ non minus quam illa sanguinis copiam imminuit, & quidem longe tutius.

De revul-  
sione.

Venæ sectio in hoc casu dicebatur institui revulsione ratione. Verum si proprie loqui velimus, sanguini fluenti motus contrarius tribui non potest, nec eundem à parte, ad quam vergit, in contrariam movere licet. V.S. ergo prodest, quia morbum ejusque causam tollit. Morbus à quo vertigo dependet, est compressio nervorum opticorum, causa nimia sanguinis abundantia, quando sanguinis nimia copia imminuitur, compressio nervorum opticorum tollitur, quia expansio vasorum imminuitur. Sanguinis circulatio è corde in arterias, ab arteriis iterum in venas, repetitis continuo contractionibus absolvitur, neque hic motus in contrarium mutari potest. In deperditi autem sanguinis locum statim succedit alius, quandoquidem evacuatio vasorum pressionem sanguinis versus illam partem reddit faciliorem. Aliqua ergo circulationis sanguinis introducitur immutatio, quia majori impetu versus vasa exhausta propulsus, minoribus pollet viribus ad compressionem illam molestam in basi cerebri continuandam. Sanguinis enim vis copię ejusdem aliquomodo proportionata est, unde sequitur, sanguinis quantitate imminutâ, non posse eundem ita valide replere vasa, quam ante institutam venæ sectionem.

De reple-  
tione vaso-  
rum hypo-  
chondriacâ.

Alterum, quod ad curam vertiginis requiritur, est, ut repletio vasorum hypochondriaca tollatur. Fit illud sanguini majorem conciliando vigorem, & morbum hypochondriacum tollendo, quod qua ratione faciendum sit postea docendum erit.

Spiritus  
excitantia in  
paroxysmo.

Interim tam in hac quam in omnibus aliis vertiginis speciebus in usum vocanda sunt spiritus excitantia & adversus vertiginem specifica remedia. Conveniunt ea tam in paroxysmo quam



quam extra paroxysmum. In paroxysmo salia volatilia, olea stillatitia, foetida, acria naribus admoveantur, causarum & circumstantiarum habita ratione. Namque ubi hysterica affectio simul vexat, tum *Oleum succini*, *Sp. Sal. Armon. Assa foetida*, *Castoreum ejusque Tinctura* conveniunt. Si autem nimia sanguinis dilatatio & febris vertiginem producat, *acetum*, ejusque excitatus vapor convenit. Danda est opera ut æger à casu sit immunis quod fiet illum sustentando, vel in sedili collocando. Præcipiunt quidem auctores ut æger ad quietem componatur, ut nempe motus inordinatus spirituum sedetur; verum cum in superioribus ostensum sit spirituum motum in gyrum fictitium esse, ea quæ ad hunc motum sedandum præscribuntur cum grano salis accipienda sunt. Etenim si sanguinis nimia copia arterias carotides nimium impleat, præstat ut æger capite erecto sedeat, non autem declivi, ne scilicet sanguis ob situm hunc magis easdem repleat arterias. Et hæc cum praxi optimè conveniunt; non semel enim conqueruntur vertiginosi, sese decubitus non ferre. Ægri ad quietem componendi ubi spirituum inordinatus motus vertiginem produxit. Itaque qui è vini largiori haustu, aut ab animi commotione, aut febre, aut æstu, aut à motu corporis viribus valdè attritis in vertiginem incidunt, ii ad quietem disponantur: ubi autem plethora, aut partium organicarum vitium vertiginem produxit, ægri erecto potius aliquandiu sedeant corpore.

Quod si paroxysmus diutius perseveret, ad spiritus excitandos ligaturæ & frictiones extremitatum præcipuè inferiorum instituendæ. Eidem usui inserviunt glandes & clysteres acres. Excitant quoque spiritus cucurbitulæ sive siccæ sive cum scarificatione; posteriores hæc conveniunt imprimis ubi sanguis sufficienter detractus non fuit. Utiliter quoque cervici applicantur vesicatoria.

Ligaturæ,  
frictiones,  
cucurbitulæ,  
vesicatoria.

Præter ea quæ dixi commendantur etiam specifica extra paroxysmum usurpanda: talia sunt *Radices Valerianæ*, *Calami aromatici*, *Doronici*: has in Alpibus contra vertiginem comedere eos qui Damas persequuntur refert *Sennertus*: verum cum de viribus *Doronici* ambigatur, certiora & tutiora remedia malim. Commendatur etiam *stercus Pavonis* in pulvere

Extra paroxysmum.

ad



ad ʒß per noctem in vino albo maceratum & colatum ad ʒj.  
*Auricula urfi*, *Margarita*, *succinum*, *corallium*, *Cinnabaris nativa*, *Cubeba* tam masticatæ, quam assumptæ. Semen *Carui*, *Pastinacæ*, *Aquilegiæ*. Inter Chymica sunt *Oleum succini*, *cumini*, *caryophyl.* *lavendula*, *anisi*, *feniculi*, *nucis muscatæ* *Tinctura succini*, *Castorei*, &c. *Hartmannus* *Cinnabarim* *nativam* commendat. *Oleum Buxi*. Succum *Chierifolii* cum jusculo assumptum tanquam specificum prædicat *Dolæus* in *Encyclopedia*. Prædicatur quoque *Conserva Fl. Calend.* *Sennertus* hunc pulverem laudat.

℞. *Nucis muscatæ*. ʒß.

*Euphrasie*. ʒij.

F. Pulvis, magnæ in vertigine efficaciam qui detur mane ad ʒj. & ultra.

℞. *Cinnabar. mineral. ver.* ʒß.

*Margarit. Corallor. aa.* ʒij.

*Croci.* ʒj.

*Fol. Auri. no. x.*

F. Pulvis subtilissimus, qui detur cum aqua lilior. convall. ad ʒß ad ʒij.

*Walsmidius* in praxi hæc habet.

℞. *Liquor. C. C. succinat.* ʒij.

*Sp. C. C. compos.* ʒj.

*Cephalic.* ʒß.

*Ess. Castor.* ʒj.

M. Dosis gutt. xv & plures.

℞. *Sp. Lilior. convall.* ʒij.

*Aq. Anhaltin.* ʒj ʒ.

*Sp. C. C. compos.* ʒß.

M. ut ante.

*Willisus* vertiginosi cujusdam importuni querelis assidue defatigatus, post alia multa remedia incassum renovata, tandem præscripsit hunc pulverem bis in die sumendum per mensem ad quantitatem cochlearis.

℞. *Pulv. Rad. Poen. maris.* ʒij.

*Flor. ejusd. contus. & sole exsiccata.* ʒj.

*Stercor. Pavon. albiss.* ʒß.

*Sacchar. albiss.* ʒij.

F. Pulvis, a quo convaleuit.

Do-



Dolæus in Encyclopædia hanc præscribit mixturam

℞. *Aq. Lilior. conv. C. vino* ℥j.

*Sp. ejusdem.* ℥jss.

*Chærefol. spirituoſa* ℥ij.

*Stercor. Pavon.* ℥j.

*Essent. Chærefol.* ℥j.

*Syr. de Betonic.* ℥j.

*M.*

Interim meminisse oportet ubi vertigo fovetur ab affectu alio, utrumque in medicamentorum præscriptione respiciendum esse, ex. gr. ubi hysterica etiam vertigini est subjecta, tum medicamentis specificis contra vertiginem possunt miscere ea quæ sunt antihysterica. Ex. gr.

℞. *Aq. Puleg.*

*Meliss. & vino. aa.* ℥jss.

*Sp. Lilior. conv.* ℥iij.

*Tinctur. Castor.* ℥j.

*Sal. Volat. Fulig. gr.* iv.

*M.*

Ubi autem ventriculi debilitas jungitur vertigini, talis vel similis præscribatur pulvis.

℞. *Rad. Calami arom.* ℥j.

*Valerian.*

*Succin. albiss. ppt.*

*Cubebæ. aa.* ℥ss.

*F. Pulvis. Dosis a ʒj. ad ʒss.*

Theodorus Majerne in praxi post V.S. per vomitum everrendum esse ventriculum censet, si nempe nausea adsit, cui ego facile adstipulor; verum in memoriam sunt revocanda quæ superius de vomitu symptomatiko diximus, & diligenter perpendendum, ubi in usum vocari possit, ubi autem eum omittere expediat. Potest emeticum exhiberi. 1. Ubi ventriculus ob ingluviem & crapulam nimiâ humorum saburrâ repleta est: saltem ubi dolores ventriculi, vel anxietates circa præcordia vexant. 2. Ubi in hypochondriacis & hystericis post assumptum cibum cardialgia vexat; ita enim brevissime causa nauseæ, ut & vertiginis tollitur. 3. Ubi ægroti faciliè vomunt,

De vomito-  
riis.



& sunt fatis robusti. Omittendum est emeticum. 1. Ubi vomitus symptomaticus & molestus vexat; etenim tum à vomitu vertigo exasperari solet. 2. Ubi dilatatio nimia vasorum cerebri, aut similis affectus organicus causa est vertiginis. Etenim cum in hoc casu vertigo sit affectus idiopathicus, cumque vitium partium fluidarum non producat vertiginem, frustra, nulla cogente necessitate, fatigatur æger, frustra in majoris dilatationis conjicitur periculum. 3. Ubi in plethoricis necdum instituta est V. S. Facile enim intelligimus è valida illa concussione corporis, varia impendere discrimina, nisi plenitudo nimia aliquomodo fuerit imminuta. Ideoque rectissime *Theodorus Majerne* vomitum venæ sectioni subjungit. Non erit inutile hic formulas modo laudati Viri subjungere.

℞. *Oxymell. simpl. & Julianizantis aa. ℥j.*

*M.*

pro duabus dosibus sumendis bis in die è cochleari sensim deglutiendo, longè à pastu pridie Emetici.

℞. *Infus. Croci Metall. ℥ij.*

*Oxymell. simpl. ℥ss.*

*Aq. Card. bened. ℥j.*

*M. F. Haustus.* exhibendus cum debito regimine.

Die ipso Vomitorii sumatur bolus sequens horâ somni.

℞. *Mithrid. Dam.*

*Confect. Alkermes aa. ℥j.*

*Pulv. subtiliss. menth. ℥ss.*

*Lapid. Bezoar. or. gr. viij.*

*M. F. Bolus.*

Infanti *Walsmidius* præscripsit

℞. *Tartar. Emet. gr. j. vel. ij.*

*Pulv. rad. Jalapp. gr. v.*

*F. Pulvis.*

*Tartarus Emeticus* etiam adultis optimè convenit.

℞. *Tartar. Emet. gr. v.*

*F. Pulvis.* sumendus cum cerevisia dulci tepida.

Ejusdem cum *Th. Majerne* opinionis est *Cardalucius*, cujus verba

ba



ba adjicere non pigebit. *Evacuatio in junioribus robustis convenientissimè fit per Aquam benedictam Rulandi, vel aliud insigne vomitorium, quo causa morbi, plerumque in ventriculo hærens, feliciter exturbatur, juxta mentem Hippocratis, & Helmontium, propriam vertiginem haustu salis vitrioli eliminare solitum. Willisius vix aliud in hoc morbo dari emetico præstantius remedium affirmat, & præscribit.*

℞. Sulphur. Antimon. gr. v.

Cremor. Tart. ʒß.

Castor. gr. ij.

F. Pulvis

capiatur cum regimine expectando vomitionem. Non differt ab hac sententia *Walsmidius in praxi. p. m. 241. Vide quoque Car. Pisonem. p. m. 94. de morbis à colluviè ferofâ ortis.*

Ubi ergo per vomitum curationem vertiginis peragere non licet, blandius & repetitis vicibus per epicrasin evacuatio tentanda est. Formulæ variæ hic concinnari possunt, sit exempli loco sequens.

Purgationis  
formulæ.

℞. Aloës rosat. ʒß.

Castor. opt.

Myrrha elect.

Croci Britannic.

Vitriol. Martis. aa. ʒß.

Cum Elix. Prop.

F. Pilula no. xviii.

Harum pilularum duæ mane, duæ meridie, duæ itidem vesperi sumantur.

Quæ de Epicrasi dixi tum locum habent, ubi omnino æger blandè est tractandus, alias purgantia majoris efficaciam sunt utilissima: non contemnendæ sunt pilulæ *Willisii.*

℞. Pil. de Succin. gr. xxv.

Resin. Jalapiæ gr. vj.

Tartar. vitriolat. gr. vij.

Balsam. Peruv. q. s.

F. Pilula iv.

sumendæ horâ somni vel primo mane.

Non est flocci faciendum præceptum *Majerne*, cujus hæc sunt

Purgationes  
repetendæ.]



sunt verba: *Purga bis in septimana cum pilulis Macri: & diebus intermediis alvus sit semper laxa clysteribus injectis, vel lenitivis per os exhibitis. Vel R̄. pil. de chamæpit. (quas descriptas habes p. 5.) 3j. Extract. calam. aromat. ʒss. Diagrid. gr. v. Ol. thym. g. ij. F. Pilulæ v.* Verum non possum non monere in juniorum gratiam; similia enim apud scriptores medicos occurrunt, numerum pilularum harum esse nimis exiguum respectu quantitatis ingredientium. Quotusquisque enim est qui fauces habeat adeo patulas ut pilulam granorum quindecim facile deglutiat? Ex hac massa ad minimum deberent formari pilulæ quindecim.

Chaly-  
beata.

*Willisus* in hoc affectu commendat etiam *chalybeata*, quæ insigni juvamen multis attulerunt. Horum usus præcipuè est in Vertigine hypochondriacâ & scorbuticâ, præmissis universali-  
bus, in quantum illa requiruntur. Præscribit ergo hæc.

R̄. *Syrupi nostri de Chalybe* ʒvj.

Sume cochlear. manè & hora 5 vesp. cum aquæ destillatæ modo descriptæ aut alterius cephalicæ ʒiij. vel sume *Tincturæ nostr. Chalybis* g. xv. ad xx. cum haustu ejusdem aquæ destillatæ, bis in die. Et revera chalybis usus egregius est; sive enim in substantia absque ulla præparatione sive etiam variè præparatum usurpetur, plerumque in hoc casu convenit, additis roborantibus ventriculum aut menses moventibus ubi id requiritur.

Tractatio  
vertiginis  
a vitio par-  
tium soli-  
darum.

Diximus etiam in affectu solidarum partium prudenter procedendum. Prudentia medici requirit ut ne multa incassum moveamus, nec ægroto molesti, nec nobis ipsis inutiles simus frustra medicamenta nihil profutura exhibentes. Ergo ubi nullum est dubium vitium aliquot partium organicarum continuam fovere vertiginem, amici de affectus difficultate moveantur; ægroto ipsi indicetur prudenter medicamentis diæ-  
teticis plus, in hoc casu, posse profici quam potentioribus, denique symptomatum habeatur ratio. Oportet ut medicamen-  
ta omnia assumpta ventriculum subeant primum, tum ope venarum lactearum & ductûs chyliferi deferantur ad sanguinem, atque ubique vires suas exerant, antequam deferantur ad cerebrum, cujus labem nequaquam corrigere possunt. Cur autem concoctionem ventriculi turbabimus, ubi ea vacat culpa? Cur  
chy-



chylum, cur sanguinem immutabimus, quando ii satis bene sunt dispositi? Est enim ea medicamentorum natura ut corpus nostrum immutent; sin autem in melius immutare non possint, necesse est, ut in pejus mutent. Diætæ ergo potius & symptomatum, in hoc casu, habebimus rationem.

Si autem serosâ colluvie inundetur cerebrum dabimus operam ut ea medicamentis tum universalibus tum particularibus exhaustiatur.

A colluvie serosa.

Medicamenta universalia sunt vel purgantia hydragoga dicta, vel vomitoria vel sudorifera, vel diuretica de quibus hic agendi non est locus.

Medicamentis universalibus.

Quamvis evacuationes particulares, ob continuam sanguinis circulationem, etiam possint censerî universales, tamen hoc loco per evacuantia particularia ea intelligimus, quæ per loca magis propinqua humorem serosum educunt, in specie capiti magis prospicere videntur. Talia sunt medicamenta *errhina* dicta, quorum formulam sequentem præscribit *Platerus*.

Particularibus.

℞. *Succorum Anagallidis flor. purpureo.*

*Rad. Beta vel Mercurialis, Majoran. aa ʒj.*

*Fœnic. Ruthæ aa. ʒj.*

*Vini albi ʒss.*

*M.*

*Si succus Cyclaminis haberi posset & adderetur, efficacius esset.*

Huc refer *Gargarismos*, *Masticatoria* & similia quæ apud *Mercurium*, *Platerum* & alios describuntur. Potest quoque utiliter fontanella in brachio aut crure, vel etiam setaceum in nucha excitari. Vesicatoria etiam post aures insignem feri copiam exhaustiunt.

Videndum jam quomodo spirituum turbulentus motus possit sedari. Id in ebriis habet locum, atque ordinariè sponte contingit si cubitum eant, & crapulam edormiant, sin autem graviora ebrietatem comitentur symptomata, ita agendum, prout circumstantiæ illud exegerint. Non est facile accedendum ad usum opii, quandoquidem ejus usus in vertigine suspectus est: quod si id videatur requiri, malim electuaria opiata in usum vocare antiqua, in quibus opii vis aliquantulum infracta est. Hac de re in superioribus quoque egimus. Præter ea, quæ de animi affe-

Spirituum motus sedandus.



etibus sedandis alibi diximus, in vertigine amovenda sunt objecta metum & spirituum inordinatum motum excitantia, talia sunt adspectus rerum aut hominum in gyrum actorum, præcipitia, ubi deest fulcrum, & similia.

Idem roborandi.

Spiritus debiles roborantur post morbos graves, si reliquæ morborum expugnentur, & si æger convenienti diætâ restau-  
retur. In specie si gelatinosa illa sanguinis dispositio emende-  
tur. Id in hoc casu optimè efficietur roborando ventriculum, adeo ut cibos oblatos optimè digerat, & cavendo ne ille ciborum copia obruatur. Capiat potius partitis vicibus aliquid nutrimenti, quam ut una vice largius prandeat; ventriculus enim ab ingestorum copiâ nimis oneratur. Ad roborandum ventriculum, ad cibum probè digerendum, ad spiritus excitandos, nec non ad gelatinosam illam constitutionem sanguinis emendandam nihil ego existimem *Vino Rhenano* aut *Mosellano* puro, antiquo & generoso præstantius. Sive enim salivam respicias viscidiorē, sive viscera debilitata, sive etiam ipsius vini saporem & odorem gratissimos, sive vim incidendi & attenuandi egregiam, deprehendes non uno nomine hoc convenire. In vertigine ab inediâ cibi multum nutrientes ut panis, caro cocta aut assata, generosioris cerevisiæ aut vini potus, modicâ tamen quantitatē, conveniunt.

De curatione vertiginis Idiopathicæ, & Sympathicæ.

Non videtur necessarium, ut Vertiginis specierum specialem subjungamus curationem, quandoquidem de Idiopathica, ut & sympathica jam actum est, quantum hic locus postulabat; etenim de scorbuto, affectione hypochondriaca & similibus non est hic tractandi locus.

De gradibus vertiginis diversis.

Quantum ad vertiginis gradus attinet, manifestum est, in leviori vertigine non statim ægrotum medicamentorum multa farragine esse obruendum. Oportet ut proportio sit inter morbum ejusque remedia. Itaque in leviori specie *Sal. Volat. C. C.* aut *oleosum*, *liquor C. C. succinatus*, *Sal. Volat. fuliginis*, *spir. Sal. Armoniaci*, *masticatio Cubebarum* aut similia ad affectum minus gravem superandum sufficiunt, adjunctâ convenienti diætâ. In speciebus gravioribus ita procedendum, uti superius explicatum est.

De Vertigine cum vomitu

De differentia illa quæ ab adjuncto vomitu de sumitur, hic esset



esset pluribus agendum, nisi utile judicassemus in superioribus, ubi de vomitu fuit actum, etiam de hac specie tractare. Et enim ne quis in usu emeticorum, quæ hic maxime profunt, deciperetur, commodum visum fuit, eodem loco subungere quando emetica essent vitanda. Itaque hic tantum addendum, me hætenus observasse præcipuè vomitum vexare, quando aut suspicio est affectus solidarum partium, vel quando febris simul vexat, vel quando pituitosa materia ventriculi nauseam efficit. In omnibus autem hisce casibus blandius agendum. Idiopathicus enim affectus à validâ corporis concussione non emolumentum, sed damnum perpeti solet. In febribus commotio & expansio sanguinis morbum hunc exasperat, itaque in hoc casu febris imprimis respicienda, nec vomitus imperandus, nisi febris natura eundem requirat. Diligenter quoque examinandum qualia medicamenta æger optimè ferat? Utile ego in hoc casu expertus sum *Sal. Absinthii*, cui aliquid adversus vertiginem adjungi potest. ex. gr.

℞. *Sal. Absinth.* ℥j.

*Castor. opt. gr. v.*

*F. Pulvis, qui aliquoties repetatur.*

Quando autem materia pituitosa circa ventriculum hærens continuam nauseam & vomitum efficit, sufficit ut ea per epicrasin exhauriatur. Ratio est, quia medicamenta satis blanda sponte aliquando sequitur vomitus satis importunus. Et quod potest fieri per commodiora quid opus est ut fiat per molestiora? Quamvis ergo talis materia sæpe indicet emeticum, in hoc tamen casu, ubi vomitus symptomaticus & molestus vexat, sufficit ut exhibeatur medicamentum blandius, idque aliquoties repetatur. Itaque exhibeantur tales aut similes pilulæ.

℞. *Mass. Pilul. Mastich.* ʒß.

*Vitrioli Martis.* ℥ß.

*Cum Elix. prop. vel Tinctur. Castor.*

*F. Pilula. No. x. exhibeantur mane & vesperi duæ vel tres.*

Utiles quoque sunt *Pilula Majerne, Cachectica Leovardien-sium*, vel nostræ superius descriptæ.

Si ratione febris vel alquarum circumstantiarum vitanda sit aloë,



aloë, *Electriarium Choragogum*, vel *Hydragogum* Sylvii in usum vocetur, vel hic pulvis.

℞. *Fol. fenn. mund. gr. xv.*

*Sal. Tartar. gr. v.*

*Diagrid. gr. i.*

*F. Pulvis.*

*Diata.*

Absolutâ curatione, de diætâ restat agendum. Itaque aër sit purus, vitetur nimium lumen, turba hominum, prospectus ab alto, aspectus circumgyrationis. Vitetur repentinum frigus, gravedo, coryza, ne excrementa serosa in cerebro accumulentur. Cibi sint boni succi; verum imprimis cavenda ingluvies, tum quandoquidem nimiam, tum quia pravam sanguinis gignit copiam. Quid, quod ingluvies ad morbum Hypochondriacum viam sternat? Vitetur quoque crapula. Vinum Rhenanum, Mosellanum, Gallicum modicâ quantitate, sed generosum juvat. Si per quadrantem horæ *Pimpinella viridis* maceretur in vino, vinum evadit gratius, & magis juvat. Cibi condiantur stomachicis & cephalicis dictis, *Thymo*, *Rorismarino*, *Serpillo*, *Salvia*, *Betonica*, *Mentha*, *Fœniculo*. &c. Motus & exercitium in hoc casu conveniunt, nisi adsit febris, aut debilitas insignis, in quibus casibus motus & quies morbo & viribus ægri proportionatus imperandus est. Interim vitetur motus in orbem, aut celeris capitis circumgyratio. Somnus sit moderatus, ut & vigiliæ. Alvus vel sponte vel arte sit libera, vitetur venus præcipue intempestiva & immoderata, ne sanguis nimium commoveatur aut spiritus exhauriantur. Id quod de Venere hic dico, in omnibus ferè capitis affectibus locum habet. In mulieribus danda opera, ut menses debitè fluant, vel si id non fiat, cura eo erit dirigenda. Eorum enim suppressio, aut fluxus parcior, & sanguinem magis copiosum, & sæpè pravis qualitatibus imbutum producit. Vitentur omnis generis Pathemata vehementia, præcipue animus meticulosus. Hilaritas & gaudium moderatum optimè convenit.



## CAPUT QUARTUM.

*De Phrenitide.*

**A**Ntequam Phrenitidis explicationem aggrediamur, ambiguitas vocabuli tollenda est. Aliquando enim in lata admodum significatione vox hæc accipitur, adeo ut plures generis mentis alienationes suo ambitu complectatur, cujus rei exempla ex *Hippocrate* afferri possent. Aliquando eam quæ febrem habet comitem, sive illa à primario affecto cerebro, sive etiam per consensum oriatur, sive mitius sive etiam gravius infestet. Aliquando ita stricte sumitur hæc vox, ut etiam à Paraphrenitide distinguatur. Nos Phrenitidem in latâ, non autem latissimâ accipimus significatione, ita ut Paraphrenitidem quidem sub se complectatur, ab aliis autem παραφροσύνης speciebus distinguatur.

Nominis significatio determinatur.

*Phrenitis* dicitur esse *perpetuum delirium ab inflammatione membranorum cerebri exortum, cum febre continua affligens.*

Descriptio Phrenitides vulgaris.

Verum, propriè loquendo, febris continua non est symptoma Phrenitidis, sed Phrenitis est symptoma febrium ardentium, continuarum, malignarum. Adeo ut *Celsus* rem acutè tetigisse censendus sit, qui hoc symptoma vocat *insaniam febricitantium. Lib. 2. cap. 1.* Ejusdem sententiæ quoque videtur fuisse *Hoeferus* in *Hercule medico*, qui de Phrenitide non agit inter capitis affectiones, sed de Phrenetico delirio inter symptomata febrium, manifesto argumento, ipsum non existimasse febrem esse symptoma Phrenitidis, sed è contrario, Phrenitidem esse sequelam febrium.

Ea examinatur.

Ut hæc melius intelligantur in memoriam revocandum est, qua ratione & quando Phrenitis soleat invadere ægros. Quamvis enim aliqui ea sint corporis constitutione, ut statim in principio febrium delirent, plerumque tamen Phrenitis non invadit, nisi in augmento morbi, vel eodem ferè ad statum accedente. Præcesserunt sæpe vigiliæ protractæ, capitis dolor, coma vigil, & arteriarum in temporibus molesta pulsatio. In levioribus speciebus, ægrôti in somnum proclives, multa non

Qua ratione Phrenitis soleat invadere.



cohærentia submissa voce & celeriter garriunt, aut cum majori impetû loquuntur. Non dormiunt omnino, nec plane quidem vigilant, interim loquaces sunt, aut, submissâ voce, multa inconcinna effutiunt. Si autem aliquis accedat auctoritate pollens, quem ægrotus suspicit ex. gr. Concionator, aut Medicus, ægrotum compellans, ad interrogata respondet, & videtur mentis compos; verum ubi attentio illa refrixit, ad loquelam suam concitatam & non cohærentem recurrunt. Aliquando Phrenitidi junguntur vigiliæ protractæ: ægri non dormiunt, stragula abjiciunt, multa loquuntur, cantant, mente sunt omnino alienata, nonnumquam ferociunt, & vix se regi ab adstantibus patiuntur, salubria monita contemnentes. Prout autem morbus est vehementior vel remissior, pro diversa ægri constitutione contingit illud vel citius vel etiam tardius.

Non semper adest inflammatio.

Inflammationem membranarum cerebri semper adeste, ubi adest Phrenitis à veritate alienum mihi videtur. Nempe antequam circulatio sanguinis esset detecta supponebant in partibus solidis morbos, qui revera partibus fluidis accepta ferenda erant. Sæpenumero in intestinis tenuibus post mortem observatur inflammatio, inflammatio meningum rarius occurrit, saltem quantum mihi videre licuit. Deinde inflammatio excitatur, quando vehementer calefacto corpore, repentinum frigus occupat. Si quis, ab exercitatione calefactus, frigidam avidius hauriat, in Pleuritidem facile incidit. Eodem modo concipimus ab ingesta frigida posse intestina vel phlogosi leviori, vel inflammatione vehementiori corripi. Ventriculus scilicet accumbit & incumbit intestinis, adeo ut frigus liquoris, avidius hausti, facile afficiat intestina membranosa & copiosissimis vassis sanguineis ditata. Meninges autem cerebri cranio, tanquam aggere, tutæ sunt, nec potulentorum aut esculentorum frigus eo pertingit. Deinde humiditas cerebri continuo meningis veluti fovens, easdem videtur ab inflammatione magis tutas reddere. Demum si essentiam hujus affectus distinctè concipiamus, prout ab aliis symptomatibus distinguitur, ea proprie consistit in nimia & depravatâ spirituum agitatione, à febris vehementiâ, æstu aut malignitate producta.



Sta. Crediderim itaque rarius ab inflammatione membrana-  
rum cerebri, frequentius ab inflammatoriâ dispositione, le-  
viori phlogosi, aut nimia repletione, expansione, vel etiam  
malignitate sanguinis fervidi oriri Phrenitidem: posteriores  
has species sæpius curari, priorem sæpe ægrotos interimere.

Ex iis quæ ego de inflammatione, & superius de Cephalal-  
giâ febrili disputavi, apparet, gradibus tantum differre pulsatio-  
nes temporum, difficilem per arterias minimas transitum, inflam-  
mationem, somnum: adeoque hæc paucis tantum tangenda sunt.

Quomodo  
inflammatio  
differat à re-  
liquis febrilibus sym-  
ptomatibus?

In hominibus sanis semper membranæ cerebri, nec non  
eiusdem corticalis substantia sanguine arterioso sunt repletæ,  
tubuli cerebri medullares itidem spiritibus animalibus copiosis  
gaudent, adeo ut somnus ex eo oriatur, quod, spiritibus  
animalibus, à vigilia prægressâ, exhaustis & fatigatis, sanguis  
substantiam cerebri exteriorem deprimat, debilem resisten-  
tiam spirituum superet, atque adeo medullarem substantiam ita  
comprimat, ut influxus spirituum in sensoria externa aliquo-  
modo impediatur. Percipitur in initio quidem aliqua cerebri  
depressio, vasorum repletio & somnolentia, verum cum tran-  
situs absque magna difficultate peragatur, gravitas quidem ali-  
qua capitis, pulsatio autem molesta in temporibus observari  
non solet, ita ut spiritus torpidi sese pressioni cerebri non op-  
ponant, nec somnum impedian.

Quomodo  
circulatio  
sanguinis  
per cere-  
brum ordi-  
nare peraga-  
tur?

Ubi autem dolor, & in temporibus pulsatio adfunt, jam  
vitium sanguinis adjunctum est, five nimia copia, five nimia  
agitatio, five minor attenuatio, five feri nimia tenacitas, five  
malignitas; talis enim sanguis validius propulsus, nimiam ef-  
ficat distensionem, pulsationem, dolorem, aliquando inflamma-  
tionem. Omnia hæc spiritus animales exagitant, efficiunt ut  
depressioni reluctantur, adeoque somnum excutiunt. Agita-  
tio hæc celerior multa objecta, brevissimo temporis spatio,  
menti repræsentans, defatigatio spirituum, attentionis defe-  
ctus ob ægritudinis molestias, faciunt, ut prava sequatur ra-  
tiocinatio & phrenitis.

Quomodo  
in febribus?

Inflammatiō, cujus ultimo loco facta est mentio, non con-  
tingit nisi à plurimis arteriolarum ramificationibus vehementer  
expansis, adeoque tumorem, pulsationem, ruborem, calo-  
rem,

Inflamma-  
tionis ratio,



rem, dolorem excitantibus. In inflammatione quippe est difficilior sanguinis per arteriarum minimas fibrillas transitus, non proportionatus cordis iteratæ contractioni, adeoque sanguinis è corde expulsionem. Inflammatio habet comitem febrem & sanguinis dispositionem inflammatoriam. Inflammatoria dispositio manifesta est in sanguine Pleuriticorum V. S. educto. Ibi cernitur in superficie crusta admodum glutinosa, tenax & crassa, adeo ut cultri ope vix diffecetur. Oritur hæc à sero inspissato & in gelatinæ consistentiam evecto, uti illud videri potest si serum sanguinis V. S. educti imponatur igni. Simulac ebullierit serum refrigeretur, & apparebit, illud consistentiam acquisivisse gelatinæ. Verum observandum est, non semper adesse inflammationem, ubi sanguis ita incipit immutari. Si causa externa febrem inducens absit, possunt hi videri sibi valere, quamvis circulatio sanguinis jam aliquomodo à statu sano deflectat. Ubi autem ab æstu & frigore sibi mutuo succedentibus, excitata fuit febris, tum febris illa sanguinem commovens, & celerius per universum corpus propellens facile inflammationem, & inflammationis symptomata, superius enumerata, producit. Frigus illud externum non tantum ad febris, sed & inflammationis, productionem facit, quia nempe frigus externum vasa constringit, adeo ut sanguis tam promptè minimas arteriolas permeare non possit, quemadmodum pressio sanguinis febrilis illud requirit.

Somni  
morbofus.

Ubi autem inflammatio, & inflammatoria dispositio gravior abest, & sanguis tamen expanditur, atque mole & impetu cerebrum deprimit, oriri potest dispositio ad somnum, vel etiam morbi soporosi, uti in sequentibus videbimus; etenim circumstantiarum quædam varietas, & diversum ægri temperamentum, miram efficit symptomatum differentiam.

Phrenitidis  
causa proxima.

Hiscæ prælibatis jam Phrenitidis causæ sunt examinandæ. Causa proxima est spirituum major, celerior & inordinata agitatio. Majorem adesse spirituum agitationem patet ex inquietudine. Celeriores adesse spirituum agitationem apparet, quandoquidem loquela est concitior, tum etiam quia fere ægrotis multo plus temporis videtur effluxisse, quam revera effluxit. Sæpe enim videas eos, quando per breve tem-

pus



pus in somnum inciderunt, rogare, quota sit hora? & quando ea indicatur, mirantur non plus effluxisse temporis, meridie putant noctem debere instare, vesperi tempus matutinum: non aliam ob causam quam quod tempus dimetiantur juxta miram varietatem objectorum, quam sibi repræsentarunt; cum autem id multo celerius contingat quam in sanis, existimant multo plus temporis effluxisse. Inordinata etiam adest spirituum agitatio, nempe absque debita attentione, desultoria, vaga, hinc delirium phreneticum. Hæc eadem modo descripta spirituum agitatio essentiam Phrenitidis constituit, si ea consideretur tanquam morbus, quia id quod respectu symptomatis est causa, revera absolutè considerando est morbus, quia nempe omne symptoma est effectum morbi corpori inconveniens. Hæc si semel rectè percipiuntur, non hærebimus in quæstionibus inutilibus, quæ sæpe apud practicos occurrunt.

Oritur hæc nimia agitatio spirituum à febre, æstu, dolore, inflammatione. Oritur à febre quandoquidem spirituum animalium sequestratio, & impetus à sanguinis pressione dependent, adeo ut hæc sibi mutuo sint aliquomodo proportionata. Si ergo sanguis sit magis agitato, spiritus etiam magis erunt agitati. Aestus sanguinis, à motu ejus intestino dependens, non tantum partes fluidas, sed & solidas afficit, adeo ut totum caput ejusque partes cranium, membranæ, ipsum cerebrum solito magis incallescant: calor hic spiritibus animalibus communicatur, adeoque eorum motum intendit. Dolor non tantum capitis, tanquam partis proximæ, sed & aliarum partium spiritus exagitat, quandoquidem vis illata partibus, ad cerebrum delata, spiritus commovet, adeoque iisdem majorem agitationem imprimit. Ad dolorem quoque pertinent, omnis generis molesta febrilia symptomata, itaque molesta temporum pulsatio, dolores lumborum, pulsationes eorundem, ut & artuum, ad dolores in lato sensu referuntur. Revera autem dolores multum huc facere, patet, quandoquidem ordinariè ante invasionem phrenitidis ægroti conquerruntur de doloribus. Jam autem non est existimandum dolores illos à phrenitidis invasione statim esse sublato, sed ægroti illos non amplius exactè percipiunt, quemadmodum nec re-

Magis remota.



liqua symptomata : hinc phrenetici ferè à querelis abstinere , imo sese perbellè habere testari solent. Si ad has causas accedat inflammatio , tanto facilius gravior exorietur phrenitis. Et enim inflammatio & tumorem , & dolorem , & æstum habet comites. Inflammatio & febrem & febrilia symptomata intendit. Inflammatio solidis partibus vim infert , solidis partibus majorem æstum impartit. Inflammatio sive cerebri membranas , sive etiam diaphragma aut alias partes invadat semper spiritus animales vehementer exagitat , vigiliis & Phrenitidem producit.

Causæ hæ  
phænomenis phreni-  
dis pulchrè  
respondent.

Ex hisce principiis cuncta phænomena , quæ ante diximus in phreneticis observari , facilè explicantur. Phrenitis non tam in principio , quam in augmento morbi , invadit , quia in principio omnia symptomata febrilia sunt mitiora , dolor , æstus , vigiliæ , agitatio spirituum animalium. In augmento hæc omnia invalescunt , & quod palmarium est , sanguis magis magisque à naturali crassi desciscit , aut dispositionem inflammatoriam nanciscitur. In somnum sunt proclives , quandoquidem expansio sanguinis cerebrum aliquomodo deprimit , atque ita somnolentos reddit ; citò autem expergiscuntur , quandoquidem motus spirituum validus , & dolores aut anxietates continuò somnum excutiunt. In somnum sunt proclives quandoquidem sæpe vigiliæ protractæ præcesserunt , & spiritus fuerunt exhausti. Illæ ipsæ vigiliæ autem non parvum momentum attulerunt ad ratiocinationem pervertendam. Sani nimium vigilantes , nimium studiis incumbentes aliquando in delirium incidunt. Non oportet arcum semper esse tensum. Videntur continuâ illa agitatione cerebro imprimi vestigia magis superficialia , ut ita dicam : cumque tandem maximus illorum coacervetur numerus , non mirum si nimia copia confusionem pariat , & delirio præbeat ansam. In Febribus ubi major est sanguinis pressio , comminutio quarundam particularum sequitur major , aliarum major visciditas , agitatio & calor majores , unde vis quædam cerebri membranis infertur : eodem tempore spiritus animales magis agitati secernuntur , qui depressioni cerebri & in somnum propensione resistentes , aliquando vigiliis producunt satis protractas , viam phrenitidi ster-



sternentes. Mentionem feci caloris, cujus consideratio hic utilis est. Calor sanguinem & spiritus exagitat, atque vigilias producit, quemadmodum experimur valdè sanos, præ defatigatione & æstu, aliquando vigilare, aliquando inquietè dormire. Expansio & pressio à calore productæ deberent allicere somnum, verum quandoquidem fibrillæ nerveæ per universum corpus ab æstu molesto nimium vellicantur, subsequuntur vigilæ, somnus abigitur, vel interturbatur. Loquaces sunt, quia spiritus nimium agitati in nervos & musculos copiosius influunt, præcipuè autem versùs linguam, quia cogitationes nostræ & loquela arctissimo nexu cohærent, adeo ut de rebus vix cogitemus quin verborum etiam subeat memoria, de loquelâ itidem vix, quin spiritus determinentur versùs linguam & labia. Ita videmus illos, qui attentius, vel cum animi aliquâ passione de re quapiam cogitant, eodem tempore loqui submissè, etiamsi de loquela ne cogitent quidem. In hoc casu autem omnia cum impetu fiunt, quandoquidem non tantum spiritus, sed & sanguis à febre sunt nimium agitati. Si accedat aliquis auctoritate pollens, atque eos compellet, mentis videntur compotes, quia tum depressio & compressio illa cerebri, vestigia confusa menti repræsentans à subitâ spirituum excitatione, & explicatione cerebri tollitur; verum ubi attentio illa evanuit, & cerebrum iterum concidit, inconcinna effutiunt. Dilucida illa intervalla citius aut tardius cessant, prout expansio sanguinis, & cerebri depressio vel major est vel minor, prout febrilis paroxysmus vel intenditur vel etiam remittit, prout itidem magis vel minus confusa est spirituum agitatio. Phrenitidi junguntur aliquando vigilæ protractæ, quando scilicet expansio & repletio tanta vasorum non adest, ut somnum excitare possint, cum interim spiritus ita agitentur, ut illi multa vestigia cerebri, tum antiqua tum etiam recenter in affectione hac malè formata, celeriter percurrentes, judicia forment non cohærentia: atque juxta animi passiones, à rationis dictamine alienas, actiones suas dirigant. Si quis sese eorum inclinationi opponat aliquando ferociunt, quandoquidem & spiritus & sanguis à febre exagitati, levi momento furorem brevem concipiunt, juxta quem tum membrorum



rum motus dirigitur. Mens non paret, sed imperat, quandoquidem rectæ rationis dictamine excusso, salutaria monita flocci fiunt, tanquam si furdo narretur fabula. Omnia autem hæc symptomata in diversis ægrotis variant; variant enim morbi magnitudo, ægri constitutio, partium solidarum configuratio, nec non aliæ circumstantiæ: cumque inter varios capitis morbos magna sit affinitas, non mirum si aliter atque aliter sese exhibeant.

Phrenitidis  
descriptio  
vera.

Postquam Phrenitidis descriptionem vulgarem ad examen revocavimus, postquam itidem phrenitidis invadendi modum, & symptomatum rationem tradidimus & explicuimus, superest ut cum veritate magis convenientem subjungamus descriptionem. Ea potest duplici ratione proponi, nempe ut Phrenitidem consideremus tanquam morbum à morbo ortum, vel tanquam symptoma. Si Phrenitidem consideremus tanquam morbum, Phrenitis est *agitatio nimia & perturbata spirituum animalium à febre producta ratiocinationem pervertens*. Vel si tanquam symptomata: Phrenitis est *delirium à febrili & nimia spirituum animalium agitatione productum*.

Ea explicatur  
& confirmatur.

Quomodocunque Phrenitis describatur, res ferè eodem redit. Essentia Phrenitidis consistit in nimia, h. e. nimis diu continuata, nimis celeri & perturbatâ spirituum animalium agitatione, ea sumitur tanquam genus in priori descriptione, & à melancholicâ aut maniacâ agitatione nimiam distinguitur, quod hæc à febre producat. In altera, delirium symptoma evidens constituit genus, cujus causa statuitur eadem illa agitatio spirituum febrilis. Causa autem symptomatis proxima morbi essentiam constituit. Nimiam autem spirituum agitationem hic adesse, ex eo manifestum est, quod ægroti in somnum interruptum sæpe incidant, iterum excitentur absque manifestâ causa, expergefacti rogant, quota sit hora? cumque intelligunt se non diu dormivisse ex. gr. esse horam primam pomeridianam, mirantur noctem necdum instare, si illud circa vesperam contingat, mirantur noctem necdum præterivisse uti in superioribus explicatum est. Si ægroti omnino non dormiant, tum è garritu, cantilenis, imo ex ipsis vigiliis manifestum est, nimiam spirituum agitationem somnum excutere. Illa agita-

tio



tio spirituum in hoc casu à febre habet ortum, quandoquidem Phrenitis non producit febrem, sed febris Phrenitidem. Geminæ autem hujus descriptionis prior præferenda videtur, quandoquidem genus melius statuitur id quod in corpore habet locum, quam id quod ad mentem pertinet, quandoquidem medicus omnes morbos considerat relativè ad curationem: & quamvis in priori addatur *rationem perversam*, tamen non est rejicienda, quoniam illud affectum determinat, & magnitudinem morbi ostendit. Alteram tamen addere placuit, ut me consuetudini accommodarem; talia enim in nostra arte ob arctissimam mentis cum corpore unionem, vix vitari possunt.

Progrediendum jam est ad explicationem differentiarum Phrenitidis. Phrenitis in latâ significatione complectitur, Phrenitidem in specie ita dictam, & Paraphrenitidem. Phrenitis in hac significatione est gravior species, quæque ut plurimum oritur ab inflammatione membranarum cerebri, vel saltem à dispositione inflammatoriâ. Paraphrenitis non oritur à tali inflammatione partium capite contentarum, estque ergo vel levior species à minori agitatione spirituum & sanguinis producta, vel ab inflammatione aliarum partium Phrenitidem per consensum seu Paraphrenitidem efficiente originem ducit. Solet in hoc casu considerari inflammatio Diaphragmatis; verum qualiscumque inflammatio, si vigilias continuatas, febrem & delirium febrile habeat adjunctum, Paraphrenitidis vocabulo mihi optimè videtur indigitari. Existimat *Willisius* Paraphrenitidem malè statui originem ducere ab inflammatione diaphragmatis, opinionem autem inde ortam, quod in hoc casu diaphragmatis motus impediatur aut pervertatur, hinc antiquos diaphragma *Φρένας* appellasse: ego judico, quandoquidem *Φρενῶν* vocabulo gaudebat diaphragma, hinc Phrenitidis aut Paraphrenitidis causam diaphragmatis inflammationi esse tributam, ne scilicet explicatio symptomatis à vocis etymologiâ abluderet.

Differentiæ  
Phrenitidis.

Distinguenda etiam Phrenitis quod vel propensionem ad somnum habeat adjunctam, vel quod vigiliæ pertinaces ægrotum exercent.

Distingui etiam potest Phrenitis quod convulsionibus fit  
P  
stipata,



stipata, vel saltem motibus convulsivis, vel quod ab iis sit immunis.

Phrenitis etiam invadit ægros vel adhuc fatis robustos, & quibus Phrenitis est familiaris, vel eos quibus è morbo protracto, vires sunt jam fatis attritæ, ac quibus hoc symptoma minus est familiare. Tandem differt Phrenitis pro naturâ febris, cujus est symptoma; comitatur enim vel febres malignas, vel ardentes, vel etiam mitiores & aliquando intermittentes: & hac ratione tum prognosis tum curatio aliter atque aliter est instituenda.

Signa.

Signa Phrenitidis ex antedictis sunt manifesta, ægri febricitant & delirant; cum antea de variis conquererentur symptomatibus, subitò, febre nequaquam cessante, sed potius invalescente, sese perbellè habere affirmant. An inflammatio vel dispositio inflammatoria adsit, è symptomatum vehementia colligitur, è dolore, è signis inflammationis. Inflammatio etiam ex urinarum inspectione manifesta fit, urina intensè rubet, crassa est, cum, vel sine sedimento ad rubedinem vergente. Interim non semper colligere licet ubi tales urinæ non adsunt, abesse Phrenitidem; contingit enim aliquando adesse Phrenitidem & urinam non admodum intensè rubere. Dico aliquando adesse Phrenitidem, ne quis decipiatur Aphorismo *Hippocratis* 72. sect. iv. ubi legitur Ὀκρόσοισι ἔρα διαφανέα, λευκά, πονηρά. μάλιστα ὃ ἐν τοῖσι φρενετικοῖσιν ἐπιφαίνεται. Hic enim Aphorismus obscurus redditur vel falsus per adjunctionem verbi ultimi ἐπιφαίνεται. An urinæ pellucidæ, & albæ maximè in Phreneticis observantur? Numquid in constitutione frigidâ ventriculi? Numquid in Nephritide? Numquid in constitutione diabeticâ sæpissimè redduntur tales urinæ? Itaque hic aphorismus aut specialius est determinandus, quod & *Galenus* vidit, aut dicendum τὸ ἐπιφαίνεται, redundare, & forte scioli alicujus manu fuisse adjectum. Verissimum est urinas albas & pellucas esse malas in phreneticis: verissimum itidem est, tales in pluribus aliis casibus excerni. An verò Phrenitis à cerebro malè affecto, an Paraphrenitis ab aliarum partium inflammatione originem ducens infestet, ex signis specialibus determinandum est. Cujus naturæ sit febris phrenitidem



nitidem produciens, è signis febrium, postmodum explicandis, dijudicandum est. Illud tamen non est usquequaque verum, in Phrenitide respirationem esse raram & magnam, propter oblivionem quod respirandum sit, in Paraphrenitide citam & parvam, ob inflammationem diaphragmatis. Præstat experientiam consulere, quam præjudiciis nimium tribuere. Proportio quædam intercedit inter pulsum, cordis contractionem, & respirationem. Quomodo ergo, ubi pulsus frequentior, cordis contractio est celerior, respiratio existet rarior? Aliquando bonus dormitat *Homerus*.

Prognosis phrenitidis ita institui potest, quod, generaliter loquendo, sit symptoma satis periculofum: interim periculum majus vel minus imminet, pro naturâ febris aut morbi, qui phrenitidem produxit. Phrenitis ordinariè paraphrenitide est periculofior, nisi quando paraphrenitis oritur à viscere vel parte nobili ita læso, ut nulla curationis spes amplius affulgeat. Phrenitis convulsionem excitans periculofior est eâ, quæ convulsionibus non est stipata. Phrenitis vel Paraphrenitis, statim in principio febrem comitari solita in assuetis, non est ita periculofa, quam ea, quæ postmodum, viribus attritis invadit. Phreneticus manum faciei admovens, ad venandum quid inde, aut festucas, floccos aut paleas carpens est morti vicinus, juxta *Hippocratem* lib. 1. prælag. 16. Phrenitis morbus acutus est, & brevi in salutem ægri vel mortem terminatur. Si phreneticus in somnum incidit, postmodum expergefactus magis deliret, periculofè decumbit. Stridor dentium cum insaniam maximè perniciosum, Aph. 17. f. 1.

Indicationes in Phrenitide sunt spiritibus nimium agitatibus subtrahere pabulum, Febrem tollere, inflammationem vel dispositionem inflammatoriam curare, denique spirituum motum compescere.

Cur medici industria in eo debeat occupari, ut spiritibus nimium agitatibus subtrahatur pabulum, facile attendenti apparebit. Nempe medicamenta quæ spirituum motum compescunt, si exhibeantur antequam alia præmissa fuerint, sæpe multum nocent. Deinde medicamenta & instrumenta medicinæ maximè efficacia, in spiritus immediatè agere non

Prognosis.

Indicationes.

Cur spiritibus nimium agitatibus subtrahi debeat pabulum?



possunt. Nullus est Chirurgus quantumvis dexter, quantumvis peritus, qui, instrumentorum ope, ad spiritus usque animales pertingere possit. Nullus Chirurgus spirituum copiam nimiam imminuere potest. Cum ergo hac viâ curatio spirituum tentari non possit, aliâ illud viâ aggrediendum est. Sanguis est respiciendus, quicum spiritibus maxima intercedit necessitudo. A sanguine, & spirituum copiâ, & spirituum motus dependent, ergo in spiritus agit medicus, quando in sanguinem agit, quando imminuendo sanguinem spiritibus subtrahit pabulum. Hinc ergo fit manifestum, maximè naturalem & primam indicationem in hoc morbo esse eam, quam primo loco proposui.

Venæ sectio, spiritibus pabulum subtrahit.

Venæ sectio igitur est insigne remedium in phrenitide, quando sanguis nimium copiosus, nimium agitatus simile pabulum subministrat, similes producit spiritus. V. S. spiritibus nimium agitatibus subtrahit pabulum. Tanto majoris autem facienda est V. S. in hoc affectu, quandoquidem ea & ratione febris, & ratione inflammationis, & ratione dispositionis inflammatoriæ sæpenumero requiritur. Hæc cum per se sint manifesta, cautiones tantum quædam proponendæ sunt, è quibus colligere licet quando ea in usum sit vocanda, quando autem omittenda. Instituenda est V. S. antequam vires nimium atterantur. Instituenda est in hominibus plethoricis, robustis, in flore ætatis constitutis. Instituenda est ubi in urina inflammationis signa apparent. Instituenda est tempestivè ubi natura febris V. S. postulat. Non est instituenda in statu morbi, ubi nempe Phrenitis vigilias protractas excipit, & non ingruit nisi ubi vires attritæ mortem non longè abesse significant. Hoc pacto insigni remedio ab imprudentibus infamiæ nota inuritur. Non est instituenda in hominibus emaciatis, exsuccis, decrepitis. Non est instituenda, quando alia ratione natura crisim salutarem molitur. Non inutile existimo *Hartmanni* verba hic adscribere: *Initium fit curationis, ut in morbo acutissimo rectissimè à venæ sectione (habita nulla ratione temporis, & horæ & ventriculi pleni) ad revellendum & evacuandum: Plethora si magna sit, V. S. sequente die reiteranda: quæ ob urgentem necessitatem protinus & quidem copiosa si vires ferant, sanguisque redundet, ad-*  
mini-



ministranda est. Si vero atas & virium lapsus obſtent, cucurbitula homoplatis & cervici cum ſcarificatione applicentur. Exemplum Phrenitidis V. S. ad animi deliquium curatæ, vide ſis apud Zacutum Luſitan. H. M. P. Lib. 1. Hiſt. 9.

Spiritibus nimium agitatſis etiam ſubtrahitur pabulum, e-  
vacuatione primarum viarum. Ego nequaquam exiſtimo bi-  
lem ad cerebrum rapi, aut ſanguinem bilioſum ibidem pu-  
treſcere, ſed primarum viarum evacuatio duplici nomine  
multum juvat, tum quia ſaburra illa, in inteſtinis hærens,  
potulentis permiſta ſanguinis motum auget, & eundem diſpo-  
nit ad ſpiritus magis agitados producendos: tum etiam quia  
repletio & fervor inteſtinorum, æſtum ſanguini majorem im-  
primit, preſſionem ejus difficiliorem reddit & vehementiorem,  
unde ſpirituum animalium agitatio ſequitur major. Quando-  
quidem autem hic morbus invadit, ubi vires ſunt attritæ, ubi  
inflammatio adeſt, ubi morbus ad ſtatum vergit prudenter a-  
gendum & ſæpe ad enemata confugiendum eſt, quæ repetita  
non parum profuerunt. Ex. gr.

Ut & eva-  
cuatio pri-  
marum via-  
rum.

Per enema-  
ta.

℞. Rad. Lilior. alb. ℥j.

Fol. Violar.

Malva

Mercurialis.

Lactuca aa m. i.

Flor. Roſar. pallid. p. i.

Coq. ſ. a. ex aq. pura colat. ℥x. Add.

Elect. Diaprun. ſolut.

Mellis Mercurialis. aa ℥j.

Sal commun. ℥j.

M. F. Enema.

Julius Caſar Claudinus vitat uſum enematum acriorum, Hol-  
lerius calidorum, vitat Hieram & Benedictam, atque hoc mo-  
do præſcribit.

℞. Decoct. Furfurum ℔j in qua diſſolve.

Sacchar. rubri. Mellis Roſac. aa ℥j.

Ol. Violati. ℥iij. Sal. com. ℥ij.

M. F. Clyſter.

Sennertus ſequens præſcribit Enema.



℞. *Malva. Viol.*

*Lactuc. Parietar. aa m. i.*

*Summ. Anethi. m. ℞.*

*Coq. in aq. f. q. Colat. ℞. ℥j.*

*Ol. Viol. ℥iij. Sacchar. alb. ℥j.*

*F. Clyster.*

*Rolfincius* etiam laudat usum Clysterum, & præscribit formulam quæ Consilio quarto videri potest. *Riverius* non vult olea admisceri in Phrenitide Enematibus.

*Per laxantia.*

Quod si Phrenitis citius invadat, vires sint robustæ, nec inflammatio impediatur, catharticum medicamentum potest præscribi, ex. gr. infusio laxans

℞. *Fol. Senn. mund. ℥j.*

*Rhei elect.*

*Tamarind. Ind. aa ℥℞.*

*Sem. foenic. dulc. ℥℞.*

*Bulliant leviter, colat. ℥iij. Add.*

*Syr. Rosar. solut. cum senn. ℥ij.*

*F. Haustus.*

*Dolæus* rectè monet in morbis acutis fortiora purgantia nocere, quatenus motum sanguinis & spirituum adaugent, itaque mitiora lenientia eligenda esse suadet, nempe hæc, decoctum *Tamarindorum*, hordei cum passulis & radicibus *Acetose*, addito saporis gratiâ vel *Syrupo Papaveris erratici*, vel *Berberum*, vel *Acetofellæ* &c. Non possum laudare *Rolfincium* qui plura coacervat absque necessitate, cum paucioribus ægroto melius consulere potuisset. Ne frustra hoc affirmâsse videar subjungam ejus formulam.

℞. *Flor. Violar. Primul. veris, Rosar. rubr. aa p. i.*

*Rad. Scorzonæ. Rhabarb. Alexandrin. aa ℥ij.*

*Gialap. nigr. resinosi. ℥v. Pulp. Tamarind. ℥iij.*

*Spicæ, Cinnamom. aa. ℥j.*

*Coq. in f. q. aq. fontane Colat. ℥iv. Add.*

*Syr. de Cichor. cum Rhabarb. ℥℞.*

*Elect. Rosar. Mesue. ℥iij.*

*Aq. Apoplect. Amar. ℥j.*

*M. F. Haustus*

*Rectius*



Rectius *Platerus Rhabarbari* Div. infundit in *aqua Rosarum & Violar.* expressioni add. *Syr. Rosar. solutiv.* ℥j. & ita exhiberi jubet. *Claudinus Tamarind.* ℥j. in fero decoquit & colaturam exhibet.

Quamvis autem plerumque Phrenitis febrium sit symptoma, & in indicationibus monuerim ego febrem esse tollendam, non est tamen hujus loci tradere quomodo illud fieri debeat. Febres phrenitidem producentes variæ sunt, itaque præstat de hac materiâ filere quam pauca dicere. Febrium curatio exacta eousque omittenda, donec tractationis ordo nos eo deduxerit.

Quomodo  
Febris tol-  
latur non est  
hic dicendi  
locus.

Inflammatiō & inflammatoria dispositio tollitur V. S. di-  
luentibus. sudoriferis. De V. S. jam in superioribus egimus. Quandoquidem autem in Phrenitide caput afficitur, commen-  
datur in hoc casu apertio venæ frontis, cui sententiæ ego non  
repugno, verum judico sectionem venæ vel brachii vel pedis  
præmittendam sectioni venæ frontis: ratio est, quod copiosa  
requiratur evacuatio sanguinis in inflammationibus, vena fron-  
tis autem ordinariè non suppeditat sufficientem sanguinis copiam,  
ne itaque tempus minus utiliter teratur V. S. statim instituen-  
da est, ubieductio sanguinis sufficiens, potest expectari; si  
autem postmodum sit repetenda V. S. tum non malè incidi  
potest frontis vena. Idem illud quod de sectione venæ fron-  
tis dixi, locum etiam habet in cucurbitulis: nempe hæ etiam  
minus promptè sanguinem evacuant, ideoque V. Sectioni sunt  
postponendæ, quod si circumstantiæ quædam venæ sectio-  
nem impedian, tum non malè recurritur ad cucurbitulas,  
quæ vel scapulis, vel manibus, vel cruribus, vel etiam lum-  
bis, aut natibus applicentur. Verum id quod superius mo-  
nui hic iterum inculcandum est, oportet ut V. S. tempestivè  
instituat, antequam inflammatio nimium invaluerit, ante-  
quam vires sint attritæ. Itaque quod in Pleuritide lippis &  
tonforibus notum est, V. S. non esse differendam, illud in hoc  
inflammationis genere etiam locum habet. Oportet medicum  
esse lynceum, non tantum præsentia expendere, sed & e cer-  
tis signis futura prævidere, totum curationis ordinem mente  
complecti, & singula remedia juxta exactam medendi methodum  
in

Inflamma-  
tio tollitur  
V. S.



in usum vocare. Itaque si æger plethoricus in febrem incidat, si dispositionis inflammatoriæ indicia sese prodant, si urina, si pulsus, si lingua eadem promant indicia, non oportet expectare ut æger evadat planè phreneticus, oportet venienti morbo occurrere. Oportet diligenter considerare V. S. in hoc casu pluribus indicationibus satisfacere. Sanguinis educatione tempestivâ non tantum ejus copia minuitur, non tantum nimix vasorum repletioni succurritur, verum etiam æstus compescitur, feri in consistentiam gelatinæ similem imutationi occurratur, spirituum animalium copia & agitatio imminuitur, adeoque præcavetur & curatur phrenitis.

Quid agendam Medico tardius advocato?

Quod si autem medicus tardius sit advocatus, si jam deliret æger, meminisse oportet egregium remedium esse V. S.; sed eam non semper esse tutam. In hoc casu judicium & prudentia medici imprimis requiruntur, quandoquidem circumstantiæ vel permittere, vel prohibere possunt generosum hoc auxilium. Si Aphthæ appareant criticæ, aut si natura alia ratione crism moliatur, si vires valdè sint attritæ, si æger sit decrepitus, si oculorum vigor sit fere extinctus, si pulsus intermittat, si æger floccos carpat, si nulla videatur reliqua salutis spes, præstat à V. S. abstinere. Sin autem vires consent, si morbus necdum videatur ad statum pervenisse, si hæmorrhagia aut evacuatio consueta sit suppressa, si diu intermissa fuerit V. S. quamvis præstitisset citius illam in usum vocâsse, præstat tamen serius institutum, imo anceps remedium quam nullum.

Objectioni satisfat.

Nec est quod mihi quispiam objiciat, etiam à nimis copiosâ sanguinis evacuatione posse oriri febres, ex. gr. à nimio lochiorum & menstruorum fluxu. Non nego illud sæpius accidere, imo addo sanguinis evacuationem copiosam plerumque pulsum frequentiore habere comitem. Non nego à minori arteriarum & venarum repletionem adeoque pressione, vires admodum prosteri, lypothymias excitari, sæpe oriri flatum, distensiones intestinorum, anxietates circa præcordia, ventriculi debilitatem: verum addo in tali casu ægros raro mori Phreneticos, mens ordinariè constat ad extremum usque. Ita memini me aliquando vocatum fuisse ad puerperam per tres circiter



citer hebdomadas nimio lochiorum fluxu laborantem, debilem quidem, verum rationis omnino compotem. Tractaverat eam pharmacopœus valdè suffenus, qui perperam medicinam fecisse videbatur exhibendo lochia promoventia medicamenta. Pallebat admodum tanquam exanguis, & conquerebatur se nocte præcedenti vehementi fuisse correptam febre, & anxietatibus admodum molestis. Ego impero quietem summam, præscribo diætam & medicamenta lochiorum nimio fluxui resistantia, quæ etiam cum aliquo successu fuerunt assumpta, adeo ut circa vesperam videretur habere melius. Horâ nonâ circiter petit matulam, sese ipsam erigit, matulæ insidens in syncopen incidit & statim expiravit. Talia observasse non est inutile, quandoquidem in hisce non semel peccatur. Concludo, cum copiosam evacuationem non soleat excipere phrenitis, imo cum ea à Phrenitide, saltem vehementiori, præservet, quamvis ægrotantes feбри & aliis infestentur symptomatibus, imo quamvis succumbant morbo, objectio contra V. S. in Phrenitide instituendam nullius est ponderis. Nolo enim sanguinem nimia, sed mediocri, educi quantitate, nolo sanguinem educi nisi ubi copiæ signa adsunt, nolo V. S. vires exhauriri, nolo intempestivè venam secari. Tempestivâ educatione superflui, & inflammationem producentis vel producturi sanguinis, symptomata à nimia pressione oriunda vel vitare vel curare mihi est animus. Habeo consentientes mecum non tantum *Hartmannum*, quem superius laudavi, sed omnes fere medicos etiam neotericos *Timæum*, *Walsmiedium*, *Dolaum*, *Willisium*, cujus hæc sunt verba, *de anima brutorum* p. 11. c. 10. *Phlebotomia raro aut nunquam omittenda, statim adhibeatur. Nihil enim æque ac hoc remedium sanguinis flammam immodicam deprimit, ac diminuit, nihilque incendium ejus a regimine animali magis avertit aut revocat: Quapropter, si res exigat, vena modo in brachio, aut manu, modo in crure aut pede, modo in cervice aut fronte aperiatur: quandoque forsitan expediat arteriam temporalem pertundi: quin etiam ex aliis locis per hiru- dines nonnunquam aut cucurbitulus sanguinis detrahi: hoc enim potissimum auxilium, & juxta Galenum ὡς πρῶτον ὑπὲρ πάντων ἢ μέγιστον ἐσόμενον βοήθημα plurimas in Phrenesi indicationes explere solet.*



Diluentia.

Alterum quod ad inflammationem præscripti sunt diluentia, quæ nempe particulis aqueis & lubricis sanguinis constitutionem tenaciorem diluunt, atque æstum temperant, nec non progressum faciliorem efficiunt. Hic etiam locum habet illud Poetæ

Ἀπὸ τοῦ μὲν ὕδατος.

Aqua nimiam sanguinis pressionem & dilatationem compescit: aqua ardorem exstinguit: aqua humores reddit fluidos: aqua sitim sedat: aqua omnem acrimoniam temperat. Itaque potus tenuis & aqueus, aqua cocta, cruda, acidulæ hic in usum vocari possunt. Possunt quoque in aqua decoqui variæ herbæ refrigerantes aut temperatæ in hoc morbo ab auctoribus commendatæ qualia sunt *Acetosa*, *Lactuca*, *Buglossa*. Utilia quoque sunt *Cichoracea*, quæ etiam amarore suo particulas tenaciores incidere valent, talia sunt *Taraxacum*, *Sonchus*, *Cichoreum*, *Endivia*, &c. Ex his & similibus pro varia circumstantiarum ratione, pro appetitu ægri vario, variæ possunt concinnari formulæ. Ex. gr.

℞. Rad. *Acetosa*.

*Scorzoner. aa. ʒj.*

Fol. *Lactuca*

*Acetosa*

*Sonchi*

*Taraxac. aa. m. j.*

Coq. f. a. ex aq. pura colat. ʒxxx. Add.

*Syr. Violac. f. ʒj.*

*Nitri anodin. ʒß.*

M.

*Willisus* hoc modo præscribit.

℞. Rad. *Graminis*.

Fol. *Luzula*.

*Pimpinell. aa. m. j.*

*Hordei ʒß.*

*Pomum incis.*

*Uvarum Corinthiacar. vel fragorum, vel*

*Fructuum Rubi Idæi m. j.*

Coq. in aq. fontis ℥ iv. ad tertiæ partis consumptionem colat. clarificatæ add.

*Syr.*



*Syr. Violar. ℥j.*

*Sal. Prunell. ℥jss.*

*M.*

Sequentes formulæ sunt *Bierlingii*.

*Rx. Aq. Nymphaea.*

*Portulac.*

*Anagallid. aa. ℥iiij.*

*Syr. de Nymphaea.*

*Papav. Rhead. aa. ℥j.*

*Tinctur. Violar.*

*Rosar.*

*Papav. Rhead. aa. ℥jss.*

*M.*

*Rx. Seri lactis caprilli cum Spir. Vitriol.*

*acidul. ℥jss.*

*Flor. Borrag.*

*Rosar.*

*Papav. Rhead. aa. p. iiij.*

*Stent in loco calido postea filtrentur & addatur Syr. de Nymphaea q. s. pro aliquali edulcoratione.*

Tertium quod ad inflammationem præscripti sunt sudorifera. Quemadmodum enim in inflammatione suspecta sunt purgantia, ita egregii usus sunt diaphoretica. Oportet autem ut ea eligantur temperatiora, ne nimia spirituum agitatio, & æstus adaugeantur. Quandoquidem autem in plurimis morbis hæc locum habent, agam tantum de iis quæ Phrenitidem potissimum respiciunt. Julapium tale præscribit *Hartmannus*.

*Sudorifera.*

*Rx. Aq. Nymph. ℥iiij.*

*Rosar. Bugloss. aa. ℥vj.*

*Syr. de Ribibus vel Limonibus. ℥iiij.*

*Sal. prunell. ℥j. vel ℥jss.*

*M.*

Nec multum dissimile est sequens *Willisii*,

*Rx. Aq. Pomor. Cerasor. nigr. Paralys. aa. ℥iv.*

*Citri totius. ℥ij.*

*Margarit. pulv. ℥j.*

*Q 2*

*Syr.*



*Syr. è succo citri. ℥j.*

*M. F. Julapium. sumantur ℥iij.  
ter vel quater in die.*

Forma pulveris præscripsit *Walsmidius*

*℞. Cinnabar. nativ. gr. v.*

*Nitri alcalisati. gr. iv.*

*Pulv. Bezoard. vel Antim. diaph. gr. xij.*

*M. F. Pulvis.*

*℞. Lapid. Bezoar.*

*Cancrer. aa. gr. v.*

*Camphoræ. gr. iv.*

*M. F. Pulvis.*

*Tinctura Bezoardica* sæpius item detur, ac *nitrum* in potu ordinario copiosè propinetur.

Quamvis enim ille hæc commendet tanquam deobstruentia, cum tamen in inflammatione nulla sit obstructio, sed transitus per minima vasa difficultas, adeoque expansio & dolor & æstus, hæc ideo profunt quandoquidem sudores movendo transitum per minima vasa faciliorem reddunt. *Rolfincius* hunc habet pulverem.

*℞. Antim. diaph. Bez. mineral. aa. gr. vj. Sol. Lun. aa. gr. iij.*

*Magist. C. C. cum Sp. Nitr. parat. gr. viij.*

Divide in ij. partes æquales pro duabus dosibus, exhibe cum *aqua fl. Sambuci.*

Quomodo  
Spirituum  
motus com-  
pescendus?

Ultimum inter indicationes generales relatum, fuit, compescere nimium spirituum motum. Fit illud per medicamenta interna & externa, per utraque blandius aut potentius. Observandum est prudenter initium fieri à mitioribus; hinc enim patet quid ægri ferant, & quæ utilitas inde in ipsos redundet. Blandius spirituum motus sedatur per *diluentia* & *hypnotica* minus potentia, potentius per medicamenta *narcotica*.

Medica-  
mentis in-  
ternis.

Prioris exempla præbent sequentes *Willisi* formulæ.

*℞. Aq. Fl. Paralyseos ℥iv.*

*Syr. de Moeconio ℥ss.*

*Margarit. ℥j.*

*F. Haustus. sumendus serà nocte.*

*℞. Sem.*



℞. Sem. Papav. alb. ʒij. Sacchar. cand. ʒjʒ.

Simul contusis affund. aq. papav. alb. ʒvj.

F. Expressio. sumenda eodem modo.

De opio, narcoticis & eorum usu in superioribus fusius egi, itaque sufficiet hic ea addere quæ in hoc affectu præcipuè locum habent. *Walsmidii* monitum non est contemnendum. Opiata quemadmodum in nulla inflammatione, ita nec hic conveniunt, nisi maritentur cum diaphoreticis. Non multum abludunt ea quæ *Willisius* in hoc symptomate inculcat. Narcotica cautè exhibeantur: quia nonnullis, quorum stomachi fibras valde teneras & sensiles habent, minus conveniunt. Sæpius observavi, hujusmodi hypnotica magnam in ventriculo oppressionem excitasse, dein statim inflationes ejus, & paulo postea spirituum in cerebro, imo in toto corpore distractiones, & inordinationes insecutas fuisse. &c. Quibus addere licet: quandoquidem affectus cerebri veluti cognitione quadam inter se junguntur, facile contingere ut è Phrenitide in Carum incidant ægroti; vidimus enim in superioribus Phrenitim sæpe invadere ubi vires sunt attritæ.

*Sydenhamius* refert se uti *Laudano Londinensi* ad gr. j.

vel

℞. Flor. Paralyseos m. j.

Coq. in s. q. aq. Cerasor. nigr. colat. ʒiij.

Dissolv. Syr. de Meconio ʒʒ.

Succi Limon. g. viij. vel x.

M.

*Rolfincius* commendat usum *Laudani opiatì solaris* ad gr. ij, iij, iv. forma pilularum deauratarum vel cum conserva *Rosarum antiqua*, vel *nymphaeæ*. Sequentem pulverem mira præstasse refert *Dolæus*.

℞. Lapid. prunell. gr. xv. Camphor. gr. iij.

Land. op. gr. ʒ.

M. F. Pulvis.

Una fidelia duos dealbabimus parietes si sudoriferis, quorum superius facta est mentio, jungamus prudenter opiata. Exempli loco potest esse formula sequens.

℞. Aq. Betonic. Flor. Tilia.

Prophylact. aa. ʒjʒ.

Oc. Cancrì ten. pulv.

Q 3

Cre-



*Cremor. diaphoret.*

*Corall. rubr. ten. pulv. aa. ℥j.*

*Laud. op. gr. ij.*

*Syr. Papav. alb. ℥vj.*

*M.*

*Vel si quis opium non amet & simul astum temperare gestiatur, hoc vel simile Apozema conveniet.*

*℞. Rad. Scorzon. ℥ij.*

*Liquerit. ℥j.*

*Fol. Acetose, Lactuca.*

*Taraxac. cum toto. aa. m. j.*

*Capit. Papav. alb. ℥jss.*

*Passular. maj. exani. ℥j.*

*Coq. s. a. ex aq. pura colat. ℥ij. Add.*

*Nitri Anodin. ℥ij.*

*M.*

*Dolæus refert foeminam quandam Limburgensem, à sequenti mixtura, sæpius per intervalla ad tria cochlearia exhibita, pristinae menti fuisse restitutam.*

*℞. Aq. Betonic.*

*Borrag. aa. ℥jss.*

*Tinctur. Rosar. ℥vj.*

*Laud. op. inc. gr. v.*

*Confect. Hyacinth. ℥j.*

*Syr. Acetos. Citri. ℥vj.*

*Sp. sal. Armon. gr. j.*

*M.*

*Externis.*

*De medicamentis externis in genere affirmare licet ea tutius in usum vocari quam interna narcotica. Sunt ea vel minus potentia vel magis efficacia. Minus potentia sunt lotiones pedum, & infusiones per aliquod tempus continuatæ; ita enim sæpe somnus invitatur. Potentiora sunt ea quæ fronti & temporibus applicantur, quæ ipsa tamen non unius sunt generis. Sequens Cataplasma est Timæi.*

*℞. Sem. papav. alb. ℥jss. Lactuc. ℥ij.*

*Contunde in mortario. add. aq. Rosar. ℥j*

*Aq.*



*Aq. flor. Rhead. Nymph. Aneth. aa ʒß.*

*Farin. Hord. q. s.*

*M. F. Cataplasma.*

*Hartmannus* hoc Epithema habet:

℞. *Aq. Solan.*

*Lactuc. aa. ʒij.*

*Acet. Rosac. ʒß.*

*Laud. op. ʒj.*

*Caphura. gr. vj.*

*M.*

*Franciscus Hildesheim* in Specileg. p. 116.

℞. *Ol. Rosar. omphacin. ʒjß.*

*Aceti ad penetrationem. ʒß.*

Mist. pro Oxyrhodino commissuræ coronali applicando, & sæpe repetendo.

Illud tamen monuisse non erit inutile, Frontalia & repellentia dicta medicamenta non debere actu frigida imponi aut fronti, aut capiti, sed tepida. Quare autem frigida noceant, calida profint, è superius explicatis patet. Morbus ex eo habet originem, quod sanguinis transitus per minima vascula cum difficultate peragatur, sive revera meningum adsit inflammatio, sive nimia tantum vasorum repletio tanquam gradus quidam ad inflammationem. Si ergo frigus externum vasa constringat, & sanguinem ad motum progressivum ineptiorem reddat, necesse est ut major sequatur repletio vasorum, adeoque major inflammatio, quemadmodum videmus aliquem in pleuritidem incidere, si avidius frigidam bibat. Itaque danda est opera, ut remedia in usum vocanda revera sint remedia, non autem venena, quemadmodum illud non raro contingit: danda est opera, ne imprudenti Medicamentorum applicatione malum ingravescat. Id quod dixi ex eo confirmatur, quod Chirurghi cataplasmata ad inflammationem non frigida sed calida soleant applicare.

Non tantum frontalia, qualia proposuimus, vocantur in usum, sed & agni aut vervecis pulmones calentes; egregre quoque profunt *columbae*, vel *gallinae* earumque pulli si medii dissiciffi imponantur capiti. In statu, is, quem modo laudavi, *Hildesheim*

ccm-



commendat resolventia moderata, *omentum castrati* vel *vituli*, actu calidum, ex animali vivo extractum, & cum repetimus, calefiat in *Oleo Chamomelino* vel *Anethino*. In sexu fœminino autem, ut efficacia horum animalium tanto melius ad interiora penetret, capilli ante abscindendi sunt; verum in casibus gravioribus solummodo ad hoc remedium confugimus, ubi alia auxilia incassum fuerunt adhibita: quandoquidem capillos sibi demi ægrè ferunt mulierculæ. Ita memini me puerperæ phreneticæ, vigilanti & cantanti præscripsisse, post amputatos capillos, impositionem Gallinæ vivæ mediæ diffissæ, una cum sanguine & fœcibus cum insigni successu. Exemplum plane simile habet *Felix Platerus* in observationibus p. 23. Vid. quoque *Claudius*: *Empyric rational.* qui *Catellos* laudat. l. III. c. 2.

De Cura-  
tione Para-  
phrenitidis.

Adjicienda sunt pauca curam differentiarum Phrenitidis spectantia. In Phrenitide exquisita caute admodum procedendum, & non facile ad narcotica confugiendum est. Circa Paraphrenitidem lubet adscribere *Cardalucii* verba: *Febres acutæ omnes, malignæ & qualescunque morbi sunt, debellantur radicitus ut plurimum mox in eorum pullulatione, propinato insigui quodam vomitorio, quod innumeris vicibus experti sumus, verum non expectamus, donec signis dignosci queat, qualis præcise morbus vel febris efflorescere velit, sed è vestigio, & quam primum quis se male habet. Exhibemus ipsi Centaurium nostrum minerale, cujus locum subire potest aqua benedicta Rulandi: &c.* In Paraphrenitide inflammationibus & doloribus aliarum partium præmissis universalibus tutius in usum licet vocare opiata. Pilulas quas *Mynsigtus* in Epilepsia & Vertigine præscribit, malim ego in Paraphrenitide in usum vocare.

℞. *Land. op. g. v.*

*Unicornu animal.*

*Margarit. Corall. aa. gr. iij.*

*M. & cum Ol. Cranii humani.*

*F. Pilulæ parvæ, pro una dosi:*

Loco Olei Cranii humani potest sumi alius liquor appropriatus, ut *Liquor Nitri fixi* &c.

Ubi in Phrenitide propensio ad somnum adest, cautius exhibenda sunt hypnotica & narcotica, vel planè omittenda. In



In Phrenitide convulsionibus stipata periculum, in quo ver-  
fatur æger, adstantibus & amicis significandum est: à medi-  
camentis potentioribus, ut plurimum, abstinendum, quandoqui-  
dem vires solent esse debiles, externa in usum vocanda. Itaque  
pedibus subjiciatur *fermentum* acidum, *pisces* varii generis, uti  
in superioribus explicatum est. *Vesicatoria* etiam & *Canthari-  
des* variis partibus applicentur, vel etiam *cucurbitula sicca*. Si  
alvus non respondeat enemata crebro injicienda. Ad vires con-  
fortandas, aquæ cordiales, & medicamenta antispasmodica  
temperata conveniunt. Aquarum cordialium dictarum plures  
exstant formulæ; sequentes *Timæi* non sunt inutiles, si Syru-  
porum addita fuisset minor quantitas; quorum enim tanta  
Syruporum copia, cum multi dulcia non ferant?

De Con-  
vulsionibus.

℞. Syr. *Perlar. oriental.* ℥ijss.

*Granator.* ℥jss.

*Flor. Rhead.* ℥ij.

*Aq. nostr. Cordial. frigid.* ℥iiij.

*Cerasor. nigror.* ℥ij.

*Sp. Rosar.*

*Fl. Tilia. aa g. xv.*

*M.*

Mihi unicus *Syrupus Granatorum* abunde sufficeret.

℞. *Aq. Cerasor. nigr.* ℥vj.

*Borrag.* ℥iiijss.

*Syr. Granator.*

*Fl. Tunica aa* ℥ijss.

*Fl. Rhead.* ℥ij.

*Sp. Vitriol. ad gratam aciditatem.*

Si phrenitis invadat ægrum satis robustum V. S. liberalior  
vel repetita, aut similia remedia potentiora in usum vocentur:  
si autem vires sunt fractæ, talia vel omittenda vel parca manu  
administranda sunt.

Dieta.

Dum remedia *Chirurgica* & *Pharmaceutica* in usum vocantur,  
non est negligenda *dieta*, non tantum, quod ea ad vires con-  
servandas sit utilis, sed & quod hæc faciat ad feliciorum me-  
dicamentorum successum. Quomodo enim somnus provoca-  
bitur, nisi vitetur strepitus? Quomodo sudabit æger, nisi

R

ex-



exhibeantur potulenta, vehiculi loco medicamentis diaphoreticis futura?

Aer igitur sit purus, cubiculum, in quo decumbit æger, ne sit nimis angustum, nec nimis luminosum, aut calidum: vitetur strepitus & salutatio amicorum frequens: in genere, omnia quæ spirituum motum nimium excitare valent.

Viæctus sit tenuis: quemadmodum illud in omnibus morbis acutis locum habet, ita etiam in Phrenitide. Vitentur cibi multum nutrientes, & aromatibus conditi, vitetur vinum. Hæc enim sanguinis motum intestinum, hæc pressionem, dilatationem ejusdem, nec non spirituum animalium motum nimium intendere valent. Vinum ab *Aureliano* habetur quasi venenum quoddam, & suâ naturâ Phreneticis adversum. Potus sit *ptisana*, vel *cerevisia* tenuis, aut *acidula*.

Somnus placidus omni ratione alliciendus est. Itaque diætetica remedia, quæ illud aliquomodo præstare valent, in usum vocanda. Prodest *hordenum* ejusque *farina*, prodest *alica avenacea*. Huc referri possunt *capita papaveris albi* in aliquo liquore decocta; ea enim instar remedii diætetici quibusdam sunt in usu.

Quandoquidem agitatio spirituum animalium est compescenda, perspicuum est, motum minimè, quietem optimè convenire. Illud tamen non impedit, quo minus ægri lectus sternatur. Non tantum somnus allicitur, si ægrotus in lectum mollem & recenter stratum transferatur: sed & æstus, à diuturno decubitu excitatus, hoc pacto abigitur.

Alvus in hoc morbo sit libera vel sponte vel arte. Post egregiam depositionem alvi ægrum in somnum placidum incidere, non semel observatum est.

Animi pathemata cane & angue pejus fugienda. Illa enim & spiritus & sanguinem nimium commovent, adeoque causam hujus mali augent.

## CAPUT QUINTUM.

### *De Melancholia.*

Melancholia descriptio vulgaris.

**M**elancholia dicitur esse *delirium à phantasmate melancholico exortum*, qua detentus uni cogitationi, absque furore & febre, cum tristitia & metu inheret.

Cum



Cum autem causa hujus mali statuatur humor vel vapor melancholicus, videndum quid de humore & vapore melancholico sit statuendum, deinde hæc descriptio examinanda & commodior substituenda est. Ut sciamus quid per humorem melancholicum debeamus intelligere, res ab ovo exordienda est. Nempe Medici vocem *μελαγχολίας* à communi usu desumptam morbo imposuerunt; Etymologiæ autem ac vocis significationi inhærentes, multa vana & falsa finxerunt. Ex *Homero*, cui cum *Hippocrate* magna est affinitas, patet, illum nigredinis facere mentionem, quando ipsi propositum est exprimere hominem dolore & ira percitum, qui animum non regit, qui æstuat, nec satis videt, quid expediat.

Humor melancholicus.

Il. 103. μέγας δὲ μέγα φρένες ἀμφιμέλαιναί  
Πίμπλαντ

Ira animum impedit ne verum cernere possit, quandoquidem ejus motus ratiocinationem pervertunt. *Omnes qui de rebus dubiis consultant, ab odio, ira, amore, imo & tristitia vacuos esse decet.* Mens dicitur circumfusa caligine, quemadmodum nox atra, aut nigra. Defectus luminis omnia velut atra caligine involvit, quandoquidem oculus coloris differentias non nisi mediante lumine dignoscit, nec homo in tenebris periculum evitare potest. Obtenebratio rationis, ab animi pathemate, facit, ut homo rerum pretium & pondus non dijudicet uti oportebat, & in magna pericula incidat. Lumen mentis est ratio: lumen mentis est hilaritas: quando illæ à dispositione corporis nostri, ob arctissimam utriusque unionem, obscurantur, tum homo evadit melancholicus. Tales itaque descriptiones, talia epitheta, non quid res ipsa sit, sed quam graphicè depingi possit, significant. Melancholia itaque simpliciter tristitiam significat, quemadmodum *μελαγχολάω*, tristis sum. Aristoph.

Μελαγχολῶντ' ἀπέμεψε με τὸν δεσπότην.

Impropriè infanio. Medici morbosam dispositionem cum tristitiâ, & aliquando delirio, conjunctam itidem *μελαγχολίας* nomine donarunt. Cum autem *χολή* & animi affectionem, & bilem significet, bilis autem iræ, non itidem tristitiæ statuatur causa, finxerunt illi humorem nigrum, fœculentum & ex



crementitium, ab eoque varios variarum partium morbos deduxerunt. Imprimis tamen illum in liene stabulari existimabant, quod ideo facilius fidem videtur invenisse, quandoquidem hujus visceris color est obscurior. Opinioni huic pondus addidit forsan, quod non rarò homines nigricantia evomant, aut excernant. Verum si rem exactè perpendamus, non est simplex humor qui excernitur, quando nigredo illa oculis subjicitur, sed variorum humorum corruptorum miscella; nec illa semper à Melancholicis, aut in melancholiâ excernitur, sed aliquando ab hominibus à melancholia longè remotis, aliquando post usum medicamentorum chalybeatorum, aliquando in Ictero, Febribus &c. Itaque postquam præteriti sæculi medicorum industria circulationem sanguinis, & usum lienis longe nobiliorem detexit, omnia hæc corruunt. Nulla alia est bilis, quam quæ folliculo fellis continetur, aut ab eodem, vel hepate naturaliter versus intestina amandatur. Illa non est excrementitia, sed summe utilis humor. Lien peculiari vase excretorio caret. Nullus humor simplex nigredine donatur.

Succus Pan-  
creaticus.

Fuerunt qui succo pancreatico optimè convenire existimarent, ea quæ de melancholico humore antiqui tradidere. Cum enim apud veteres fieret mentio humoris admodum acris, & sæpe per vomitum & secessum ejicerentur valdè acria & acida, putabant acredinem illam succo pancreatico acidiori & austeriori esse tribuendam. Et revera nullum est dubium, quin humor pancreaticus in statu morbofo, non minus quam alii humores, à naturali crasi multum desciscat. Verum iste nunquam est ater, & quando ille dominium, ut ita dicam, exercet, veluti in Ictero, fæces omnino albicant. Deinde non tantum succus pancreaticus, sed & saliva, & glandularum intestinalium liquores, & ipsa bilis multum immutant humores per vomitum vel secessum ejectos, Quid, quod ipsa ventriculi constitutio & ciborum fermentatio huc multum faciant? Quàmvis ergo in principio, non sine plausu, arrepta fuerit avidè hypothesis, è succo pancreatico ejusque vitiis & halitibus, sive etiam ab humorum triumviratu, omnes ferè deducens morbos, postquam tamen amplius negotium examinatum est, atque opinio hæc novitatis gratiam exuit, pancreas facul-



cultate hac sua, non minus quam hepar sanguificationis munere, excidit.

Nigram autem bilem in cerebro posse colligi, aut hanc, vel etiam vapores tetros posse spiritus animales quasi fuligine inficere, absurdus est quam ut refutationem mereatur. Quando ergo dicitur, melancholiam produci à phantasmate aut humore melancholico, idem per idem explicatur, vel potius obscurum per magis obscurum. Nullus enim est, qui non melius sciat quid sit melancholia, juxta receptum loquendi modum, quam quid sit phantasma melancholicum, vel similis humor. Humor melancholicus est qui tristes efficit, quemadmodum nox dicitur cæca, amor cæcus, quod hominibus visum adimat, vel etiam rationem. Ad explicationem medicam non est necessaria circumscriptio tropica, sed res ipsa explicanda est.

Bilis atra.

Examinanda jam est descriptio vulgaris. Melancholia dicitur delirium, cui non multum repugno, dummodo observetur paucos melancholicos posse dici delirare, nisi delirium sumatur in significatione admodum generali & tenui. Verum cum in casibus gravioribus ratiocinatio & judicium circa objecta particularia pervertatur, esto dicatur delirium, & intelligatur de melancholia in gradu intensiori: ejusdem autem gradus remissiores tanquam viæ ad futurum delirium considerentur.

Examinatur  
descriptio  
vulgaris.

Velim autem scire quid sit phantasma melancholicum? Estne res externa tristitiam vel terrorem incutiens? Verum hæc est causa procatartica & transiens, ideoque cessante illius objecti, actione videtur debere cessare effectus. Quid, quod phantasma melancholicum non videatur objectum externum, sed internum quid significare? An vero est valida illa commotio ab objecto in spiritus & sanguinem magna vi agente? Verum hæc est animi affectus, nec, nisi valde improprie & obscure dici potest phantasma melancholicum. An vero est objectum phantasiæ? Sed objecta illa sunt species menti representatæ, vel vestigia cerebro impressa, seu memoria rei præteritæ: quomodo autem illa dicuntur melancholica? Explicandum erat, in quo consistat tristitia horum phantasmatum. Explicandum erat, quam immutationem in cerebro, in spiritibus, in san-



guine, denique in reliquis visceribus hæc efficerent; in his etenim propriè dispositio ad tristitiam consistit. Vel denique an erunt nocturna spectra & larvæ, vanorum hominum mentes exagitantia, à perspicacioribus habita anilia terriculamenta & impostorum illusiones? sint sanè, si ita velint, tales chimæ, quandoquidem hæc propria vocum est significatio, hæcque teneant & arctè complectantur, qui illas amant, nobis cum larvis luctari non libet.

Quomodo  
producatur  
melan-  
cholia.

Antequam autem commodiorem descriptionem substituamus, operæ pretium est examinare, quis sit productionis melancholiæ modus? Melancholia aliquando repente ab animi affectione, vel segnius à corporis constitutione & pravâ diætâ producitur. In priori specie causa est manifestior, in altera obscurior, in utrâque autem sensim ad *ἀκμὴν* adscendit hoc malum. Non inutile est binas has causas singulatim rimari, ut originem hujus mali detegamus. Repentinus metus, tristitia, terror spiritus animales valdè commovet, profunda sui vestigia cerebro imprimit, cordis meatus seu orificia constringit, pulmonem ejusque vesiculas & vasa sanguifera coarctat, unde minor sanguinis expansio, ut & pressio debilior, ob repletionem & constrictionem vasorum. Primus quidem impetus sanguinem, non minus quam spiritus animales, validè commovet; verum, cessante illa commotione, tristitia coarctationem cordis & vasorum efficit. Hæc constriction vasorum accuratè tenenda est, ob insignem mutationem, quæ hinc ad sanguinis constitutionem redundat. Quamvis enim omnem sanguinis fermentationem & effervescentiam negem, non nego tamen sanguinem magis aut minus dilatari, tum ab animi passionibus, ab aëris constitutione, à diversa esculentorum & potulentorum, imo & ipsius hominis temperie, pro climatum, anni, tempestatum & morborum varietate. Ab hac inæquali dilatatione & proportionem quæ inter sanguinis dilatationem & vasorum explicationem atque capacitatem intercedit, & hominis constitutio & varia morborum symptomata dependent. Ab hac eadem sanguinis dilatatione minore vel majore, dependet spirituum animalium productio major aut minor, eorundemque in partes inferiores influxus.

Ut



Ut ad negotium nostrum revertamur, quandoquidem hic agimus de iis passionibus, quæ constrictionem habent comitem, videndum quæ sint hujus sequelæ? Passionum  
sequela.

A minori sanguinis dilatatione dependet productio spirituum minori copiâ; iidem spiritus evadunt sensim minus agiles, atque ad viscera imi ventris, ventriculum, lienem, hepar, intestina minori abundantia & efficacia amendantur. Hinc sequitur ventriculi fermentatio minor, minor excrementorum secretio & excretio, si lotium crudum & salivam excipias, juxta vulgare verbum, melancholicos esse sputatores. Hinc oriuntur sanguinis minor perfectio & quasi cruditas, seu minor exaltatio, spiritus animales quoque segniores. Segnities spirituum causa est, quare sese non diffundant æqualiter per cerebri tubulos, sed per illos potius, quos inveniunt magis patentes, adeoque lentiori suo magis accommodatos, qui non sunt alii, quam illi ipsi, qui ab animi pathemate sunt patefacti, quique in principio vigilas & dissipationem spirituum produxerunt, atque vestigia primi impetus satis profunda retinuerunt. Cum autem illa affectio tristitiam produxerit, hinc cogitationes circa objecta parum læta multum occupantur, & tandem libenter versantur. Spiritus in illa vestigia incidentes agitantur, facile somnum ex oculis excutiunt, vigilas protractas, spirituum ingentem dissipationem, functionum naturalium languorem producant. Iidem illi spiritus in fibras pulmonis coarctatas influentes, sanguinis circulationem & expansionem minus promovent, unde anxietates non tam circa præcordia, uti perperam quondam statutum fuit, quam circa pectus, pulmonem &c. hinc etiam oriuntur suspiria crebra. A minori autem in ventriculum influxu spirituum, tardior ciborum dissolutio, fermentatio, concoctio dependent, præcipuè accedente saliva viscidior. Hinc iterum chylus, sanguis, spiritus animales minus mobiles, circulatio tardior, pressio debilior, tandem totius corporis signities. Semper quidem cogitationes feruntur circa objecta, quæ profundiora sui vestigia in cerebro reliquerunt, prout autem vigilas magis vel minus urgent, prout spiritus magis vel minus attentè circa objecta aliqua versantur, prout aliqua vestigia antiqua delentur, vel etiam



etiam nova imprimuntur, hinc vel tristitia, vel ratiocinatio perversa, vel imaginationes absurdæ ægrum exagitant.

Baglivi sententia.

Ne cui mirum videatur me tantum tribuere, passim in hoc tractatu, animi passionibus, non inutile mihi visum est hic adscribere lectu dignissima Baglivi verba: *omnes homines sua cura vexat, & singulis incumbit amara necessitas per ancipites laborum eventus atatem pene omnem traducendi: Quæ si vera sunt, verum pariter & illud esse quis non videt, quod sc. magna morborum pars ab eo quod singulorum cervicibus impendet jugo aut producatur aut foveatur, præsertim in iis qui fortuna utuntur lautiori; hi namque animi potius quam corporis morbis afficiuntur, eorundemque corporis morbi animi morbis frequenter arguentur. Quamobrem cunctos & diligentes esse velim medicos in interpellandis agrotis de causa occasionali, præsertim de animi passionibus; neque, absque ullo facto examine, singulorum morborum originem a repletionem & cacochymia fabula indiscriminatim deducant. &c. Vid. l. 1. de praxi medica ad priscam observandi rationem revocanda c. 14. Exempla inferius adducuntur.*

Melancholia à corporis dispositione orta.

Vidimus hætenus priorem modum generationis melancholiæ ab animi pathemate, sequitur altera à corporis dispositione producta. Si quis ventriculum habeat debilem, si quis eundem oneret cibis difficilioris concoctionis, iisque copiosis, si quis vitæ solitariae & sedentariae sit deditus, si quis meditando & vigilando spiritus non parum dissipet, hic sanguinem acquirat minus comminutum, minori, quam decebat, vi per universum corpus propulsum, unde necessum est spiritus animales gigni pauciores & minus agiles: imo facile eandem acquirat dispositionem, quam dixi à passione gravi in corpus redundare, sed longius requiritur tempus. Citius id continget, si privatio alicujus boni, si mœror accedat ex. gr. mors filii, filia, uxoris dilectæ, jactura bonorum, amissio dignitatis: tum enim spiritus animales, vestigia illa magis patula in cerebro inveniunt, sæpe eadem illâ viâ transeunt. Bona autem illa tanquam absentia, amissa, atque numquam reditura considerantes miseri, se ipsos continuò torquent, solitudinem amant, exercitia & gaudium negligunt, spiritus animales per universum corpus minus diffundunt, nisi in quantum id requiritur ad com-

mo-



motionem illam in sanguine excitandam, quæ hujusmodi passionem ordinariè comitatur. Quod si eadem illa commotio vigilias accersat, spiritus animales magis dissipantur, concoctiones omnes imperfectius peraguntur, liquores glandularum fiunt acriores, vestigia cerebro imprimuntur prout morifitati eorum consentaneum est, antiqua oblitterantur, adeo ut tandem ratiocinatio ipsa pervertatur. Ita refert *Forestus*, *Damianum Simonis*, virum quadragenarium sine uxore in coelibatu viventem, cum multa legeret, ac se plurimum torqueret, postea vigilem factum, metu ac moestitiâ in melancholiam, & varias imaginationes esse lapsum. *L. x. obs. ix.* Similia exempla habet *Timæus*, quæ ille ad Hypochondriacam melancholiam refert. *Henricus ab Heers* in *Observationibus Tractatui de Fontespadano adjunctis observat. 27.* varia melancholicorum exempla habet lectu satis digna, in quibus diætæ errores non paucos, & solitudinis amorem animadvertere non erit inutile.

Hæc omnia ita cum quotidiano usu conveniunt, ut symptomata omnia Melancholicorum hinc facile deduci queant, nec necesse sit comminisci sanguinis fæcem, nec vapores tetros cerebrum obnubilantes, nec spiritus animales à naturâ miti, benignâ & subtili, in acetosum & corrosivum (cujusmodi sunt liquores ex *Aceto*, *Buxo* & *Vitriolo* proliciti) degenerâsse. Neque enim alia est sanguinis fæx, quam sanguinis particulæ quæ debitam perfectionem necdum acquisiverunt, vel etiam eadem, quando diu per universum corpus circumactæ, ob pressionem debiliorem, non satis fuere depuratæ, unde tum consistentia ejus & color immutati cernuntur. Quæ de sanguine atro, in cadaveribus melancholicorum reperto, narrantur (*Vid. Bonet. Sepulchretum l. i. sect. ix. obs. 1, 2, 4, 6, 7. & c.*) mirabitur nemo, qui attentè consideraverit partes sanguinis, ad quas aër & luminis radii non penetrant, ordinariè atro colore esse perfusas, quæ tamen nigredo evanescit, si eadem illa sanguinis pars aliquamdiu lumini objiciatur. Vapores tetri ad cerebrum non perveniunt, adeoque cerebrum non obnubilant. Spiritus animales destillando minimè proliciuntur, adeoque comparatio cum destillatione hic locum non habet. Spiritus animales nunquam tantam acredinem acquirunt, aut acquirere possunt,

De sanguinis fæce.



ut comparatio cum *Spiritu Vitrioli* in illos quadrare queat. Cur enim hi spiritus ratiocinationem perversam, non autem cerebri & nervorum efficerent erosionem?

De aciditate & acredine humorum.

Rogabit fortasse aliquis, qua ratione hi ægri acida vomant? è *Galeno* quippe constat, tantam humorum aliquando adesse acridinem, ut ejectus humor in terram decidens fermentationes & bullas excitarit. Respondeo, quemadmodum in sanguine nulla datur fermentatio aut effervescencia, ita illæ ventriculo & intestinis adimi non possunt. Evincit hoc expansio ventriculi major, post duas tresve horas à prandio & cœnâ, præcipuè liberaliori, manifesta. Evincit hoc comminutio & attenuatio ciborum summa, quamvis absque sufficienti manducatione iidem sint deglutiti. Evincunt hoc excrementa alvina naturalia, præcipuè comparata cum morbosis admodum compactis & tenacibus: quemadmodum enim hæc fermentationis & secretionis defectum, ita illa fermentationem debitam mole, poris, & colore manifestè demonstrant. Non fit hæc semper sufficienter, ideo culpant medici non rarò cruditatem acidam, non parvam molestiam, vomitum acidum, aciditatem ingentem spirantia excrementa, producentem. A cruditate hæc summa oritur acredo, ita ut dentes stupeant, & hic est ille humor admodum acidus. Unde autem oritur is in hoc casu? A minori ventriculi calore, minore spirituum influxu, tardiori ciborum concoctione (acida enim sensim redduntur acriora) à liquorum per glandulas secretorum aciditate, vita sedentariâ, reliquiis ciborum in ventriculo hærentibus. Quemadmodum fructus solent observari crudi, acerbi & acidi, ob defectum caloris æstivi, ita humores evadunt acidi ob sanguinem & spiritus animales minus activos, & minori copiâ versus ventriculum confluentes. Minus activus est sanguis, quia debitâ destituitur perfectione; minus copiosè confluent spiritus animales, quia circa cogitationes tristes occupantur, & quia sunt segniores. Omnia, ut ita dicam, sunt immatura. Immaturus est sanguis, immaturi spiritus animales, immaturus chylus, immaturi liquores per glandulas secreti, quid mirum si cruditas oriatur acida & humores reperiantur tales quales à medicis describuntur? Horum humorum receptaculum non



non est cerebrum, non lien, aut Pancreas: sed iidem illi humores, qui in statu naturali erant blandi & temperati, in hoc casu sunt minus maturi, minus elaborati, sunt acres ac molesti & tum dicuntur melancholici, præsertim si melancholiam habeant comitem. Male lienem sæpe vitii accusari in Melancholiâ, ante me ab aliis quoque observatum est. Vid. *Boneti sepulchretum* l. 1. f. 1X. ob. 21. &c.

Commodior mihi hæc videtur descriptio: Melancholia est *constans cerebri & spirituum animalium ad tristitiam dispositio, animum demissum, sanguinis debiliorem motum & nonnunquam delirium habens comitem.* Descriptio commodior.

In omni Melancholia adest quidem tristitia, verum in tristitia non consistit essentia melancholiæ, quatenus objectum est Medicinæ, hoc est quatenus medicamentis illam expugnare valet medicus. Non etiam propriè est genus melancholiæ, quandoquidem tristitia est animi affectus, passio repentina & transiens: hic autem quærimus morbum, seu eam corporis dispositionem, à qua symptomata omnia pendent. Ea explicatur.

Nullus est quin aliquando contristetur, non tamen ideo melancholicus dici potest. Itaque dispositio constans, seu continuata est genus melancholiæ; tum enim solent homines dici melancholici, quando à pravâ corporis constitutione sunt tetrici, tristes, solitarii, nec sese ab hoc statu facilè dimoveri patiuntur. Vitium hoc ad mentem non pertinet, verum ad corpus, quamvis mens in consensum trahatur. Adeo arcta est horum conjunctio, ut animi mores sequantur temperamentum corporis, præcipuè in iis qui animi imperio minus, corporis impetu magis utuntur.

Dixi cerebri & spirituum animalium: dubitari posset, an non potius deberet dici, spirituum animalium & cerebri, cum vestigia cerebro imprimantur à spiritibus animalibus? Verum ego censeo talibus minutiis non esse nimis anxie immorandum: quemadmodum cerebri vestigia à spiritibus animalibus; ita horum generatio & motus à cerebro & vestigiis cerebro impressis dependent. Deinde affectus non esset adeo pertinax nisi accederet cerebri dispositio morbosa. Quamvis ergo existimem me ordinem naturalem in descriptione observasse, non

De cerebri dispositione.



putem tamen in talibus quæstiunculis esse hærendum. Praxin medicam conscribimus non Logicam, cujus etiam tricas riserunt perspicaciores. Si res ipsa intelligatur de ordine non multum laborandum est, meâ quidem opinione. Hæc ideo addo, ut constet me cuique suum permittere iudicium. Quod si quis velit spirituum dispositionem, dispositioni cerebri esse anteponendam, per me id licet, dummodo rectè curetur æger. Hanc tamen adjicio rationem, unde apparet non temere visum esse mihi hunc ordinem potiozem. Solent medici distinguere inter Melancholiam quæ cerebri vitio, & eam quæ aliarum partium vitio contingit: ut ergo pateat me de priori specie hic agere, non autem de hypochondriacâ, (de qua in tomo tertio forsan disputabimus) quamvis magna inter ambas sit convenientia, imo quamvis sibi mutuo sæpius copulentur, dixi hanc esse affectionem seu dispositionem cerebri tum etiam spirituum animalium.

Ut autem intelligatur qua ratione cerebrum afficiatur in hoc morbo, utile est considerasse duplicem cerebri dispositionem seu actionem. Altera est qua cerebrum sanorum sese expandit liberaliter, id quod ad generationem spirituum satis agitatorum imprimis requiritur. Altera qua secretio ipsa spirituum animalium peragitur. Utraque in hoc affectu non habet sese debito modo. Quamvis enim in principio cerebrum expandatur, ubi nempe ab animi pathemate somnus excutitur, tantum abest ut spirituum moderatè agitatorum generatio hinc promoveatur, ut potius dissipentur iidem. Deinde ubi somnus abest, adest expansio molesta, quæ multum differt à naturali & ad lætitiâ, nec non perceptionem, iudicium, & perspicaciam requisitâ. Requiritur vigiliarum & somni vicissitudo, cum somnus ad instaurationem spirituum non parum faciat. Si somnus sit parvus, si sit interruptus, non sequitur post somnum solita alacritas. Ubi autem prima illa commotio superata est, cerebri expansio naturalis impeditur, tum ob dissipationem, tum ob sanguinem ipsum minus mobilem, minus expansum uti in superioribus vidimus, tum etiam ob spiritus minus mobiles. Hinc oritur minor alacritas, adeo ut vigilantes animo sint minus præsentî, imo videantur vel dormire vel in somnum esse



esse proni. Multo magis hæc dispositio nocet, si sanguis simul sit copiosior, uti id non rarò contingit; tum enim minor mobilitas cerebro magis molesta & gravis est, adeoque expansionem cerebri naturalem aliquomodo impedit. Secretio ipsa spirituum non fit debito modo, quoniam à sanguine minus exaltato, minus dilatato, non secernuntur spiritus satis agitati & subtiles, non secernuntur etiam satis copiosi. Dispositio cerebri ad tristitiam etiam in eo consistit, quod vestigia illa quæ passiones profundius eidem impresserunt, memoriam & imaginationem mœroris continuo veluti excitent. Deinde cum profundiores illi sulci attentionem ad objecta tristitiæ convertant, reliqua vestigia ante impressa veluti oblitterantur, ægri uni cogitationi inhærent, & à ratiocinationis rectæ tramite aberrant. Cerebrum itaque & ratione expansionis, & generationis spirituum, & ratione vestigiorum nimis profundè impressorum, malè affectum est.

Quod si cui videatur cerebrum propriè non posse dici dispositum ad tristitiam, illi ego facile assentior, si nempe Philosophicè & abstractè hoc negotium explicare velit: verum Philosophiæ & Medicinæ diversa est ratio. Medicina occupatur circa sanitatem & morbum quatenus illa conservari, hic medicamentis expugnari potest, adeoque tota est relativa, unde sequitur, non malè explicationem huic scopo accommodari, quod commodius fit per notiones ad praxin relationem habentes quam per absolutas & abstractas. Novi tristitiam, quatenus perceptionem & conscientiam habet comitem, propriè ad mentem pertinere; verum hanc comitatur commotio spirituum, sanguinis & partium solidarum, aliquando tanta, ut vestigia commotionis non facile oblitterentur, & sæpe mentem non solum in novas passiones conjiciant, sed & è suo statu dimoveant. Cum ergo unio mentis cum corpore sit tanta, ut mens affici non possit quin corpus simul afficiatur, nec corpus quin mens simul malè mulctetur, rectissimè, meo judicio, cerebrum dicitur dispositum ad melancholiam, quando ejus vestigia, dispositio &c. non possunt non in mente excitare cogitationes turbulentas, & ad tristitiam vergentes. Corpus mentem necessario in consensum trahit. Est itaque dispositio ad melan-

Ulterior  
explicatio.



choliā. In hanc medicum cogitationes suas dirigere, hanc medicamentis idoneis expugnare debet. In corpus propriè medicamenta agunt, verum corpore restituto, mens valet & viget: sublatâ causâ tollitur effectus.

De spirituum animalium dispositione.

Spirituum animalium dispositio ad tristitiam facilè intelligitur, si ea quæ de eorum dissipatione, minori alacritate, imò de segnitie, quæ à sanguinis simili constitutione dependet, ex superius explicatis in memoriam revocemus. Delirium non solet esse universale sed particulare, nec semper melancholiæ copulatur, uti vidimus. Vide quoque *Schenkii* obs. 1. 5. p. m. 130. & c.

Melancholia ordinariè febris expers.

Melancholiā ordinariè carere febre, habere tristitiā conjunctam, vel quod idem est animum abjectum & demissum omnes statuunt. Quemadmodum in febre nimia adest sanguinis pressio & expansio, ita minor pressio & expansio, minor spirituum animalium copia, minor motus corpus ad languorem, mentem ad tristitiā disponit: & quanto altiores hæ causæ egerunt radices, tanto diutius tristitia hæc continuatur & sensim invalescit. Contingit tamen aliquando melancholicos in febrem incidere, atque tum ordinariè symptomata sunt talia, ut ex parte febris, ex parte melancholiæ adscribi debeant. Si delirium comitetur, illud potius melancholicum quam Phreneticum dici debet. Talem ego nuper tractavi ægrotam, quæ restituta obnubilationem mentis, & tristitiā confitebatur, cum antea adstantes meæ non omnino viderentur annuere sententiæ. Atque hæc sufficiant definitioni vel descriptioni nostræ explicandæ, quæ si quis cum aliorum placitis conferre dignetur, is dijudicabit, num in materiâ admodum difficili, veriora ac clariora proposuerim, nec ne?

Causæ. Plethora.

Vidimus melancholiæ generationis modum, quem explicare non potuimus, quin simul causas proximas explicaremus: superest ut videamus causas magis remotas. Hæ triplices mihi videntur, Plethora, solitarum evacuationum suppressio, & varii in diætâ errores. Plethoram hic sumo in latâ significatione, pro abundantia humorum venis & arteriis contentorum, quamvis sanguis fortè ab exactâ crasi non parum desciscat. Possem etiam dixisse Cacochymiam; verum cacochymicos non solemus appellare, nisi eos, qui sunt pallidi, oedematosi, atque in



in quibus pravæ constitutionis signa sese manifestè produnt. Quemadmodum hos non excludo, ita non puto necessarium, ut ad hanc *ἀνμὴν* sanguinis prava dispositio perveniat, adeoque existimavi me Plethoræ vocabulo in latâ significatione posse uti, ad causam antecedentem explicandam *Johannes Buscoducensis* Carthusianus, ex repletionem in melancholiam incidit, teste *Foresto* l. x. obs. 16.

Cum plethorâ conjunguntur, illamque sæpe producant solitæ evacuationes suppressæ, mensium, hæmorrhoidum, hæmorrhagiæ narium vel similes. Non est hoc sanguini menstruo tribuendum, quasi is sit admodum venenatus, quemadmodum multi malè creduli sibi persuaferunt, sed quod corpus universum, imprimis autem cerebrum, viscus molle & arteriis repletissimum, à nimia sanguinis mole valdè oneretur. Deinde frequenter à sanguine glutinosiori, minus moto & expanso oritur menstruorum suppressio. Si itaque huic causæ, à causâ melancholiæ non multum abludenti, jungatur nimia vasorum repletio & sanguinis copia, non mirum si in melancholiam incidunt ita affecti. Denique eadem illa sanguinis copia sanguinis rarefactioni obest. Cum enim arteriæ venis sint multo angustiores, sequitur, sanguine copiosiore existente in universo corpore, eundem in arteriis, ob angustius spatium, non posse sufficienter rarefieri, præcipuè causâ extraordinariâ rarefactionis, febre sc. deficiente. Hinc igitur oritur membrorum gravitas, minor agilitas, segnities, tristitia.

Solitæ evacuationes suppressæ.

Hæmorrhoidum suppressio quoque non ideo obest quod hac viâ solita sit natura evacuare sanguinem melancholicum. Præjudicium illud ex eo fuit ortum, quod venæ hæmorrhoidales prope lienem orirentur, quem falso statuebant esse focum melancholici humoris. Itaque arbitrabantur ramum portæ sub recto intestino declivem, ac mesenterio suffultum, nonnunquam ad sæculenti sanguinis per anivenulas, sanguine interdum manantes, expugnationem plurimum conferre. Vide *Vesalium* l. i. c. 5. Verum jam constat, venas hæc sanguinem versus intestinum rectum non advehere, sed eundem, ab arteriæ ramo mesenterico vel hypogastrico huc delatum, revehere, atque adeo lienem, licet vera de eo narrassent antiqui, hac viâ

Hæmorrhoidum suppressio.



viâ fæculentias suas non posse expurgare. Itaque sanguis per anum evacuatus, ejusdem est naturæ, cum eo, qui reliquis vasis continetur. Nocet itaque suppressio hujus evacuationis, quandoquidem natura non amplius nimiam copiam hac viâ exonerans, à nimio sanguinis onere premitur, eodem modo quemadmodum si cui hæmorrhagia narium subsistat. Exemplum habet *Forestus* l. x. obs. 14.

Errores in  
diætâ.

Varii in diætâ errores viam facilè sternunt ad melancholiam, ex gr. aër crassius & nebulosus, ingluvies, somnus diuturnior, otium, vita sedentaria, animi passiones. Non est omittenda mens sibi malè conscia, & dispositio hæreditaria, quæ ad varios in diætâ errores animum flectunt. Deinde dispositio scorbutica, humores tenaciores & concoctiones imperfectiores efficiens. Quamvis enim hæc ad diætam propriè non pertineant, cum ea tamen ita conjunguntur, ut hæc non malè coronidis loco huic annectere posse me arbitrarer.

Guerneri  
*Neuhaufen*  
Homo melancholicus.

Postquam cogitationes meas de melancholia in chartam coniecissem, incidit in manus meas libellus *Guerneri Neuhaufen Hammonensis*, quem donavit nomine hominis melancholici. Huñc statim avidè, nec sine insigni jucunditate perlegi. Præterquam enim quod de sensorio communi ea habet, quæ à meo sensu longissimè absunt, uti in capite de Epilepsia patebit, non admodum difficulter sententia ejus, si rem ipsam spectemus, cum meâ conciliari potest. Pulchra sunt & homine Philosopho digna, quæ de mente, corpore, utriusque unionis & affectibus pluribus persequutus est. Quando vero melancholiam ait esse aut mentalem aut corporalem, hanc sanguini inhærentem & turbantem animum, illam in mente radicatam & turbantem corpus, non obscure confirmant ea quæ superius explicui fusius. Ille enim menti tribuit quæ ego passionibus, ille magis philosophicè, quemadmodum dissertationem suam dixit *Philosophico Medicam*, ego, ut mihi quidem videor, magis medicè. Quamvis enim mentem in abstracto concipere possimus, quamvis mens distincta sit substantia à corpore, quamvis mens corpore extincto maneat superstes, hæc mens non est objectum medicinæ, hujus morbi sunt peccata & vitia, hæc nullas præbent indicationes medicas, ob-

jectum



jectum medicinæ est corpus humanum, si mens ob vitium corporis laboret, restituendo illud vitium etiam restituitur; si corpus ob affectiones vel passionēs animi laboret, medicus turbulentum illum motum spirituum sedando, non parum menti prospicit. Mentem propriè non curat medicus, illud est vel Christiani vel Philosophi. Rectè enim in eo differentiam Philosophiæ & Medicinæ collocat *Democritus*, quod Philosophia morbis animi, Medicina corporis morbis succurrat. Ἰσορίην σοφίης γὰρ δοκέω ἰητρικῆς ἀδελφὴν ἢ σύνοικον. σοφίη μὲν γὰρ ψυχὴν ἀναρύεται παθέων. Ἰητρικὴ δὲ νόσους σωμάτων ἀφαιρέεται. Ita scribit. *Democr. de Natura hominis* p. m. 281.

Historia juvenis, ab ipso fusius narrata, qui ob repulsam in melancholiam inciderat, non parum etiam confirmat ea quæ in superioribus disputavi. Unde enim illa melancholia nisi à duplici sibi mutuo succedente animi passione, amore & dolore? Unde tristitia, unde morositas, unde absurda nonnunquam responsio, nisi ob spiritus, aliis cogitationibus intentos, ob vestigia profundius à passionibus cerebro impressa? Scilicet animi affectus vehemens corpus malè mulctavit, donec tandem solitudinis amor eum impulit ad relinquendum patrias ædes, ad extruendum casulam è frondibus & cespitibus, ad sepulchrum effodiendum, in quo cadaver recumberet. Varias & memorabiles historias melancholiæ à passionibus variis ortæ vide apud *Platerum* in observationibus l. 1. de *Mentis alienatione* p. m. 77, 78, 79, 83, 85. &c. Hæc, nocte ingruente prope patibulum pernoctare coacta è metu: illa, videns carnificem cadaver, in profluentem abjiciendum, dolio includere, è terrore: alia, è tristitia & indignatione quod nubere cuidam esset coacta, quem non amabat, in melancholiam inciderunt. *Forestus* refert insignem concionatorem, diligenter studiis incumbentem, è verecundiâ, quod visus esset à duobus viris, dum ventris saburram exoneraret in pascuis, in melancholiam, & falsas imaginationes incidisse. Vid. l. x. obs. 12.

Melancholiæ celebris est differentia, in eam quæ potest dici primaria, de qua nunc egimus, & hypochondriacam, cujus in superioribus est facta mentio. Secundum gradus varios etiam potest distingui melancholia; alia enim tantum habet

Differentiæ.

T

ad-



adjunctam tristitiam leviolem : alia graviolem : alia etiam absurdam imaginationem , à qua sese vix aut , ne vix quidem dimoveri sinunt ægroti. Interim , quantumvis absurdæ videantur hæc imaginationes , latet tamen aliquando causa non tantum tristitiæ , sed & imaginationis stupendæ in corpore. Hujus indicia cum patiundo animadvertat , non est mirum , si sese ab imaginatione falsâ , fundamentum tamen in corporis dispositione nactâ , avelli non patiatur æger. Ita in melancholici ventriculo , ranam vivam se in eo gestare rati , inventus est post mortem tumor scirrosus. Vid. *Boneti sepulchretum* l. I. Sect. IX. obs. xxxv. Melancholia etiam distinguitur , quod vel contingat , cerebri , vel aliarum partium vitio. Quod vigilias habeat comite , vel quod ægrotos reddat somnolentos.

Melancholiae signa.

Melancholiæ signa sunt satis obvia ; præterquam enim quod vultus sit speculum animi , & tristitiam prodat , patientes ipsi aut adstantes de tristitia continuâ conqueruntur. Quamvis pulsus dicatur rarus , & aliquando validus , existimo tamen eum non esse semper ejusdem generis , cum varia ægroti ipsius dispositio , animi pathemata , morbi tempus , quod n. p. sit vel in initio , vel augmento , vel statu , vel declinatione magnam diversitatem pulsus efficere possint. Observatum quoque est eos noctu sudare , sputatores esse , lotium eorum varium esse , alvum ut plurimum segniorem , atque eos ante senium canescere. Dicuntur quidem esse paucissimi somni , sed ea quæ circa pulsum observata sunt , hic quoque locum habent : animi pathemata enim repentina & recentia somnum excutunt , verum tristitia continuata , & humores in consensum trahens , potest etiam somnum producere satis profundum. Causas autem vel ex relatu , vel è propriis locis , vel accurato examine , aut diligenti observatione expiscatur Medicus.

Prognosis.

Morbus ut plurimum est chronicus Melancholia ; nec ægrum repente jugulat , verum curatu est difficilis , præcipuè si sit inveteratus , aut hæreditarius. Seniosæ Melancholiæ periculosiores. Hæmorrhoides & varices *Hippocrati* Melancholiam solvere dicuntur.

Indicationes

Indicationes generales sunt : passionis repentinæ impetum refrænare , lentos humores expurgare vel emendare , spiritum ex-



excitare, denique causas, quantum pote, tollere.

Curatio impetus passionum tribus potissimum peragitur, V. S. <sup>Cura. per V. S.</sup> mentem ad alia objecta abducendo, spirituum motum sedando. V. S. in repentinis passionibus, nisi quid impediat, summi est usus. Sanguinis enim motum turbulentum, sæpe palpitationes cordis efficientem, compescit: spiritibus etiam animalibus ferocientibus subtrahit pabulum. Ea imprimis locum habet in melancholiâ ubi plethora adest, aut ubi solitæ evacuationes fuerunt suppressæ. Illud hic moneo ubi de V. S. erat agendum, in sequentibus tamen V. S. locum & modum determinabo.

Quamvis ille etiam V. S. possit statui usus, ut mens ad alia objecta abducatur (etenim ubi V. S. instituitur ægri ad Chirur- <sup>Mens ad alia objecta abducenda.</sup> gum, ad vulnus infligendum &c. inflic- tum, ad sanguinem vi magna erumpentem attendere incipiunt: incipiunt sese ipsos respicere, & sanitati aliquod statuere pretium) remedium tamen hoc generosius est, quam ut ob hunc solum scopum in usum vocari debeat. Respicio igitur ad alia in vulgari quidem usu posita, non exigui tamen usus: hujus generis est, si quis exterritus statim haustu vini generosioris largiori animum ab objecto molesto avellat, & simul contractionem cordis impedi- at. *Vina parant animos.* Quod si *salia volatilia* potui cui- cumque misceantur majori dosi, promptius hic obtinetur scopus. Utilis hic est etiam *Cochenilia*, *Crocus* ejusque *Tinctura*, *Tinctura Bezoardica*, *Liquor C. C. succinatus* &c. Idem il- lud obtinetur, si locum mutet, sese ab objectis terrorem in- cutientibus abducatur, si latrinam adeat ventris aut vesicæ onus deponat &c. si salutaria consulentes audiat, si animum regat.

Tertium quod ad passionum impetum refrænandum requi- <sup>Spirituum motum ni- mium sedan- dus.</sup> ri dixi est spirituum motum sedare.

Cum vero in superioribus de hac materia fusius sit actum non est necesse huic negotio ulterius immorari. Sufficiet mix- turam adjungere huic & præcedenti indicationi satisfacien- tem, ex gr.

℞. Aq. Meliss. cum Vino ℥iij.

Magnanimitat. ℥ss.

Sal. Volat. oleosi. g. xv.

T 2

Land.



*Laud. opiat. gr. iij.*

*Syr. fl. Tunica. ℥℔.*

*M.*

Hujus mixturæ sumat subinde duo vel tria cochlearia æger, donec somnus obrepit, à quo non est excitandus, quandoquidem nihil magis mentem ab objecto tristi avocat, nec spirituum motum nimium compescit, quam somnus moderatus. Laudatur in melancholiâ etiam musica; efficaciam ejus in curando hoc affectu observatione confirmatam, vide apud *Schenkium* l. i. p. m. 136. Vide etiam *Hoeferi* H. M. l. i. c. 7.

De humorum purgatione.

Dixi humores lentos expurgandos & emendandos esse, purgationem præparationi præmittens, secus quam à practicis vulgo fieri solet. An fontica fuerit ratio, quare ita statuerim, è sequentibus fiet manifestum. Supponamus igitur medicum ad ægrotum melancholiâ laborantem vocari, necessum est illud fieri vel in principio, vel postquam æger jam aliquamdiu valetudinarius fuit, affulgente tamen spe aliqua restitutionis; si enim conclamatum sit, si vires omnino attritæ, tum perspicuum est medicum symptomatum urgentium debere habere rationem, nec posse rectâ ad salutem ægroti grassari via. Quocumque autem tempore illum advocari statuas, utrobique necessum est statim humorum illorum tenacium saburram exhauriri. Si enim in principio advocetur, quidni statim primas vias, corporis nostri sentinam exhauriet medicus, antequam humores viscerum hic hærentes, medicamentorum ope fluidi redditi, ad sanguinem deferantur? Quidni statim illud tentabit in melancholia, ubi purgantium tantus est usus, tanta necessitas, ut proverbium, aliquem *indigere Helleboro*, hisce ortum suum debeat? Antiquorum fuit decretum minimè contemnendum, citò, tutò, jucundè curandum esse ægrum. Festinatio cæteris præmittitur. Festinatio semper habet locum, si modo ægri salus tuto reposita sit loco, nisi æger in magnas conjiciatur angustias. Cur in morbo hoc chronico frustra necitemus moras? Quid ni statim liberabimus ægrotum ab hac saburrâ, cum id possit fieri & tutò & jucundè? Numquam tutius in usum vocantur medicamenta purgantia, quam ubi vires constant. Constare autem hic vires è suppositione est manifestum;

sup-



supponimus enim in priori hoc casu medicum statim in principio fuisse advocatum. Nunquam tutius in usum vocamus medicamenta purgantia, quam ubi talis morbi & humorum est natura, ut ii medicamenta requirant quammaximè efficacia. Dubitabimusne an medicamenta requirantur efficacia, cum antiquos *Helleboro* in hoc affectu esse usos constet? Numquid efficax est medicamentum *Helleborus* nec ne? Tutò ergo in usum vocantur medicamenta purgantia, præcipuè cum idem illud suadeat jucunditas. Non infimum locum inter symptomata habet, quod melancholici sint abjecto animo, & anxii. Quis autem in praxi tam leviter est versatus, qui nesciat anxietates circa præcordia minui post assumptum purgans? Quid, quod somnus non semel obrepat placidus, ubi hoc fasce levatus est venter infimus? Itaque si in principio ad melancholicum vocetur medicus, statim ante præparantium usum præscribet vel exhibebit purgantia, nisi frustranectere moras, nisi antiquum monitum citò, tutò, jucundè curandum esse ægrum floccifacere velit. Non alia etiam insistet viâ, si ægrotus aliquandiu hoc symptomate fuerit vexatus. Cum enim è superioribus sit manifestum, & salivam, & humores per glandulas secretos sensim fieri magis lentos, cur purgationem differet? Si cruditas acida vexat, illa autem ab humoribus in ventriculo diutius hærentibus oriatur, quidni fibræ ejusdem ut & intestinorum excitabuntur ad validiorem contractionem, adeoque evacuationem materiæ peccantis ope medicamenti cathartici? Cum in hoc morbo diuturno & difficili cunctando non restituat, sed potius evertat maximi pretii rem, sanitatem nempe, medicus, quidni urgebit negotium? Atque hæc sufficere arbitror, ut veritatis avidi assensum extorqueant, etiam in posteriori casu non esse differendam purgationem in hoc morbo adeo necessariam.

Ne tamen alicui adhuc scrupulus hæreat circa doctrinam modo propositam, diluere aliquot objectiones, quæ adversum hanc sententiam moveri possent, non videtur esse inutile. Dicat ergo aliquis, humores acidos difficulter expurgari. Respondeo: illud non omninò esse verum, cum videamus infantes acidum spirantium humorum, & planè viridium copiam sponte

Objectiones  
diluuntur.



ejicere. Quid, quod etiam adultiores sponte acida vomant aliquando, sine ingenti difficultate, non sine insigni commodo? Hæc opinio imprimis invaluit postquam à succo pancreatico acidiori, austeriori &c. plurima morborum cohors deducta fuit, & acidorum usus omnino damnatus. Præjudicio igitur innititur hæc opinio acidos humores adeo difficulter expurgari. Quod si tamen hoc demus, verum aliquando esse, acidos humores difficiliter moveri, cum tamen, ex suppositione, acidi humores hic abundant, & causam constituent morbi, omnino necesse est illos expurgari, quamvis illud non ita commodè fiat, nisi putemus non sublatâ causâ morbum posse tolli. Instabit fortè quispiam, humores ante purgationem, ex antiquorum præcepto, esse præparandos. Verum dico: humores corporis nostri sponte sunt fluidi, quandoquidem in continuo sunt motu è lege circulationis & pressionis sanguinis, unde non tantum calor, motus, sed & secretio humorum continua dependent. Quid, quod sputatio melancholicorum evincat humores non tantum esse fluidos, sed & copiosius, quam par est, per glandulas secerni? Præjudicium illud de humorum præparatione tum imprimis obtinuit, cum medici ex ignorantia circulationis sanguinis, nec partium usum, nec humorum naturam, nec œconomiam humanam satis haberent perspectam. Itaque frustra occuparis in hoc morbo, in humoribus ad excretionem disponendis, cum illi sint fluidi, cum aliquando ad excretionem sponte ferantur, cumque ulterior secretio purgantium imprimis usu obtineatur. Frustra occuparis in emendandis humoribus glutinosis, nisi prius copiam superfluam eduxeris. Deinde nulla dantur medicamenta, quæ præcisè hunc vel illum humorem tantum educant, itaque frustra laboras in solius melancholici humoris præparatione (si illud fieri posset) cum illa sola absque bile & reliquorum humorum miscella evacuari non possit. Præparatio optima in hoc morbo est, qua sanguini suum restituitur robur, atque id rectissimè fit per medicamenta *chalybeata*; verum hæc, juxta receptam sententiam, in usum vocari non debent, nisi præmissis purgantibus, aut saltem laxativis medicamentis. Unde iterum deducitur, purgationem in hoc morbo præparationi deberi præmitti. Quod si alius medicus, vel ægri ipsi spon-

te



te purgantia in usum vocaverint, tum ad alia, in sequentibus indicanda, poterit fieri transitus, non tamen à methodo in superioribus proposita disceditur. Dixi purgationes debere præmitti, cum autem hoc ex suppositione sit factum, nihil impedit quo minus ulterius curationi instes. Non quæritur quis eas præscripserit, sufficit iis usum esse melancholicum, sufficit primas vias esse expurgatas, eadem postmodum repeti possunt. Ejusdem mecum opinionis videtur fuisse *Forestus*; hic refert l. x. obs. 16. sese ad *Johannem Buscoducensem Carthusianum* monachum (cujus superius feci mentionem) vocatum, statim ipsi exhibuisse leniens: altero die è venâ mediâ brachii dextri detraxisse sanguinem: postmodum ad præparationem & concoctionem materiæ Apozemata præscripsisse.

Videamus jam quibus medicamentis id fieri debeat in hoc morbo. In hunc finem veteribus in usu fuit *Veratrum* seu *Helleborus* niger, medicamentum potens. Cum enim in superioribus explicatum sit humores in hoc morbo sensim fieri glutinosos, necessum est talia in usum vocari quæ tenacia incidere, eademque educere valeant. *Helleborus* ideo convenit, quod non tantum hisce gaudeat facultatibus, sed & aliquando nauseam & vomitum moveat. Vomitus hoc nomine plurimum juvat, quod non tantum ventriculum exhauriat, sed & salivam viscidam, ut & lympham acidam è glandulis manantem copiose educat. Vidit hoc *Hartmannus*, cujus hæc sunt verba: *In ejusmodi casibus exhibeatur, ceteris paribus, Aqua benedicta. Rulandus* refert se exhibuisse *Aque terræ sanctæ* ℥vj. frigide pro aqua fontana, ægotam optime purgatam esse tam ore quam alvo, & statim placidæ ac sanæ mentis compotem factam. *Matthiolum* in *Dioscoridem* l. v. c. 59. utilitatem *stibii* variis observationibus confirmat, inter eas est hæc memorabilis. Melancholico exhibitum fuit *stibium granorum duodecim*, quod paulo post atram bilem (ut ille loquitur) eduxit, cui erant admixtaamenta veluti carnis. Hoc medicamentum tantam opem tulit, ut postera die videretur belle pristinam mentis suæ sanitatem recuperavisse. Fuit *Matthiolum* hujus curationis oculatus testis, tanquam ad miraculum vocatus. Melancholiam antiquam radice *Bryoniæ* curatam è *Rhase* refert *Zacutus Lusitanus*. M. P. H.

Medicamenta purgantia.



l. i. hist. 38. Sive ergo fumatur *Helleborus*, five medicamenta alia satis potentia, ea omnia in Melancholia profunt. Talia sunt *Colocynthis*, *Gialappa*, *Gummi Gotte*, *pulvis Diasennæ laxativus*, *Specificum purgans Paracelsi*, *Electuarium Hydragogum Sylvii*, *Extractum Melampodii Pharm. Bat.* *Pilula Melanogoga ejusdem & Pavii*. Vomitum movent *Crocus Metallorum*, *Aqua benedicta Rulandi*, *Tartarus Emeticus*, *Regulus Antimonii* aut *vinum* in poculo regulino infusum. &c. *Henricus ab Heers* laudat pulverem à *Michaele Pascasio & Pereda* descriptum observ. 27. Estque talis,

℞. *Summ. Epithymi*. ʒß.  
*Lapid. Lazuli ppt.*  
*Agaric. trochiscat.* aa ʒij.  
*Scammonii.* ʒij.

Forſan erravit Typographus & ſcribendum

*Scammon.* ʒj.  
*Garyophyll.* no. xx.

F. Doses quinque.

Quod ſi cui formula extemporalis placeat, ea ſit ſequens :

℞. *Rad. Gialapp.* ʒj.  
*Rhei elect.* ʒß.  
*Sal. Tartar.* gr. v.  
*Trochiſc. Alhand.* gr. ij.  
 F. Pulvis.

Vel hauſtus hic, nec ingratus nec inefficax.

℞. *Elect. Hydragog. Sylv.* ʒiij.  
*Sal. Tartar.* gr. vj.  
*Aq. Meliſſ.* q. ſ.

M. F. Hauſtus.

Si æger pilulas præferat.

℞. *Maſſ. Pilul. Ruſſi.*  
*Mercur. dulc.* aa ʒß.  
*Trochiſc. Alhand.* gr. iv.  
*Cum Tinctur. Croci.*

F. Pilulæ no. iv.

*Williſius* hoc modo præſcripſit.

℞. *Pil. Tartar. Quercetan.* vel



*Succin. Craton. ʒß.*

*Resin. Scammon. vel Jalapp. gr. vj. vel viij.*

*Tartar. Vitriolat. ʒß.*

*Ammoniac. solut. in aq. Mirabal. q. s.*

F. Pil. sumat. iv horâ somni; & nisi operabuntur prius i manè seq.

*Theod. majerne commendat Syr. Helleboratum.*

*Timæus extractum Hellebori nigri legitime præparatum, hanc subjungens formulam.*

℞. *Extract. Hellebor. nigri. ʒj.*

*Resin. Gialapp. gr. iv.*

M. F. Pilulæ n. ix. deaurentur.

Ad vomitum concitandum præscribi potest,

℞. *Aq. Benedict. Ruland. ʒx.*

*Oxymell. Scyllit. ʒij.*

F. Haustus.

*Theodorus Majerne narrat D. Cademan sibi retulisse, si Hellebori albi radix ad ʒij infundatur in ʒvi. v. gr. vini muscatellini atque hujus infusi detur cochleare unum, blande movere vomitum pituitæ viscidissimæ, & subducere alvum. Extat quoque descriptio Electuarii Emetici Heurnii, ex Helleboro albo præparati, cujus vires in vertigine, insaniâ, convulsione &c. prædicantur. Vid. Atrium Medicinæ Helvetiorum p. 143. Do- leus existimat in antimonio latere vim contra Melancholiam, & nil tam Melancholiam purgare quam antimonium. Convenit hoc pulchrè cum iis, quæ superius è Matthiolo. adduxi.*

*Willisii formulæ sunt sequentes.*

℞. *Oxymell. Scyllit. ʒjß.*

*Vini Scillit. ʒj.*

*Syr. de peto. ʒij.*

M. F. Vomitorium: si minime, vel segnius operabitur, liquore possético cum foliis Card. bened. copiose ebibito vomitio irritetur.

℞. *Decoct. Median. Sambuc. ʒiiij.*

*Sal. Vitriol. ʒj. vel ʒij.*

*Oxymell. simpl. ʒij.*

M. sumat eodem modo.



Interim in hoc morbo curando imprimis requiritur Medici prudentia, & diligens observatio juvantium & nocentium. Non enim omnes ferunt medicamenta efficacia, in quo casu blandiora eligenda sunt, & per epicrasin evacuantia, talis est *Ejusdem formula.*

℞. Rad. Polypod. qu. ℥β.

Epithymi. ℥iij. Senn. ℥β.

Tamarind. ℥vj. Sem. Coriandr. ℥iij.

Santal. citrin. ℥ij.

Coq. in aq. fontan. ℥xiv. ad ℥x. Add.

Agaric. ℥ij. Rhabarb. ℥jβ.

Colat. clarificat. add.

Syr. de pomis purgant. ℥ij. capiat.

℥vj. repetendo intra 3. vel 4. dies.

*Dolai* sententia est, magno cum effectu interponi *Clysmata* varia è carminativis, aciditatem temperantibus, parata, quæ simul alvum lubricant, & mucum illam fluxilem reddunt.

Præparantia.

Veteres in Melancholiâ moderatè calida & humida præscribebant, & præparationem purgationi præmittebant. Hoc quamvis nec necessarium, nec utile sit, uti in superioribus demonstravimus, tamen si sanguinis crasis sit emendanda, & ægrotis inter purgationes quies quædam sit concedenda, non malè ea exhibentur, quæ in hoc morbo dicuntur specifica, qualia quædam enumeravit in praxi *Theodorus de Majerne*. Nempe cum sanguis hoc in casu sit tenacior, & ad circulationem facilem minus aptus, medicamenta valida, medicamenta incidentia & attenuantia calidiora eum nimis exagitant, nimis expandunt, adeo qui molestiam creant. Hæc vera est ratio quare medicamenta temperata, in hoc casu, votis medici & ægroti magis satisfaciant. Neque enim puto aliquem, rationis & experientiae trutina examinantem ea, quæ ab antiquis memoriæ prodita sunt, adeo illorum placita exosculaturum, ut putet humorem melancholicum esse humorem frigidum & siccum. Nempe cum quaternarium elementorum numerum in Physicam introduxissent Philosophi, medici quatuor humores caliditate, frigiditate, humiditate, siccitate harumque qualitatuum combinationibus sibi mutuo contrarios amplexi sunt, ne sc. microcosmo



cosmo deesset aliquid, quod ad constitutionem macrocosmi necessarium visum erat Philosophis. Quomodo illud quod frigidum est & siccum erit humor? Cum partes maximè solidæ ex. gr. ossa humiditate sua non destituantur, quomodo partes fluidæ, tales sunt corporis nostri humores, poterunt haberi siccae? Vapores & halitus è terra versus nubes elevati, fluiditatem suam amittunt, quando à frigore concrecentes, pruinae, nivis, grandinis forma versus terram decidunt. Sicca, quantumvis minutissimè divisa, non fluunt, hoc est, non evadunt fluida. Quamvis enim triticum in tenuem farinam reductum effundi possit, & hoc pacto aliquam mentiri fluiditatem, non gaudet tamen motu intestino instar aquæ, vini aut olei, sed particulae ejus juxta se invicem quiescunt. Adeo ut contradictio sit in adjecto, humorem aliquem frigidum esse & siccum. Ita apparet veteres, non minus quam recentiores, præjudiciis excæcatos, non semel malè calculum posuisse. Ratio autem vera ea est, quam statim proposui: ideo non ferunt melancholici medicamenta calidiora & particulis activis admodum imbuta, quia humores tenaces ab iis nimium exagitantur. Huic rationi & alia subjungi potest: acida sæpe contrariis non tam commodè quam subcontrariis & diluentibus expugnari: non ferunt semper salia lixiva, aut aromatica. Ita ego memini me ægrotum tractasse cruditate acidâ laborantem, qui ne quidem *oculos cancri* in pulverem reductos ferebat, quia sc. in ventriculo, aciditate insigni imprægnato, molesta excitabatur lucta. Hæc eadem est ratio, quare purgantia sæpè non tantum profint quam quidem vomitoria. Itaque attentum oportet esse medicum ad ea quæ in praxi occurrunt, & quæ è praxi petita diligenter à scriptoribus annotata sunt.

Dixi in indicationibus generalibus, lentos humores esse expurgandos & emendandos. Vidimus quomodo evacuatio in hoc morbo fieri possit, vidimus etiam quæ cautiones sint observandæ: pergendum jam ad emendationem humorum viscidorum seu melancholicorum. Fit illud duplici via, vel medicamentis incidentibus & attenuantibus, vel chalybeatis tanquam visceribus & sanguini suum restituentibus robur. Prioris generis medicamenta sunt vel minus potentia vel magis ef-

Quomodo  
humores  
lenti præ-  
parentur.



ficacia. Minus potentia conveniunt, quando ea est ægri constitutio, vel complicatio symptomatum, ut utile sit sanguinis particulas nimis cohærentes & tenaces dissolvere, vel etiam diluere aciditatem humorum versus primam regionem confluentium. Talia sunt Radices; Buglossæ, Polypodii, & aperientes, Liqueritiæ; Folia: Fumariæ, Borragin. Bugloss. Meliss. Thymi, Becabungæ. &c. è quibus varii generis præparationes concinnari possunt. Ex. gr.

℞. Rad. Polypod. qu. ℥j.

Fol. Fumar. m. iij.

Bugloss.

Scolopendr. aa m. j.

Thymi.

Chamedr. aa m. β.

Coq. f. a. ex aq. pura colat. ℥xx. Add.

Syr. Pomor. redolentium. ℥j.

Sal. Tartar. ℥j.

M.

Non admodum dissimilis est Willisi præscriptio.

℞. Rad. Chæresolii. Polypod. quer. aa ℥jβ.

Fol. Lingæ cerv. Asplenii.

Ceterach. Chamedr. aa m. j.

Tamarisc. m. β. Cort. ejusdem. ℥β.

Passular. exacin. ℥ij. Pomum i. incisum.

Incisa & contusa Coq. in aq. fontis ℔. iv. ad tertiæ partis consumptionem circa finem adde.

Fol. nasturtii aq. m. j.

F. Colatura clarificanda. Sumantur ℥vj. bis vel ter in die edulcoretur cum syrupo de fumariâ.

Huc refer acidulas ferratas, vel etiam aquias minerales Tunbrigen-  
ses, quæ plurimis dicuntur profuisse. Nempe copiosa liquoris talis assumptio sanguinem reddit fluidiorem, exercitium subsequens propellit & expandit sanguinem, humores tenaces attenuat, viscera roborat, adeoque subtilium & mobiliorum spirituum generationi inservit. Rectissime Joh. Georg. Steigerthal in Programmate de Aquarum mineralium præstantia: Non ignoro tamen in quamplurimis casibus animalia & vegetabilia suas utilitates



tes ipsis mineralibus aquis nonnunquam preferendas possidere, verum in chronicis morbis majora semper fontibus medicatis deberi præconia hic potissimum ostendi, uti hoc etiam cuiusvis patebit, quisquis pertinacissimos quosvis morbos tot medicorum operas eludentes, & tot medicamentorum conatus frustraneos lassantes, ab hisce tandem aquis edomitos consideraverit. Laudatur quoque serum lactis si ventriculus id ferat, quod potentius reddi potest, si herbæ convenientes ipsi incoquantur, præcipuè antiscorbuticæ, admodum in hisce regionibus utiles, quandoquidem vix est affectus chronicus, cui scorbutus non jungatur.

℞. Rad. Helenii. ℥j.

Fol. Taraxac. cum toto

Cochlear.

Nasturti, aquat. aa m. ij.

Coq. s. a. e sero lactis ad ℥j.

Colaturæ calidæ dentur ℥vj. mane & vespere.

Non inutile quoque est remedium, quod *Wierus* in Scorbuto præscripsit, ad melancholicos humores corrigendos, h. e. ad blandè incidendam pituitam, & temperandos humores acres: est autem ejusmodi.

℞. Come Absinth. sicc.

Granor. junip. contus. aa. m. j.

Lactis caprini ℥iv.

Coquantur ad teritiæ partis consumptionem, exprimendo colentur, deinde admissæ Croci in pulverem redacti ℥j. denuo ebulliant fervore uno aut altero, secundo colentur.

Decocti hujus datur ter in die haustus.

Non est flocci faciendum ejusdem præceptum, præstare decoctiones tales quotidie recentes apparari, quod tamen in superiori neglectum est.

Commendat *Willisus* succos herbarum, qui si exprimantur ex herbis antiscorbuticis, non immerito inter remedia magis efficacia locum habere possunt. Lubet hic modo laudati *Wieri* formulam subjungere.

℞. Cochlear.

Sisymb.

Cardaminis.



*Nasturtii hiemal. dict. aa p. æ.*

*Becabung. partem mediam.*

Hæ virides in mortario lapideo cum pistillo ligneo contunduntur, exprimunturque; exhibentur ℥iv hora matutina, & quarta pomeridiana. Exhibet autem hos succos auctor post præmissam purgationem, quod observatu est utile; facit enim hoc ad confirmationem sententiæ à me in superioribus propositæ.

Spiritibus  
excitantia.

Medicamenta magis efficacia & spiritus excitantia præscribi possunt, ægrotis robustioribus; & qui à talibus minimè læduntur. Talia commendat Hartmannus: *Elixir. proprietatis* Paracelsi, *Essentia Croci*, *Liquor Luna*, *Extractum alker-mes* cum extracto *Gummi Ladani* adjecta particula *Ambra*, & *Moschi*. Sed notandum Melancholicos, scorbuticos, Hypochondriacos non semper ferre suaveolentia, adeo ut hæc non temere sint in usum vocanda. His addi possunt *spiritus Cochlearia*, *spiritus Sal. Armon.* *spiritus & Sal. Volat. C. C. Majer-ne* laudat *Tincturam Hyperici*, *ALII Tincturam Lapidis Lazuli.* &c. *Vid. Bierling. Thesaurum Theoretico-practicum fol. 39.* *Doleus* hanc habet formulam.

℞. *Sp. Sal. Armon. succinat.* ℥ss.

*Carminativ.* ℥ij.

*Tinctur. Castor.*

*Cinnamom.* aa ʒj.

*Martis.* ℥ss.

*Aq. Fumar. Centaur. min.* aa ℥ij.

*Syr. Cinnamom.* ℥ss.

M.

Purgationes  
repetendæ.

Non sufficit autem in principio exhibuisse purgantia, sed ea sæpius repeti possunt & debent. *Hippocratis* est effatum: furori dysenteriam salutiferam, unde efficitur, si dejectiones adeo crebræ, ut abrasionem intestinorum & inflammationem eorundem habeant comitem, profint, non negligendas, sed repetendas esse purgationes in Melancholicis affectibus. *Galenus in Aphor. 47. l. vj.* *Hippocratis refert* historiam melancholici, quem vere & autumnis repetitis purgationibus à melancholiâ ingruente præservavit. In hunc finem conducunt

Pt-



*Pilula de Ammoniaco* magistrales, ut & *Pilula melanogoga pharm. Bateana*. Possunt quoque pro re nata vel Apozemata, vel vina medicata, vel pilulæ pro aliquot dosibus præscribi. ex. gr.

℞. Rad. Helen.

Gentian. aa ʒß.

Fol. Meliss.

Thymi.

Card. bened. aa. m. ß.

Summ. Centaur. min. p. j.

Fol. senn. mund. ʒvj.

Rhei elect. ʒij.

Agaric. opt. ʒj

Cort. Citri exter. ʒjß.

Sem. Apii ʒß.

Grosso modo concisis & contusis affunde Vini alb. Gallic. ʒLx. stent in infusione per dies quatuor. Dosis ʒiiij. vel ʒiv tertio, quarto, vel quinto die. Vini medicati chalybeati formula apud *Theodorum Majerne* c. 7. videri potest. Libet hic ad-jicere *Electuarii Panchymagogi* nostri descriptionem.

Electuarium Panchymagogum.

℞. Pulp. Prunor. acido dulc. ʒviiij.

Tamarind.

Rad. Gialapp. aa ʒij.

Diagrid. ʒj.

Fol. senn. m. ʒß.

Cinnamom. acut. ʒij.

Sacchar. clarificat. ʒxviiij.

F. f. a. Electuarium.

Hujus Electuarii grati & efficacis potest vel quantitas nucis muscatæ mane deglutiri ad alvum blandè laxandam: vel idem Haustus forma præscribatur hoc modo.

℞. Elect. Panchymagog. ʒijß.

Sal. Tartar. gr. iv.

Aq. Fenic. q. s.

M. F. Haustus.

Electuarii Dosis est a ʒij. ad ʒß.

Quod



Quod si purgantia difficilius ferant, clysteres in hoc casu quoque conveniunt.

℞. *Fol. Thymi. m. ij.*  
*Flor. Chamomill. p. j.*  
*Sem. Apii. ʒij.*  
 Coq. f. a. ex aq. pura in colat. ʒx.  
*dissolv. Confect. Hamech.*  
*Mellis mercur. aa ʒj.*  
 M. F. Enema.

Medica-  
 menta cha-  
 lybeata.

Restat ut de medicamentis chalybeatis, tanquam visceribus, & sanguini suum restituentibus robur agamus. Non quod hæc demum aliis omnibus præmissis in usum debeant vocari, aut quod nulla alia medicamenta viscera robovent: aut quod nullis aliis polleant facultatibus hæc medicamenta, sed quod tractationis ordo nos non ante deduxerit ad horum medicamento-  
 rum considerationem. Plures sunt indicationes, plures cura-  
 tionis scopi, de singulis in specie est agendum, & medicamen-  
 ta in certas classes distinguenda pro præcipuâ, quâ pollent,  
 facultate. Medici autem prudentis est considerare, quæ  
 medicamenta in hoc vel illo casu reliquis sint præfe-  
 renda. Roborant quoque viscera *Elix. prop.* & alia superius  
 proposita. Possunt ergo medicamenta chalybeata hisce commo-  
 de jungi, ita vis unita evadet fortior. Operæ pretium autem  
 erat de hisce in specie agere, ob eximias facultates. Roborant  
 enim viscera & sanguinem, aciditatem temperant, pituitam in-  
 cidunt, alvum laxant, aliquando vomitum concitant, & jun-  
 cta medicamentis carminantibus, flatu discutiunt. Quid?  
 quod eadem hæc medicamenta causam melancholiæ, mensium  
 suppressionem tollant? Possunt forma varia exhiberi, &  
 aliis atque aliis medicamentis jungi, alterantibus atque laxan-  
 tibus, pro vario ægrorum temperamento & appetitu. Ubi  
 tamen ventriculus simul cruditate laborat acida, & vires non  
 sunt admodum attritæ præstat *Chalybem* exhibere forma pulve-  
 ris, ea jungendo quæ ventriculo sunt accommodata. ex. gr.

℞. *Limatur. Chalyb. puriss. ʒj.*  
*Sem. Levistic.*  
*Rad. Angelic.*



*Macis*

*Cort. Winteran. aa. ʒj.*

M. F. Pulvis. Dosis a ʒß. ad ʒj.

Manè cum vino, aut alio liquore, corpus postmodum exercendo, ad levem sudoris eruptionem.

Ubi hoc pacto sumitur *chalybs*, potest iniri calculus, quantum ægrotus præcisè assumat. Si quis amet medicamenta gratiora, gratior & simplicior est pulvis sequens,

℞. *Limatur. Chalyb. juxta Poterii methodum aquâ irroratæ diebus canicularibus. ʒß.*

*Cinnamom. acut. ʒjß.*

*Macis. ʒj.*

M. F. Pulvis.

Varias *Chalybis* præparationes vide apud *Eundem Pharmac. spagy. l. II. c. 17.*

*Willisii* formulæ sunt sequentes,

℞. *Limatur, ferri ʒj. ponatur in vitro cum succi Aurant. ʒij. stet per diem subinde agitando, deinde affunde aq. pomorum & vini albi aa ʒbj. vel pomacei tenuioris & mitis ʒbij. sumant ʒiiij. bis in die, per se, vel cum alio medicamento solido.*

℞. *Vitrioli Martis.*

*Cremor. Tartar.*

*Oc. Cancr. aa ʒj.*

M. F. Pulvis. dividatur in ix partes. fumatur pars omni manè, in haustu aquæ destillatæ vel decocti, vel jusculi appropriati.

℞. *Extract. Chalybis, vel Chalybis cum decocto appropriato parati. ʒiiij. pulv. Eboris, Santal. citrin. Lign. Aloës aa ʒß. Sal. Tartar. ʒij. Ammoniac. soluti in aq. Lumbri. q. s. F. Massa, formetur in pilulas exiguas, sumantur iiij. vel iv. omni vespera super bibendo aq. pomorum aut fl. Paralysis. ʒiiij.*

*Grulungius Med. Pract. l. I. c. 4.* tanquam specificum commendat pulverem *Fumariæ* sæpius exhibitum. Pilulas ejus-



dem non satis laudandas, uti ait, Vid. Cent. III. ob. 71. Sennertus *Lapidem Bezoar* admodum utilem esse scribit. *Sinkelii* & *J. Heurnii* secretum esse dicitur *Essentia Margaritarum* ʒj. pondere.

Plethora  
imminutio  
per V. S.

Accedendum jam est ad causarum antecedentium considerationem. Si plethora ansam dederit Melancholiæ, ea imminuenda est V. S. uti in superioribus quoque monui. Sanguinis educendi quantitas determinatur, respectu habito ad repletionem majorem, vel minorem, ægri ætatem, vires &c. Eædem illæ considerationes determinant, num simul & semel, num autem repetitis vicibus evacuandus sit sanguis. Locus ordinarius est brachium, isque eligi solet ob commoditatem & venarum ramificationem insignem. Melancholiæ exemplum memorabile, & V. S. successus eximius exstat apud *Schenkiū. l. I.*

p. m. 134.

Ea quoque  
locum habet  
in suppressi-  
one evacua-  
tionum soli-  
tarum.

Si suppressio evacuationum ordinariarum huic morbo causam præbuerit, hæmorrhagiæ narium, hæmorrhoidum, mensium V. S. locum habet uti in plethora dictum est. Locus eligitur idem, nisi quod in suppressione mensium sanguis in pede secari soleat, à quo more temere discedendum non est. Sive enim sanguinem consideres minus mobilem, atque ideo ad pedes descendentem, cum spirituosus recto tramite sursum feratur: sive etiam motum, qui versus partes inferiores concitior redditur, sive etiam juvamen quod hujusmodi V. S. non semel attulerunt, non malè hic antiquorum prememus vestigia. De sinistro latere eligendo, quia scilicet in sinistro latere lien reconditur, nihil moneo, quandoquidem lien sæpe immeritò culpatur, & quanvis in ipso aliqua esset labes, dextrum latus non minus aptum esset V. S. quam sinistrum, quandoquidem lienis sanguis ad brachium ferri non possit, quin prius cor & pulmones pertranseat, & vice versâ. In pede autem venæ cavæ propagines pertunduntur, cum venæ portæ rami, sanguinem, ab arteriâ coeliacâ advectum, versus hepar deferant. Vicariæ V. S. sunt cucurbitulæ. Alii evacuationis modi, præcipue hirudines, in defuetudinem venerunt. Novum quidem præscribi hirudines podici & venis hæmorrhoidalibus applicandas, tanquam sanguinem melancholicum exsugentes;

ve-



verum hæc opinio innititur præjudicio antiquorum, in superioribus confutato, adeoque meritò rejicitur. Cum sanguis per universum corpus brevi temporis spatio circuletur, arteriarum rami majores versus capillares eum deducant & premant, minimæ venulæ eundem suscipiant ad cor deferendum, V. S. non minus quam hirudinum applicationem, prodesse judico, præcipuè ubi repentina expetitur evacuatio. Possunt tamen eadem uti superius explicatum est, in affectibus cerebri adeoque & melancholiâ, in usum vocari, ubi vires debiles suspectam reddunt evacuationem repentinam, vel quando à suctu aliquod speratur juvamen, vel quando Melancholicus eas exposcit, sperans inde egregium emolumentum; opinioni enim melancholicorum aliquid concedendum est. Quod si quis existimet hæmorrhoidum fluxum multis attulisse juvamen, atque adeo à juvantibus & nocentibus petendam esse optimam indicationem, is cogitet, hoc duplici ratione factum esse, vel quia hac viâ sanguinis universalis fit evacuatio è toto corpore, vel quatenus illa non simul & semel, sed partitis vicibus & minori quantitate contingit. Copiosior autem & diu perseverans, per has partes evacuatio, symptoma est admodum noxium, vires non mediocriter dejiciens. In præscriptione medicamentorum, menses moventia, imprimis chalybeata, non sunt negligenda. Quemadmodum autem antea monui de purgatione, ita idem de V. S. hic repetendum est: eam statim in principio esse instituendam, tum quandoquidem universalia præmittenda sunt, tum etiam quandoquidem repletio nimia ad melancholiam disponit, effectus autem non nisi sublatâ causâ tollitur. Hoc ideo moneo, quia methodus recta medendi est summæ utilitatis, cum tamen non semper satis accuratè observetur.

Jam agendum esset de variis in diætâ erroribus; verum quandoquidem de diætâ ex professo dicendum erit, in fine hujus capituli, ideo hic subjungam ea, quæ differentias melancholiæ spectant. De differentia prima non est necesse multis agere, quandoquidem ea, quæ hæcenus dicta sunt, præcipuè Melancholiam, idiopathicam dictam, spectant, de Hypochondriaca suo loco erit agendum. In melancholiæ gradu minori medicamenta blandiora in usum vocanda, præ cæteris autem cha-

De erroribus  
in diætâ, &  
minori me-  
lancholiæ  
gradis.



lybeata, à vehementioribus V. S. purgationibus, potius abstinendum. In absurdâ imaginatione diligenter inquirendum an vitium aliquod lateat in ea parte, de quâ ægrotus conqueritur, cum pars hæc aut illa malè affecta integram œconomiam nostram turbare possit. Quomodo hoc fiat explicare non potuerunt auctores, ideoque varia commenta, varios finxerunt vapores & similia. Ego autem praxeos explicationem aliâ aggressus viâ à figmentis mihi temperandum esse decrevi. Nihil assumo, nisi quod è structurâ partium, circulatione & pressione sanguinis clarè demonstratur. Ex hisce fontibus manifestum fit, quomodo tumores, & solidarum partium vitia, in hominibus melancholicis, graviora possint inducere symptomata. Nempe nulla pars solida malè afficitur, quin simul hinc circulatio sanguinis aliquomodo immutetur. Sive enim citius transmittat sive tardius, sive etiam cum difficultate, sive etiam sanguis ibi diutius hæreat, necesse est inde circulationem immutari. Si sanguinem citius transmittat, sanguis eo majori impetu fertur; si tardius, debilior est sanguinis pressio: si cum difficultate, spiritus eo cum impetu fluunt, cor agitant, circulationem intendunt, adeoque œconomiam nostram turbant: si sanguis alicui diutius hæreat, eo ipso circulatio immutatur, & sanguis à debita crasi desciscit. Quod si autem pars aliqua sit malè affecta, ex. gr. cerebrum, illa pars maximè hujus immutationis noxam luit, atque ita per consensum afficitur. Quæ hic paucis tetigi, fundamentum continent explicationis multorum chronicorum & curatu difficilium affectuum, febrium lentarum, hæcticarum, cachexiæ, melancholiæ hypochondriacæ, uti suo loco pluribus demonstrabitur. Ut ad negotium nostrum revertar, ubi pars quædam malè affecta, vel affectum melancholicum, vel ejusdem graviora producit symptomata, in curatione ægroti potissimum eò respiciendum est, ne malè sedulâ diligentiam ægroto creemus molestiam. à perversa imaginatione quosdam vafre restitutos esse refert *Bierlingius in Thesaur. p. 37. &c.*

De Melancholia cum vigiliis.

Differentia Melancholiæ, quod alia habeat vigilias adjunctas, vel etiam somnum, in curatione insignem habet usum. Sive enim illa differentia in eodem ægro, respectu temporis morbi,

ob-



observetur, siue etiam in alio, pro circumstantiarum varietate, illa minimè negligenda est. Ubi vigiliæ urgent, si vires illud ferant, præcipuè, si illæ oriantur ab animi affectu, somnus omnino provocandus, uti in capite de vigiliis nimis fufius explicatum est. Quamvis enim primâ fronte somni provocatio videatur contraria spirituum tarditati & cerebri dispositioni, tamen, si experientiam consulamus, somnus moderatus in hoc affectu plurimum juvat, ut sanguis reddatur spirituosior & subtilior, ut spiritus refocillati alacriores ad munia sua redeant, ut mens à molestis curis, & continuâ objecti tristici consideratione avocetur. *Horstius*, in Epistola *Obs.* 18. l. 11. subiecta, refert, sese post purgationes è mineralibus reiteratas, V. S. multas, & ritè correctâ narcotica (exhibet *Laudan. opiat.* gr. v.) diebus canicularibus restituisse fœminam honestam. Refert etiam sese exterius fronti & temporibus applicasse compositum sperniolæ, cum aqua rosarum dissolutum, dum interim *Laudanum opiatum* cum magisteriis ad gr. iv. vel v. præscriberet interius. Hoc velim diligenter considerare medicos adhuc acriter usui *Laudani*, laudatissimi medicamenti, adversantes, cum tamen prudens ejus usus ægrotos non semel è summo eripuerit discrimine. Pluribus indicationibus satisfâcit mixtura sequens,

℞. Aq. Meliss. ℥ij. Puleg. ℥j.  
 Tinctur. Croci, Castor. aa ℥j.  
 Sal. Volat. C. C. gr. v.  
 Laud. op. gr. iij.  
 M.

Sumet per intervalla, præcipuè cubitum iturus, æger cochleare unum aut alterum.

*Matthias Tillingius* in *Anchora salutis* refert se virum ornatissimum, phreneticis, melancholicis & epilepticis affectibus correptum, variis remediis frustra adhibitis hac *Emulsione* ad somnum & mentis compositionem tranquillam duxisse.

℞. Amygdal. dulc. depilat. ℥ss.  
 Sem. 4. frig. maj. & min. aa ʒj.  
 Papav. alb. Violar. purpur. aa ℥ij.  
 Aq. Lactuc. Violar. Endiv.



Rosar. Solan. aa. ℥iij.

F. f. a. Emulsio, cui admisce

Confert. Alkerm. de Hyacinth. aa 3℔.

Magister: Corall. Perlar. or. aa ʒj.

Land. opiat. cum Succo Citri ppt. gr. x.

Syr. Papav. rh. Violar. aa ʒj.

Aq. Cinnamom. ʒij.

M. in mortario & f. f. a. Emulsio.

Commendat etiam *Willisus* hypnotica blandiora & *Emulsiones* è *Seminibus papav. alb.* cum Syrupo de Meconio. Describit idem *Tillingius* quoque pulverem opiatum, qui quum recipiat plura ingredientia, apud auctorem videri potest. p. 304. *Hoeferus* in *Hercule Medico*, è *Cratone* commendat singulis diebus, vel alternis, capiti adhibere *jecur vitulinum* calidum, ut per ejus temperatum & blandum calorem cerebri intemperiem ad antiquam crasin reducat. Idem præstant *columba*, & *gallinae* vivæ discerptæ & impositæ: nec non *sanguis gallinarum* aceto dilutus. Occipiti applicat idem *grana juniperi* contusa. *Vid. L. I. c. 7.* Inter externa commendatur quoque *Balneum aquæ dulcis*. *Vide Jul. Cas. Claudini* *Empyricam rationalem. l. III. c. 5.*

Cum somnolentiâ.

Si Melancholia adjunctam habeat somnolentiam, somnus, quantum pote, excutiendus est; adeo ut in hoc morbo etiam illud *Hippocratis* sit verissimum: ὕπνος, ἀγρυπνίη, ἀμφοτέρα, τῶ μετρίῳ μάλλον γεγόμενα, κακόν. *Aph. 3. sect. II.* Conveniunt in hoc casu medicamenta Spiritus excitantia. *Sp. Sal. Armon. Sal. Volat. C. C. Fuliginis Liqueor. C. C. succinatus, &c.* Vitanda sunt hypnotica, multo magis autem narcotica.

Diæta.

Quandoquidem in præcedentibus dictum est, varios in diæta errores occasionem præbere Melancholiæ, post curam Pharmaceuticam etiam de diæta est agendum.

Ær.

Vitetur ær crassus, subterraneus, foetidus, humidus: eligatur purus, lucidus, moderatè calidus. Quemadmodum autem in multis morbis chronicis, ita etiam hic, æris mutatio locum habet: imprimis si ad *acidularum* usum accedere ægro sit animus. Felicius aquæ ferratæ & minerales operationes suas absolvunt, si æger fontes ipsos adeat, convenienti utatur regimine, exercitio gaudeat quotidiano, quam si easdem do-

mi



mi suæ segnis hauriat. Mutatio hæc aëris etiam locum habet quando æger est segnis & in somnum proclivis, quandoquidem objectorum diversitas, & colloquia spiritus excitant. Institui autem potissimum debet iter versus loca amœna, puro, calido & moderatè sicco aëre læta. Imprimis ubi incolarum genius ad lætitiā est proclivis: lætitia quippe indigenarum salubris regionis argumentum.

Vitentur cibi crassi, viscosi, saliti, vento vel fumo indurati: vitentur pisces viliores, squammis carentes; carnes asperinæ, suillæ. Cibus & potus sint boni succi. Conveniunt carnes gallinarum, agnina, vitulina, atque ex his parata jussula, quibus herbæ appropriatæ addi possunt. Commendatur serum lactis, præcipue si in eo laxantia infundantur. Nocet cerevisia crassa, sæculenta, acida, non satis fermentata; prodest cerevisia tenuis, lupulata, probè cocta: ut & vinum tenue ac spirituosum. Quemadmodum enim in puro & subtili aëre viventes spiritus habent mobiles, & ad hilaritatem sunt dispositi, ita etiam sanguinis & spirituum animalium dispositio & motus sequuntur non parum naturam alimenti quo vescimur. Cum enim alacritas spirituum, à sanguinis pressione & crassi, sanguinis subtilitas à chylo laudabili, laudabilis chylus ab alimentis boni succi pendeant, sequitur naturam spirituum animalium sequi esculenta & potulenta quibus vescimur. Quæ *Philippus Hochstetterus Decad. v. cas. i.* in scholiis habet hic quadrant. *Ventriculus depravatè concoquit chylum, cujus substantiam longè crassiore, viscosiore, ac tenaciorē reddit, quam ut bonum ex eo sanguinem Hematoseos virtus progignere possit.* quem vide l. c. De vini usu in melancholia pluribus disputantem vide *Gabelchoverum Cent. III. obs. 80.*

Cibus &  
Potus.

Non sufficit autem eligi cibos convenientes, nisi simul probè mastificentur. Masticatio accurata salivam intimius cibis admiscet, cibos egregiè comminuit, adeo ut ventriculo minorem pariant molestiam. Masticatio ad dissolutionem & concoctionem primum & summæ utilitatis gradum struit. Vitentur nimia ciborum varietas, convivium protractiora, quandoquidem hæc ad ingluviem & ebrietatem, & proinde ad melancholiam ducunt. Ad potum referri possent *acidula Swalbacen-*

ses,



*ses*, nisi jam ante de aquis ferratis & acidulis esset actum. *Guernerus Neuhausen* commendat infusiones *Thee* & *Coffee*, ut & confectionem *Chocolata*, priores imprimis locum habent in melancholiâ cum somnolentiâ.

Somnus &  
vigilia.

Etiam de somno & vigiliâ in superioribus est disputatum, adeo ut hic nihil restet addendum, quam utraque debere esse moderata. Quod si ægrotus in alterutram partem nimium inclinet, contrario modo blandè flectendus, & sensim assuefaciendus est.

Motus &  
quies.

Inertia & vita sedentaria in hoc morbo variis de causis plurimum nocent. Præterquam enim quod illi, quos nullum agendi & vigilandi studium delectat, quibus nulla familiæ prospiciendi necessitas incumbit, sint tetrici, & sæpe numero sibi ipsis oneri: inertia ipsa & exercitii defectus concoctioni ciborum, chyli distributioni, excrementorum separationi, sanguinis attenuationi & pressioni, spirituum animalium secretioni, atque agilitati plurimum obest. Affectentur deambulationes quotidianæ, non negligatur vectio sive in equo, sive in rheda; hæc enim in morbis diuturnis non semel profuerunt. Blandus enim ille & continuatus viscerum & totius corporis succussus, sanguinis & spirituum calorem, expansionem & motum promovent: diversa etiam illa, quæ oculis subjiciuntur, objecta, mentem à curis & molestiis avocant: quietis major incumbit necessitas illis, quos vigiliæ molestæ exercent, præcipuè nocte: defatigatio modica diurna etiam somnum blande allicit.

Excreta &  
retenta.

Excreta & retenta debito sese habeant modo. Alvus potius sit lubrica, quam adstricta. Intestina nimio excrementorum pondere onusta, aut flatuum copiâ distenta, anxietates circa præcordia, adeoque affectionem hypochondriacam, aut ejus æmulas oppressiones excitant. Mensium fluxus moderatus sit & debito contingat tempore. Sive enim sanguinis copiam corpus gravantem, sive inopiam spiritus imminuentem & functiones labefactantem consideres, utraque non parum nocet. Ad excreta etiam imprimis referri debet feminis excretio; illa enim ad corpus labefactandum & spiritus dissipandos magnarum est virium, si sit immoderata. Moderata tamen in assuetis, in ve-

ge-



getis, in rei venereæ deditis culpanda non est, modo sit casta & licita. Coelibatus plurimis nocuit. Non quod semen venenatam, aut virulentam induat naturam, quæ anilia & spurca medicorum sunt commenta, sed quod illi qui in amplexum conjugalem feruntur, nisi potiantur votis, vehementissimis animi passionibus exagitantur, quas sedare frustra annitaris. Si quis huic succumbat passioni miser, illi casto conjugio melius, quam mellitis verborum globulis, consulueris. Est medullas mollis hæc flamma, fauciam mentem exagitat cæcus ignis, venæ vulnus alunt. *Bierlingius* in *Thesauro Theoretico practico* p. 37. ait: *Venus nonnunquam excitat melancholiam, nonnunquam etiam illius medicina est. Duo juvenes auxilium contra morbum melancholicum impetrarunt, cum puella amata se conjunxissent. Aret. lib. I. diurn. I. 5.*

Non est quod de animi pathematibus multa adjiciam, cum è superioribus pateat, illis sæpe affectum hunc originem suam debere. Gaudium & lætitia universo hominum generi, adversus morbos graves, auxilium præstant non contemnendum. Spes non tantum agricolas, sed & demissi animi homines, alit. Itaque adversus tristitiam, & subitos casus, quantum pote, muniendus est animus. Animus ne imperet cavendum. Fugiendi animum irretientes mollium, impudicarum & meretricum laquei. Fugiendi libri obscœni, spectacula, colloquia, sodalitia & mentem corrumpentia omnis generis amoris lenocinia.

Animi pathemata.

*Speculator adstat desuper,  
Qui nos diebus omnibus,  
Actusque nostros perspicit  
A luce prima in vesperam,  
Hic testis, hic est arbiter,  
Hic intuetur quicquid est,  
Humana quod mens concipit:  
Hunc nemo fallit judicem.*

Et si *Philemonem* apud *Justinum Martyrem* de *Monarchiâ Dei* audis: p.m. 82.



Ἔσιν δίκης ὀφθαλμός, ὃς τὰ πάνθ' ὀρᾷ.  
 Ἐἴ γὰρ ὁ δίκαιος ἢ ἀσεβὴς ἔξουσιν ἐν,  
 Ἀρπάζ' ἀπελθὼν, κλέπτ', ἀποσέρει, κύκα·  
 Μὴ δὲν πλανηθῆς, ἔστι καὶ ἄδ' κρίσις  
 Ὅσπερ ποιήσει θεὸς ὁ πάντων δεσπότης,  
 Οὐ τῆνομα φοβερόν, εἰδ' ἂν ὀνομάσαιμι ἐγώ.

## C A P U T S E X T U M.

*De Mania.*

Ira & Ma-  
nia compa-  
ratio.

CUM ira furor sit brevis, furor ira continuata, & animi commoti æstus diuturnus, dici potest. Itaque ad intelligendam Maniæ naturam, huic negotio potissimum incumbendum est; quod enim Græci, Maniam *Cicero* furorem dixit.

Maniæ de-  
scriptio.

Mania est vehemens & continuata spirituum animalium & sanguinis commotio, vigilias, audaciam, & ferociam, absque febre, producens.

An sit mor-  
bus an vero  
symptoma?

Disputatum fuit de Melancholia, dubitari posset quoque de Mania an sit morbus, an symptoma? Verum si rem ipsam perpendamus, tales disputationes sunt admodum frivolæ. Cum enim symptoma sit effectus morbi corpori inconveniēns, perspicuum est, non posse dari symptoma, quin etiam detur morbus. Morbus enim nullus datur, nec cognosci potest, nisi è symptomatibus, quæ tanquam effecta, vel signa morbi considerantur. Ergo totius difficultatis summa huc redit, an tractatio & descriptio ita sit proponenda, ut præcipuè morbum, an verò id, quod in sensus incurrit, imprimis respiciat? De tractationis autem methodo, cum quisque suo sensu abundet, non est laborandum, modò vera, certa & praxi convenientia proponantur. Mihi rectius videtur, si illud commodè fieri possit, morbum ipsum tractare, symptomata tanquam symptomata, non autem morbum tanquam causam considerare. Hæc est ratio quare Maniam definire noluerim *delirium diuturnum, cum audacia & furore absque febre.*

Explicatur  
& confirma-  
tur descri-  
ptio.

Dixi itaque Maniam esse vehementem & continuatam spirituum & sanguinis commotionem, ut essentiam morbi seu

ra-



rationem formalem ob oculos ponerem. Quæ enim de spiritibus fervidis & igneis, aut iisdem *aqua stygia* non absimilibus, dicuntur, falsa sunt & fictitia. Ignis sese lumine & æstu depascente, in cineres & favillas proxima quæque redigente, manifestat. Quæ autem indicia hujus immutationis? An aliquis ira furens statim acquirit spiritus igneos? Ignæ naturæ spirituum repugnant, spiritus ipsi, cerebrum, nervi. Quod spiritus ipsos spectat, hi sunt quidem subtiles, attamen humidi, fluidi, benigni: adeoque à lucida & conflagrante naturâ quam longissimè remoti. Cerebrum ipsum viscus est molle & humidum, atque ideo spiritibus igneis producendis minimè aptum. Quid? quod spiritus hi ignei tubulis cerebri copiosissimis contenti, non tantum coquere, sed & assare deberent cerebrum, id quod absurdissimum esse nullus non videt. Quæ assantur aut vitâ destituuntur, aut vitam exuunt. Repugnat illud etiam nervorum naturæ. Præterquam enim quod eadem illa, quæ de cerebro dixi, nervis quoque possint applicari, nervi vehementiam ignis ferre non possunt, quin dolorem, febrem, convulsiones vel similia producant symptomata. Non dantur ergo spiritus ignei aut fervidi, adeoque essentiam vel causam Maniæ non constituunt. Ex iisdem fontibus refutari posset *aqua stygia* similis spirituum natura. Sufficiet monuisse dato non concessio eam esse spirituum naturam, affectum non posse esse diuturnum, nec sanitatem quoad cætera incolumem. Quis enim concipiat *aquam stygiam* cerebro nervisque contentam, ac horum ope per dies, hebdomadas, menses, annos plures continuò in viscera, musculos &c. depluentem, absque ulla læsione? Aut læsio insignis deberet produci ab hac *aqua stygia*, vel *aqua stygia* à proprietate multum descivit.

Causæ errorum hæ mihi videntur esse, vel quod stupendorum symptomatum stupendas crederent esse statuendas causas, vel quod ubique ferè putarent in temperie esse vitium. Si quis autem attentius rem perspiciat, is facile animadvertet, non tantum intemperie & structurâ; verum etiam motu partes corporis nostri, in quibus sunt & humores & spiritus, sæpe numero peccare. Quinimo intemperies non est causa motus perversi, sed motus perversus, aut modum excedens, causa intemperiei.

Cur spiritus  
excogitati  
sint *aque sty-*  
*gie* similes?



De vehementiori spirituum animalium motu.

Postquam ergo causas falsas refutavimus, atque causas erroris deteximus, non inutile erit, si ea quæ in descriptione à nobis exposita sunt luculentius adstruamus. Spiritus animales vehementius esse commotos patet, ex inquietudine & vigiliis, quæ & tanquam causæ & tanquam symptomata maniaæ considerari possunt. Tanquam causæ, quandoquidem vigiliæ solent præcedere, antequam ægroti evadant furiosi. Tanquam symptomata, quandoquidem in paroxysmis gravioribus somnus excuti solet. Spiritus animales vehementius esse commotos patet, è garritu, loquelâ non cohærente, & clamoribus vehementibus ac continuatis. Tantus etiam adest spirituum motus, ut ad aliorum rationes & sermones minimè attendant, nec argumentis convenientibus eorum mens commota sedari possit. Surdo narratur fabula. Quid? quod pudore omni seposito, de corporis tegumentis nullo modo sint solliciti; sed partes, quas natura velare jubet, nullâ adstantium, sexus aut ætatis habitâ ratione, aliorum oculis non vereantur exponere.

Ut & sanguinis.

Adest quoque motus sanguinis nimius, id quod patet ex eo, quod injuriæ aëris illos non admodum afficiant. Patet id quoque è viribus stupendis quibus pollent: quia non multum videntur debilitari, quamvis magnâ copiâ eductus fuerit sanguis. Vestes & stragula dilacerant, frigoris sunt patientes, soli pluribus robore sunt pares, adeo ut necesse sit eos vinculis aut carcere coerceri.

Duplex hæc commotio simul ægrotos exagitat.

Non minus sanguinem quam spiritus esse commotos, imo amborum horum liquorum commotionem sibi mutuo manus tradere, se mutuo adjuvare, patet è passionibus animi vehementibus ira, audaciâ, ferociâ. In hisce enim consistere efficaciam pathematum, quod spiritus agitati in præcordia influant, cor, pulmonem diaphragma, adeoque sanguinem & viscera vehementer commoveant, & vice versa, quod sanguis commotus, & validius pressus, spiritus animales, & cerebrum validissimè & turbulente afficiat, clarissimum est.

Diuturnum est delirium.

Diuturnum est delirium, adeo ut quosdam diu, imo ad mortem usque comitetur: quandoquidem febris abest: ægroti cibum sumunt, eundem sic satis concoquunt, digerunt, egerunt,



runt, nec somno semper destituuntur. Habent enim plerique dilucida, nunc longiora, nunc autem breviora, paroxysmorum intervalla. A somno motus spirituum animalium & sanguinis aliquomodo sedatur. Malum exacerbatur pro ægroti, vel æris dispositione variâ. Absentia autem febris, & induciæ, quibus gaudent hi ægrotantes, clarissimè demonstrant, naturam hujus morbi propriè consistere in spirituum & sanguinis nimia commotione: quemadmodum maximè sani aliquando vehementissime irascuntur & promptissimè, ab objectis solummodo externis, absque antecedente spirituum animalium corruptione. Ita Juvenes athleticè valentes, in maniam incidunt. Non est necessarium supponere non concessa principia, ubi ex iis, quæ negari non possunt, totum negotium expediri potest.

Hæc omnia confirmantur ex iis quæ in ipso furore contingunt. Audaces sunt & admodum robusti, adeo ut plures uni coercendo vix sint pares: suam vitam nihili pendunt, minores corporis læsiones non sentiunt, vel saltem non animadvertunt, exæstuant, invadunt, perfringunt omnia. Omnis nocendi occasio, omnia nocendi instrumenta ipsis adimi debent. Tam agiles sunt eorum spiritus animales, tanto nocendi studio feruntur aliquando, ut varias injurias inferendi & lædendi artes excogitent, & ubi nihil aliud est ad manus, sputis vel excrementis alios conspurcare gestiant.

Cum audaciâ & ferociâ.

Addidi tandem non adesse febrem, id quod ex eo patet, quod satis sani degant, cibum non fastidiant. Adest tamen major sanguinis pressio, unde sequitur pulsus magnus & robustus, etiam post iteratas venæ sectiones. Hæc est causa tantarum virium, audaciæ & ferociæ. Verum non dicitur hæc febris, cum alia symptomata febrilia non comitentur pulsum hunc majorem. Existimatur hic pulsus, & hæc pressio sanguinis Manicorum esse quasi naturalis. Quemadmodum autem sani in febrem incidere possunt, ita etiam maniaci; in paroxysmis tamen febrium furor solet esse vehementior.

Absque febre.

Mos obtinet ut maniaci ædibus, huic usui destinatis, includantur, vel dedantur hisce vel illis qui tales tractare solent, nullum tamen est dubium, quin plures restitui possent, si tempestive in prudentis alicujus medici inciderent manus,



qui tum per experientiam plura circa hunc affectum observare posset. Rarius medici ita affectos tractant, nisi forsan in initio. Tractavi tamen ego, nec infeliciter, aliquos, unde de reliquis conjecturam facio.

Mania causæ  
animi pathemata.

Causam ego putem hujus mali plerumque esse externam, iram, amorem, pœnitentiam, excandescentiam excitantem, præcipuè autem si accedat malè sibi conscia mens, dolor, & stimuli conscientia inquietæ, aut ad desperationem tendens animi angustia. Nimirum quando aliquis nos læsit, quando aliquis amore ardet, cui satisfacere non potest, vel ob repulsam, vel ob amicorum vel parentum, rectius juventuti consulentium, voluntatem, quando sese in maximas vident conjectos angustias, excitantur animi pathemata. Videas tales iratos, vindictam spirantes, amore cæcos, æstro percitos, amantes, lætantes, sperantes, desperantes, indignantes, obstacula omnia amoliri gestientes. Quod si nostra imprudentia, errore, incitia nos irretitos animadvertamus, nostri nosmet pœnitent.

Id quod Veteres Poëtæ non ignorarunt.

Pulchrè hoc mihi Veteres in *Orestis*, *Oedipi*, *Ajacis* fabulis expressisse videntur. *Orestes* à *Virgilio* furiis agitatus dicitur, ab *Euripide* autem correptus νόσω μανίας. *Virgil.* l. IV. *Æneid.* vs. 471. *Eurip.* in *Oreste* vs. 227, 228. & versu 254. λύσση. Eodem modo *Sophocles* *Oedipi* desperationem dixit νόσημα μείζον ἢ φέγειν. *Sophocl. Oed.* vs. 1302. Vid. quoque vs. 1308. *Ajacem* idem *Sophocles* in *Ajac. flag.* vs. 59. dixit. φοιτῶντ' - μανιάσιν νόσοις. quod vetus Scholiastes explicat. ἀντὶ τῶ μαινόμενῃ. φοῖτος γὰρ ἡ μανία. & quæ sequuntur. Videri quoque potest *Stolbergius* ad hunc locum. postea vs. 143. eundem dixit Poëta ἱππομανῆ. Possem plura adducere, sed hæc sufficiunt, ut constet hos omnes fuisse maniacos. Unde autem hic affectus? Non ab igneis spiritibus, non ab iisdem aqua stygia similibus, sed ab animi pathematibus vehementibus, à dolore, irâ, repulsâ, mente malè sibi consciâ. Hanc imprimis significarunt quando furiarum fecerunt mentionem. Luculentus mihi est testis *Cicero* pro *Roscio* c. 24. Nolite enim putare, quemadmodum in fabulis sæpe videtis, eos qui aliquid impiè scelestèque commiserunt, agitari & perterreri furiarum tadis ardentibus. Sua quem-



quemque fraus, & suus terror maxime vexat, suum quemque scelus agit, amentiaque afficit: suae malae cogitationes, conscientiae animi terrent. Ha sunt impiis assidue domesticaeque furiae, quae dies nocteisque parentum poenas à consceleratissimis filiis reportant. Quae hic ab Oratore dicuntur illos dies nocteisque torqueri, sunt notatu dignissima: vehementes hae commotiones somnum abigunt, & vigiliae solent praecedere continuatae maniam. Serpit enim paulatim dolor, instar ignis conclusi, & vires acquirit eundo, donec tandem erumpat furor. Graphice illud Maro expressit *Æn. l. iv. vs. 529.*

*At non infelix animi Phænissa, nec unquam  
Solvitur in somnos, oculisque aut pectore noctem  
Accipit: ingeminant curae, rursusque resurgens  
Sævit amor, magnoque irarum fluctuat aestu.*

Quid exceperit has vigilias postmodum subjungit. Conscendit furibunda rogos, antea dixerat: Ergo ubi concepit furias evicta dolore. &c.

Revera enim spirituum hic æstus, sanguinis & præcordiorum agitatio, vigiliae continuatae, rationis dictamen tandem excutunt, unde homines tales, ad nocendum proni, ærumnam, dedecus, pestem sibi, aut aliis inferre gestiunt. Nimirum antiqua illa vestigia, & rationis rectae præcepta, juxta quæ sani judicant, atque vitam suam instituunt, delentur, nec non oblivioni traduntur: furiosi, hisce fuscque deque habitis, ad vivas illas & recentes impressiones, quas vehemens animi excitavit commotio, attenti, sui ipsius obliviscuntur & maniae indicia misere produnt. Eadem hæc & ego & alii observarunt practici. *Platerus* narrat juvenem dissolute viventem puellam prædivitem *Milhusio* contra parentum voluntatem abductam, matrimonio sibi copulasse: mox bonis dilapidatis pessime tractasse, adeo ut sæpe desperabunda infœlix mulier se ipsam interficere cogitaret. Tandem ad insaniam redacta, vestes dilacerabat, nudaque catenis vineta etiam stramen, in quo cubabat, minutim unguibus discerpebat. Narrat hæc *Platerus* oculatus testis, *Obs. p. m. 86.* Is etiam ad Principem virginem quandam fuit accersitus, quæ ex amore principis ecclesiastici, cui ipsi per suos nubere non licuit, in maniam inciderat. *ibid.*

*Id cum usu  
quotidiano  
convenit.*

Qui



Qui plura desiderat, is adeat *Platerum*, *Schenkius*, alios.

Causæ anteceden-  
tes

Inter causas antecedentes recenseri debent temperamentum corporis biliosum & melancholicum, tempus vernale, autumnale, dies caniculares, intentio animi, studia, ebrietas, sanguinis orgasmum insignem producentia. Magna inter maniam & melancholiam intercedit affinitas; quidam enim ob temperamentum magis languidum, ubi res ex voto minus fluunt, sese totos tristitiæ tradunt: alii autem è contrario audacius insurgunt, irascuntur, cuncta amoliri obstacula gestiunt, atque ita evadunt furiosi.

Differentiæ.

Differentiæ mania sunt, quod alia existat gravior, alia levior, alia recens, alia inveterata. Ratione symptomatum quoque differt; quidam enim ad hos, alii ad alios excessus sunt proni: Ratione causarum etiam differt mania; alii enim ab amore, alii à dolore, alii ab ira potissimum in hunc affectum inciderunt, quamvis ordinariè diversæ mentis agitationes concurrant, antequam quis in maniam incidat. Differt etiam mania, quod alia sit hæreditaria, alia acquisita; hanc autem differentiam ita intellectam volo, non quod quidam ab ortu statim sint maniacy, sed quod parentes, ante hoc correpti morbo, miseri affectus semina liberis quasi indiderint, quæ postmodum sui indicia produnt. Nemini res ita ex voto fluunt, quin aliquando animum hæc vel illa molestia excruciet. Cum leviores illæ ægritudines à plerisque facilè superentur, qui hæreditario hæc malo sunt obnoxii, à causa levioris momenti vehementius afficiuntur. Differt etiam mania, quod alia sit absque febre, alia febrem habeat comitem. Non est de essentia mania febris: nihil tamen impedit quin maniacum possit invadere febris vel statim in initio, vel etiam postea, aut per intervalla, quod diligenter observandum est, quandoquidem tum non tantum mania, sed & febris ratio sit habenda.

Signa.

Signa mania sunt manifesta: ferociunt ægri, lacerant, confringunt omnia, robusti admodum sunt, aliquando in adstantes impetum facturi nisi cohibeantur. Non adest febris manifesta, unde à Phren<sup>tide</sup> distinguitur: audacia adest & ferocia, quæ in Melancholicis non observantur. An mitior sit an  
gra-



gravior, è symptomatibus dijudicare licet. Quæ sit causa, tum ab adstantibus narratur, tum sagaci conjectura dijudicatur. An malum sit hæreditarium nec ne, interrogando expiscamur. Febris indicia è pulsu magis concitato, siti, æstu, linguâ obductâ & scabrâ, appetitu prostrato, urinâ intensè rubra defumuntur. Non esse hoc phreneticum delirium, ex eo cognoscitur, si mania indicia sese ante febris invasionem prodiderint, aut si cessante febre perseveret ferocia. Deinde in Phrenitide non solent omnia perfringere, aut dilacerare, veluti in mania.

Prognosis ita instituatur. Mania est difficilis affectus, & Prognosis. nisi illi tempestivè occurratur, diu vel per totam vitam infestare potest, si non semper, saltem per intervalla. Curatu tamen facilius est mania recens, mitior & adscititia, quam inveterata, ferociens, & hæreditaria. Si à somno mania sedetur, bonum est. Quamvis febris graviora inducat symptomata, tamen utilis esse potest, quandoquidem corpus debilitat, & spiritus postmodum languidiores reddit.

Indicationes in hoc affectu sunt spiritibus ferocientibus subtrahere pabulum: Spiritus ab objectis furorem excitantibus avertere, eosdemque mitigare: somnum conciliare, & causas antecedentes tollere. Indicationes

Cura perficitur imprimis V. S. Sanguis enim concitatus Cura V. S. spiritibus continuum suppeditat pabulum, adeoque is venæ sectione & sanguinis educatione liberaliori imminuendus est. Sanguinis impetus ordinariè ejus moli proportionatus est, adeoque impetus minuitur, si copia subtrahatur. Itaque vena statim in principio est secanda, idque pro ægri viribus, ætate, & morbi magnitudine repetendum aliquoties. Instituitur V. S. in brachio, pede, fronte, pro circumstantiarum varietate. Observatu non est indignum, illos ipsos auctores qui mania causam statuunt malignam & occultam qualitatem, tamen V. S. præscribere, tanquam remedium maxime necessarium: exempli loco sint *Platerus*, *Sennertus*, *Riverius*. Revera pressione sanguinis impetus, & spirituum motus, ab hac pressione pendens, V. S. promptissimè & tutissimè compescitur. V. S. ex *Aëtio* quoque commendat *Franciscus Hildesheim* in specilegio,



gio, ac plerique practici. *Platerus* refert virginem illam infelicissimè nuptam, cujus in præcedentibus facta est mentio, ad *Empyricum* quendam rusticum devectam, curatam fuisse, septuagies unâ septimanâ, venis, diversis in locis, apertis, atque universo pene sanguine detracto.

Purganti-  
bus.

Spiritibus quoque subtrahitur pabulum purgationibus, & quidem efficacioribus. Cum enim impetus sanguinis versus caput feratur majori vehementiâ, non est mirum, si secretion-nes humorum versus intestina segnius peragantur, & alvus sit adstricta. Quemadmodum ergo in capitis dolore, phrenitide, vigiliis nimis, alvus laxa prodest, ita etiam hic eo colliman- dum, ut alvus laxetur. Magis id requiritur in hoc casu, quandoquidem ferocia est major, nutrimentum majori copia assumitur, nec vires debiles, aut alia symptomata purgationem impediunt. Præscribatur itaque hic vel similis haustus.

℞. *Elect. è succo Rosar.* ℥℞.

*Lapid. prunell.* ℥℞.

*Trochisc. Alhand. gr.* ij.

*Aq. Borrag. q. s.*

M. F. Haustus.

Commendatur à *Theodoro de Majerne Pulvis benedictus Valesci. Pil. Alexandri Tralliani, de Lapide Armeno. de Lapide Lazuli &c. à Mynsichto, Pilula melanogoga.* Exstant quoque *Pilula, pulvis, Electuaria*, non inutilia in *Pharmacopœa Jacobi le Mort Professoris Lugdunensis.* Vide quoque *Collectanea Chymica Leidensia.*

Laudat *Timæus Extractum Hellebori nigri*, cum *Syrupo Violarum*, id quod proculdubio hausit è *Sennerto* idem remedium præscribente. *Willisus* hæc præscribit:

℞. *Extract. Hellebor. nigr.*

*Calamelanor. aa* ℥j.

F. Bolus.

℞. *Decoct. Senæ Gereonis vel Epithymi (cum Rad. Hellebor nigr. 3ij.)* ℥vj.

F. Haustus.

℞. *Pulv. Diasenn.* 3ij.

Sumatur in fero lactis.



Si æger à medicamentorum assumptione non abhorreat, potest præscribi Apozema laxans, semel vel bis quotidie sumendum ad ℥iij. iv. vel v.

℞. Rad. Polypod. qu. ℥j.

Fol. fumar. m. iij.

Taraxaci cum toto. m. j.

Tartar. Rhenan. alb. ℥jss.

Coq. f. a. ex aq. pura sub finem decoct. Add.

Fol. Senn. mund. ℥ss.

Rhei elect.

Rad. Hellebor. nigri. aa ℥jss.

Colat. ℥xx. Add.

Syr. Rosar. solut. cum senna. ℥jss.

M.

Pilulæ à Rolfincio præscriptæ etiam in usum vocari possunt.

℞. M. P. Tartar. Quercetan. ℥j.

Extract. Hellebor. nigri. ℥ss.

Cum Syr. de fumar.

F. f. a. Pilulæ.

Electuarium nostrum panchymagogum hic quoque utile.

Si æger Enemata admittere velit, ea non contemnendi usus, quemadmodum ego illud aliquando observavi. Contingit enim nonnumquam fæces in recto intestino induratas, operationem medicamentorum, per os exhibitorum, impedire. In tali casu rectissimè præscribitur hoc vel simile enema:

℞. Herb. Fumar. m. ij.

Sonchi

Violar. aa m. j.

Rad. Althea. ℥ss.

Coq. f. a. ex aq. pura colat. ℥bj. Add.

Confert. Hamech. ℥ij.

Mellis Mercurialis. ℥j.

Sal. com. ℥j.

M. F. Enema.

Sequens formula est Rolfincii,

℞. Herb. Malva, Alb. Mercur. Violar. Beton. aa. m. j.

Rad. Althea. ℥ss.



Concisa, contusa Coq. in f. q. aq. ad medietat.  
Colat. ℞. ℥jss.

Ol. *Violar.* ℥iiij. *Hieræ simpl.* ℥jss.

F. Enema.

Quamvis ratio mihi non satisfaciat, placet tamen monitum *Walsmidii*: *Purgantia oportet esse fortiora, alias vix saburram acidam commovebunt. Hinc & emetica magnæ sunt efficaciæ. Non tantum Walsmidius commendat emetica, sed & Hartmannus, Aquam benedictam. Willisius* annotavit, agyras in hoc casu *Sibii* dosin largiorem, etsi temerè & periculose, non rarò tamen cum successe exhibere. Præscribit quoque.

℞. *Sulphur. Antimon. gr. viij. ad gr. x.*

*Cremor. Tartar.* ℥ss.

M. simul terendo: F. Pulvis  
detur in cochleari panatellæ.

Quomodo  
mens ab ob-  
jectis furo-  
rem excitantibus abdu-  
cenda sit?

Dixi in indicationibus generalibus, mentem ab objectis furorem excitantibus avertendam esse. Hoc in tali affectu rationibus perfici non potest, quandoquidem vestigia illa recentia adeo profundè cerebro sunt impressa, ut facile immutari nequeant, itaque illud peragatur dolorem & molestiam creando talem, quæ mentis attentionem eò convertat. Fit illud triplici modo, vel medicamentis pharmaceuticis, vel instrumentis chirurgicis, vel verberibus, aut simili castigationis genere, prudenter in usum vocatis.

Pharmaceu-  
ticis.

Instrumenta pharmaceutica sunt vel Emetica, vel purgantia fortiora, quæ ideo repeti debent, ut, anxietatum & doloris ratione, æger se ipsum respicere incipiat. Inter synonyma, sive appellationes *Maniæ* est quoque *ἑκστασις*; sunt enim maniaci veluti ecstatici, se ipsos negligunt, ut ad se redeant effici debet. Dolor mentem eò potenter convertit, Hæc fortè est ratio quare dysenteriam furori salutiferam pronunciaverit *Hippocrates. Aph. 5. sect. v. 11.* Ego tamen nemini auctor sim purgationes aut tam potentes, aut tam diu exhibere, ut inde sequatur dysenteria, sufficit ut repetantur, nec tormina ventris metuantur. Sed de hisce medicamentis eorumque formulis jam actum est.

Chirurgicis.

Inter medicamenta chirurgica præter V. S. sunt cucurbitulæ



læ scarificatæ , veficatoria diversis locis applicata , & forte etiam cauteria.

Cucurbitulæ evacuant fanguinem V. S. vicariæ sunt. Verum cum de V. S. agerem , datâ operâ nullam cucurbitularum feci mentionem , quandoquidem hic locus postulare videbatur , ut de iis agerem , quatenus , dolorem excitando , mentem & spiritus animales à furore aliquomodo avocant. Itaque si V. S. tanta sanguinis quantitas non sit educta , quin adhuc cucurbitulis detur locus , illæ tum ad evacuationem sanguinis , tum ad dolorem excitandum , in usum vocari possunt. Locus varius eligi potest , scapulæ , dorsum , nates , crura , suræ &c. Applicatio renovetur aliquoties , & fricando excitetur dolor.

Cucurbitulis.

Veficatoria cum non tantum lympham evacuando aliquomodo spiritibus pabulum subtrahant , sed & dolorem insignem excitent , hic etiam cum successu in usum vocari possunt. Applicantur nuchæ , cruribus &c.

Veficatoriis.

Dixi forte etiam cauteria profutura , quandoquidem illud mihi videor probabili ratione colligere , ex iis , quæ de natura maniae disputavi , tum etiam ex iis , quæ in praxi occurrunt. Cauteria non tantum in omnibus , sed & in affectibus capitis Epilepsia , Lethargo præscribuntur , quid ni etiam in Mania ? Videri potest *Fienus* & *Mollenbrocchius*. Nolim tamen audacter præscribere , quandoquidem experimentum tuto capiendi hætenus occasio mihi defuit. Nolim etiam occipitio applicari , sed brachiis aut cruribus , eo loci ubi fonticuli inuri solent. Hujus rei hæc est ratio , quoniam motus humorum sponte ad caput nimio impetu vergit , spiritus , ope doloris , alio abducendi , deinde , quoniam velim maniacum videre cauterium ejusque applicationem , ut & metu & dolore ad se redeat. Consentientem mecum habeo *Willisium* cauteria actualia & potentialia laudantem.

Cauteriis.

Ultimum locum dedi verberibus , vel simili castigationis generi , non tantum quandoquidem illi , qui maniacos ordinariè tractant , hoc modo eos coercere dicantur , sed & quod mihi ipsi hujus durioris tractationis insignis utilitas luce meridiana clarius apparuerit. Vocatus eram ad virum tri-

Verberibus.



ginta circiter annorum, qui à potu, vehementibus animi pathematibus & vigiliis, inciderat in maniam. Insigniter ferociebat, & quamvis ipsi esset res angusta domi, tamen omnia perfringebat, armarium & supellectilem optimam frangens. Ego remediis pharmaceuticis & chirurgicis ejus sanationi incumbo. Inter eos, qui ipsum custodiebant, viros, unus ferocior, cum parum se proficere moderatione videret, ægrotum durius tractare cepit, felicissime; nam hoc pacto brevi fuit restituta mens. Hac experientia fretus, non dubitavi etiam cauteriorum facere mentionem in superioribus. Quod si attentè hac de re cogitemus, facile patebit, nos plerumque deteriores fieri licentiâ. Nihil magis infantes, pueros & adollescentes enervat & corrumpit, quam si id quod libet liceat, si eorum audax petulantia risu & osculo excipiat. Ideoque prudentissimum sapientissimi regis est monitum, eum *qui virga parcat filium odisse*. Similis aliquomodo maniacorum est ratio: sana mens, ratiocinatio justa languent & corruptæ sunt, passionnes vigent: itaque sentiant sibi omnia non licere impunè. Hujus Urbis ergasterio rectissimè inscriptum est: *Virtutis est domare, quæ cuncti pavent*.

De cordis &  
cerebri ro-  
boratione.

Præcipiunt auctores, in hoc & similibus cerebri affectibus, cor & cerebrum esse roborandum, ut mihi quidem videtur, ineptissimè. Præterquam enim quod cor & cerebrum roborari non possint, nisi alimentorum aut medicamentorum ope sanguinem & spiritum roborantium: cur cordi & cerebro, nulla labe contaminatis, frustra medicinam facias? Dico cor & cerebrum nulla labe esse contaminata, intelligo autem debilitatis labem, quæ confortationem indicet: nam quantum ad vestigia confusa & profunda cerebro impressa à pressione & agitationis impetu, ea medicamentis & instrumentis aliis corrigi non possunt, quam antedictis & postmodum adhuc subjiciendis. Illa autem medicamenta non respiciunt cor & cerebrum, nisi quatenus eorum motum impetuosum & perversum corrigunt. Quid? quod cordis & cerebri vigor in eo consistat, illius quidem, ut sanguinem validè propellat & premat, hujus autem ut spiritus vividos multumque agiles generet ac propellat? Jam autem tantum abest, ut cordis efficacia augeri debeat,

at,



at, ut ea potius omni molimine V. S. purgantibus, emeticis debilitanda sit & frangenda. Tantum abest, ut spiritus magis agitari debeant, ut ii potius coercendi sint & sopiendi. Ergo tantum abest, ut cor & cerebrum debeant roborari, ut potius omnino sint enervanda, uti in superioribus vidimus. Dixi spiritus esse mitigandos, &, ut mihi videor, non paulo melius atque rectius.

Mitigantur spiritus medicamentis bilem temperantibus. Quamvis enim bilis peccantis vix meminerim in explicatione, nihil tamen impedit horum medicamentorum in curatione facere mentionem. Non est in cortice hærendum, res ipsa penitus inspicienda & examinanda est. Talia medicamenta operationem suam non exercent, pro nomenclaturæ ratione, quam auctoribus illis imponere placuit, sed pro viribus & facultatibus, ipsis à naturâ tributis. Impediunt medicamenta hæc æstum & orgasmum sanguinis, id quod in affectu, quem tractamus, maximè necessarium est. Ego præ cæteris hoc in casu laudarem *Plantaginem*, *Portulacam*, *Borraginem*, *Buglossam*, *Lactucam*, *Acetosum*, *Sempervivum*, *Majus*, *Fumariam*, *Hordeum*, *Alicam avenaceam*, *Tamarindos*, *Lapidem prunellæ*, *Spiritum Vitrioli* &c. Quando ex hisce vel in aqua, vel in fero lactis parantur decocta, tum sanguis diluitur, particulæ ejus maximè activæ temperantur, unde tum porro sequitur spirituum minus agitatorum productio.

℞. Rad. *Lapathi acuti*. ℥j.

Herb. *Fumar*. m. iij.

*Portulac*.

*Plantag*.

*Acetos*. aa m. j.

Coq. f. a. ex aq. pura colat. ℥jss. Add.

*Syr. Acetos. Citri*. ℥j.

*Lapid. prunell*. ℥ss.

M.

Simile apozema præscribitur à Sennerto è Rad. *Buglossæ*. *Glyzirriz*. *Ceterach*, *Fumar*, *Endiv. sem.* 4. frig. maj. *Tamarind. Fl. Cordialibus*. Verum nimis magna (meo quidem judicio) additur Syruporum quantitas.

De Spirituum mitigatione.

Ab



Ab hisce formulis non multum abludit expressio *Willisii*.

℞. *Summit. Borrag. Bugloss. recent & tenerior.*  
*aa. m. iv. Poma curtipendula iij. sal. prunel. Zij.*  
*Sacchar. ʒß. Simul contusis affunde aq.*  
*fontan. ℥iij. Expressio. capiat ℥ß. ter in*  
*die vel sæpius.*

Nec prætereundus est ejusdem pulvis sequens.

℞. *Crystell. mineral. seu Nitri optimi*  
*purificati Zij. margarit. ppt. Zij.*  
*Sacchar. cand. ʒijß. Camphoræ ʒß.*

Simul omnia terantur in pulverem subtilissimum.  
 Hujus zij. ponantur in lagena vitrea ℥ij. capaci  
 cum aq. fontis aut cerevisia tenuissimâ clarâ ac miti  
 pro potu ordinario, quæ ad libitum concedatur.

*Serum lactis* effervescens quoque affunditur *Flor. Violar. aut*  
*Nymphaeæ*, & post infusionem per duas horas copiosè propi-  
 natur. Laudatur quoque *serum lactis caprini*.

*Acidulae* etiam ubertim epotæ conveniunt optimè in hoc af-  
 fectu.

Inter specifica commendatur *Decoctum Anagallidis fl. purpu-*  
*reo*, aut etiam *summit. Hyperic. à Mynsichto, Tinctura antimonii,*  
*& Hyperici composita.* Præscribuntur etiam aliqua ab auctoribus  
 tanquam specifica, quæ ego fateor me non esse expertum,  
 nec facile in usum vocaturum, probe gnarum, quam rarò ta-  
 lia respondere soleant promissis; illud tamen novi, si æger  
 omnis generis medicamenta respuat, illum posse aliquomodo  
 in viam reduci, exhibendo *caninum cerebrum* coctum & in sarta-  
 gine frixum. Hujus efficaciam mihi aliquando videre licuit.  
 Prodest quoque *Saccharum Saturni.* *Grulungius* se *Liquore Lunæ*  
 multum profecisse affirmat. *Cent. vi. obs. 8.* Vid. quoque *Theo-*  
*dor. majern. l. i. c. 7.*

Spirituum  
 motum  
 compescentia.

Quemadmodum autem sanguinis detractio primario sangui-  
 nem respicit, secundario spiritus animales ferocientes, ab eo-  
 dem, continuâ secretionem, emanantes, ita ad manum sunt  
 medicamenta spirituum motum nimium compescentia, hypno-  
 tica dicta. Hæc in usum velle vocare antequam sanguis suffi-  
 cienter sit detractus, sæpenumero admodum noxium. Turcæ  
 Opio



*Opio* utuntur ut tanto animosius praelium committant. Post celebratam V. S. in usum vocata sese spiritibus admiscunt, depressionem exterioris & corticalis cerebri partis adjuvant, atque ita somnum alliciunt. Profunt in Mania *Emulsiones* è feminibus frigidis & papaveris albi, cum *Syrupo* *Diacodii* &c.

℞. Sem. Cucum. Melon.

Papav. alb. aa ʒss.

Cum aq. decoct. Hord. F. f. a. Emulsio ad ʒxxx. Add.

Syr. Diacod. ʒvj.

Aq. Cinnamom. ʒj.

M.

Inter interna non tantum laudat, sed & omnibus aliis medicamentis emulsiones præferri dixit *Walsmidius*. *Timeus* præscripsit hoc modo:

℞. Sem. Papav. alb. ʒss.

4. Frigid. maj. excort. aa ʒj.

Aq. Nymphaea, Rosar.

Hypnot. nostr. aa ʒj.

F. f. a. Emulsio Add.

Margant. ppt. ʒj.

Spir. Rosar. gt. vij.

M.

Talia medicamenta nimiam sanguinis & spirituum agitationem, nec non spirituum animalium versus cor, pulmonem, diaphragma & reliqua viscera influxum turbulentum, sanguinis reciprocam versus cerebrum propulsionem violentam compescunt, somnum alliciunt, adeoque maniae contraria sunt.

Quod si vigiliæ sint pertinaciores, licet Emulsionibus hisce Laudani granum unum, duo, plura, si modo vires id ferant, addere. Refert *Gregor. Horstius* exempla Maniacorum in quibus *Laudanum* sive *perlatum* sive aliud ad gr. v. exhibitum eximiae fuit utilitatis. *Timeus* laudat opiata suæ hypnoticæ usum. *Dolens* ad somnum conciliandum præscripsit

℞. Laudan. Opiat. gr. ij.

Dissolv. in f. q. Essent. Anagallid.

& Hyperic. edulcoretur parum, pro j. dosi.

Aa

Gru-



*Grulingius*, cujus statim feci mentionem, post sectam venam frontis cum Saphænâ, & purgationem præmissam è *Fol. sennæ* pulvere cum *corrigentibus*, has præscripsit pilulas.

℞. *Land. op. gr.* viij.

F. Pilulæ. pro tribus dosibus.

Insignis usus, quem affert somnus in affectibus maniacis, non fuit incognitus Poetis, & priscorum seculorum viris perspicacioribus. *Euripedes Orestem* à somno refocillatum ita loquentem introducit. ψf. 211.

ὦ φίλον ὕπνῃ θέλγητρον, ἐπίκρονον νόσῃ.  
ὥς ἡδύ μοι προσῆλθεσ ἐν δέον τί γε  
ὦ πότνια λήθῃ τῇ κακῶν ὥς εἴ σοφῇ,  
καὶ τοῖσι δυσυχῶσιν εὐκταία θεός.  
πόθεν ποτὶ ἦλθον δεῦρο; πῶς δ' ἀφικόμην;  
ἀμνημονῶ γὰρ τῇ πρὶν ἀποληφθεῖς φρενῶν.

Inter externa commendatur *succus sedi majoris* recens expressus, capiti impositus, ut & aqua ejus. Commendatur quoque *Nitrum preparatum*, quod cum modico *Camphoræ* in aq. *Nymph.* dissolutum, cum petiis capiti applicatur. Præparatur quoque *Tinctura Santali* rubri cum aq. *Rosar.* in cujus ℥v. dissolvuntur *Camphoræ* gr. ix. Additur etiam *Moschus* ad gr. v. (si nempe ab odore non abhorreat æger) atque calidè capiti raso imponitur. *Grulingius* loco citato hoc habet Epithema,

℞. Aq. *Rosar.*

*Anethi* aa ℥v.

*Opii Thebaici succo*

*Citri correcti.* 3ß.

*Croci.* 3ß.

Misce bene & F. Epithema.

Vide quoque *Cent. vii. obs. 39.* & *Mynsichti Armamentar. p. 371. & seq.* Utilis est hic sacculus,

℞. *Sem. Cannabis* ℥iv.

*Coriandr. Milii* aa 3ß.

*Herb. fragar.*

*Betonic.* aa 3ij. Sacculo insuta

Co-



Coquantur in cerevisia & capiti applicentur. Plura vide apud *Sennertum* hoc capite. *Hoeferus* in *Hercule Medico* laudat *Balneum aqua dulcis*. *Goclenius* conf. 42. *Flor. Nenuphar. Bugloss. Violar. Capita Vervecis & Papaveris albi* &c. decoquit in aqua, pro *Balneo*. Commendat quoque *pulmonem arietis* calentem capiti applicatum.

Quod si medicamenta hypnotica sperato careant successu, probabiliter conjicitur, aut V. S. non esse sufficienter institutam, aut purgantia debere iterum repeti. Si purgantibus parum proficiatur, & nihil impediat, propinari potest vomitorium. Vomitoria crebro repeti vult *Willisus*, & præscribit *Mercurium vitæ*, ego malim, nec ab ipso neglectum, *Tartarum Emeticum*.

℞. *Tartar. Emetic.* gr. viij.  
S. Pulvis.

Commendatur quoque *Tartarus Emeticus* in Mania ab *Hadrano à Mynsigt*, qui cautiones circa hujus & aliorum vomitoriorum usum præscribit in *Armamentario Med-Chymico* p. 15. Vide quoque *Fredericum Dekkers*, Professore Lugdunensem in *Exercitationibus medicis* c. 4.

Vomitoria spiritus ferocientes versus viscera inferioris ventris copiosè alliciunt, repetita, ægrum debilitant. Nauseabundi maniacy, & molestâ illâ corporis concussione vexati, non possunt eidem illi objecto, passionem & furorem excitanti, inhærere, sed coguntur ad turbas, in prima regione excitatas, attendere. Quid? quod multi spiritus dissipentur hoc modo, unde languor & ferocia minor? Hæc ideo annotâsse operæ pretium fuit, ut pateat, non tantum evacuationem in hoc casu spectandam esse, sed efficaciam longè potiore, quæ principem sibi locum in curatione vendicat.

Subjungemus paucis diætam. Aër sit purus & temperatus, sed lumen omnino arceatur, ne spiritus à luminis radiis magis agitentur & somnus abigatur. Æger funibus & loris constringatur, ne sibi aut aliis vim inferat. Probè curandum, ut è cubiculo removeantur omnia nocendi instrumenta, gladius, culter, malleus &c. Ægroto ministrent vir robustus unus atque alter, cætera salutantium, invisentium, amicorum

Diætâ.  
Aër.



turba vitetur, nisi fortè aliquando admittatur aliquis, cujus auctoritas ægrotum possit coërcere. Ministri sint prudentes, qui & ægroto gratificari, non tamen perversis ipsius studiis annuere sciant. Si minæ, increpatio aspera, verbera videantur futura ex usu, nec ea omittantur.

Cibus &  
potus.

Cibus sit facilis concoctionis, juscula herbis refrigerantibus *lactuca*, *acetosa*, *endivia*, temperata. Vinum, imprimis generosum, aut fulmine congelatum vitetur. Vid. *Hoeseri Herculem medicum*. Vitentur quoque aromata, *piper*, *caryophylli* &c. *Julius Caesar Claudinus* dulcia, tanquam pestem, damnat: vult autem esculentis admisceri diuretica. Vid. l. III. c. 6. In potu laudat *Dolaus acidulas Donningsteinenses*, & *decoctum hirundinum* cum *lapide prunellæ*, suâ experientiâ comprobatum.

Somnum &  
vigilia.

Somnus omni ratione, sed prudenter, promoveatur, arceantur pro viribus vigiliæ continuatæ.

Motus &  
quies.

Eadem motus & quietis est ratio, illum lora & claustrum impediunt, hanc furor omninò flagitat.

Excreta &  
retenta.

Alvus sit laxa, omnis generis excretiones promoveantur, imprimis necessariae & consuetæ.

Animi pathemata.

Cum ab animi pathematibus hic affectus originem ducat, illa omnibus modis sedanda sunt. Moderatis passionibus aliquid concedendum, effrænes omnino coercendæ sunt. Quemadmodum autem parentes prudentes in educatione liberorum ad eorundem ingenium respicere solent, & attendere, an indulgentia, an severitate magis proficiant, ita etiam in Maniacorum tractatione agendum est. Pro indolis varietate, vel liberalius vel etiam durius sunt habendi. Vidi ego maniacum qui solutus vinculis dormiebat quietè, cum antea vigilasset & fuisset garrulus.

## C A P U T S E P T I M U M.

*De Soporosis affectibus in genere: & in specie, de Comate, & Caro.*

Confusa tractatio sopororum affectuum.

**A**Liquamdiu anceps hæsi, an me conjicerem in hæc angustias, ut de soporosis affectibus omnibus, non ex præjudicio, sed ex rei veritate, tractarem: an vero Lethargi tra-



tractatione, tanquam generali, absolutâ, de reliquis cuique suum permitterem iudicium. Dubitationis erat ratio, quod non temerè à receptis morborum appellationibus & determinationibus recedendum esse putarem; si enim ea, quæ hæcenus observata & tradita sunt, rejiciamus, si ab ipsis fundamentis destruamus Medicinam, metus est, ne, hordeo & tritico relictis, stramen colligamus & paleas. In horum autem affectuum tractatione, si auctores cum auctoribus, ac si eorum sententiam cum experienciâ comparemus, tantam inveniemus confusionem & obscuritatem, ut, quid de hisce affectibus sit statuendum, planè relinquatur dubium & incertum. Tandem potior sententia visa est, nec hanc praxeos partem relinquere intactam. Tanta autem usus sum moderatione, ut vocabulorum eam amplecterer significationem, quæ etiam ex *Hippocrate*, si necessitas id exigeret, quodammodo probari posset. Cunctis ergo veræ praxeos amatoribus me rem non ingratham præstiturum arbitratus sum ego, si omnibus ritè perpensis, glaciem frangere conarer in re arduâ, & hosce affectus, ex iis quæ in praxi occurrunt, accuratius determinarem. Tentavit idem hoc ante me *Franciscus de le Boc Sylvius*, & in re intricata se extricare conatus est; quamvis autem ex experienciâ se affectus determinaturum promittat, videtur tamen mihi experienciæ minus, auctoribus practicis nimium tribuisse, adeo ut nec in ejus sententia acquiescere potuerim. Quod si veritatem hac in parte etiam assequi liceat, gratulabor mihi; quod si à scopo aberravero, veniam peto, & ut alii me in viam reducant, rogo.

Quemadmodum in Botanices studio multi relinquuntur scrupuli, quia sæpe ignoratur, quid auctores veteres harum vel illarum herbarum nomine (& similis est fruticum ratio) intellexerint, quia in illorum libris accuratæ descriptiones & notæ characteristicæ desiderantur, ita idem illud obtinet in *Hippocratis* scriptis ubi de *Typhomania*, *Aphonia*, *Caroticis affectibus* sermonem instituit. Nec mihi, ejus aphoristicas determinationes consideranti, dubium est, quin sæpius diversis nominibus, tanquam synonymis, ad unam eandemque affectionem significandam promiscuè fuerit usus. Itaque non est mi-

Vocabula apud Hippocratem ambigua.



rum recentiores, five antiquorum placitis adhærescant, five ab iis recedant, non unam amplexos esse sententiam. Ut de Aphoniâ solâ mentionem faciam, manifestum est *Hochstetterum* pluribus casibus satis diversis, hanc appellationem tribuere. *Vid. Decad. IV. obs. 1, 2, 4. &c.*

Tractationis  
ordo.

Antequam ergo veriore sententiam de hisce affectibus proponam, operæ pretium est demonstrare, ea, quæ tum veteres tum recentiores de hisce morbis scripserunt, non esse satis expedita: adjiciam, hanc difficultatem quosdam movisse, ut de hisce symptomatibus simul agerent: denique conabor erroris & confusionis fontes detegere. Ita evadet manifestum me coactum fuisse in id incumbere, ut veriora & certiora eruere.

Obscuritas  
Veterum.

Ea quæ de hisce affectibus apud veteres exstant non esse satis clara ob ambiguitatem vocabulorum patent *Galeni* testimonio. Is explicaturus *Hippocratis* textum l. 11. Prædictionum τὸ κατὰ δὲ ἀρά γε πανταχῶς κακόν. Subjungit. ἀπορίαν ἡμῖν ἡ ῥῆσις κινεῖ, διὰ τὸ μὴ σαφῶς εἰρησθαι τὸ σημαίνονμενον ἐκ τῶς κάρου φωνῆς. Postmodum plures rationes dubitandi subjicit, & suo modo explicaturus somnum è pituita originem ducentem, ait: ὅταν δ' ὑπὸ φλέγματι ὁ ἐγκέφαλος ὑγρὰνθῇ ἢ ψυχθῇ, τὸ κατὰ τὰς ληθαργικὰς διαθέσεις ἐσι κῶμα, ἢ καλεῖν ἔξεσι τῷ βελομένῳ ἢ τῷ κάρου. Hunc locum citat *Hercules Saxonia* l. 1. c. 5. & tractationem Cari atque Lethargi, imo omnium affectuum soporosorum se posse conjungere autumat. A *Saxonia* non multum differt *Forestus* l. x. obs. 24. & *Vidus Vidius de Curat. membr. l. 11. c. 12.* Quod si autem *Galeno* difficile fuerit accuratè determinare vocabula, quibus *Hippocrates* fuit usus, cum tamen Græca lingua ipsi esset vernacula, nec ille ab *Hippocratis* ævo tam longè remotus: non est mirum, si nobis id videatur longè difficilior, tum ob linguam minus familiarem, tum ob stylum concisum & aphoristicum.

Pauli Ægine-  
tæ obscu-  
ritas.

*Paulus Ægineta* non malè vigilias & Cataphoram inter symptomata febrium enumerat l. 11. c. 41. & 42. Verum ubi l. 111. c. 10. signa proponit Catochi five Comatis vigilis, tot & tanta congerit, ut ego libentissime fatear, me illa cum morbo, de quo agit, nequaquam posse conciliare. Capite sequenti a-

git



git de memoriæ & ratiocinationis abolitione, ut & Caro & morosi. Hos affectus deducit ab intemperie, quæ si humida tantum sit, infert læsionem memoriæ & ratiocinii, torporem & Cataphoram, nec non somnos longos ac profundos. Si vero humiditati jungatur siccitas, tum producuntur Cari & Lethargi. Similiter si siccitas sola adfuerit, vigilias inducit, si vero huic jungatur calor, tum producuntur deliria & Phrenitides. Postea subjungit, has intemperies aliquando locum habere in humoribus, aliquando in cerebri ventriculis, vel in ipsius vasis, vel in dispersa humiditate, vel is ipsius cerebri corpore. Hæc si quis attentè consideret, is facile videbit distinctionem horum affectuum, non è praxi esse petitam, sed è præjudicio, è diversitate temperamentorum fictitiorum, adeoque explicationem accuratam ex hoc auctore hauriri non posse.

*Hollerius* Typhomaniam explicaturus dicit esse quoddam genus delirii inter Phrenitidem & Lethargum è bile & pituita: in qua affectione si superat bilis, coma peculiariter appellari: si pituita Catochon. Verum rectè mihi videtur sensisse *Nicolaus Chesneau*, qui observatione 3. l. 1. hæc habet verba. *Ego vero nullam talem esse Catophoram vigilantem existimo, nec ullius generis soporem, qui ex humorum simul mixtorum contrarietate gignatur. Si enim calidus humor misceatur cum frigido; qualitas unius infringet qualitatem alterius, sicut acris à non acri retunditur, ex eorum mixtione, nec caloris effectus & acrimonia, quæ vigilias inferre dicuntur, nec frigoris, quod una ex causis somni creditur, exurget; sed quid tertium neque frigidum neque calidum, & acre, ut somnum morbosum aut vigilias inducere possunt &c.*

Antequam ulterius progrediar, quemadmodum statim vidimus demorborum causis non convenire inter medicos, ita operæ pretium est animadvertere non semel contigisse, de eodem casu admodum discrepantes eorundem fuisse sententias, imo eundem scriptorem aliquando à se ipso dissentire. *Henricus ab Heers*, refert sese & *Oggerum* affectum, qui ab aliis dictus esset Phrenitis, censuisse appellandam Melancholiam, cum tamen Phrenitis & Melancholia non parum à se mutuo distent.

Medicorum  
discrepantes  
sententiæ.



In sequentibus, capite de Catalepsi, videbimus, *Saxoniam* à *Fernelio* dissentire circa observationem ab ipso *Fernelio* propositam. A se ipso dissentit *Feyneus*; cum enim in principio c. 10. l. 11. dixisset, Carum febrem non habere comitem postmodum tamen subjungit: Quod si post longas febres hujusmodi torpor corpori accesserit, cætera eadem servanda sunt, indicans Carum febribus supervenire, id quod cum mea & *Galen*i sententia non malè convenit, uti postmodum explicabo. Idem, cum in principio paragraphi V. S. in Caro rejecisset, postmodum in fine tamen subjungit. *At promptior is somnus, quem multus humensque sanguinis vapor in synocho induxit, V. S. scarificatu humerorum & infixis cucurbitulis & aliis supradictis quam mox discutitur.*

Variorum  
auctorum  
sententiæ.

Verum in specie videamus quam confusa sint ea quæ de affectibus soporosis habent auctores. *Hercules Saxonia* prælectionum practicarum p. 1. c. 7. Carum dicit totius corporis insensibilitatem & immobilitatem. Postea c. 11. Apoplexiam è *Galen*o dicit Paralyfin totius corporis cum abolitione principum facultatum. Deinde ex *Aëtio* & *Paulo* hunc morbum explicans intelligit sublatum sensum & motum totius corporis. Aut ego nihil intelligo, aut ubi est totius corporis insensibilitas, ibi est sublatum sensum, ubi est immobilitas, ibi est sublatum motum totius corporis: erit ergo Carus & Apoplexia unus idemque morbus. Antea c. 8. Lethargi differentias ita explicat, ut complectatur Coma somniferum, deinde Lethargum propriè dictum cui annectitur Coma, denique ut complectatur Carum non Coma. *Capivaccius* l. 1. c. 8. Carum exquisitum distinguit à Comate, nothum eundem cum Comate facit. *Pulverinus* de Caro ferè eadem habet quæ *Saxonia*. Signa explicaturus, ait, tantam esse in illis, qui Caro laborant sensuum stupiditatem, ut si respirationem non haberent conspicuam, vel apoplecticos vel mortuos eos existimares. Cum autem in Apoplexiâ respiratio non semper tollatur, qua ratione Carum ab Apoplexia distinguas? Lethargum deducit ab inflammata in cerebro pituita. Ut distinguat Phrenitidem à Lethargo & Catalepsi recurrit ad causas sc. frigiditatem, humiditatem. Si hisce causis quispiam non assentiatur, si neget pituitam in cerebro inflammari, differentia illæ corruunt. *Sennertus* saltem



liberè pronunciavit : *impossibile esse credo, ut ex eadem pituita putrescente in cerebro & febris & sopor excitetur. l. i. p. 11. c. 20.* Dodoneus κατὰ φωνὰν Græcos appellasse somnum qui febribus supervenit, atque de eo agit inter symptomata febrium. Postmodum de Caro sive Subeth tractat inter symptomata capitis, & dicit eum esse soporem profundum, cum sensuum & motus cessione, permanente respiratione absque febre : confundens Carum cum Apoplexiâ, uti è superioribus patet. In eo tamen mecum convenit quod soporem gravem, in febribus contingentem, distinguendum putet ab eo, qui absque febre invadit. *Sebastianus Egbertus* in Scholiis, Carum dicit Coma somnolentum, Catochon vigilantem. *Dodoneus* c. 10. Catochon à nonnullis Catalepsin dici monet. *Forestus* l. x. observ. 8. diversas de Lethargo tradit opiniones. Idem annotat, Carum aliquando esse absque febre, aliquando febrem subsequi l. x. obs. 9. *Timæus* casu ix refert discrepantes sententias de affectu proposito, quem ipse Carum appellavit, manifesto argumento non admodum expeditam esse horum morborum distinctionem. *Walsmidius* in notis ostendit, se Carum à Comate non satis distinxisse. *E Dolei* descriptione patet ipsum Carum vel numquam vidisse, vel confusâ auctorum descriptione fuisse delusum. *Willisus* Coma, Lethargum, Carum tanquam affectiones gradibus differentes enumerat, & causas hypothesi suæ convenientes excogitat, cujus vestigiis omnino insistit *Walsmidius* in notis ad praxin Barbettianam. *Platerus* insignis practicus, capite de Mentis consternatione, rectè animadvertit, Carum febrem nonnunquam subsequi, illiusque esse symptoma, ego illud semper locum habere existimo. Idem *Hippocratis* Typhomaniâ statuit esse Coma vigil. Longum esset & tædiosum omnes omnium auctorum enumerare sententias, videri possunt præter citatos *Petrus Salius* in annotationibus ad *Donatum ab Altomari*, & *Schneiderus* de morbis capitis.

Confusionem hanc non tantum viderunt auctores practici, sed & de eâdem sunt conquesti. Memorabile est imprimis *Hol-*  
*lerii* testimonium in scholiis ad c. 8. l. 1. Hæc sunt ejus verba. *Lethargus, Caros, Arabibus Subeth, Catoche, Cataphora, Coma, affectiones sunt somniculose, ob idque inter morbos, aut mor-*

Practicorum  
 quarela de  
 confusione  
 circa affectus  
 soporosis.



borum symptomata numerantur. Sed neque de nominum distinctione, neque de causis satis constat inter auctores. Rondeletius hæc habet notatu digna in annotationibus ad c. 20. Affectiones omnes soporiferas Coma, Carum, Cataphoram Arabes nomine subeth comprehenderunt. De horum significatione multa & apud Galenum & alios dissensio, ut quibus Cataphora & Caros modo pro eodem, modo pro diversis affectibus usurpentur. Vide quoque Sylvium Praxeos Medicæ l. II. c. 25. §. 13.

Quidam  
conjunctum  
de hisce  
agerunt.

Hæc difficultates evitaturi quidam è recentioribus, de affectionibus soporosis in genere agunt, exempli loco sit Hartmannus in Praxi Chymiatrica. Idem imitatus est Riverius; verum ipse singula descripsit symptomata. Iisdem vestigiis insistens Paulus Barbette non tantum de Paralyfi, Caro, Comate vigili & somnolento, Catalepsi, Incubo, Lethargo &c. Opistotono, Emprostotono, Tetano conjunctim agit, verum etiam liberè ad hunc modum suam explicuit mentem l. I. c. 3. Hisce de affectibus non est quod multa dicam; neque enim essentialiter, sed gradibus saltem differunt. Hoc ut Lector, rerum non verborum amans, melius concipiat, has illi meas communico observationes. Mater D. Vincent. brachium dextrum impotens movere periculose decumbebat, ergo erat paralytica: interdum dormiebat profunde, ergo laborabat comate somnolento carove: interdum vigilabat, ergo debuit tum ejus morbus Coma vigil nominari: interdum stertebat nullamque edebat vocem, quicquid vociferarentur adstantes, ergo erat apoplectica: febricitabat continuo, ergo aderat Lethargus. Quorsum ergo nunc entium noxia multiplicatio? Quantum sapimus verba dando!

Brevis recapitulatio, & transitio.

Putem me abunde demonstrasse, ea, quæ veteres & recentiores de hisce morbis scripserunt, esse admodum intricata; ostendi etiam, hinc quosdam conquestos esse de confusione, quosdam, ut hanc evitarent, conjunctim de hisce affectibus egisse: detegendi sunt jam errorum fontes.

Fontes errorum.

Fontes hosce facile detegemus, si in mentem revocemus vocabula, quibus Græci morbos exprimunt, vel morbum significare propriâ vi, vel gaudere significatione generali, & per Synechdochen tantum morbis quibusdam applicari. Prioris



ris, generis sunt πυρετός, ἑξ, ἀφθαλ, ἀρθρίτις, πλευρίτις, κεφαλαλγία &c. Posterioris generis sunt ἀνδραξ, ἐκλυσις. Prioris generis vocabula sese ipsas aliquomodo determinant, posterioris autem nisi accuratè determinentur facilè confusionem pariunt: præsertim si Scriptores nunc hoc, nunc illo vocabulo promiscuè utantur, ad eundem affectum indigitandum, vel eodem vocabulo utantur ad diversos affectus significandos. Posterioris hujus generis sunt pleræque morborum sopororum appellationes, ut κῶμα, κάρθ, κάτοχθ, κατοχή, ἀφωνία, καταφορά. κῶμα enim juxta *Etymologicum*, ἀπὸ τῶ κοιμῶ quasi κοίμημα, significat ὕπνον, ἢ ληθώδη καταφοράν. κάρθ apud *Platonem* significat somnum profundum ex ebrietate, in *symposíaco*: & hunc *Galenus* distinguit à Caro morbofo. Videri potest ejusdem commentarius in Aphorismum supra citatum. κάρθ *Suida* est ἡ ἐξ οἰνοποσίας ἐγγινόμενη μέθη ἢ παραφορά. Habere autem significationem generalem patet, quia δύναμις καρωτική tribuitur medicamentis à *Dioscoride*. Hæc facultas non significat vim producendi morbi illius, qui Cari nomine venit; sed gaudere vi soporem, hoc est, somnum profundum excitandi. Pollent eâdem virtute opiata: effectus autem pro varia dosi, pro diverso ægrorum, quibus exhibetur, statu vario, debet alio nomine significari nempe vel Comatis, vel Cari, vel Lethargi, vel Apoplexiæ. A Caro denominantur etiam arteriæ Carotides, optima sanè ratione, quia revera cerebrum premunt, & somnum naturalem producunt, uti patet ex iis, quæ de *oeconomia humana* antea disputavi. Cari & Comatis vocabula esse fere synonyma, & non tantum hisce morbis, quibus ordinariè significandis ea adhibemus, sed & Lypothymix & Vertigini posse applicari, ex *Apollonii* loco evadit manifestum. l. i i. 203.

Κάρθ δέ μιν ἀμφικάλυψεν  
Πορφύρεθ, γαῖαν ᾗ περίξ ἐδόκησε φέρεσθαι  
Νείοθεν ἀβληχρῶ δ' ἐπὶ κώματι κέκλιτ' ἀναυδθ.

Ubi Scholiastes: κάρθ ᾗ αὐτὸν κατέσχευεν τετάρτην σκότωσις. τὴν ᾗ γῆν διὰ τὴν σποτοδινίαν ὥσθι φέρεσθαι. ὥσει εἶπεν ὅτι ὥσθι τὴν γῆν



γῆν ἐπικεῖσθαι ἑαυτῷ. -- ὁ δὲ ἢ νῆς ὑπὸ τῇ λεπτῇ ἐκείνῃ διατὴν σκό-  
 τωσιν καταφορᾶς ἐκείτο ἄφρωνος. Κώματι δὲ ὕπνῳ, ἐκλύσει, καὶ  
 ἔστι κατὰ συγκοπὴν ἀπὸ τῆς κοίμησης. Haecenus vetus Scholia-  
 stes. κατόχος & κατοχῆς vocabula esse generalia, significatio  
 verbi κατέχω demonstrat. Eadem est reliquorum ratio. Vide  
*Dietericum* in Iatreio *Hippocratico* in voce ἄφρων. Copia ergo  
 ambiguarum, generalium & ejusdem fere significationis vo-  
 cum, ambiguitati dedit ansam & confusio. Nempe cum  
 Medici Græci, è vulgi usu hæc vocabula desumpta in Medi-  
 cinam transtulissent, ad morbos congeneres significandos, nec  
 significationem accuratè determinassent, non est mirum si il-  
 lis etiam sæpe promiscuè fuerint usi, unde non potuit non o-  
 riri confusio ingens, præcipuè cum *Hippocratis* vocabula suis  
 applicarent hypothesebus caliditati, frigiditati, humiditati,  
 pituitæ vel putrescenti vel obstruenti meatus cerebri. Non  
 tantum in hisce affectibus magna occurrit ambiguitas apud au-  
 ctiores, sed & in pluribus aliis. Vocabulorum Catharri,  
 Rheumatis, Branchi, Pharyngis, Laringis, Bronchi, Fau-  
 cium, Gulæ &c. varias esse significationes apud *Schneide-*  
*rum* de *Catharris* l. c. 1. 3. videri potest. Hinc concludit c. 7.  
*Studium auctores Græcos legendi dubiam facit de Catharri speciebus*  
*opinionem.* x. l. 1. de Somno &c. c. 4. *Falso de dogmate, non nisi*  
*similia nascuntur.*

Necessitas  
 & utilitas  
 accuratiori  
 tractationis.

Hæc ideo latius esse deducenda credidi, ut constet me co-  
 actum fuisse, ne semper remaneret eadem obscuritas & con-  
 fusio, ex iis quæ in praxi à me sunt observata, morbos, vo-  
 cabulis homonymis obscurè designatos, notis suis characteri-  
 sticis distinguere, & singulis appellationes proprias imponere.  
 Non sunt hic nomina & entia multiplicata sine necessitate,  
 sed si appellationes essent in promptu, distinctius adhuc pos-  
 sent quædam species proprio gaudere nomine. Nec caret hæc  
 distinctio utilitate insigni in praxi: differunt enim non parum  
 Coma vigil à somnolento, Coma somnolentum à Caro, unde  
 aliæ atque aliæ nascuntur indicationes & medendi methodus  
 diversa, uti è sequentibus patebit.

Coma Vigil.

Observamus itaque aliquando ægrotos conqueri de summa  
 capitis molestiâ, non quidem dolore, sed velut interno ardo-  
 re,



re, & motu intestino expansivo, qui ipsos reddit quidem in somnum proclives, & somnum enixe desiderantes, cum tamen non possint, aut non audeant somnum capere. Est hoc plerumque symptoma febrium acutarum, ardentium, malignarum, atque in principio & augmento morbi sese exferit. Differt hic morbus à vigiliis protractis, quod ea molestia percipiatur antequam ægroti diu vigilaverint, & quod vigiliæ protractæ hac molestiâ specificâ careant. Differt etiam à Phrenitide, quod necdum delirent ægroti, quamvis major adsit spirituum agitatio. Plerumque hunc affectum excipit Phrenitis, aut alia graviora cerebri symptomata. Habet tamen cum Phrenitide & vigiliis protractis aliquam affinitatem. Nominino hunc affectum *Coma vigil*.

Hujus rei recentem possum referre observationem. Juvenis xx annorum corripitur Variolis. Ante meum accessum Pharmacopæus exhibuerat medicamenta cardiaca & sudorifera; stragulis, tempore æstivo, oneratur æger, febris ingravescit, advocor ego. Ego quidem statim curo, ut æger magis moderatè habeatur, præscribo medicamenta magis temperata & diætam similem: verum ægrotus imprimis conquerebatur de capitis insigni molestiâ, & velut expansione, quæ somnum excuteret. Cumque ego monerem, ut bono esset animo, ac sese in somnum componeret, præscriberemque emulsionem cum semine papaveris albi, postea retulit se non ausum fuisse capere somnum, nec etiam potuisse dormire. Erecto capite sedere maluit. Talis nempe jam impressus erat sanguini orgasmus, ut etiam blanda non ferret hypnotica; id quod non semel contingit. Varia quidem in usum vocavi medicamenta tam interna quam externa: jussi ut crura imponerentur lacti bubulo recenti, verum omnia incassum: fatis bene quidem apparuerunt & intumuerunt variolæ, verum æger succubuit. Forsan huic V. S. juxta *Sydenhamii* præscriptum profuisset, de qua quidem ego seriò cogitavi; verum cum morbus videretur cedere medicamentis à me in usum vocatis, malui non recedere à consueto curationis tramite.

Contingit etiam aliquando homines, provectioris ætatis præsertim, in somnum esse valde proclives, cum insigni mentis

Observatio.

Coma  
somno-  
lentum.



hebetudine, nonnumquam oris apertione, adeo ut sedentes & cum aliis colloquentes etiam interdiu in somnum involuntarium labantur. Hic morbus circa vesperam ingravescere solet. Febris non est insignis, aliquando lenta; nec ægri conqueruntur nisi de somnolentia molesta. Locum illud habet etiam in junioribus, accedente aliquando vertigine. Potest hic affectus dici *Coma somnolentum*. Huc etiam referri potest ea somnolentiæ species, quæ suppressionem urinæ consequitur. Somnus enim vexat absque febre, à denegata urinæ evacuatione. Differt hoc Coma à Lethargo, quod Lethargus sit gravior species, cum stertore invadat, febrem non quidem acutam, febrem tamen, aliquando cum exacerbatione habeat comitem. Lethargus appetitum dejicit, ægrum decumbentem reddit, cum Coma præcedens homines invadat etiam aliquomodo munia sua obeuntes; quamvis segnius. Lethargum potest præcedere Coma. Apoplexia subito invadit, morbus acutissimus cum sensuum abolitione, ἀφωμίαν & membrorum resolutione. Ad Coma somnolentum referri debent sopores profundi absque manifesta febre, ut ex. gr. ab ebrietate, ab usu opii ut & somnolentia scorbutica. vid. *Charletonum* de Scorbuto.

Carus.

Contingit etiam non rarò ægrotos corripì febris insigni & vehementi, & statim in augmento vel etiam principio in somnum profundum incidere, unde vix aut ne vix quidem excitari possunt, quem aliquando convulsiones & ipsa mors brevi excipiunt. Non potest hoc symptoma dici Coma, quandoquidem adest febris satis vehemens. Non Apoplexia, quandoquidem hæc subito absque febre invadit, & plerumque est gravior. Non Lethargus, quod ægroti vehementius febriticent, gravius laborent, nec semper excitari possint. Dicendum est, hanc esse *Cari* speciem primam, quæ, si nomen haberemus commodum, proprio vocabulo à reliquis distingui posset.

Contingit etiam sæpenumero post attritas à febre continuâ vires, ægros in somnum profundum & ἀφωμίαν incidere, in eo statu per aliquot dies permanere, nihil rogare, jacerere veluti moribundos, postea iterum oculos attollere, aliquando statim cibum petere, atque feliciter evadere. Sequitur



tur hæc species aliquando Coma vigil, Phrenitidem aut Convulsionem. Observavit & distincte descripsit hanc speciem *Galenus part. 5. p. m. 190.* ἐωράκαμεν ἐν ἐπ' ἐνίων ἀρρώσων ἡγρυπνηκόντων ἐφεξῆς ἡμέραις τρισὶν ἢ τέταρσι δυσδιέγεστον ὕπνον γενόμενον, ὡς ὅλης ἡμέρας ὠφελήσαντα μεγάλως. ἐπὶ δὲ παιδίων εἶδον πολλάκις, & μιᾶς μόνον, ἀλλὰ καὶ δυοῖν ἡμερῶν ἐπ' ὠφελείᾳ μεγάλη γενόμενον τοιοῦτον. (κάρον.) Et hæc est *Cari* altera species, in febribus, non integris viribus, sed fractis contingens.

Accidit etiam non rarò in febribus ægrotos, diem unum aut alterum ante mortem, veluti somno oppressos decumbere ob attritas vires, sanguinem ad circulandum ineptum redditum & spiritus dissipatos. Solemus hoc nostra lingua exprimere (*hy ligt uyt zyn verstand*) quia scilicet nulla perceptionis indicia proferunt ægroti. Hoc symptoma non incommodè etiam *Carus* potest appellari, nisi quis malit ἀφωνίαν in specie dicere, cui ego nolim repugnare. Saltem illud constat, nec attentis practicis ignotum est, hæc ita in praxi observari. Hanc ultimam *Cari* speciem putem esse causam, quare opium & laudanum opiatum apud quosdam malè audiat. Nempe si post usum Laudani talis contingit *Carus*, ille omninò tribuitur opio, cum sæpissimè is accidat ægrotis, qui ab opiatis & hypnoticis planè abstinuerunt. Exigit tamen medici prudentia, ut, viribus attritis, potius à Laudano abstineamus, nisi molestissima illud exigant symptomata, quemadmodum etiam medici in fluxu alvi aliis nequicquam proficientibus, tanquam extremum remedium, præscripserunt usum *Laudani opiatum* etiam in fatis magnâ dosi.

Hoc pacto mihi videor praxi convenienter, ab usu auctorum Conclusio. & etymologiâ non abhorrentia, diversis affectibus distincta imposuisse nomina. Quanti autem usus sit hæc accuratè percepisse, practicis ego veris considerandum relinquo. Differunt enim indicationes, differt medendi methodus, quod è sequentibus adhuc magis evadet manifestum. Non agam hoc capite de Lethargo & Apoplexia aut Catalepsi; hos enim affectus singulos suis locis descripsi, juxta ordinariam praxeos methodum, sed tantum de Comate & Caro breviter, quandoquidem è superioribus jam aliquomodo innotuerunt.



Comatis vigilis descriptio.

Causa.

Est igitur Coma vigil insignis in somnum propensio, cum molestâ veluti expansione cerebri & æstu, nullo interim subsequente somno, vel exiguo absque levamine.

Causa est pressio sanguinis nimia, cum ejusdem particularum motu intestino rapido, & febrili expansione vasorum, per meninges & cerebrum, disperforum. Ab expansione illâ & æstu oritur spirituum animalium agitatio vehemens, molestas producat vigilias. Observatu dignissimum est, febrilem æstum satis molestum sentiri in corporis extremitatibus manibus, pedibus, capite. Id ex eo contingit, quod arteriarum plurimæ & minimæ ibi reperiantur propagines, quæ sanguinem, vehementer pressum, non satis prompte transmittunt; difficultas illa transitus expansionem, pulsationem, æstum producit. Quando impetus sanguinis versus caput fertur, non est mirum, si membranarum cerebri vasa expandantur, adeoque molestia, dolor, vigilie producantur. Putem ego Coma vigil viam sternere ad siderationem cerebri, cujus Hippocrates non semel meminit sub nomine σφακέλας & σφακελισμὸς τῆς ἐγκεφαλῆς ex gr. 11. de Morbis c. v. §. xx. R. xxxiii. 2. Ubi tamen per σφακέλον non oportet intelligere affectum gangrænâ graviolem, uti nunc fieri solet, verum gradum ad gangrænam, uti rectè in *Oeconomia* observavit *Foësius*. Hippocrates rationem reddens quare in hoc casu sanguis è naribus fluat, utitur vocabulis quæ explicationem, à me propositam, confirmant. Ita enim ait: ὅταν ἐν θερμανθῶσιν αἱ φλέβες, ἢ τὸ αἷμα ἐν αὐτῇ σφίξῃ, διαδιδῶσιν αἱ μὲν ἀπὸ τῆς κεφαλῆς ἐς τὰς ρῖνας, αἱ δὲ ἀπὸ τῆς ράχις αἱ μὲν ἀπὸ τοῦ σώματος. 11. de morbis v. §. 19. Vide quoque *ibid.* viii. 4. Narrat *Gabelchoverus* è *Volchero Coitero* historiam dissectionis foeminæ è phrenitide mortuæ, quæ non tantum ea quæ superius disputavi de Phrenitide confirmat, sed & aliquam lucem huic affectui afferre potest. Nempe dum ferra cranium removebatur, aqua loturæ carniū similis effluxit. Membrana tenuis & plexus choroidis vasa aquoso & pituitoso sanguine turgebant. *Gabelchoverus* Centuria v. obs. 48. Fortè Phrenitidem præcesserat Coma vigil.

Differentia.

Differentiis non nisi paucis affectum hunc gaudere existimo, iisque



iisque à circumstantiis petitis. Nempe Coma vigil vel viros vel foeminas, juniores vel seniores, virgines, prægnautes, vel puerperas divexat. Symptoma hoc etiam vel gravius vel levius ægrotos affligit. Possæt aliquis existimare me debere addere hanc differentiam, quod detur Coma cum delirio, quandoquidem auctores ajunt comatosos loqui & delirare. Ego autem longè aliter judico, & affirmo, comate vigili laborantes non delirare. Ratio est, quia Coma vigil distingui debet à Phrenitide, non potest autem distingui, nisi delirium statuat Phrenitidi proprium. Uterque affectus est symptoma febrile: uterque affectus adjunctum habet insignem æstum & agitationem spirituum animalium: in utroque affectu adest loquela solita major, differentia in eo consistit, quod comatosi non delirent. Hinc in superioribus dixi Coma aliquando Phrenitidem præcedere: tam diu enim debet molesta illa cerebri expansio, cum vigiliis conjuncta, dici Coma vigil, quamdiu delirium abest, accedente autem delirio, non est amplius Coma, sed Phrenitis. Et hanc ego putem fuisse causam, quare symptomata hæc ab auctoribus confusè fuerint tradita hætenus. Longè fallitur etiam *Willisus*, quando Coma distinguit in morbum solitarium, & symptoma febris, Phrenitidis & Lethargi. Numquam Coma vigil est morbus solitarius. Semper est symptoma febrile. Differt à Phrenitide aliquantulum, à Lethargo quam longissimè distat. Descriptio ejus etiam claudicat.

Signa per se patent, vel planè non dormiunt, vel si dormiant, subitò & turbulentè somnus excutitur. Conqueruntur ægri de vigiliis, & expansione cerebri molestis, cum tamen non possint, vel non ausint capere somnum. Oculis conniventibus somnum captare, non est signum diagnosticum hujus morbi, cum illud in vigiliis protractis & Phrenitide quoque sæpius accidat. Aliud signum ego observavi maximi momenti, & meam admodum confirmans sententiam, nempe vasa oculorum sanguinea esse admodum tumida. Si enim vasa hæc minima adeo repleantur & intumescant, non malè concludimus illud in vasis, per meninges copiose dispersis, etiam obtinere. Non neglexit hoc signum *Frambesarius*, atque inter signa plethoræ retulit, tensionem vasorum plenorum è copia san-

Signa.



guinis turgentium, oculis manifestam. *Canon. Med. l. i. §. 15.* Eadem fere habet *Sennertus* in institutionibus. Verum illi tantum respiciunt signa plenitudinis quæ in sanis observantur, ego id, quod in Comate vigili, diligenter attendendo, ipse observavi.

Prognosis.

Prognosis hoc modo institui potest, quod sit symptoma admodum periculofum, quandoquidem pars princeps, qualis est cerebrum, ejusque vasa, vehementer afficiuntur. Sæpe est prodromus Phrenitidis, Convulsionis, Cari. Periculum autem tanto est gravius, quanto majorem febris habet conjunctam malignitatem. Rectissimè *Sennertus*, & principiis meis convenienter, affirmavit, hoc symptoma præcipuè in febribus malignis accidere.

Indicationes

Indicationes in hoc affectu sunt, expansionem molestatam vasorum cerebri tollere, spirituum motum nimium sedare, sanguinis impetum à cerebro derivare.

Cura.

Cura expansionis nimix vasorum cerebri, à nimia sanguinis pressione ortum ducens, præcipuè exspectanda est à V. S. quæ etiam omnino, nullâ interpositâ morâ, nisi quid impediat, instituenda est. Quâ enim aliâ ratione huic occurras? Num temperantibus, diluentibus, refrigerantibus? Verum hæc remedia sunt minus efficacia, quam ut tantum morbum superare valeant. Num attenuantibus, incidentibus, volatilibus, quibus in omnibus ferè morbis quidam utuntur? Atqui illud est oleum camino affundere. Num sudoriferis, hypnoticis, narcoticis? Illa quidem essent præstantissima, verum sudorifera sola non sufficiunt, conjuncta cum opiatibus non ferunt ægri, nisi præcesserit V. S. *Sennertus* eam repetendam esse vult, & jubet venam in pede revulsionis gratiâ aperiri. In morbis malignis eam cautè instituendam esse satis notum est; *Gabelchoverus* tamen eam quoque in morbo Hungarico laudat l. i. §. 8. cuius hæc sunt verba: *Error Ungaros & Germanos invasit, in Synocho & febre ardenti* (hoc est, in suo morbo Ungarico appellato) *vena sectionem non admittere: qua PRÆSTANTIUS REMEDIUM NULLUM in eo morbo sub sole est, præsertim apud eas nationes plethoricas.* Non igitur te deterreat vulgi per Ger-  
ma-



*maniam & Ungariam MALE FUNDATA OPINIO, & quorundam Recentium Medicorum &c.* Forestus in eandem scripsit sententiam l. x. ob. 34. in Scholiis: *Hujus mali curationem etiam descripsit Joannes Arculanus, & potissimum in eo commendat venæ sectionem &c.* loquitur autem de Comate vigili. Confirmatur hæc sententia ab eodem. Is puerperæ debili & Phreneticæ, adeo ut lecto contineri non posset, postquam tres à partu septimanæ præterissent, ac benè purgata esset, venam secari jussit cum insigni successu. *Vid. l. x. obs. 5.* Si in puerperâ debili, ubi jam Phrenitis supervenerat, V. S. cum insigni emolumento fuit instituta, multo magis ea convenit, in usum vocata antequam morbus ad hanc pervenerit *ἀνμὴν.*

Nimia vasorum expansio etiam compescitur medicamentis æstum temperantibus. Cum enim expansio à pressione & æstu originem ducat, si æstus temperetur, illa quoque imminuetur. Horum ideo insignis est usus in hoc affectu, quandoquidem & sitim temperant, & sudoriferis vehiculum præbent. Cum autem in superioribus horum facta sit mentio, non opus est huic negotio immorari. *Hieronymus Ochus Rizettus*, de Febribus malignis vulgaribus, illas conficit ex aquis stillatitiis *Sonchi. Endivie, Cichor. Acetos. Epatic.* (possunt eadem & similes herbæ etiam decoqui) quibus perpetuo permiscet quadam diaphoretica, & Syrupos de *Agresta, de Pomis, è succo Limonium, Acetosum* s. Vult autem, ut sint cum Saccharo albissimo confecti. Addit: *Incumbendum medico valde est, in medicamentorum munditie, venustate & jucunditate, ad hoc ut visui ac gustui satisfaciens, agrum adinveniat obedientiorem, quod in Syrupis intendendum est præsertim. &c.* Et paulo post pag. np. 269 subjicit. *Quod si nobilius atque efficacius parare tibi placeat medicamen, pro Syrupis extracta saccharizata adhibebis, quæ tibi sic parabis. Poma hæc vel illa frustulatim divisa, super patinam infundo perforatam, per stratum super stratum apposita, Saccharo finissimè pulverisata abunde cooperies. Ex hac in loco subterraneo atque humido reposita destillabit, in receptaculum, subtus positum, limpidissimus liquor, odorem ac saporem pomi referens perquam jucundum, qui in refrigerando & siti compescenda excellens valde est. Sic aque tibi parabis ex mali Punici granis, ac cūran-*

Æstum  
temperantia.



*gulis exteriori atque interiori cortice nudatis seminibusque demptis, ne alioquin liquor amarore suffundatur.* Hoc monitum non est fufque deque habendum; nam nifi Pharmacopæus fit fedulus & attentus, facilè fermentantur Syrupi, quæ ratio me coëgit sæpe abstinere à Syrupis, ne ægris meis molestus efferem, aut nocerem. Labet adscribere duas *Dolai* formulas; hic enim rectius de Comate vigili sentit, affectum eundem statuens cum pervigilio, à quo revera sæpe non multum distat. Ipse affirmat se sequentem Julebum magno cum successu exhibuisse.

℞. *Aq. Verben.* ℥iv.

*Endiv. Lactuca.*

*Roris Vitrioli.*

*Syr. Rosar. aa* ℥jss.

M. F. Julepus, pro aliquot vicibus.

vel

℞. *Aq. Plantag.* ℥v.

*Papav. err.* ℥iij.

*Acet. Stillat.* ℥j.

*Syr. Cydonior.* ℥jss.

*Tartar. Vitriolat.* ℥ij.

M.

*Forestus* refert se puellam, apud Cerevisiarium è Comate vigili decumbentem, & simul febricitantem curâsse V. S. ex vena media. Applicuerat autem oxyrrhodium fronti, postquam irritâisset alvum glande acutâ. Propinaverat etiam Julebum sequentem:

℞. *Aq. Meliss. Betonic. Cichor. aa* ℥iij.

*Fœnic. Endiv. aa* ℥j.

*Syr. de Byzant. de Cichor. cum Rhab. aa* ℥jss.

*Capill. de Hyssop. Borrag.*

*Oxymell. simpl. aa* ℥ss.

M.

Dein hoc modo purgaverat:

℞. *Diaphœnic. el. è Succo Rosar. aa* ℥iij.

*Aq. Borrag. Fumar. Betonic. aa* ℥j.

*Syr. de Betonic.* ℥ss.

M.

Quamvis hæ formulæ à meâ & hodiernæ praxeos methodo mul-



multum distent, nolui tamen omittere eas; ut constet curandi rationem, à me descriptam, & adhuc describendam, non malè quadrare cum iis, quæ in praxi observata sunt.

In hoc symptomate puto etiam multum profuturas acidulas vulgares. *Lotichius* hoc modo præscripsit:

℞. *Rob. Ribium*. ℥iij.  
*Aq. fontan. limpid.* (forte ℔ij.)  
*Sp. Vitriol. q. s.*  
*ad grat. acid.*

M. pro Julebo.

Verum quandoquidem Coma vigil febrile est symptoma, & gravius affligit quando febres sunt malignæ, expansio & æstus optimè imminuentur fudoriferis. Recte illud olim observavit *Schmitzius* cujus hæc sunt verba: *Cum semper ferè ingruat cum febre maligna, præter ejus curationem malignitas & venenum expugnandum, revellendum, roborandum &c.* Conveniunt in hoc casu. *C. C. sp. ppt. Unicornu, Lapis, Bezoar. or. & occid. Terra sigillata, Bolus Armena, Acetum stillatitium, Rutaceum, Calendula, Sambucinum, Succus Limonum, Sp. Nitri, Salis, Vitrioli, Antimonium diaphoreticum, Bezoardicum minerale, Sal prunella, Card. Bened. Absinth.* Laudantur etiam *Acetum Prophylacticum, Bezoardicum &c.* Verum quandoquidem descriptiones non sunt admodum concinnæ, juvat subjungere sequentem.

### ACETUM BEZOARDICUM.

℞. *Flor. Sambuc. m. iv.*  
*Calend. m. ij.*  
*Fol. Ruth. m. j.*  
*Bacc. junip. ℥ss.*  
*Pomum Citri minime putridum no. j.*  
*Aceti vini ℔vj.*

Infundantur & insolentur in vase tecto, non tamen clauso, per mensem, colatura servatur usui.

Ex hisce & similibus variæ possunt componi formulæ. Sequens est *Rolfincii*.



℞. Corall. rubr. ppt. Margarit. ppt. aa ʒß.  
 Antimon. diaph. Bezoard. min. aa gr. ij.  
 Aq. Borrag. Scorzon. aa ʒj.  
 Syr. Acetos. Citri. ʒß.  
 M. F. Potio.

Varias formulam habet *Diemerbroekius* de Peste l. iiii. c. 5.  
 inter quas est pulvis sequens,

℞. Pulv. liberant. ʒj. vel ʒjß.  
 Lapid. Bezoar. or. ʒß.  
 Camphor. gr. ij vel iij.  
 F. Puvis.

*Laurentius Donkers* affirmat, se in morbis Petechialibus sæpe  
 cum optimo successu hunc exhibuisse pulverem:

℞. Sal. Prunell. ʒß. vel ʒij. ant. ʒj.  
 Oc. Cancr. ppt.  
 Camphora aa ʒß.  
 Sacchar. perlar. ʒj.

M. F. Pulvis ter quaterve exhibendus cum Aq. Card. ben. ʒiiij. vel q. pl. & aq. Cinnamon. ʒij. cum Sp. Vitriol. q. s. manè sc. & vesperi: interea temporis nihilominus semper, sed in minori dosi, continuato usu mixturæ, cujus hæc est descriptio:

℞. Sal. prunell.  
 Oc. Cancr. ppt. aa ʒj.  
 Diascord. Fracast. ʒij.  
 Syr. Papav. errat.  
 de Succo Citri ant Gran. acid. aa ʒß.  
 Aq. Verben.  
 Prunell. aa ʒjß.  
 Rosar. ant Violar. ʒj.  
 Sp. Nitri ant Vitriol. q. s.  
 M.

Addendo si placet Landan. op. gr. j.

*Lotichius* in simili casu præscripsit

℞. Lapid. Bezoar. orient. gr. xiiij.  
 C. C. ust. præp. ʒj.  
 Spec. liberant. ʒß.  
 M. F. Pulvis subtilissimus.



℞. *Lap. Bezoard.* or. ʒ℞.

*Confect. Alkerm. spec. diamarg. fr.* aa ʒj.

*Trochisc. de viper.* gr. v.

*Aq. Card. b. Bugloss.* aa. ʒj.

*Cinnamom.* ʒ℞.

M. dilig. F. H. hydroticus.

Ad expansionem molestim vasorum cerebri non nihil possunt medicamenta externa capiti applicata. *Forestus* refert sese in usum vocasse oxyrrhodinum ex aceto acerrimo, oleo chamomill. & rosac. *Sennertus* monuit ultra triduum oxyrrhodina non esse continuanda. Non parum etiam profunt animalia viva dissecta & capiti imposita. Æstus capitis hoc pacto imminuitur, transpiratio promovetur, facilius per vasa transitus procuratur. Quantum levamen afferant, è foetore, quem brevi contrahunt, non obscurè colligitur. Vide *Platerum obs. p. 93.* Interim curandum, ut caput probè sit tectum, quandoquidem frigus externum difficilem reddit sanguinis transitum, unde tum major sequitur vasorum expansio.

Ad spirituum motum nimium sedandum, imprimis conducunt hypnotica & opiata, verum ea prudenter & cautè in usum sunt vocanda, ne è Comate vigili in Carum incidat æger. Oportet ut universalia, ubi ea requiruntur, præmittantur. Ut à minori dosi fiat initium. Ut diligenter animadvertatur, an ægrotus ea ferat, nec ne? Annotarunt auctores, Coma vigil oriri à medicamentis narcoticis, id quod ego facile concessero; etenim si in morbis inflammatoriis exhibeantur opiata ante celebratam V. S. non somnus, sed summæ excitantur angustiae. Opiata si non inducant Coma vigil, saltem ægrotum conjiciunt in molestas & inquietissimas vigilias, aut somnum turbulentum. Vide quoque *Tillingium* monita utilia circa usum opiatorum proponentem. p. 292. Utilia hic sunt medicamenta à *Sylvio* ad dolorem ardentem præscripta.

Spirituum  
motum se-  
dentia.

℞. *Aq. Cichor.*

*Acetos.* aa ʒiij.

*Syr. Diacod. vel*

*Papav. alb.* ʒj.

*Sp. Nitri* gr. viij.

M.

℞. *Hord.*



℞. *Hord. mundat. ad crepat. cocti.* ℥j℔.

*Sem. Papav. alb.* ℥iij.

*Cucum.*

*Melon. aa* ℥ij.

Cum ejusdem *Hordei decocto*,

F. Emulsio ad ℥xv. Add.

*Fulap. Rosar.* ℥j.

M.

Potentior est sequens, quam habet *Tillingius* in *Anchora salutis*. p. 295.

℞. *Amygdal. dulc.* ℥vj.

*Sem. Papav. alb.* ℥iij.

F. Emulsio cum aq. *Verben.*

*Nymphaea.*

*Violar. aa* ℥iij. (malim ℥iij vel amplius)

Colat. Add.

*Margarit. ppt.* ℥j.

*C. C. Philosoph. ppt.* ℥℔.

*Laud. op. gr.* iv.

*Sacchar. perlar.* ℥iij.

M. in Mortario.

Non uno nomine in hoc casu conveniunt Emulsiones: sitim sedant, æstum temperant, somnum blandè alliciunt. Idem hoc modo præscripsit.

℞. *Aq. Bugloss.* ℥iij.

*Syr. Acetos. Citri.* ℥iij.

*Ess. Margarit.*

*Corall. Petri Fabri. aa gr.* iv.

*Aq. Narcotica Mynsicht.* ℥ij.

Ducantur in Mortario.

*In casu debiliū, ubi opiata non nisi magno periculo intus sumere licet, externe tamen sine metu illa in partes vocabis: quæ inter magni facimus mixturam somniferam, quam Optimus parens noster, Johannes Dolæus, Pharmacopæus sexagenario major, Consul civitatis Francofurtensis, multa experientia confirmatus salutiferam reperit, quæ sequens est:*

℞. Un-



℞. Unguent. popul. alabastr. aa ʒʒ.

Sanguin. hirund. ʒj.

Ol. nucis. M. express. ʒj.

Croci or. ʒj.

Opii dissolut. ʒjʒ.

Ol. sem. hyoscyam. express.

Papav. alb. express. aa ʒj.

M. & F. Mixtura somnifera, cum corio, temporibus applicanda. Verba sunt *Dolei l. i. c. 6.*

*Zacutus Lusitanus* proponit Epithema, quo solo, tamquam, præsidio præstantissimo, quidam Phrenitide confirmata correptus, per integrum diem obdormiscens, refocillatis viribus, sanitatem integram est consecutus.

℞. Rad. Mandrag.

Hyoscyami

Sem. Lactuce

Portulac.

Coriand. virid. aa ʒij.

Opii. ʒj.

Philon. Persic. ʒij.

Bulliant omnia in ℥iiij. vini albi, ad consumptionem duarum partium, cola, serva.

Hujus vini sequens est usus quando æger quiescet, vel dormire cupit, sæpe naribus odorem suscipiat, & digitis in eo madidis nares intro illinantur, tota facies abluatur, plantæ pedum & volæ manuum laventur, quod si parum aceti vini permisceatur, erit præstantius. Vide quoque *Tillingium. p. 295.*

Dixi sanguinis impetum à cerebro derivandum. Fit illud potentissimè V. S. quia si sanguinis moles in universo corpore imminuatur, vires ejus & impetus versus cerebrum minuitur. Fit tamen illud aliquomodo, si irritatio excitetur in aliis partibus; observare enim licet in praxi, si in parte aliqua sit insignis dolor, aut irritatio, eò spirituum & sanguinis motum magis vergere. Enemata non tantum humectant intestina, adeoque æstui conducunt, sed & irritando spiritus versus has partes alliciunt & sanguinem. Eorum usus est insignis quando primarum viarum adest molesta repletio, hæc enim æstum

Sanguis  
impetum  
derivantiā  
à cerebro.



augendo, somnum etiam abigere valet. Ita ego memini me, in simili casu, ægroto præscripsisse clysterem, cujus tantus fuit successus, ut, rejecto enemate, somnus sequeretur placidus cum maximo levamine, quem frustra aliis medicamentis invitaveram.

℞. *Rad. Lilior. alb.* ℥j.

*Fol. Violar. Malva.*

*Ruth. hortens. Mercurialis. aa m. j.*

*Fl. Chamomill. p. j.*

Coq. f. a. ex aq. pura colat. ℥x. Add.

*Elect. Diaprun. sol.*

*Diacathol. aa ℥j.*

*Sal. com. ℥j.*

M. F. Enema.

*Riverius Lib. I. Praxeos Med. c. 2. ubi de Comate & affectibus soporosis agit, hunc præscribit Clysterem.*

℞. *Fol. Parietar. Hyssop. Calamenth. Origan.*

*Salvia, Ruth. & Centaur. min. aa m. j.*

*Sem. Cartham. ℥ss. Fœnic. Cumin. aa ℥iij.*

*Agaric. alb. in nodulo inclus. ℥ij.*

*Pulp. Colocynth. in eodem nodulo inclusæ. ℥jss.*

Coq. ad ℥bj. in colat. dissolv.

*Hiera Picra. ℥ss. Diaphenic. ℥j.*

*Ol. Rutacei. ℥ij.*

F. Clyster.

Item hunc cum aqua benedicta.

℞. *Decoct. Emollient. ℥bj.*

*Diaphenic. ℥j.*

*Aq. benedict. turbida. ℥iv.*

F. Clyster.

Potentius sanguinis impetum à cerebro derivant purgantia; non tantum enim irritationem in prima efficiunt regione, sed & bilis ac succi pancreatici secretionem & excretionem promovent. Interim memoria diligenter tenendum est, Coma vigil sæpe esse symptoma febrium malignarum, in quibus, ut & variolis & morbillis, purgantia non semper sunt tuta. Ubi autem nihil impedit ea in usum vocare, exhibeantur statim in principio; mor-



morbus enim est acutus, & periculum in morâ. Ego non semel statim à V. S. horulæ unius tantum interposito spatio, præscripsi purgans, cum insigni successu. Monet quoque *Riverius* medicum non debere esse cunctabundum.

℞. *Fol. senn. mund.* ʒj.  
*Tartar. Rhenan. alb.*  
*Rhei elect. aa.* ʒß.  
*Sem. fœnic. d.* ʒj.

Bulliant leviter in decocto *Tamarind.*

In colat. ʒiij. dissolv.

*Manna Calabrin.* ʒß.

M. F. Haustus.

Quidam amant pulverem *Cornachini*, cui tamen ego non adeo faveo; observavi enim operationem ejus non esse satis blandam. Malim ego *Electuarium Cholagogum Sylvii* medicamentum gratum, lene & efficax. ex gr.

℞. *Elect. Cholagog. Sylv.* ʒijß.  
*Sal. Prunell.* ʒß.  
*Aq. Betonic. q. s.*

M. F. Haustus.

In Comate vigili commendantur quoque vomitoria. *Samuel Formius* refert, sese filiam *D. Ludovici* octo annos natam, Comate detentam, cum convulsionibus frequentibus, restituisse exhibendo cum juscule *Vitrioli albi.* ʒj. Vomitu excitato ilico liberata est. Eodem modo filio hortulani sex annos nato exhibuit *Aquæ Bened. Ruland.* ʒß. Supra & infra fuit purgatus, & ab affectu liberatus. Plures tales refert observationes, quæ apud *Riverium* videri possunt. *Dolaus* vomitoriorum catalogo adscripsit *sapam antimonii*, *Tartarum emeticum*, *vinum emeticum* suum; verum rectè monet, cum cautela esse exhibenda fortiora.

Sanguinis impetum à cerebro quoque derivant *Cucurbitulæ* tum humidæ tum siccæ, quæ scapulis, dorso, natibus & cruribus affigi possunt. Si itaque vena quidem fuerit secta, non tanta tamen quantitas evacuata, quanta necesse fuerat, & animus sit derivare impetum sanguinis, id cucurbitularum ope fieri potest.

Cucurbitulæ.



Vesicatoria

Eidem usui quoque inserviunt vesicatoria variis corporis partibus admota, cervici, scapulis femoribus, nolim tamen ea excitari nimis dolorifica, quandoquidem hoc modo somnus parcior magis adhuc abigitur. Aliud est in Apoplexia aut Caro, aliud in Comate vigili ea in usum vocare.

Lotiones pedum.

Quamvis non ita fortiter derivent, magni tamen usus sunt in hoc casu lotiones pedum. Hujusmodi descriptionem habet *Hartmannus*,

℞. *Folior. Salicis, Lactuca*  
*Nymphaea, Violar. aa m. j.*  
*Chamomill. Betonic. aa m. ℞.*  
*Capitum papav. alb. sine semine no. vj.*  
*vel vij.*

Incisis capitibus reliqua bulliant in aqua fluviatili.

Hoc decocto primum madefiant tempora & manus, sponte exsiccandæ: tandem pedes per ἐγκάδισμα abluantur: somnum jucundissimum producit, præsertim si aliquot diebus vesperi ante ingressum lecti illud usurpetur. *Franciscus Hildesheim* in specilegio de Morbis Cerebri & Capitis, ubi de Comate vigili agit, varias habet formulas lotionum pedum. ex. gr.

℞. *Rosar. Rub. & alb. Nenuph.*  
*Violar. aa m. i℞.*  
*Melilot. Chamomell. Anethi,*  
*Malva aa m. ii℞.*  
*Farfar. Lactuca, Betonic. aa m. j.*  
*Cort. rad. Mandrag. ʒvj.*  
*Capit. Papav. alb. no. x.*

Incisa dentur in charta &c.

Possunt quoque suppedanea pedibus applicari, præcipuè si facies insigni rubore candescat. Tale describit *Diemerbroequeus*.

℞. *Fol. Petasitid.*  
*Ruthæ. aa m. j.*

Contundantur minutim in mortario Add.

*Fimi Columbin.*  
*Ferment. acid. aa ʒi℞.*

*Sal.*



*Sal. com. ℥iij.**Acet. Rosac. vel Sambucini q. s.**F. Suppedaneum.*

Non est necesse de diætâ hic multis agere, cum ea conveniat cum diætâ vigilantium & Phræneticorum. Inter hos affectus est quædam convenientia, ita tamen ut revera distingui possint, id quod etiam observavit Dolæus, qui in fine capitis de Comate vigili rectissime monet: *Somnus omni opera est inducendus, ne ager in Phrenitidem incidat.*

Diætâ.

Coma somnolentum est somnus profundior absque insigni febre, à repletionem, sanguine magis premente exteriorem cerebri corticem, nec non spiritibus torpidioribus productus.

Comatis  
somnolenti  
descriptio.

Dixi esse somnum profundior, in hoc differt à Comate vigili, in quo ægri vigilant: absque insigni febre, in eo differt à Caro & Comate vigili in quibus somnus & vigiliæ symptomata sunt febris. Differt etiam ab Apoplexia, in qua est sensuum internorum & externorum abolitio repentina, cum resolutione membrorum: adeo ut Apoplexia sit gravior Comate somnolento, ac etiam subito invadat, quod in Comate non est necesse. Potest tamen Coma quam proximè accedere ad Apoplexiam, quando scilicet ab usu opii ægri subito expirant. Adeo ut omnes somni præternaturalis species absque manifesta febre debeant ad Coma somnolentum referri.

Ea explicatur.

In descriptione tres præcipuè causas tetigi, sc. repletionem, sanguinem vasa prementem, & spiritus torpidiores. Repletio habet locum plethora, aut quando quis ex ebrietate in Coma incidit; tum enim à repletionem & dilatationem vasorum producit Coma. Sanguis magis premens cerebri corticalem substantiam, imprimis habet locum in senibus, qui in somnum hunc incidunt, & ore hianti dormiunt: spiritus torpidiores locum habent imprimis in Comate à narcoticis producto, in iis qui à febre sunt immunes. Si enim distincte loqui velimus, sopor à narcoticis productus variis debet gaudere nominibus, pro vario ægrotorum statu, qui abusi sunt opio. Si enim hi ferè sint sani & ita incidant in soporem, tum propriè dicendi sunt Comate laborare, si febre acutâ la-

Causæ.



borent & incidant in somnum, dicendi sunt Caro laborare, si febris sit minor & expergefacti respondeant ad interrogata, atque iterum in somnum labantur, dicendi sunt laborare Lethargo. Tres hæ causæ sæpe concurrunt, ex. gr. inebrietate gravis adest est repletio vasorum, & depressio cerebri, & spiritum animales torpidiores: id quod de ebrietate dixi, similiter intelligendum est de Comate à plethora originem ducente. Utile tamen est distinctè has causas animadvertere, quandoquidem diversæ hinc oriuntur indicationes. Nolim generationis modo multum immorari, quandoquidem in capite de Lethargo de hac materiâ fusius sum disputaturus. Interum quemadmodum hæ causæ, id quod præcipuè respiciendum est, explicant, tamen potest in hoc casu concurrere cerebrum flaccidum, aqua vel serum cerebrum ejusque ventriculos copiosius irrigans. Exemplum in *Boneti sepulchreto* sunt obvia. A sero in universo corpore redundante, sopor in Ischuriâ originem ducit.

Differentiæ.

Distinguunt auctores Coma tam vigil quam somnolentum in idiopathicum & sympathicum. Verum si accuratè loqui velimus, hæ distinctiones examen sustinere non possunt. Quantum enim ad Coma vigil, illud semper censeretur debet idiopathicum, quandoquidem ad essentiam ejus requiritur molesta distensio vasorum cerebri, cum insigni æstu. Nec refert, quod hæc distensio à sanguine fiat, quum cerebrum sine sanguine munia sua obire nequaquam possit. Corpus sanguine destitutum cadaver est, cerebrum, vitâ superstitè, sanguine carere non potest. Itaque cerebrum per se afficitur, quandoquidem afficitur ab eo, quod ad ejus essentiam omnino requiritur. Existimare autem sympathicum Coma esse dicendum id, quod à febre malignâ dependet, absurdum est, quandoquidem nullum aliud datur Coma vigil, quam id quod à febre excitatur; si ergo hoc sit sympathicum, omne coma erit sympathicum, quia nullum aliud datur. Apertum ergo est, hanc distinctionem Comatis esse imaginariam, quandoquidem omne Coma vigil ejusdem est generis. Quod si quis existimet, Coma vigil esse dicendum sympathicum, quando dolores aliarum partium, aut inflammationes, vigilias producant continuatas, is non videtur satis distinxisse vigilias protractas à comate



mate vigili. Dolores & inflammationes aliarum partium facile somnum excutere possunt, non ita facile producere Coma vigil, quia in hoc molesta expansio adest vasorum cerebrum ejusque membranas perreptantium: adeoque, nisi impetus sanguinis versus cerebrum, cum molestâ distensione, & spirituum agitatione, adsint, non est Coma vigil dicendum; sed vigiliæ tantum protractæ. Si autem hæc adsint (quod tamen rarius existimem fieri, quoniam impetus sanguinis versus aliam partem vergit) Coma vigil idiopathicum dicendum est. Estque morbus à morbo. Quæ hæcenus dixi, ex eo confirmantur, quod Coma somnolentum sympathicum à vaporibus genitum, distinguant à Comate, à sanguine, non uno modo, generato. Coma somnolentum idiopathicum juxta auctores igitur oritur à sanguine, proinde Coma vigil à sanguine etiam dicendum est Idiopathicum. Coma autem somnolentum à vaporibus nullum datur, quandoquidem nulli vapores ad cerebrum penetrant. Erit ergo Coma somnolentum ordinarie idiopathicum, nisi sympathicum placeat appellare illud, quod in senibus cum languore viscerum, & concoctionis debilitate locum habet; ita enim sanguis evadit sensim minus aptus circulationi per cerebrum satis promptè absolvendæ; verum improprie hoc fit, quandoquidem Coma hoc non à ventriculo, sed à sanguine pendet. Ille sopor, qui locum habet in ægrotis Ischuriâ laborantibus, & quem ego ad Coma somnolentum retuli, posset dici sympathicus, quandoquidem non à sanguine, nec cerebri aut spirituum animalium vitio oritur, sed à sero in universo corpore redundante, propter impeditam ejusdem vel secretionem vel excretionem. Verum & hoc idiopathicum melius habetur, cum somnus non ante obrepit, quam ubi cerebrum ipsum à sero inundatur. Si Coma somnolentum oriatur à lumbricis, uti scripsit *Riverius*, illud fortè dicendum esset sympathicum. Reliquæ Comatis somnolenti differentię à circumstantiis sunt petendæ. Aliud nempe est gravius, & fere ad Apoplexiam accedens, aliud est levius. Aliud est puerorum, à lumbricis, uti existimat *Riverius*, aliud est adultorum, aliud senium. Aliud sensim ingravescit, aliud repente ægrotum in summas conjicit angustias, & ad Apoplexiam



plexiam accedit Aliud in somnum graviolem aliud in leviolem tantum conjicit ægrotum. Ex alio ægroti excitati respondent, ex alio vero non excitantur, nec ad interrogata respondent. Respectu causarum, aliud oritur ab ebrietate, aliud ab assumptis narcoticis, aliud à sanguine glutinosiore, & spiritibus languidis: aliud à sero redundante, & cerebrum premente. Faciunt quoque auctores mentionem somnolentiæ, & soporis gravis Scorbatici, qui nomine comatis somnolenti rectè donari possunt: quamvis *Charletonus*, *Willisus*, *Engalenus* plures species describant, *Engalenus* nomine Cari. *Willisus* nomine Lethargi tertiam Cari speciem mihi dictam intellexit. Causa est sanguis & spiritus languidi scorbatici.

Signi.

Signa ex jam enarratis manifesta sunt, dormit aliquis, vel saltem in somnum est valdè proclivis, absque febre manifestâ. Ut veræ causæ eruantur, oportet considerare an aliquis repente in somnum inciderit? An aliquis vino aut spiritu vini sit abusus? An opio vel medicamentis opiatis fuerit usus? An sensim imbecillior redditus, in commatosum inciderit affectum? An Ischuriâ laboret? An dispositio scorbutica somnolentiam hanc producat?

Prognosis.

Prognosis ita institui potest; Coma universaliter loquendo esse periculosum; afficitur enim cerebrum pars princeps. Hippocratis effatum *Aph. 1. f. 2.* ita habet. Ἐν ᾧ νοσήματι ὑπνὸς πόνον ποιεῖ; θανάσιμον. Coma aliquando Lethargum, aut apoplexiam &c. præcedit. *Mercatus* non male l. 1. c. 12. Coma tanquam præludium Lethargi considerat. Levius facilius superatur, gravius difficilius. Coma puerorum non est adeo periculosum, atque illud, quod senes vel decrepitos infestat. Facilius superatur, quod ab ebrietate, quam quod à senio, sanguinis prava diathesi, & spiritibus languidis, aut dispositione scorbuticâ ortum habet.

Indicationes

Indicationes generales sunt, excitare ægrotum, & causas somni tollere.

Cura.

Cura perficitur admovendo naribus foetida, salia volatilia, olea stillatitia: *Sp. Sal. Armon. Sal. Volat. Fulig. C. C. Ol. Succin. Therebinth. Spica.* Quod si per os horum aliquot guttulæ, cum liquore appropriato, exhiberi possint, tanto facilius voti fiet



fiet compos medicus. Horum non tantum insignis est usus, ut excitentur ægri, sed & medicus hinc de gravitate affectus & periculo rectius judicat. Si enim ab odore admodum penetrante vix, aut ne vix quidem afficiatur æger, signum est, ipsum periculosè decumbere, sin autem statim expergefiat, hinc colligitur, non ita graviter affici patientem. Præscribi potest hæc, aut similis mixtura:

℞. *Aq. Ruth. Betonic. Meliss. aa* ℥j.

*Aurea Lang.* ℥vj.

*Tinctur. Castor.* ℥ij.

*Sp. Sal. Armon. g.* xv.

*Ol. Succin. g.* viij.

M.

*Timæus* in Caro, quod ego Coma dixerim, sequentem præscripsit mixturam,

℞. *Aq. nostr. Cephalic. calid.* ℥iij.

*Apoplect. Heinii. Carbunc.*

*Cinnamom. aa* ℥j.

*Sp. Lilior. convall. meliss. aa g.* xij.

*Cerasor. nigr.* ℥ß.

*Rotul. man. Christ. perlar.* ℥ij.

M.

Ad excitandum ægrotum, utile quoque est ejusdem Enema:

℞. *Herb. Mercur. Origan. Centaur. min.*

*Puleg. Calaminth. Beton. aa m.* ß.

*Sem. Cartham. in pet. ligat.* ℥vj.

*Agaric. in pet. ligat.* ℥iij.

*Fl. Stachad. Arab.* ℥ij.

Incisa & conquassata Coq. ex s. q. *aq. simpl.*

℞. *Colat.* ℥x. *Elect. hieræ s. Hieræ*

*Longad. Bened. Laxat. aa* ℥iij.

*Ol. Rutac.* ℥j.

*Chamom. Aneth. aa* ℥ß.

*Sal. Gemm.* ℥j.

M. F. Enema.

Sternutationes in ejusmodi casibus esse necessarias monuit *Hartmannus*, itaque in curationibus istorum morborum sæpius provocandas.



*Timæus*, modo laudatus, granum unum aut alterum pulveris sequentis naribus per calamum jussit inspirari.

℞. *Hellebor. Alb. Castor. Pip. alb. aa* ℥j.

*Ol. destill. Ruth. Majoran. Salv. aa* gr. ij.

M. F. Pulvis subtilissimus.

Quod si ventriculus sit repletus, etiam exhiberi potest vomitorium: vehemens illa corporis concussio multum valet ad discutiendum somnum, verum prudentiâ opus est, ne in gravius malum conjiciatur æger.

Ab ebrietate.

Si ab ebrietate originem trahat Coma, nec sit admodum vehemens, discussâ crapulâ discutitur Coma. Sin autem sit vehementius, eodem modo procedere oportet, atque in Lethargo, aut Apoplexiâ postea docebitur.

Ab assumpto narcotico.

Si ab assumpto Narcotico subsequatur profundissimus somnus, danda est opera, ut illud quamprimum rejiciatur medicamento vomitorio: sin autem illud jam per corpus distributum sit, omni ope in id incumbendum, ut æger excitetur, quemadmodum postea, in capite de Apoplexia, docebitur. Si autem parvâ tantum quantitate sit assumptum, & ægri mediocriter dormiant, illud sæpè maximum præstat emolumentum, adeoque is somnus interrompendus non est.

A sanguine effoeto.

Si autem à sanguine effoeto, cerebrum magis deprimente, ortum habeat Coma somnolentum, uti in senibus contingit, examinandum, num simul nimia adsit repletio, id quod sæpe contingit. Cum enim vigor illorum sensim languescat, cum humores reddantur acriores, appetitus sæpe viget, satis avidè & copiosè nutrimentum capiunt, unde sensim sanguis nimium capit incrementum, præsertim si ad motum & exercitium sint segniores. Hinc sæpe videas in manibus senum non tantum majores venarum propagines, uti in junioribus, sed & minores sensim dilatari & reddi magis conspicuas. Hæc est causa quare in Coma somnolentum, Lethargum, Apoplexiam, Paralyfin non raro incidant. Si ergo talis repletio adsit, omnino secanda est vena, & sanguis vel majori, vel minori quantitate, virium & repletionis habita ratione, educendus. Nec est quod quis V. S. in ætate ingravescente expavescat, ubi



ubi sc. adest repletio, cum natura aliquando hæmorrhagiâ excretionem moliatur cum levamine.

Quando autem juniores in somnum sunt admodum proclives, vix sedeant, quin in somnum incidant, nocte admodum profundè dormiant, experrecti adhuc sint somnolenti, argumentum illud præbet satis manifestum, istos laborare è repletionem. Itaque V. S. statim huic malo occurrendum est, quod etiam unica aut iteratâ V. S. non rarò superatur.

Si sanguis sit glutinosior, is corrigendus. Id fit, materiam tenacem primæ regionis evacuando, vomitoriis, purgantibus validioribus, blandioribus, aloëticis, pro diversa circumstantiarum ratione. Ex. gr.

℞. *Mass. Pilul. Mastichin.* ʒß.

*Trochisc. Alband.*

*Resin. jalapp.*

*Sal. Armon. subt. pulv. aa gr. vj.*

Cum *Elix. Prop.*

F. *Pilulæ n. xij.*

Harum pilularum potest assumere æger vel ij vel iij. vel iv. vel v. vel vj. vel vij. pro ut vel unicâ vice efficacius, vel pluribus vicibus per epicrasin evacuare est animus. Si duæ sumantur, blanda sequetur evacuatio, si sex vel septem, satis potenter purgabitur æger. Hæc ideo observâsse non est inutile, ut sciamus doses medicamentorum tum purgantium, tum etiam alterantium, insignem habere latitudinem, pro variâ medici intentione, pro vario ægrotorum statu, temperamento, ætate, viribus, consuetudine.

Sanguis glutinosior quoque corrigitur, si ventriculus roboretur amaricantibus, antiscorbuticis, aromaticis, chalybeatis. Formulæ possunt esse variæ, pulveres, pilulæ, vina medicata, aquæ vitæ, extracta, elixiria, conservæ. Quandoquidem hujus loci non est de hac materia fuscè agere, unicam tantum aut alteram subjiciam formulam:

℞. *Rad. Calam. arom.* ʒß.

*Galang. min.*

*Cubebæ.*

*Cinnamom. aa ʒij.*

Ee 2

Con-



Concisa & contusa infundantur in *Sp. Vini* ℥<sup>XL</sup>.  
 stent in infusione per xiv. dies, tum colentur,  
 colatura fervetur in vitro probè obturato.  
 Dosis ab ℥ss. ad ℥ij. post prandium vel cœnam.

vel

℞. *Extract. Trifol. aquat. inspiss.* ℥ss.

*Chalyb. cum Sulph. ppt.* ℥j.

*Ol. macis still. g.* vj.

F. Pilulæ no. xx. pro iiij. dosibus.

Sanguis glutinosior quoque corrigitur, si particulæ magis crudæ, tenaciores, scorbuticæ incidantur, attenuentur & diluantur. Præstant illud, præter medicamenta modo laudata, imprimis decocta *Lignorum Guajaci, Sassafras* &c. de quibus capite de *Lethargo* agam.

Eadem illa decocta spiritus animales seigniores excitant, id quod etiam obtineri potest à medicamentis spirituosis, & sale volatili præditis, quorum in principio curationis facta est mentio. Quod si dispositio hæc sanguinis & spirituum scorbuto sit accepta referenda, in usum debent vocari imprimis medicamenta antiscorbutica. *Eugalen* experientiâ constat, inter cætera, primum locum sibi *nasturtium aquaticum* vendicare. Vult autem illud intelligi, quod in claris & limpidis, non in putridis aquis, provenit. Hoc modo Coma levius superari potest, gravius, cum ad Apoplexiam accedat, eodem modo curari debet, ejus ergo cura è sequentibus est petenda.

Confirma-  
tio.

Libet ea quæ hætenus breviter dicta sunt illustrare & confirmare duplici observatione, altera quidem *Riverii*, altera *Foresti*. *Riverius* refert se puero 5 annorum præscripsisse clysterem ex *hiera, diaphenic. cum aqua benedicta*, quo multum purgatus est. Rejecto clystere exhibuisse *Sal. Viriol.* ℥ss. & paucis post horis liberatum esse.

*Forestus* habet observationem à se restituti ægroti, cui, post exhibitum *Oxymel. Scyllit. & Syr. de stachade*, præscripserat has pilulas:

℞. *Pilul. Cochiar.* ℥ijss.

*Castor.* ℥ss.

*Cum Syr. de Stachad.*

F. Pilulæ no. v. quibus alvus

egre-



egregie turbata fuit. Demum exhibuit *The-riaca* 3j. vigil factus, est & è somno ad mentem rediit:

Restat ut breviter quædam de diætâ adjiciamus. Aër sit purus & lucidus. De cibo & potu in paroxysmo graviore Diætâ non opus est præcipere: nihil appetunt, nihil sumunt ægri. In leviori, aut extra paroxysmum, vitanda repletio, ebrietas, fumendi sunt cibi facili digestionis, aromatibus conditi. Danda est opera, ut cibi probè dentibus comminuantur. *Vinum* generosum *salvium*, *enulatum*, aut *absinthites*, modica quantitate, egregiè prodest, præcipuè in ætate provectioni. *Vinum lac senum*. Motum & exercitium, tum ad somnum discutiendum, tum ad sanguinem viscosiorem corrigendum, tum ad viscera roboranda, maximè commendo. Nocent excretiones suppressæ, alvus servetur libera. Animi pathemata, imprimis tristitia, vitentur, lætitia prodest.

Carus est *sopor profundus*, adeo ut ægri vix, aut ne Carus: vix quidem excitari possint, à sanguinis febrili orgasmo, spirituum dissipatione, ac virium defectu febribus gravioribus superveniens. Hujus frequens apud *Hippocratem* fit mentio, verum diversâ enunciatione; aliquando enim dicitur, ἀφωλία, aliquando extasis, aliquando Coma, aliquando Carus, fortè etiam νάρκη, & ἀναυδία. Quamvis enim per ἀφωλίαν aliquando intelligatur Apoplexia, id non habet locum, ubi hæc febribus dicitur succedere, quemadmodum illud in Coacis §. 248. (conferri potest articulus præcedens) 253, 256. manifestum est. *Dietericus* in *Narthecio* rectè monet (voce ἀφωλῖα) hoc vocabulo ἀποπλήκτις ἢ κατὰ μὲν intelliigi. Citat etiam *Hollerium*, qui docet *Hippocratem*, nomine ἀφωλίας epilepsiam, apoplexiam, syncopen, cardiacam aliosque id genus affectus complecti, in quibus non solius vocis, sed sensus motusque, qui arbitrio fit, privatio est. Ego addo *Hippocratem*, quando Apoplexiam, vel affectum repentinum significare vult voce ἀφωλίας, non uno loco adjungere παραχρῆμα, ἐξαίφνης. *Aph.* v. 5. vi. 51. vii. 58. Hac enim nota Apoplexia à reliquis soporosis affectibus distinguitur. *Galenus* Carum, de quo nunc agimus, pulchre



descripsit *Tom. V. p. m.* 190. quem locum in superioribus citavi. Mecum facit *Ætius*, *Paulus Aegineta* & *Avicenna*. *Paulus l. 111. c. 9.* Lethargum à Caro distincturus, statuit & quidem rectissimè, Carum febribus vehementioribus succedere, his verbis : ἢ ὁ κάρῳ δὲ τῇ αὐτῆς ὡς ὕλης τῷ ληθαργῳ τέττα διαφέρει, τῷ τὸν πυρεττὸν ἡγεῖσθαι μὲν τῷ κάρῳ, ἢ σφοδρότερον εἶναι, ἐπεσθαι δὲ τῷ ληθαργῳ. Quum *Avicenna* tractat. l. III. Fen. I. Tract. IV. c. 1. de Subeth & somno s. Caro egisset. c. 3. de Cura Subeth & somni gravis, facti in febribus. Alia ergo est ratio curationis somni præternaturalis in febribus contingentis, distincta ab ea, quæ debetur somno absque febre. *Sennertus* quoque somnum profundum recenset inter symptomata Febrium, cum antea de Comate & Caro egisset inter capitis affectus. Somnus hic profundus revera est Carus aut κάρῳδης juxta *Hippocratem* & *Galenum*. *Feinejus* inter symptomata Febrium recenset capitis dolorem, soporem, ac mentis ignaviam, adferentem l. I. c. 18. *Pulverinus* etiam statuit Febrem præcedere Carum, cum Lethargus aliquando præcedat febrem, c. 8. Existimavit *Sylvius* somnolentiam in febribus oriri ab halitibus flatulentis : quamvis enim in eo erret, videtur tamen somnum, febrile symptoma, distinxisse ab aliis somni speciebus, de quibus tractat libro secundo, cum de somnolentia febrili egisset L. I. c. 29. §. 72. Recurrit quoque in explicatione Comatis somnolenti ad virtutem narcoticam, quam fatetur sese necdum posse explicare : in explicatione Cari, ad spirituum animalium dispositionem vitiosam L. II. c. 27. & 30. Ego putem ex iis, quæ dicta sunt, & adhuc dicentur, vim narcoticam satis manifestè elucescere.

Est somnus  
profundus.

Vidimus somnum hunc, quem nos Carum nominandum esse censemus, auctoribus non fuisse ignotum, *Hippocrati* plane cognitum. Videamus jam descriptionem in principio propositam : diximus Carum esse somnum adeo profundum, ut ægri vix, aut ne vix quidem excitari possint, & in hoc omnes vel plerique auctores saltem consentiunt, adeo quidem, ut fere cum Apoplexia confundant, uti in superioribus vidimus. Et revera Carus aliquando ita gravis est, ut ratione insensibilitatis ab Apoplexia non differat, etiam convulsiones habeat comites,



tes, in eo tantum est differentia, quod Apoplexia subito homines invadat, qui sibi videntur satis fani, eosque sensu & motu privet, cum Carum præcedat febris satis gravis, febris producat Carum, nec Carus unquam accidat, nisi illum comitetur febris; hinc dixi hunc febribus supervenire.

In descriptione tres causas enumeravi, quæ quamvis ali- Causæ cari.  
quando concurrant, distinctè tamen explicandæ sunt, ut species Cari accuratius distinguamus, & productionis modum intelligamus. Causa ergo Cari est febrilis orgasmus. Est enim non minus quam Phrenitis symptoma febrium, præcipuè acutarum, ac sæpe Phrenitidi aut Comati vigili succedit. Expressit hoc *Hippocrates* in Coacis 156. αἱ μετ' ἐκλύσεως ἀφω-  
νίαι, ἐν πυρετῷ ὁξεῖ ἀνιδρῶτι, εἰς μὲν θανάσιμοι &c. Non potest hic intelligi Apoplexia, quandoquidem illa repentè, nullâ præcedente febre, invadit, hic autem agitur de symptomate febrili, & quidem febrium acutarum, quod non aliud est quam Carus. Est autem Apoplexiæ æmula quandoquidem additur μετ' ἐκλύσεως, quod videbimus in Apoplexia quoque locum habere. Febrilis hic orgasmus nullam fermentationem aut effervescentiam in sanguine efficit, sed calorem, æstum, expansionem nimiam. Calor, æstus, pressio vehementior sanguinem expandunt, vasa replent & extendunt vehementius, unde cerebrum adeo deprimitur, nervi ita comprimuntur, ut sensus aboleatur, somnus producat profusus, uti in sequentibus adhuc dicendum erit. Hæc est vis illa narcotica, quam se ignorare fatebatur *Sylvius*, quamque ego primus (quod sciam) explicui in *Cogitationibus meis de instauratione Medicinæ*. Si enim supponamus, vasa cerebri ejusque membranarum minima, tantum puncti unius majorem acquirere latitudinem quam in statu naturali; arteriarum autem Carotidum majores truncos proportionaliter extendi, jam manifestum evadit, quantum cerebrum & nervi debeant premi, somnus produci profundus, sensus aboleri. Causæ hujus efficacia multum intenditur, si ante invasionem febris æger fuerit plethoricus, si vasa habuerit admodum repleta. Hinc etiam videmus homines robustos hisce symptomatibus soporosis aliquando vehementius corripiri. Et hæc est prima Cari species  
sta-



statim in principio, secundo aut tertio die, invadens & ægrotos pefundans. Ea, quæ *Petrus Salins Diversus* de affectibus particularibus c. 1. habet, forte non malè huic Cari speciei applicabuntur. Quamvis enim ibi agat de *inflammatione cerebri*, quandoquidem tamen non refert se post mortem in dissectione revera signa inflammationis invenisse, non est à ratione alienum symptomata eadem ex alio fonte deducere.

Spirituum  
dissipatio.

Altera Cari species est, quæ in augmento vel circa statum accidit, atque sæpe Comati vigili vel Phrenitidi succedit. Hujus causam brevitatis gratia expressi per spirituum dissipationem. Revera enim in febribus multi dissipantur spiritus, præcipue accedentibus vigiliis, aut Phrenitide. Intelligenda tamen est causa alia non minus efficax, febriumque continuarum pedisequa, & Phrenitidis focia, quæ est ipsa sanguinis à naturali statu immutatio. Febrilis quippe hic orgasmus, serum sanguinis liquidum & tenue in substantium excoquit, (liceat mihi hoc uti vocabulo, quandoquidem *Hippocrates* Febrem solet τὸ πῦρ appellare) gelatinæ non absimilem, unde magis magisque ineptus evadit circulationi absolvendæ. Reliqua & magis consistens pars sanguinis aliquando ita comminuitur, ut consistentiam ordinariam planè amittat, nec sese cultello dividi patiatur, sed instar cruoris diffluat. Et hanc ego existimo fuisse rationem, quare antiqui febres hæc appellaverint putridas, quia credebant hunc sanguinem esse revera putridum. Et quoniam humiditas non raro putredinis est causa, hinc etiam ægrotos à potu arcebant, non sine ingenti eorum detrimento: quippe non tantum molestiam sustinebat intolerabilem æger, verum etiam privabatur liquore, qui sanguinem diluere, æstum temperare & sudores promovere erat aptus natus. Hoc contra illos dictum sit qui putant errores antiquorum omnes fuisse innoxios. Sanguis hoc modo à febrili orgasmo immutatus, nimium replet fibrillas arteriarum per meningem tenuem & corticalem cerebri substantiam dispersas. Hinc oritur ἀφωλία, somnus cum virium resolutione. Hanc *Galenus* descripsit speciem. *Historia Bartholomæi Feer*, apud *Wepferum* p. 432. descripta, confirmat meam explicationem; etenim ibi post mortem inventa sunt vasa tenuis meningis valde



de cruore oppleta, & triplo ampliora, quam alias existunt: adeo ut primo intuitu omnia sanguine suffusa apparerent. Affectus autem, qui ægrotum sustulerat, rectissime à medico Hardero ad Carum fuit relatus. Vid. *ibid.* p. 435.

Dixi tertiam causam esse virium defectum. Quippe quanto diutius febrilis ille orgasmus perseverat, quanto spiritus Virium defectus. magis dissipantur, quanto sanguis magis à naturali desciscit, tanto magis vires fatiscunt. In sanguine brutorum anima esse dicitur, à sanguine ejusque pressione vita & vires humanæ dependent corporeæ. Itaque si ille in tantum degeneraverit, ut circulationi absolvendæ evadat impar, symptomata illa sequuntur, quæ vitæ finem instare significant. Inter illa signa est Cari tertia species, de qua nunc agimus, mortis instantis nuncia. Hanc speciem nomine Lethargi donavit *Willisus de Scorbuto c. 4.* Testatur autem se tales, somno perpetuo obrutos, aperuisse, & cerebrum fatis sic cum, ac hydrope, aut coluvie serosâ, quibus Lethargici plerumque afficiuntur, prorsus immuneprehendisse. Hæc omnia confirmant meam sententiam. Verum hæc somni & Cari species non semper à Scorbuto dependet, quamvis scorbuticos corripere possit.

Dixi Carum febribus gravioribus supervenire, adeoque etiam febrilibus symptomatibus Comati vigili, Vigiliis protractis, Est symptoma febris. Phrenitidi. Febri statim in principio supervenit Cari prima species, febrilibus symptomatibus, reliquæ duæ. Quamvis enim Carus & Phrenitis symptomata sint à se invicem valde sejuncta, Phrenitis quippe paucum aut interruptum somnum, Carus profundum; Phrenitis loquelam continuam, cantum vel etiam clamores habet conjunctos, Carus ἀφωρίαν: non rarò tamen contingit Carum succedere, & quidem repente, Comati vigili vel Phrenitidi. Coma enim vigil & Phrenitis, æstum habentes comitem & vigilias, spiritus consumendo, sanguinem magis magisque immutando, vires atterendo, ægrotum ad Carum disponunt. Hæc probè sunt observanda, ut causæ veræ harum affectionum eruantur. Non tantum ego hoc in praxi observavi, sed & ante me *Forestus* in scholiis ad *obs.* 3. l. x. quod equidem gaudeo. Succedit Carus facilius, si imprudenter usurpata sint medicamenta narcotica, quæ proinde



de cautè usurpanda, quando vires sunt attritæ, nisi dolor aut similes molestiæ, morte graviore, cogant medicum anceps in usum vocare potius medicamentum quam nullum. Rectè Zacus Lusitanus de M. P. H. L. 1. H. 7. p. m. 43. *Melior est noxa à medicamento illata, quam mors, quæ ex immani dolore plerumque contingere solet, ex Gal. 12. Meth. c. 1.* Sæpe tamen succedit Carus, quamvis ea non sint usurpata, quod probè observandum, ne omnino medicamentis tribuatur, quod est morbi sequela.

Catochus.

*Forestus* Carum appellavit soporem gravem, à quo æger excitari non potuit, è *Cranii* fractura. l. x. obs. 40. Rationem reddit in scholiis, quare hunc affectum non Apoplexiam, sed Carum appellet. *Hippocrates* ita affectos à cerebri concussione ἀφώγος dixit *Aph.* 58. s. vii. Ego putem tales Apoplexiâ, non Caro esse affectos, quandoquidem Carus & Apoplexia sunt distincti affectus, qui confunduntur, si hi negentur esse Apoplectici. *Idem* affectum similem à *Dodoneo* Lethargum appellatum Carum dixit. Et revera hic occurrit difficultas, quomodo appellandus sit propriè is affectus, quando ægri è capitis vulnere incidunt in somnum, à quo tamen excitantur. Ita *Wepferus* refert *Johannem Eberlin* è scalâ præcipitem & decidentem, primis horis adhuc excitatum & locutum fuisse: postmodum in Apoplexiam incidisse. Quamvis enim ille affectum generali Apoplexiæ nomine indigitet, ego tamen præludia, & Apoplexiam ipsam, si distinctè loqui velimus, non esse confundenda existimo. Vid. ipsius *observ. de Apoplexia* p. 332. Historias hujus affectus, de quo agimus, vide quoque apud *Bonnetum in Sepulchreto* p. 1562. 1566. 1572. 1580. Non est hic Apoplexia; sensu enim & motu non omnino destituuntur. Non est Lethargus, quandoquidem sine febre invadit, & febris postmodum excipiens non potest dici somnum cum stertore produxisse. Non est Carus, quandoquidem non producit à febre graviore. Hic apparet non laborare nos vocabulorum multitudinem, ad affectus capitis distincte appellandos; sed potius penuriâ. Dicendus ergo hic est Lethargus repentinus, ad differentiationem Lethargi ordinarii, vel aliud nomen ambiguum est restringendum, & huic morbo est applicandum. Dicamus ergo



in specie hunc affectum Catochon, nec amplius hoc vocabulo aut Coma vigil, aut Catalepsin intelligamus. Intelligamus hoc nomine etiam omnes affectus soporosos repentinos Apoplexia minus graves. Vel cum *Hippocrate* dicamus hoc symptoma ἐκπληξιν *Aph.* 14. VII. quia ægri à vulnere inflictò consternati in somnum, Apoplexiâ leviozem, incidunt. Cui hæc nomina minus arrident, is alia inveniat magis comoda.

Refert *Sennertus* ad Carum affectum illum, quo quidam corripuntur à fumo carbonum, in conclavi clauso accensorum, quem ego malim ad suffocationem reducere. Si quis tamen velit hunc etiam inter affectus soporosos esse enumerandum pertinebit ad Coma, vel Apoplexiam, vel Lethargum repentinum, vel potius Cotochon in specie. Non est enim Carus, quandoquidem is febris succedit, uti vidimus, hic autem nulla præcessit febris. Revera autem hos ægrotos suffocari, patet è repentina morte, tum etiam ex circumstantiis. Quandoquidem hi ægri destituuntur aëre libero, ad respirationem, & sanguinis per pulmonem transitum adeo necessario, circulatio per pulmones impeditur. E transitu hoc impedito in lipothymiam & syncopen incidunt, & nisi illis ocus succurratur, exspirant. Revera autem illos laborare è respirationis liberæ defectu, ex eo manifestum est, quod post mortem facies sit & remaneat floridi coloris. Deinde non memini me unquam intellexisse tales in stertorem incidisse, cum tamen non semel advenientium & januam aperientium ope plures fuerunt servati. Si ergo nomen proprium expetatur, posset hic affectus ad differentiam suffocationis hystericae, meo iudicio, non incommode dici, suffocatio syncopalis.

Suffocatio  
syncopalis.

Quandoquidem autem jam hujus morbi vel symptomatis facta est mentio, breviter cura est subjiçienda. Æger itaque statim in aërem liberum deducatur, vel deportetur; in affectibus levioribus enim sola aëris mutatio sufficit. Quod si hoc remediï genus minus potens sit, statim vena in brachio pertundenda erit; cum enim sanguinis motus in pulmone ferè sit sufflaminatus, atque ideo pulsus aboleatur, ad systolen & diastolen repetendam excitabitur cor, si venæ primum, deinde arteriæ

Ejus Cura.



depleantur; ita enim spatium amplius ingressuro è corde sanguini procuratur, id quod ad circulationem ejus non parum facit. Potest etiam *Sp. Sal. Armon.* naribus admoveri, aut *Sal. Volat. oleos* aut *Aqua Regin. Hungariae*. Interim aqua *Apoplectica*, *Vita Mathioli*, *Theriacalis* aut similis ori infundatur. Si ad vomitum sit proclivis æger, emeticum aut purgans exhibeatur. *Castoreum*, *Succinum* ejusque *oleum*, ac similia medicamenta *Cephalica* in hoc, non minus quam in affectibus capitis, utilia. *Hoeferus* in *Hercule medico* l. i. c. 5. Sub Lethargo descripsit suffocationem à musto in Austria satis frequentem: jubet autem semi-mortuum aëri libero exponi, & spiritum vini optimum cum *Theriacâ* ori infundi, ut & aquam *Apoplecticam*: postmodum dubium movet, an talia hic rectè in usum vocentur? Præfert *Acetum rutaceum*, vel aquam *Epilepticam* cum *aceto* destillatam, de *hirundinibus cum castoreo*. qui l. c. videri potest.

*ἀναυδία*

Dubitari etiam posset de *Cari* tertiâ specie, si ea in aliis morbis contingat, ubi insignis febris non præcessit, quo nomine sit appellanda? Videri possit hæc quoque species dicenda esse *Carus*, quandoquidem ordinariè febris satis vehemens simul invadere solet. Ego tamen existimo, hæc symptomata non esse confundenda, cum non meminerim ægros tum semper in somnum; sed è defectu virium, in sensus & loquelæ defectum incidere. Dicatur ergo hæc posterior species juxta *Hippocratem ἀναυδία*. Facit enim hic mentionem *ἀναυδίας ἐν πυρετῷ*: hæc mihi eadem est cum *Caro*: datur ergo *ἀναυδία* sine febre, vel saltem quæ à febre non dependet, & hæc est illa *ἀναυδία*, de qua jam ago. Non oritur hæc ab articulatæ vocis instrumentis læsis, uti perperam existimavit *Foesius* in *Oeconomia*, sed à virium prostratione, & facultatibus animali & vitali fatiscentibus. Hujus cura fere nulla est, cum mortem instantem præfagiat, si qua sit, consistit in virium languentium refocillatione, & plerumque humectatione. Præscribatur itaque hæc, aut similis mixtura:

℞. Aq. Fl. Tilie.

Violar. aa ʒij.

*Fu-*



*Fulap. Rosac. ʒʒ.*

*Sacchar. perlar. ʒj.*

M.

Præscribi etiam potest Enema, cuius formula in sequentibus videri potest. Quod si quis tamen hanc speciem ἐκστασιν σιγῶσαν appellare velit, ei nolim repugnare.

Non unius speciei est Carus, tres differentias in superioribus enumeravimus, quas hic repetere non est necesse. Quandoquidem autem morborum & symptomatum est quædam veluti latitudo, ratio postulat ut Carus dividatur in graviolem & leviolem. Verum descriptio Cari, quæ apud auctores existat, omnem ægris sensum & motum adimit, quam significationem nos quoque secuti, eodem modo de Caro egimus. Observamus autem sæpe somnolentiam & somnum profundum esse symptoma febris gravioris, è qua ægri facilius aut difficilius excitantur, & respondent, qui Lethargi nomine intelligi non potest, quandoquidem Lethargus propriè non est symptoma febris acutæ. Agendum itaque hic quoque est de febrili somno leviori, sed ad differentiam Cari ordinarii dicendus est hic somnus ὕπνῳ κατὰ δυνάμιν. Est igitur ὕπνῳ κατὰ δυνάμιν somnus profundior in febribus gravioribus contingens, ita tamen ut ægri possint expergefieri & respondeant. Oritur hic ab iisdem causis quibus Carus, sed levioribus. Hæc est veluti via ad Carum, & facilè in eundem mutari potest. Habet aliquando capitis gravitatem, vel Cephalalgiam comitem, & convulsionem minatur.

Differentia  
Cari.

De hac specie intelligi potest *Hippocrates* in *Coacis* I. II. f. I. §. 15. secundum *Duretum*. κεφαλαλγίη κατὰ δυνάμιν μετὰ βάρους ποιεῖ τι σπασμώδες. Aliquando Comatosi vocabulo utitur; non solet enim hæc distinguere c. II. §. 4. οἰκωματώδεις ὕπνοι. ἢ αἱ καταψύξεις ὀλέθριον. ita etiam §. 3. 5. 9. Opponitur huic Carus tanquam gradus intensior.

Inter differentias utiles & ad curationem cognitu necessarias *Sennertus* recenset, quod Carus alius sit per essentiam, ubi materia ejus in capite generatur, alius per consensum, & quidem nunc ex hac nunc ex illa parte. Itane? Estne hæc differentia utilis & necessaria? Ego putem inutilem & confu-

Ef 3

sio-



fionis parentem. Quæ est materia Cari? Non alia quam sanguis. Potestne is dici in capite generari? Minime quidem mea sententia. Generatur sanguis è chylo & chymo: hosce liquores non suppeditat caput. Miscentur hi humores non sanguini ad caput deportando; sed eidem à capite & brachiis &c. refluxo: nec ante ad caput deferitur, quam in cordis utroque ventriculo & pulmone non contemnendam subierit immutationem. Cari essentia in eo consistit, quod à febre producat, nullus alius datur Carus. Itaque omnis erit per essentiam. Sin autem velis Carum per consensum eum esse, qui à febre producat, omnis dicendus est per consensum. Omnis Carus est ejusdem generis, adeoque nullius ad praxin momenti est hæc differentia. Majoris momenti, & e praxi petita est differentia, quod Carus habeat conjunctas convulsiones vel motus convulsivos, alius hisce destituatur. Alius ab initio vexat, alius tardius accedit. Alius est Criticus, alius est symptomaticus: & prima quidem Cari species solet esse symptomatica, altera fere critica, tertia symptomatica & mortifera.

Signa.

Signa è descriptione sunt manifesta: æger laborat febre satis gravi, & profundè dormit: adeo ut videatur Apoplecticus. Non laborat tamen Apoplexia, quandoquidem febris præcessit. Idem illud rectissimè observavit *Forestus*, cujus verba ex *obs. 79. l. x.* adscribere libet, quia mirè meam sententiam confirmant: *Permansit autem illico ex Apoplexia sine sensu & motu, sine loquela - ad sex integros dies: quamquam tertio die prius - febris acuta illum invaserit: NAM SI AB INITIO febricitasset, PUTASSEM NON FUISSE APOPLEXIAM, SED CARUM.* Vides febrem distinguere Apoplexiam à Caro, quia hic illius, & quidem acutæ, est symptoma. Quamvis aliquomodo videatur sentire nonnumquam vellicatus, vel planè non loquitur, vel statim in somnum profundum delabitur æger. Species prima facile innotescit, quandoquidem statim in principio adest: secunda & tertia difficilius distinguuntur, saltem in principio. Hæc observâsse non erit inutile: in secunda specie febris non ingravescit, pulsus constat, graviora symptomata absunt. In tertia specie vires collabescunt, febris gravis, pulsus frequens, inæqualis, intermittens, ali-

quan-



quando convulsiones, motus convulsivi sæpius vexant. Somnus καρώδης ex eo cognoscitur, quod ægri tantum sint somnolenti, & non ita difficulter excitentur.

Quo ad Prognosin, Hippocratis bis pronunciavit τὸ καρώδες Prognosis. πανταχῶς κακόν. nempe in Coacis §. 178. & Prædict. I. VIII. §. 2. In febribus malignis è præcordiorum dolore obortis Carus pessimus. Οἱ ἐξ ὑποχονδρίων ἀλγύματ' πυρετοὶ κακοήθεις, τὸ καρώδες ἐπὶ τέτοις κάκισον. Ejusdem quoque enunciatio verissima huic pertinet αἱ ἐν πυρετῷ ἀναυδίαι, κακόν. Coac. I. 53. Per ἀναυδίαν hic Carus indigitari, vel si malis vocis defectum in Caro occurrentem, mihi videtur manifestissimum, confertur modo Coac. art. 77. Nempe si aliquis in principio vocem amittat, si ve etiam postquam à febre attritæ sunt vires in ἀφωνίαν incidat, si mens quasi somno obruta stupeat, facile intelligimus hunc periculosè decumbere. Carus absque sudore prorumpentè periculosior eo, qui cum sudore contigit. Carus cui jungitur convulsio periculosus. αἱ ἐν πυρετῷ ἀφωνίαι σπασμώδεα τροπον, ἐκῆσαι σιγῇ, ὀλέθριον. Coac. II. 248. Item Carus cum virium resolutione. αἱ μετ' ἐκλύσε' κατόχως ἀφωνίαι, ὀλέθριοι. Coac. II. 250. Quid significet Carus circa initia contingens, videri potest in Coacis II. 36, 37. Carus gravis Phrenitidi succedens *Hippia* sorori fuit funestus. Popul. VII. XXIX. §. 8, 9. Carus cum convulsionibus est admodum periculosus, ut & cum singultu. αἱ μετὰ λυγρῶς ἀφωνίαι κάκισον. Præd. I. III. §. 8. vide quoque seq. Tres illæ Cari species omnes sunt periculosæ, ita tamen ut de omnibus non possit ferri idem judicium. Prima Cari species est quidem satis periculosa, verum cum in principio accidat, remediis generosioribus concedit locum, unde successus sperari potest. Altera Cari species aliquando ad salutem ægroti terminatur. Tertia species maximè periculosa & instantis mortis nuncia. Febris καρώδης non est ita periculosa, si medicus tempestivè advocetur, antequam morbus eundo vires acquisivit. Ex professo quædam *Hippocratis* loca citavi, quæ si quis diligenter expendat, is videbit meam sententiam è multis Aphorismis posse confirmari, & *Hippocratis* mentem, ex iis, quæ diximus, clariorem reddi, atque facilius & distinctius explicari.

In-



Indicationes

Indicationes in hoc affectu sunt, ægrotum excitare, febri-  
lem orgasmum compescere, sanguinem corrigere, spirituum  
dissipationi occurrere.

Cura.

Quemadmodum in indicationibus, ita etiam in curatione  
primum locum sibi vendicat excitatio ægroti. Hæc ita latè  
posset accipi, ut integram curam suo ambitu complectatur;  
verum ego hic accipio in strictissima significatione, ut ab aliis  
indicationibus distinguatur. Nempe quando medicus vocatur  
ad ægrotum somno gravi oppressum, statim conatur ægrotum  
excitare: id quod tum in usum statim vocari potest, à me hoc  
loco intelligitur. Excitandus est itaque æger clamoribus,  
vellicationibus, naribus admovendo acria & spiritus excitan-  
tia, frictionibus. Clamores omnes non sunt æque utiles, ve-  
rum voce altâ, nomine proprio est compellendus æger; ita  
enim excitatur aliquando attentio. Vox consueta amici dilecti  
hic est utilis. Magis efficax est clamor, si vellicationes jun-  
gantur. Imprimis autem naribus admovenda *salia volatilia*,  
*spiritus subtiles*, *acetum acre*. Frictiones extremitatum, ma-  
nuum & pedum, pannis asperioribus, quoque sunt utiles.

Sanguinis  
orgasmi  
compescen-  
tia.

Sanguinis orgasmus, depressionem cerebri & somnum produ-  
cens, compescitur V. S. Clysteribus, purgantibus, refrige-  
rantibus. Venæ sectio etiam ad excitationem ægri facit; ve-  
rum cum præcipuus ejus usus sit, in hoc casu, æstum san-  
guinis compescere, ideo huic inter remedia æstum temperan-  
tia primum dedi locum. Calor noster naturalis moderatæ,  
præter naturalis sanguinis pressionis majori debetur. Cum ergo  
V. S. sanguinis imminuat molem, imminuit etiam pressionis  
vehementiam, atque orgasmum. V. S. summum in hoc morbo  
est remedium. Videndum itaque, quando ea conveniat, quan-  
do autem minime. Convenit V. S. in plethoricis, robustis,  
in principio febrium, in iis qui huic remedio sunt assueti, at-  
que id neglexerunt. *καρτεράειν* & Carus sæpe ex eo oriun-  
tur, quod non satis tempestivè, aut sufficienter, instituta fue-  
rit V. S. In hisce casibus igitur, & Cari primâ specie, insti-  
tuatur V. S. larga: eaque, si necessitas id flagitet, repetatur.  
Meticulosi ordinariè nimis sumus in exhauriendo sanguine,  
quamvis in capitis affectibus id omnino necessarium & salutare  
sit.



fit. Testatur id de se *Parens* ; testatur idem se , cum maximo ægroti commodo, septem & viginti vascula, quinque vicibus, quatuor dierum spatio, juveni alicui vulnerato detraxisse. l. ix. c. 14. Ordinariè eligitur brachium, potest tamen V. S. in manu, pede &c. institui, prout circumstantiæ illud suaserint. Non est instituenda in tertia cari specie, aut viribus prostratis, præcipuè accedentibus convulsionibus; convulsiones tamen, in principio & prima specie, non tam impediunt, quam suadent V. S. In secundâ specie, ut plurimum, omitenda est, quandoquidem ea aliquando est critica, & circa statum morbi (in quo quiescere oportet) accidit. Venæ sectionis vicem implent cucurbitulæ scarificatæ, verum segnius. Usurpari possunt, quando V. S. non est sufficienter instituta, & quando dolorem inferendo excitare ægrum est animus.

Orgasmm sanguinis etiam compescunt clysteres, quia intestina excrementis repleta (uti in morbis acutis & corporibus subito prostratis solet) æstuant, atque æstum sanguini communicant. Fovendæ sunt igitur & humectandæ hæ partes, & à saburrâ humorum liberandæ. Irritatio etiam illa aliquid potest ad excutiendum somnum. Itaque vel ante, vel post V. S. statim in usum vocari possunt.

Clysteres.

℞. *Fol. Violar. Malvæ.*

*Mercur. Parietar. aa m. j.*

*Flor. Rosar. pallid.*

*Hord. integri.*

*Furfur. aa p. j.*

*Sem. fenic. ʒij.*

Coq. f. a. ex aq. pura colat. ʒx. Add.

*Mellis Mercur.*

*Elect. Diaprun. sol. aa ʒj.*

*Sal. Gemm. ʒj.*

M. F. Enema.

Non tantum in usum vocari possunt enemata statim in principio, sed & postea sæpius iterari. V. S. potest esse intempestiva, purgantia possunt esse suspecta; verum enemata ferè semper utilia sunt, & in quacunque Cari specie; ita tamen,

Gg

ut



ut si mors videatur instare, tum potius quiescamus, ne medicamento tribuatur id, quod est sequela morbi.

Suppositoria

Possunt quoque in hoc casu in usum vocari suppositoria, sed ea sunt minoris efficaciae. Quamvis enim *melli* ad consistentiam cocto addantur vel *species hieræ*, vel *Colocynthis*, cum *sale communi* vel *sale gemma*, & ita ad excretionem stimulentur intestina, fetus tamen ille, & blanda humectatio partium, sanguineis vasis copiosissimè gaudentium, deficit. En formulam *Francisci Hildesheim*.

℞. *Hellebor. albi.*

*Nitri, Sal. Gemma aa gr. vj.*

*Colocynth. ℥ß.*

*Mellis q. s.*

M. & F. suppositorium.

Purgantia.

Purgantia etiam ad compescendum æstum sanguinis faciunt. Non quod *cholagoga* dicta medicamenta tantum bilem evacuent, cui æstum tribuunt auctores, sed quod medicamenta purgantia secretionem humorum per glandulas, & excretionem promoveant. Diminuta autem secretio & excretio bilis, succi pancreatici, salivæ, urinæ, &c. in statu morbofo & febribus, morbum aggravat, & æstum auget, uti illud è praxi est apertissimum. Purgantia autem in Caro usurpanda non sunt ejusdem generis; nempe in Cari prima specie, & morbi principio validiora in usum vocare convenit, à quibus, in reliquis duabus, omnino est abstinendum, vel si quid moliri necessitas postulet, eligenda sunt medicamenta minus efficacia. Conveniunt itaque in principio *Gialappa*, *Scammonium*, *Electuarium Cholagogum Sylvii*, *Panchymagogum nostrum* è *succo Rosarum*, *Extract. Alhand. Pharm. Bat. Magister. Git.* ejusdem *Pulvis Senn. Wieri, Cornachin.* &c. Ratio autem, quare hic requirantur validiora, facile perspicitur, quia scilicet est affectus soporofus satis vehemens, in quo purgantium stimulus non ita facile percipitur, & tamen requiritur, ut somnum excutiat.

℞. *Elect. Panchymagog. nostr. ℥iij.*

*Sal. Tartar. gr. v.*

*Cremor.*



*Cremor. Tartar. ʒß.*

*Aq. Betenic. q. s.*

M. F. Haustus.

℞. *Pulv. Rad. Gialapp. ʒj.*

*Cremor. Tartar. ʒß.*

*Diagrid. gr. iv.*

*Trochisc. Alband. gr. j.*

F. Pulvis.

Reperiuntur quidem aliæ formulæ apud auctores ; verum cum hi non animadverterint febrem jungi Caro , aut Carum à Lethargo non satis distinxerint , adduntur *Tinctura Castor. Succin. Sal. ejusdem, Castoreum* in fatis larga quantitate ; quæ ratione febris & æstus hic non conveniunt.

Mitiora optimè forma infusionis vel decocti exhibentur.

Mitiora.

℞. *Rhei elect. ʒj.*

*Fol. senn. mund. ʒß.*

*Sem. anis. ʒß.*

Infundantur per noctem in aqua tartarizat. colat. ʒiij. Add.

*Syr. Diacnicu. ʒij.*

M. F. Haustus.

*Decoctum Rhabarbari* Pharmocopææ Bateanæ hic est utilis-  
fimum.

Ad purgantia referuntur quoque emetica, quorum, in prin-  
cipio, ventriculo adhuc repleto, tum ad evacuandum, tum  
ad excitandum, insignis potest esse usus. *Rolfincius* laudat *Mer-*  
*curium vitæ* & præscribit :

Emetica.

℞. *Rosæ vitæ mineral. gr. viij.*

*Gialap. pulv. gr. v.*

*Eleosacchar. Citri. gr. iij.*

In charta D.

℞. *Aq. Benedict. Ruland. ʒvj.*

*Syr. Fl. Tunic. ʒij.*

M. F. Potiuncula.



Refrigeran-  
tia.

De refrigerantibus non est opus hic multis agere, quandoquidem horum tractatio ad doctrinam de febribus pertinet. In usum vocari possunt *decoctum album* & *decoctum ad sitim* Pharmacopææ Bateanæ.

Sanguinem  
corrigentia.

Sanguinis correctio, distincta ab indicationibus jam propositis, consistit præcipuè in sudoris provocatione.

Ea fere in omnibus febribus habet locum, præcipuè autem in continuis & malignis. Oportet, ut illa fiat per medicamenta appropriata, & temperatiora. Non ergo promiscuè in omnibus ægris exhibebimus *Theriacam*, *Mithridatum*, &c. Nec etiam maximâ testaceorum pulverum copiâ debiliū & languentium ægrotorum onerabimus ventriculum: sed pro morbi, ægrotorum & symptomatum varietate, illa immutabimus, & curabimus, ne conveniens desit vehiculum. Conveniunt *Aceta* varia, *Sambucinum*, *Calendula*, *Rutaceum*, *Destillatum*, *Acetum nostrum Bezoardicum*. *Aqua Alexipharmaca*, *Prophylactica*. *Antimonium Diaphoreticum*, *Bezoardicum minerale*, *Sp. Nitri*, *Sp. Vitrioli*, *Salis dulcis*, *Succus Citri*: *Alumen febrifugum*, antifebriale concharum Pharm. Bat. *Decoctum Ambrosianum*, *Decoctum Citri*, *Card. bened.* *Crocus Fl. Calendula*. *Pulvis Cantianus*. *Rad. Contraier.* *Sal. Absinth.* *Card. bened. Ruthæ.* &c. *Succi herbarum* harum & similium inspissati. *Mixtura simplex* &c. Ex hisce & similibus variæ possunt concinnari formulæ ex. gr.

℞. *Aq. Ruthæ.**Meliss.**Acet. Bezoard. aa ʒjss.**Oc. Cancr. tenuiss. pulv.**Cremor. diaphoret. aa ʒss.**Croci Britannic. ʒss.**Syr. è Succo Card. ben. ʒj.*

M.

Non admodum dissimilis est mixtura, quam præscripsit P. Bar-  
bette capite de Febribus.

℞. *Aq. Prophylact. ʒjss.**Barrag.**Card.*



*Card. bened. aa ʒj.*  
*Julap. Rosar. ʒjʒ.*  
*Sacchar. perlar. ʒij.*

M.

Si cui forma pulveris magis arrideat, is sequenti uti poterit :

*Rx. Lapid. prunell. ʒj.*  
*Bezoard. mineral.*  
*Unicorn. ppt.*  
*Sacchar. perlar. aa ʒʒ.*

F. Pulvis pro iv. dosibus.

Spirituum dissipationi, cui & virium defectus adscribendus est, occurritur, vigilias continuatas, Coma vigil, Phrenitidem, quam ocissimè tollendo; hæc enim symptomata spiritus animales dissipant, & sæpe Carum præcedunt. Deinde etiam spiritus blande excitando, quod fit imprimis per acida, tam interne quam externe adhibita. Novi plurimos, abhinc aliquot annis, medicos contra aciditatem acuisse stylum: ego tamen nullo modo vereor, in hisce & similibus morbis, de meliori nota commendare acida. Provoco ad experientiam, nonne ab acidis sæpe optimè habuerunt ægroti? Nonne acida, naribus admota, sæpissimè languidos & lypothymiâ correptos excitant? Est ergo egregius acidorum usus. In quo autem casu potissimum, nisi ubi spiritus, ab æstu languidi, sunt excitandi? Vidit id *Timæus* qui in febribus non semel præscripsit acida, quorum formulas duas tresve subjungere libet.

Quomodo  
spirituum  
dissipationi  
occuratur?

*Rx. Aq. Endiv. Acetos. Endiv. aa ʒvj.*

*Syr. Acetosel. Granator. aa ʒij.*

*Succi Citri recent. express. ʒjʒ.*

M. F. Jolabium.

*Rx. Aq. Acetosel. ʒvj. Fl. Borrag.*

*Bugloss. aa ʒiij.*

*Syr. de Rubo Ideo. Berber. aa ʒij.*

*Sp. Vitrioli q. s. ad gratam aciditatem.*

M.

*Rx. Aq. Endiv. Acetosel. Cichor. aa ʒvij.*

*Syr. è succo Acetos. Endiv.*

Gg 3.

Vini.



*Vini Granator. aa* ℥j℥.

*Succi Citri recent. express.* ℥ij℥.

M.

Ad spiritus blandè excitandos etiam utile est, *acetum*, vel *Rutham hortensem* viridem *aceto* madidam, naribus admovisse. Utilissimum quoque est, si vapor *Aceti Celendulae*, *Sambucini* vel similis nares ægroti feriat. Excitatur hic, si lateribus candentibus inspergatur *Acetum* modo laudatum. Odor talis admodum est penetrans, adversus malignitatem utilis, ut & aëris emendationem. Hunc vaporem quoque commendat *Avicenna*. Utile quoque dicit *Theriaca*, aut *Mithridatio* palatum & labia inungere, quibus aliquid Castorei addi potest. Subjungit : efficacissima in hoc genere est *Confectio Anacardina* cum *Aceto Scyllitico*, si FEBRIS EAM ADMITTAT. Hæc cautela utilissima est ; quis enim ubi summus est æstus, oleum camino addat?

Cura specialis Primæ speciei.

Absolutis indicationibus generalibus, videndum quid singulæ species habeant peculiare, ad quæ attendere necesse est. In prima specie, V. S. larga & repetita, purgationes, vomitoria, audacius in usum revocanda : refrigerantia, sudorifera, acida efficaciora usurpanda. Nec tantum spiritus excitandi sunt blandioribus externis, quorum superius est facta mentio, sed & cucurbitulæ & vesicatoria in usum vocari possunt. Jubet *Sennertus* ad primam vel secundam vertebra Cucurbitulas, vel Phænigmos, aut vesicantia applicare. Possunt etiam *Cantharides*, vel *Emplastrum Cantharidum*, cruribus imponi, & ulcuscula vel consolidari, vel aperta servari, pro variâ circumstantiarum ratione, & medici prudentia.

Secundæ.

In altera Cari specie remedia potentiora sunt omittenda, ac si spiritus sint excitandi, illud fiat blandioribus. Prima species est symptomatica, hæc aliquando critica; ubi autem natura crîsim molitur, eam tunc interturbendam esse, nec ratio, nec experientia docet. In hoc ergo casu Enemata imprimis in usum vocantur, & cardiaca temperatiora, in quem finem laudantur *Aqua Cordialis Herculis Saxoniae*, *Carbunculi*, *Cinnamomi cum fl. Borraginis absque vino destillata*. Utiliter quoque exhibetur *Gelatina C. C.* cui aliquid *Succi Citri recent.*

&



& *Saccharum Crystallinum*, vel *Perlarum* ad gratiam est additum. Inter externa imprimis conveniunt *supplantalia è fermento, ruta, aceto*. Hoc pacto enim æstus temperatur, & particularum acrium per cutem evaporatio promovetur, quia scilicet æstus febrilis in extremitatibus corporis nostri est manifestus. Cucurbitulas & vesicatoria, in hac specie, ut plurimum omitendas esse cenfeo, ut & in tertia sequente. Si enim Carus sit criticus, naturæ negotium committendum est; sin autem mortis sit prænuncius, quis ab omni humanitate ita sit alienus, ut in his extremis anxietatibus addere velit molestias? Alia Cari, alia Comatis aut Lethargi est ratio. Si in hisce posterioribus casibus spiritus sint excitati, si somnus sit excussus, affectus ipse magnam partem est sublatus, in Caro autem, licet somnus sit superatus, non tamen omni periculo defunctus est æger, non tamen febris superata, non tamen vires restitutæ. Itaque quæ de colloquiis, vellicationibus, strepitu, ligaturis, frictionibus dicuntur, ea vel prudenter in usum vocanda, vel prudenter omittenda sunt.

In tertia Cari specie periculum indicandum, & quiescendum est, nisi quod sitis, æstum, ariditas linguæ lenienda veniant. A nimia siti fatiscunt sani, multo magis febricitantes, & à symptomatum vehementia exhausti. Julapium sequens in hac & priori specie potest exhiberi, quod

Tertiæ.

Rx. *Decoct. Scorzonæ & C. C.* ℥j.

*Sp. Nitri d.* ℥ss.

*Rob. Ribesior.* ℥j.

M.

De somno carotico non est quod multa addamus, quandoquidem eadem est curationis methodus. Remediorum efficacia morbo respondere debet. Maturè occurrendum, ne levior species in graviolem degeneret.

Somni carotici.

In Caro convulsionibus stipato, majus imminet periculum. V. S. hic requiritur liberalior, si in principio contingat, purgantia validiora. Medicamentis reliquis addenda sunt ea, quæ adversus Convulsiones laudantur, sed temperatiora: neque enim ita convulsiones sunt respiciendæ, ut febris negligatur.

Cari cum convulsionibus.

Restat ut paucis subjiciamus diætam. Aer sit purus, tem-

Diæta.

pe-



peratus, ad frigiditatem vergans, vapore *aceti* imbutus. Tempore hiberno in foco ignis luceat. Cubiculum sit spatiosum & amplum, vitetur invisentium vel salutantium turba. Victus sit tenuissimus, qualis in morbis acutis requiritur. Potus sit itidem tenuis, vitentur cerevisiæ generosiores, imprimis eæ in quibus *Sclarea*, aut *Coriandrum* sese exserit. Vinum ut plurimum vitetur, nisi acidulis parvâ addatur quantitate. Somnus ipse est affectus, de quo agimus, cujusque superandi modum in superioribus proposuimus. Motus hic locum non habet, mutatio lecti non tantum concedatur, sed & impereatur, nisi sudor aut virium debilitas impediat. Alvus servari debet libera. Passionum impetum Carus obruit, si iis posset esse locus, lætitia spiritus excitans conveniret.

## C A P U T O C T A V U M.

### *De Lethargo.*

Explicatio-  
nis Lethargi  
difficultas.

**E**Xplicationem Lethargi difficilem reddit, tum vocis ambiguitas, tum varii, qui in auctorum scriptis irreperunt, errores. Ambiguitatem vocabuli ante me observavit *Sennertus*, scilicet Lethargi vocem non minus quam vocabulum Comatis & Cari, generaliter pro omni sopore profundo, & difficilis expergefactionis usurpari. Ambiguitas & homonymia vocabulorum ansam dedit confusione, de qua capite præcedenti egimus. Erroribus variis occasionem dedit, ignoratio circulationis sanguinis, & conatus è quatuor humoribus omnes morbos deducendi. Errores è descriptione vulgari elucescent, quæ talis proponitur à *sonstono*.

Descriptio  
vulgaris exa-  
minatur.

Lethargus est *inexplebilis in somnum propensio, cum febre lenta, oblivione & torpore, è pituitoso sanguine in posterioribus cerebri sinibus putrescente, exorta*. Non est Lethargus in somnum propensio, quod & Comati convenit, sed & sopor profundus. Febris, quantum ego observavi, non est dicenda lenta, cum revera sit gravior, quamvis non negem febrem, per se consideratam, non esse magni momenti, nisi adesset Lethargus, qui fe-



febrem multo graviores efficit. Quæ de oblivione dicuntur procul dubio Etymologiæ vocis tribuenda sunt, de qua prolixè disputantem vide *Schneiderum de Morbis capitis*. Cap. de Lethargo. Oblivio ita intelligenda est: ægri excitati non sunt præsentis animo, sed quasi attoniti, uti illud etiam sanis aliquando contingit, qui, mediâ nocte subitò excitati, stupent: si aliquomodo excitati respondeant, tamen postea ejus non meminerunt: alias memoriam esse læsam, non meminisse observasse. *Caspar Hofmannus* apud *Schneiderum* l. c. meritò ambigit, an in Lethargo semper lædatur memoria? q. v. Non meminisse etiam observasse delirium, cujus *Sennertus* in descriptione facit mentionem, nec quadrat illud cum reliquis descriptionis partibus. Delirium acutarum febrium symptoma est, non lentarum. Delirium non à principio febris ad finem usque infestat, sed in augmento morbi, vel circa statum ingruit. Delirium spiritus agiles requirit, non torpidos. Quæ de pituitâ in posterioribus cerebri ventriculis putrescente adduntur, crassam ignorantiam sapiunt. Quamvis enim non negem serum aliquando in cerebri ventriculis inveniri, nego, quod illi supponunt, ventriculos spirituum animalium esse promptuaria: nego pituitam ibi putrescere: nego putredinem illam esse causam febris. Non est necesse has opiniones refutare, cum *Platerus* jam dudum contenderit, à putredine pituitæ, præsertim in capite, nequaquam incendi febrem, nec eundem humorem frigiditate suâ soporem gravem, & calore febrem accendere: quia unum idemque & frigidum & calidum esse nequit. *Plateri* sententiam probat *Sennertus*, qui videri potest.

*Lethargus est sopor gravis cum febre & stertore, in quo ægri excitati respondent, & iterum in somnum relabuntur.*

Descriptio  
accuratior.

Est hæc descriptio Lethargi tanquam symptomatis, ut ex eâ statim natura ejus, & discrimen quod huic cum præcedenti intercedit, elucescat. Quanquam enim ego præferam descriptiones morbi ipsius naturam exprimentes, in hoc tamen casu, nimium mihi discedendum esset à practitorum consuetudine, & à conceptu, quem vox Lethargi nobis ingerit, si sanguinis, spirituum & cerebri potissimum facerem mentio-

Hh

nem



nem. Deinde sopor est genus adæquatum, pluribus affectibus commune, à quibus per ea quæ adjecta sunt distinguitur. Febris aliquando est gravior, aliquando levior, ita tamen ut febris non producat Lethargum, quemadmodum illud Carri est proprium, sed eadem causa Lethargum producens producit etiam Febrem, quod cum antiqui non intelligerent, finxerunt pituitam in cerebri ventriculis putrescentem. Totum autem hoc negotium verius & facilius explicari posse, è sequentibus patebit.

*Stertor.*

Stertor semper Lethargum comitatur, quantum ego hæcenus observavi, verum is non constituit essentiam Lethargi, cum is in aliis quoque morbis observetur. Stertor adest in Comate, sterter adest in Caro, sterter adest aliquando in Apoplexiâ. Novi auctores narrare in Apoplexia respirationem cessare, quod etiam fortassè verum est, morte instante, alias ego non memini me hæcenus vidisse Apoplecticum, quin respirationis adestet manifesta & laboriosa, aut cum stertore. Fortassè auctores, qui talia memoriæ mandarunt, non satis distinxerunt Apoplexiam à Syncope.

*Lethargi & reliquorum affectuum soporosorum discrimen.*

Dicet fortassè aliquis: si in hisce variis casibus observetur sterter, qua ratione Apoplexiam & Lethargum distinguas à reliquis affectibus? Respondeo: id debere fieri per notas characteristicas jam explicatas, & in sequentibus ulterius explicandas. Breviter. Apoplexia subito invadit, motus & sensum prorsus abolet, absque præcedenti febre. Carum semper præcedit febris satis gravis. In Lethargo excitantur ægroti, respondent & levius febricitant. In Comate somnolento plerumque non ita graviter, vel à causâ externâ, in somnum incidunt ægroti absque febre. Vel ægrotos ante comatis invasionem vexavit segnities scorbutica: vel præcessit aut comitatur Ischuria.

*Ægri loquuntur, & iterum in somnum labuntur.*

Ægros excitari, ad interrogata respondere, atque iterum in somnum relabi constans medicorum est sententia. Quamvis enim circa morbi gravitatem differant, nec semper iisdem modis loquendi utantur, solent tamen, ut probent oblivionem comitari hunc affectum, adducere hoc exemplum, ægrotos matulam petere, & oblivisci se eam habere. Verum

fi



si ritè calculum ponamus, debile & infirmum est hoc argumentum oblivionis, illud enim & sano somnolento contingere potest, num ideo censendum esset istius memoriam esse læsam? Hinc autem manifestissimè evincitur, lethargum esse somnum è quo excitantur, loquuntur, & iterum in somnum relabuntur ægri. Deinde differentia Hyſtericæ passionis & Lethargi in eo constituitur, quod in hoc affectu ægri respondeant & febri-  
citant.

Non agam hic prolixè de somno, aut de propensione ingenti ad somnum, quæ tum in sanis, tum in ægris observatur; suppono enim lecta & meditata esse ea quæ de hac materia fufius in *Cogitationibus meis de instauratione Medicinæ disputavi*. Sufficiat observâsse repletionem arteriarum carotidum, cerebri externam superficiem, & meningem tenuem perreptantium, esse causam pressionis cerebri atque nervorum, unde primum languor sensuum externorum, deinde quies sequitur. Repletio hæc arteriarum majoris est efficacix, si spiritus animales simul sint vel dissipati vel torpidi.

Breviter  
somnus at-  
tingitur.

Causæ itaque Lethargi erunt quæcumque repletionem præternaturalem efficiunt, quæque spiritus torpidos reddunt: deinde in genere omnia, quæ pressionem medullaris substantiæ & nervorum majorem producunt. Oportet igitur hic considerare cerebrum, sanguinem, humorum colluviem, spiritus animales.

Causæ Le-  
thargi.

Si cerebrum sit humidum, facile concipimus illud subfidentix & compressioni magis esse obnoxium; tale autem cerebrum post mortem non semel inventum est. Vid. *Boneti Anat. Pract. l. I. sect. III. obs. 3, 4, 8*. Eodem modo Hydrocephali comes potest esse Lethargus. Vid. *ibid. obs. II*. Huc pertinet quoque abscessus & pus, Apostema & Spacelismus cerebri. Vid. *ibid. observ. 33, 34*. Similis quoque est ratio si meninges vel cerebri exterior ambitus tumore phlegmonode sint obsessæ. *obs. 36*.

Cerebrum.

Sanguis peccat vel nimia copia, vel lentore nimio. Copia sanguinis sequitur victum liberaliorem, vitam sedentariam, evacuationes suppressas. Si ergo in hoc casu morbum, morbi causam, & symptoma distinguere placeat, morbus erit reple-

Sanguis pec-  
cat copia.



tio vasorum & cerebri depressio, sanguinis nimia copia erit causa morbi, somnus symptoma. Adeo ut repletio vasorum, & cerebri depressio, quæ symptomatis ratione dicuntur causæ, revera sint id, quod morbi essentiam constituit, scilicet dispositio p. n. actiones lædens. Revera autem sanguinem hoc modo producere Lethargum, ex eo fit manifestum, quod post mortem etiam vasa tenuis meningis sanguine turgida fuerint inventa. Vid. *Bonnet. l. c. obs. 16.*

Lentore.

Lentor sanguinis oritur, vel à moerore continuato, vel à cibis viscidis, concoctu difficilibus & pravâ diætâ. Huc referri possunt ea quæ habet *Bonetus observ. 19.* de sanguine melancholico, quo vasa meningum repleta fuerunt in cadavere comatosi & Lethargici post mortem. Quod si dispositio scorbutica conjungatur, manifestior evadit hæc sanguinis dispositio. Vide *Willisium, Eugalenum, &c.*

Humorum  
colluvies.

Sequitur humorum, præcipuè serosorum, illuvies, copiâ & pondere cerebrum deprimens. Ita aqua limpida, & crystallo clarior non semel post mortem in ventriculis cerebri & capite fuit inventa. *ibid. obs. 9. 12, 21.* Hinc rectè contendit *Car. Piso* de morbis à serosâ colluvie exortis *Sect. 11. Part. 11. c. 6.* *Lethargum fieri madefactis cerebri membranis, ejusque corpore pregnante multo seroso humore, itaque ventriculis potius compressis, quam verè obstructis: quia denique sensus non omnino sunt obruti, eam certè compressionem sive gravitatem corporis cerebri mediocrem esse, non summam, ut fortè in Apoplexia fateri oportet.* Oportet enim ut à se invicem distinguantur Apoplexia & Lethargus: nam subita illa sensus & motus privatio, quæ vulnera capitis non raro excipit, accuratè loquendo, non est dicenda Lethargus, sed Apoplexia. Hæc est ratio, quare in hoc capite nullam vulnerum fecerim mentionem. Lethargus non ita subito, nec adeo graviter invadit, vel si videatur alicui affectus minus gravis dicendus esse Lethargus, dicatur repentinus, atque ita patebit, non intelligi Lethargum cum febre sensim invadentem, sed affectum Apoplexiæ cognatum.

Spiritus.

Spiritus animales peccant torpore, seu motu & agitatione minore: ita enim pressioni cerebri non multum resistunt, nec facile ad motum excitantur. Cum spirituum anima-

ma-



malium torpor à dispositione sanguinis pendeat, eadem sunt causæ spirituum torpidorum, quæ sanguinis lenti.

Quando utraque hæc causa, nempe lentor sanguinis & spirituum torpor, concurrunt, uti fere contingit, quandoquidem una alterius est causa & effectus, gravior solet esse Lethargus. Sanguis quippe difficilius capillaria vasa permeans, premit corticalem cerebri substantiam, meninge tenui undique involutam, spiritus torpidiores depressioni cerebri & compressioni resistendo sunt minus apti, ergo ita comprimitur cerebrum & nervi, ut in somnum profundissimum incidant ægroti. Atque hinc jam patet, quomodo eadem sit causa somni præternaturalis hujus atque febris, & quidem minus vehementis. Difficultas illa transitus sanguinis, cor ad frequentiore contractionem compellit, adeoque pulsum frequentiore medico tangendum exhibet, qui ipsi febris indicium præbet. Difficultas illa transitus oritur ab ejusdem lentore, seu minori exaltatione. Idem ille lentor est causa repletionis vasorum, & compressionis cerebri, adeoque somni præternaturalis. Itaque eadem illa causa, quæ producit febrem, producit quoque Lethargum & vice versâ. Hinc jam perspicitur, illa quæ de pituitâ putrescente, ut & pulsu raro à practicis dicta sunt, esse absurda & erronea.

Causarum complicatio.

Non putrescit pituita in posterioribus cerebri ventriculis, nec talis post mortem unquam, quod sciam, inventa est. Inventa est aqua limpida, inventum est serum copiosum, inventum est pus, inventum est cerebrum corruptum, pituita putrida inventa non est. Si quis autem ea, quæ de pituita putrescente exarata exstant, de sanguine pituitoso intelligenda esse contendat, is cogitet, sanguinem velut perpetuum esse mobile, putredinem non habere locum in liquoribus continuò & celeriter motis. Non putrescit sanguis, nisi putredinis vox improprie sumatur. Et si supponatur putrescere, putredo deberet esse universalis, non in solo cerebro, quia sanguis continuo in circulum movetur. Causa erroris est, quod vigilias putaverint excitari à bile fervidâ, versus cerebrum repente. Cum autem vigiliæ & somnus sibi mutuo essent oppositi, causam contrariam excogitarunt somnum producentem, nempe pituitam.

Errores vulgares deteguntur.



Pituita autem, humor frigidus & humidus, non videbatur febrem, quam *Hippocrates* πῶς vocat, productura, nisi putredo succurreret. Quæ de pulsu tardo & raro dicuntur, sunt ejusdem farinae. Nempe cum Febris signum sit pulsus p. n. frequentior, quomodo febrem adesse judicabimus, si in pulsu nullum ejus appareat indicium? Si autem pulsus rarus & tardus signum sit febris, corruunt ea, quæ circa febrem, diligentissimi observarunt practici. Quid? quod hoc pacto doctrina de pulsu reddatur dubia & incerta?

De vulneribus capitis  
& opio.

Lethargi causæ etiam statuuntur capitis vulnera & opiatorum usus; verum ego superius statui à capitis vulnere subitâ prehenfos ἀφωρία dicendos esse Apoplecticos, leviorē speciem distincto carere nomine, hinc non uno sub titulo capitis vulnerum à practicis fit mentio. Ab opii usu in somnum incidentes sunt vel Comatosi vel Apoplectici dicendi. Potest etiam ab opii usu in Febribus excitari Carus. Lethargum propriè ab opio non putem produci, quia febris per aliquot dies perseverans, & simul sopor gravis opio soli tribui non potest: si enim nimia fumatur copia, brevi temporis spatio enecat, si minori, non tam diu perseverat somnus. Si quis tamen imprudenter Lethargico exhibeat opiata, is affectum potest graviores reddere. Itaque quos *Willisius* Lethargicos dixit lib. II. c. 3. de anima Brutorum in fine, ab usu radicum hyosciami, ego malim dicere comate correptos. Secundum quod idem refert, Lethargi exemplum, ego malim Carum dicere, uti è superioribus est manifestum.

Causæ procatarticae.

Inter causas procatarticas potest etiam referri crapula, si nempe, non tantum Coma cito transiens, sed & febrem atque soporem accersat. Ignavia & somnus protractus, etiam ad Lethargum disponunt. Evacuationes solitæ suppressæ sanguinem copiosiores & minus defæcatum reddentes, etiam ad productionem Lethargi faciunt. *Hippocrates* Lethargum inter morbos hiemales retulit. *Aph.* 23. s. VII.

Differentiæ

Differentiæ Lethargi variæ sunt: alius potest dici per essentiam, scilicet quando cerebrum ipsum affectum est. Ita *Forestus* refert exemplum Lethargi ab abscessu in cerebri parte anteriori. lib. x. obs. 11. Per consensum, qui oritur ab

eva-



evacuationibus suppressis &c. *Claudianus* in *Empyrica rationali* III. 4. statuit Lethargum per consensum nasci, à solo diaphragmate, phlegmone pituitoso obfesso. Verum si conceptibus nostris nimium tribuamus, facile in absurdas incidemus opiniones. Quæ connexio inter phlegmonem pituitosum diaphragmatis & Lethargum? Verisimile est potius vigilias aut phrenitidem è tali affectu excitatum iri, quam Lethargum. Adeo difficile est ab erroribus circa affectus capitis & soporosos sibi cavere. Utilior est distinctio, quod alius oriatur à partium solidarum vitio, alius à partium fluidarum. Partium solidarum vitium potest esse tumor scirrosus membranarum cerebri, abscessus cerebri &c. Vid. *Bonetum Anat. Pr. C. I. f. III. obs. 21, 33. &c.* Inter partes fluidas primum sibi locum vendicat sanguis, qui si sit copiosior, vel minus aptus promptè circulari per minimas arteriarum propagines, facile Lethargum producet. Alius Lethargus est gravior, alius levior. Proponitur & hæc differentia ab auctoribus, quod alius sit legitimus, de quo hætenus disputavimus, alius nothus, quando nomen tribuitur affectui congeneri, qui propriè lethargus dici non potest. Hæc distinctio non in praxi, sed auctorum scriptis pervolvendis alicujus utilitatis est, quandoquidem nomen lethargi tribuitur affectui, qui revera Lethargus non est, uti in superioribus vidimus. Febris aliquando intensior, aliquando minus intensa, habet etiam quandoque suas exacerbationes.

Signa, ex iis quæ dicta sunt, fiunt manifesta: ægri alto sopore obruti stertunt & febricitant: excitantur atque iterum in somnum relabuntur. Pulsus dicitur esse magnus, respiratio rara & imbecilla. De pulsu in superioribus vidimus: de respiratione non est necesse multa addere, cum ego, omnibus accuratè & attente praxin exercentibus, putem esse manifestissimum, inter pulsum & respirationem esse quandam proportionem; ubi pulsus est febrilis, ibi etiam respiratio itidem est febrilis. Adeo ut mihi admodum sit simile vero, plurimos medicinæ practicæ scriptores sequi antecedentium gregem, non qua eundum est, sed qua itur. Id quod priores in chartam conjecerunt, sine sufficienti examine, à sequentibus iterum repetitur, atque ita non tantum crambe bis cocta,

Signa.



cta, sed errores, civitate, ut ita dicam, donati, apponuntur. Non est necesse urinam excerni turbidam, sufficit si refrigerata talis reddatur. Oculis ferè clausis jacent. Nonnulli dicuntur tussire, quod tamen non est necessarium. Signa feri in capite redundantis sunt tumor faciei & palpebrarum: gracilitas pedum antea tumidorum. &c.

## Prognosis.

Prognosis ita instituatur, quod Lethargus sit morbus periculofus non tam respectu febris, quam quidem soporis profundi: afficitur enim pars princeps, & viscus molle. Periculum majus est, si partes solidæ simul afficiantur, si abcessus in cerebro, aut tumor scirrosus in membranis lateat. Periculofum quoque, si latex serofus cerebrum inundet, sive corpore universim repleto, sive etiam ubi pedes tumidi subito detumescunt, & serum copiosius versus caput defertur. Lethargo affectos in septem diebus interire, si autem septimum diem excedant fervari dixit *Hippocrates*, quod ego malim de Lethargo in latiori significatione, adeo ut etiam Carum complectatur, intelligere. Quanto sopor est profundior, quanto ægrotus magis in senium vergit, tanto periculofior est lethargus. Convulsiones vel motus convulsivi juncti lethargo, periculum majus denunciant. *Hippocratis* effatum eos qui à lethargo servantur, fieri empyicos, merito rejecit *Mercurialis* nisi prudenter explicetur. Tremor & sudores frigidi, malum.

## Indicationes

Indicationes generales in hoc affectu sunt: depressionem cerebri tollere, & spiritus excitare, non neglectâ feбри.

## Curatio.

Curatio depressionis cerebri respicit causas depressionis, scilicet sanguinem nimis copiosum, tenaciorem, serum in cerebro redundans, quo referri potest ipsa cerebri constitutio humidior.

## Venæ sectio

Si ergo sanguis peccet nimîâ copia, si evacuationes solitæ sint suppressæ, is promptè V. S. est imminuendus. In hoc casu nulla fit revulsio, neque enim motus alius sanguini imprimi potest, quam juxta circulationis leges, à corde per arterias versus corporis extremitates, ab extremitatibus per venas versus cor. Ratio autem quare V. S. prodest, è natura pressionis sanguinis deducenda est. Quandoquidem arteriæ sunt

re-



repletissimæ, etiam in statu sanitatis, quandoquidem sanguis vi pollet elasticâ, quandoquidem sanguis cordis validâ contractione exprimitur in arterias, necessum est, si pulsus reddatur frequentior, & sanguis magis dilatetur, cerebrum, viscus molle, magis comprimi, atque ita somnum gravem cum febre induci, à pressione præter naturam auctâ. Ubi autem sanguis V. S. educitur, deplentur primum quidem venæ, verum cum jacturam hanc sanguinis refarcire debeant arteriæ, arteriarum repletio etiam imminuitur, ac proinde non infertur tanta vis cerebro, nec tantum imminet periculum apoplethæ aut disruptionis vasorum. Res sese eodem modo habet uti in aggeribus, quibus à nimia fossarum, vel alveorum fluminum, repletionem, vis infertur. Efficacia aquæ, fossis, aut fluminibus contentæ, moli ejusdem proportionatus est, adeo ut major repletio canaliculos antea clausos, vel conniventes aperiat, eosdem sensim reddat magis patulos, & nisi occurratur, aggerem perumpat. Ubi autem recessu fluminis alvei aliquantulum exhausti sunt, cessante ingenti illa pressione, clauduntur, vel saltem non amplius conspiciuntur illi canaliculi, atque adeo nullum est periculum fata læta, boumque labores prostratum iri. Ut ad sanguinem revertamur, videmus quantâ vi is è secta vena prorumpat, quando ligaturâ ejus refluxus versus cor impeditus est. Videmus quam citò, ligaturâ solutâ, arteriæ sanguinem novum in locum deperditi subministrent. Videmus etiam quantum levamen in affectibus capitis afferat venæ sectio.

Venæ sectionis tamen in Lethargo, non eadem semper est necessitas. Nolim enim facile venam secari decrepitis, debilibus, hydropicis, aut Leucophlegmaticis, sanguinis evacuatione copiosâ exhaustis, neque etiam quibus latex serosus in capite redundat. Autumno etiam & hieme parcius detrahi sanguinem malim, quam vere & æstate. Longè parcius etiam in hoc casu detrahendus est sanguis, quam in Caro vel Apoplexia. Quantitatem sanguinis evacuandi determinabunt ejusdem copia, soporis gravitas, ægroti ætus, consuetudo, vires, genus vitæ, tempus anni. *Willisus* in hoc casu venam jugularem, præ brachiali, pertundendam consulit. Mihi

Ea non semper in usum vocanda.



satisfaciunt venæ ordinariè secari solitæ.

Vomitória.

Sanguinis visciditati occurritur, si ipsi pabulum subtrahatur, si visciditas imminuatur, si corrigatur. Pabulum tenacitati subtrahitur, si ventriculus vomitorio exhauriatur. Rarò vel nunquam sanguis peccat visciditate, quin saliva glutinosior concurrat, vel tanquam causa, vel tanquam effectus. Tanquam causa, quando ejus minor fluiditas non satis sufficienter dissolvit alimenta ingesta, nec eadem satis ad fermentationem debitam disponit. Tanquam effectus, quando à sanguine magis cohærente particulæ tenaciores, ope glandularum separatæ, per vasa salivalia versus os & ventriculum deportantur. Itaque vomitorium, in hoc casu, magni est usus, quandoquidem ventriculum saburrâ liberat, & simul magnam salivæ viscidæ partem educit. Quid? quod vehemens illa concussio non parum ad excitandum ægrum faciat? Exhibendum autem est statim in principio, si vires ferant, nec circumstantiæ aliquæ ejus usum impedian. Sunt enim aliquando delicatuli & molles non tantum ægri, sed & adstantes, sibi ipsis & medicis molesti. Notandum autem, in Lethargo exhibenda esse in majori dosi, quandoquidem irritatio alias non percipitur, nec laudabilis sequitur effectus.

℞. Vini Emetic. ex infus. vitri antim. ℥jss.

Oxymellis Scyllit. ℥ij.

F. Haustus.

Vomitum suspectum esse dixit *Hercules Saxonia*, quia caput replet, neque excitandum nisi in ea Lethargi specie, quæ è ventriculo ortum habet. Non dubitavit tamen præscribere,

℞. Trochisc. Alhand. gr. x.

Mellis aut Syr. de Beton. aut Oxymell. simp. q. f.

M. F. Pilulæ ij. vel iij.

Verum *Colocynthis* aliquando non minores turbas in corpore excitat, quam medicamentum vomitorium. Et quotusquisque laborat Lethargo, in quo ventriculus culpa vacat? *Riverius* non malè *Sereni* versiculum adducit: *Medici hac potiora putant, quam dulci morte perire.* Atque hoc *Cornelii Celsi* effatum: *multa in precipiti periculo rectè fiunt, quæ alias essent omittenda.* Commendat igitur *Aquam benedictam* è *Croco metallorum* paratam, atque addit: *bonâ fide testari possum, me virum nobilem,*

ex



*ex primoribus hujus civitatis, vidisse, ter intra biennium ab Apoplexia hoc solo remedio liberatum. l. I. c. 7.*

Visciditas sanguinis imminuitur, si purgantia exhibeantur Purgantia. potentiora, amaricantia, simul incidentia. Ex. gr.

℞. *Elect. Hieræ. picræ.* ℥iij.

*Sal. Tartar. gr.* viij.

*Aq. Salvia. q. s.*

M. F. Haustus.

Non est quod amaricantia metuamus: si lingua & palatum valide afficiantur, facilius excitabitur æger. Pulvis sequens etiam satis est efficax:

℞. *Rad. Gialapp. ʒj.*

*Rhei elect. ʒß.*

*Sal. Absinth. gr. v.*

*Trochisc. Alhand.*

*Diagrid. aa gr. ij.*

F. Pulvis.

*Willisi* sunt sequentes formulæ:

℞. *Sulph. Antimon. gr. v.*

*Scammon. sulphurat. gr. viij.*

*Cremor. Tartar. gr. vj.*

M. F. Pulvis.

℞. *Scammon. sulph. gr. xij.*

*Cremor. Tartar. gr. xv.*

*Castor. gr. iij.*

F. Pulvis.

Quod si pilulæ in usum vocari possint, *Pilula Vaticana* non sunt inconcinnae. *Fr. Dekkers* nunc Professor *Lugd. Bat.* præscripsit:

℞. *Extract. Cathol. ʒj.*

*Castor. ʒß.*

*Ol. Succin. g. ij.*

M. F. Pilulæ no. vij.

Visciditas corrigitur medicamentis Cephalicis dictis, Stomachicis, Amaricantibus, Antiscorbuticis. Eligenda autem talia, quæ etiam ratione febris, & symptomatum febrilium maximè ex usu sunt. Ex. gr.



℞. *Fol. Taraxac. cum toto. m. ij.*

*Ruthæ.*

*Trifol. aquat. aa m. j.*

*Cort. Citri recent. ℥ij.*

*Coq. f. a. ex aq. pura colat. ℥xxxiv. Add.*

*Syr. è Succo Card. bened. ℥j.*

*Sp. Nitri dulc. ʒß.*

M.

*Willisius* tale præscripsit *Julapium*:

℞. *Aq. Fol. Polon. Cerasor. nigr.*

*Ruth. Jugland. f. aa ℥iij.*

*Pæon. compos. ℥ij.*

*Castorei nodulo inclusi & in vitro suspensi. ʒij.*

*Sacchar. ʒiij.*

M. F. *Julapium.*

Dentur cochlearia iij. vel v. tertia vel quartâ quaque horâ: porro singulis hujus dosibus adde ꝑ. C. C. *Succini.* vel *Sal. Armon. gr. xii.* vel chartam pulveris sequentis,

℞. *Pulv. Rad. Pæon. Macis, Cranii human.*

*Rad. Serpentar. Virginiam Contraier. aa ʒj.*

*Bezoar. Margarit. aa ʒß.*

*Corall. ppt. ʒj.*

F. Pulvis dividendus in 12 partes.

*Fr. Dekkers* hanc præscripsit mixturam:

℞. *Aq. Puleg.*

*Betonic. aa ʒjß.*

*Prophylact. ʒj.*

*Tinctur. Castor. ʒj.*

*Sp. Sal. Armon. ʒß.*

*Syr. Sthachad. ʒvj.*

M.

Utilis quoque est in Lethargo *Tinctura herbe Thee* aqua bul-  
liente extracta, & ordinario modo usurpata; hæc enim cre-  
ditur somnum excutere. Convenit quoque decoctum ligno-  
rum, *Guajaci*, *Sassaphras*, & similium; præterquam enim quod  
hoc incidendi & attenuandi magna vi polleat, etiam calida  
iffius-



istiusmodi liquoris copiosa assumptio palatum & fauces velliat, diluit, movet, attenuat sanguinem, spiritus animales mobiliores reddit, atque ita pluribus indicationibus satisfacit. Quod si comparatio sit instituenda inter Tincturam *Thee* & tale Decoctum, facile patet, illam quidem sitim extinguere, ventriculo autem flaccido, qualis hic occurrit, esse minus utilem copiosam aquei hujus potus ingurgitationem. Decoctum autem lignorum ventriculum debilem minime offendit, & in constitutione scorbutica utile est. Ego sanè, aliis medicamentis minus proficientibus, tale decoctum reliquis palmam præripuisse expertus sum. Formulæ variæ apud Auctores reperiuntur, lubet tamen sequentem, non magnâ simplicium farragine onustam subungere :

℞. *Rad. Sals. parill.* ℥ij.  
*Ros. Lign. Guajac.* ℥iv.  
*Cort. ejusdem.*  
*Ligni Sassafras aa* ℥j.  
*Liquent.* ℥ij.

Infundantur, per noctem in *aq. puræ* ℔viiij. tum decoque ad tertiæ partis consumptionem: colatura detur pro Decocto.

Qui plures descriptiones tam alterantes quam purgantes desiderat is adeat *Mynsigtum* in Armamentario, *Quercetianum* in Pharmacopœâ dogmaticâ restitutâ, *Petrum Poterium* in Pharmacopœâ spagyrica &c.

Absolvi priorem indicationem generalem, & docui quomodo depressio cerebri sit tollenda, restat altera, quæ præcipit spiritus esse excitandos. Antequam autem hanc aggrediamur, quæstio hæc examinanda est: an particulæ narcoticæ sulphuris vitriolici, aut narcotici æmulæ in corpore nostro generentur? Occasionem huic quæstioni dedit, quod, dum hæc scribo, auctores recentiores magni nominis hanc sententiam tueri videam. Ego autem non vereor liberè profiteri, me ab hac sententiâ quam maximè alienum: atque acriter defendo, tales particulas esse meras chimæras, & ignorantiaæ asylum. Mirum sanè videri possit, perspicaci hoc seculo, in quo homines rident facultates veterum medicorum, concoctricem, reten-

Discutitur  
quæstio, an  
in corpore  
nostro ge-  
nerentur  
particulæ  
narcoticæ &c.



tricem, expultricem, qualitates occultas, & plura ejusdem commatis antiquorum placita, mutatis nominibus eandem agere fabulam. Quid enim aliud est statuere particulas narcoticas, quam particulas qualitate occultâ, facultate somnifera præditas? Nisi videatur ille toto cœlo errare, qui facultatem statuit narcoticam: illum autem rem acu tangere, qui particulas statuit narcoticas: illum termino uti ridiculo, qui qualitatem dicit occultam, illum autem termino uti distinctissimo, qui particulas dicit, easque ab effectu, quem supponuntur habere, denominat, somniferas. At hoc id ipsum est quod quæritur, unde somnus hic producat? Tu dicis à particulis somnum producentibus: ego respondeo, hoc est idem per idem, antiquorum modo, explicare. Excipiet fortasse aliquis, has particulas explicari, quando dicuntur sulphureo-vitriolicæ; verum rem ipsam penitus inspiciamus. Sulphuris vox à Chymicis in medicinam introducta est, & significat unum ex ipsorum principiis, quæ tanquam elementa corpora mixta constituunt. Non dicam jam, litem de principiorum horum veritate adhuc sub iudice esse; illud dicam, tale sulphur in corpore nostro non reperiri, nisi quis velit corpus nostrum laboratorio chymico planè esse simile, & operationes utriusque, vasa & viscera, ignem & calorem, omnino convenire. Eadem est *Vitrioli narcotici* ratio, cujus processus longo temporis spatio, nullâ accedente humiditate, præterquam V. S. rectificato, perfici debet. Cum autem nec *vitriolum pulverisatum* in corpore nostro inveniatur, nec illud *ad albedinem lento calore exsiccari possit*, cum nec *spiritus vini rectificatus* detur, nec *marie balneum*, nec *organa destillatoria*, nec *recipiens*, manifestum est, tale *vitriolum narcoticum* in corpore nostro non inveniri. Constat ergo, frustra aliquem contendere has particulas explicari, cum termini advocantur chymici: finguntur tantum vocabula nova, & talia corpuscula qualia in corpore nec dantur, nec dari possunt. Relinquitur ergo, has particulas, è Chymia transumptas, esse metaphoricæ, & obscuras, adeoque evidentiam significationis deberi peti ab adjuncto epitheto, quod diximus esse ejusdem valoris cum facultatibus & qualitatibus occultis. Non oportet aliquid



quid statui in corpore nostro generari, & symptomata producere, nisi simul explicare possimus quale illud sit, & demonstrare illud revera dari. Hæc ubi præstare non possumus, non debet videri mirum, talia rejici tanquam chimæras. Ubi autem talia adhibemus explicationis loco, quæ verba sunt, & præterea nihil, termini vagi & metaphorici, ad ignorantiaæ asylum recurrimus. Relinquitur igitur, auctores illos cum somni naturalis rationem ignorarent, nec præternaturalis causas, ex veris principiis, explicare possent, obtrusisse particulas narcoticas, seu qualitates occultas. Ego nulla suppono incerta principia, nullas particulas, nulla elementa, nisi quæ in corpore nostro inveniri nullus ambigit, sanguinem copiosorem, viscidiorum, laticem serosum, spiritus torpidiores, quæ revera dari nemo facile ibit inficias, nec aliis fictitiis causis mihi est opus, cum ex hisce solis totum negotium explicari, & distinctè concipi possit. Argumentum, quo horum auctorum sententia nititur, omnino ficulneum est, scilicet pathologiam sparmodicam non alia ratione tradi posse, quam per *corpuscula* quædam *extranea*, velut *nitro sulphurea*, quæ *spiritibus adherentia*, & ab iis *denuo elisa*, ipforum impetus quasi *explosivos*, hoc est, *convulsivos* cient. Quemadmodum autem è superioribus manifestum est, mihi particulis narcoticis, ad Lethargi naturam explicandam, non fuisse opus, ita è sequentibus patebit, nec hæc nitro sulphureas particulas, ad explicationem convulsionis, requiri. Hæc ergo argumentatio incertum per æque incertum, vel potius, falsum per id, quod nullo nititur fundamento explicare frustra annititur.

Spiritus torpidiores (ut è diverticulo in viam redeam) excitantur *Salibus volatilibus*, *acribus*, & *fatidis*, imprimis autem *spiritu Salis Armoniaci*. Excitant quoque spiritus torpidiores medicamenta *cephalica* dicta *Elixir cephalicum*, *Tinctura Succini*, *Spir. vini succinatus*, *Essentia cephalica*, qualia collegit *Mattias Tillingius* in Prodomo praxeos chymiatricæ Classè II. Tit. 3. Conveniunt hic quoque ea, quæ ad sanguinem corrigendum præscripsi, quandoquidem materia spirituum est sanguis, & ordinariè inter hosce liquores est quædam proportio. Ad spiritus excitandos faciunt & enemata, ex gr.

Quomodo  
spiritus ex-  
citantur.

℞. Rad.



## D E L E T H A R G O.

℞. Rad. Angelic. Lilior. alb. Bryon. aa ʒβ.

Fol. Origan. Salvia, Rutha

Rorismarin. aa m. β.

Flor. Sthæchad. Chamomill. aa p. j.

Coq. f. a. ex aq. pura colat. ʒx. Add.

Elect. Diaphenic.

Hieræ picræ aa ʒj.

Sal. Gemm. ʒj.

M. F. Enema.

Saxonia ad hunc modum præscribit:

℞. Centaur. utriusque aa m. β.

Puleg. Origan. Tragorigan.

Thymi, Calaminth. aa m. j.

Colocynth. in pet. ligat. ʒij.

Bulliant simul usque ad consumptionem medietatis & facta  
expressione

℞. Prædict. decoct. ℥j.

Hieræ diacolocynth. ʒβ.

Mellis Ros. Sol. ʒiij.

Ol. rut. ʒiij. Sal. ʒj.

M. F. Clyster.

Dolens hanc habet formulam:

℞. Herb. Absinth.

Centaur. min.

Fol. Ruth. Betonic. aa m. j.

Rad. Pyrethri. ʒiij.

Pulp. Coloc. in petia leg. ʒjβ.

Coq. in f. q. aq. com. colat. ʒviiij. Add.

Elect. hier. c. agar. ʒj.

Fellis taurin. inspiss. ʒj.

Vitelli ov. j.

F. Clyster.

Quidam vinum emeticum colaturæ addunt, qualium enema-  
matum formulas superius, ubi de Comate vigili egi, è Ri-  
verio exhibui.

Ad spiritus excitandos etiam non parum conducunt cucur-  
bitulæ tum siccæ tum etiam scarificatæ. Scarificatorum im-  
pri-



mis egregius est usus, quando V. S. non sufficiens sanguinis quantitaseducta est.

Eidem scopo inserviunt ligaturæ dolorificæ, frictiones cum pannis asperis, sternutatoria. Tale præscribit *Dolæus*: Sternutatoria.

℞. Pulv. Tabac. Virgin.

Majoran.

Lilior. convall. aa ʒj.

Sal. Volat. urin.

Pulv. Hellebor. alb. aa gr. iv.

M. F. Pulvis.

Sequenti errhino cum insigni successu usus est *Fr. Dekkers*.

℞. Turbith. mineral. ʒß.

Glycir. pulv. ʒß.

M. F. Pulvis tenuissimus.

Commendantur quoque vesicatoria ampla cervici & cruribus applicata. Refert *Willisius* se novisse maximum juvamen collatum à vesicatorio amplo, ulcuscula plurimum manantia in toto ambitu capitis excitante. Vesicatoria sincipiti adhibita multum præstare affirmat quoque *Dolæus*. Vesicatoria.

Laudantur etiam Apophlegmatismi, non quidem statim in principio usurpati, ob metum novæ fluxionis, sed postmodum. Inserviunt hi salivæ viscidiori expurgandæ. Imprimis autem huic fini inserviunt vomitoria spiritus potentius excitantia, & materiæ tenacis magnam copiam evacuantia, uti in superioribus explicui. Simulac enim quis nausæâ corripitur, statim saliva copiosè ad os confluit. Manifestum etiam est ea, quæ per vomitum educuntur, non fuisse omnia contenta ventriculo, verum in ipso vomendi actu eò confluxisse. Probè hæc sunt observanda, hinc enim explicatio petenda est curationum stupendarum, quæ unius vomitorii usum sæpe secutæ sunt, frustra & diu aliis medicamentis incassum adhibitis. Exempla in Asthmate, Orthopnæâ, strangulatu apud *Rulandum* exstant. Quemadmodum itaque in superioribus ad sanguinis visciditatem emendandam laudavi vomitoria, ita eadem hic iterum commendo, tanquam spiritus excitantia & salivam viscendam educantia. Apophlegmatismi.



℞. *Tartar. emet.**Sal. Absinth. aa gr. v.*

F. Pulvis, cum cerevisiâ tepidâ exhibendus.

Quod si crapula huic morbo occasionem dederit, tanto magis ea requiruntur.

Castoreum  
purgantibus  
additum.

Veteres solebant uti, tanquam medicamento magnarum virium, *Castoreo* cum *Scammonio* mixto: ad quorum imitationem præscribere licet

℞. *Castor. opt. ℥j.**Diagrid. ℥ß.**Sal. Tartar. gr. v.*

F. Pulvis.

Spiritus torpidos etiam excitant *Oleum Succini* aut *Balsami cephalici* temporibus & faciei illiti.

Cataplasma.  
12.

Pedibus imponuntur cataplasmata è *Ruta*, *Piperide* & *Ranunculo*, cum *sapone nigro* & *sale marino* in pulvem contusis.

Febris non  
est negli-  
gentia.

In fine indicationum generalium addidi, non negligendam esse febrem. Febris quippe pulsum frequentiore, & sanguinis dilatationem majorem efficiens, somnum profundior inducit. Hæc est ratio quare non præscripserim Aquas spirituosas, *Apoplecticarum* aut *antiparalyticarum* nomine superbientes. Facile speciosis hisce appellationibus decipimur, res ipsa potius spectanda est. Quomodo hæ aquæ somnum abigent ægrotantium & lecto affixorum, cum constet etiam sanos, ex horum usu copiosiori, in ebrietatem & somnum incidere?

*Decipimur specie recti.*

Hæc est ratio quare in superioribus præscripserim Apoze-  
ma. Nolim tamen hæc ita accipi, quasi omninò à spirituo-  
sis esset abstinendum, illud volo, ea non esse semper, per se,  
aut magna quantitate usurpanda. Respicere oportet circum-  
stantias varias, ætatem, vires, magnitudinem morbi, vitæ  
genus, consuetudinem ægrotantis. Inter spirituosas non infi-  
mum obtinet locum *Tinctura Castorei* aquis cephalicis phlegma-  
ticis commixta, & cum cerevisiâ, aut vino parva quantitate  
exhibita. Ex gr.

℞. *Aq.*



℞. *Aq. Betonic. Cochlear. aa* ℥j℞.

*Tinctur. Castor.* ℥j℞.

*Sal. Volat. Fulig. gr. v.*

*Ol. Succin. g. iij.*

M.

Sumat subinde cochleare unum patiens.

Non tantum *Tinctura* sed & *Castoreum* ipsum in substantia exhibitum magnarum est virium ad excutiendum somnum; medicamentum ingratum quidem, sed præstans. Potest itaque præscribi hic aut similis pulvis,

℞. *Castor. opt.* ℥℞.

*Sal. Volat. Succin.* ℥℞.

F. Pulvis pro ij. dosibus.

Vel si æstus insignis vexet, potest minori quantitate medicamentis magis temperatis jungi. Ex. gr.

*Sal. Absinth.*

*Cremor. diaphor. aa* ℥℞.

*Castor. gr. iv.*

F. Pulvis.

*Dolens* habet sequentem specificum,

℞. *Pulv. Castor.* ℥j.

*Sem. Sinap. Nasturt. hortens.*

*Ciner. hirund. succin. ppt. aa* ℥j.

*Ambra grisea.* ℥℞.

*Fol. Auri. no. iij.*

F. Pulvis specificus.

& hanc mixturam,

℞. *Aq. Ruthæ.* ℥iij.

*Cephalic. ad intra.* ℥j.

*Oxymell. Scyllit.* ℥j℞.

M. Pulvis hac mixtura assumi potest.

Dixi respiciendum esse ad vitæ genus & consuetudinem: neque enim eadem medicamenta conveniunt aquæ & vini potioribus, si itaque necesse sit in usum vocare spirituosam, quandoquidem plures exstant formulæ medicamentorum admodum efficacium, en aquam trium florum laxantem non contemnendam, sed magis temperatam:



## AQUA TRIUM FLORUM.

℞. *Flor. Salviæ.**Tunicæ.**Lavendulæ. aa m. iij.**Spir. Vini. ℥iij.**Aquæ Cochlear. ℥vj.*

Destillentur f. a. in arena, abstrahendo circiter tertiam partem, in qua infunde per octiduum

*Rhei elect.**Gialapp.**Aloës lucid.**Croci Britannic.**Rad. Angelic. aa ℥ij.*

Colatura fervetur in Phiala vitrea probe obturata.

Dosis est ab ℥j. ad ℥iij.

*Diæta.*

Breviter subjungenda est diæta. Aer sit purus, lucidus, calidus, quod si talis natura non sit, exstruatur ignis è ligno juniperino: frigus enim nocet. Vitetur cibus glutinosus, difficilis concoctionis, pravi succi: juscula condiantur herbis cephalicis; nocet satietas. Cerevisia sit recens, modice lupulata. Vinum Rhenanum Enulatum, salviatum modica quantitate concedi potest. E somno sæpius excitetur æger, exhibeantur medicamenta palatum & fauces afficientia, ne cito in somnum relabatur. Quandoquidem morbus exercitia impedit, exercitii loco æger è lecto surgat, erectus sedeat, adstantes linteis asperioribus membra fricent. Alvus semper fervetur libera, exhibeantur purgantia, injiciantur enemata, glandibus acrioribus irritetur alvus. Inter animi pathemata nocet mœror, homines torpidos & abjecto animo reddens, prodest gaudium, spes sanitatis brevi recuperandæ, itaque sodalitium amicorum, ægro quam maximè acceptorum, ad soporem arcendum & confabulandum, convenit.



CAPUT NONUM.

*De Hydrophobia.*

SI ullum est symptoma horrendum, certè id est Rabies, quippe cum omnibus aliis morbis & ægrotis auxiliares admoveamus manus, atque si illos tollere aut curare non possumus, saltem conamur mitigare symptomata. Hydrophoborum unicorum alia est ratio, hi soli dicuntur suffocari, & tanquam inutilia, imo tanquam summè noxia reipublicæ membra, refecari, ne partes sinceræ trahantur.

Hydrophobia symptoma horrendum.

Non est admodum frequens hic affectus, neque novi me ad tales ægrotos fuisse vocatum (non loquor de vulneratis, sed de hydrophobia in summo gradu) nisi semel tantum ad virginem, quam referebant amici à cane fuisse vulneratam; erat autem garrula, inquieta, potum averfabatur, sese diu posse vivere negabat, imo sese illa ipsa nocte exspiraturam affirmabat, cum videretur adhuc satis robusta, id quod etiam contingit. *Listerus Exerc. 3. ait. Idcirco providentiam divinam magnopere laudo, à morbo etiam longe savissimo, humanum genus, etiam invitum, tueri velle. Gaudeo ac Deo gratiam habeo & ago, plures tales ægrotos curæ meæ non fuisse commissos; neque enim sine aliquo metu adfui, cavens ne saliva ejus commacularer. Potuisssem itaque hoc symptoma sicco transire pede: verum cum auctores in enumerandis symptomatibus ferè convenient, nolui meam mentem de hoc affectu premere.*

Non est admodum frequens.

Est autem Hydrophobia aqua & potulentorum fuga atque horror, è morsa potissimum canis rabidi contractus, cum febre, astu, ac delirio.

Ejus descriptio.

Quamvis hic affectus etiam Rabiei nomine veniat, malui tamen Hydrophobiæ appellationem retinere, ob singulare illud symptoma, quo ab omnibus aliis morbis internoscitur, quodque signi pathognomonici loco esse potest.

Nominis ratio.

Non dixi hunc affectum delirium, aliorum auctorum more, tum quandoquidem delirii vox admodum generalis sit, & plurimis morbis accidat, tum quod delirium propriè ad mentem

Delirium non ita commode dicitur.



pertineat ; pravæ autem dispositionis corporeæ genus tale non debet statui , quod mentem , non autem corpus , respicit. Non nego me in fine descriptionis etiam delirii fecisse mentionem , sed aliud est dicere corpus ita graviter affectum esse , ut ratiocinatio nostra exinde pervertatur , aliud pravam dispositionem corpoream esse ipsam mentis læsionem. Hisce addi potest , *Petrum Salium* testari se adfuisse hoc morbo correptis , quibus mens planè constabat , etiam tum cum à liquidis admodum abhorrent.

Fuga & hor-  
ror potus.

Fuga potus rectè tanquam genus constituitur , cum ea sit etiam aliis morbis communis. Non semel observavi ægrotos causo laborantes potum respuere constanter ; quamvis enim lingua & fauces aridæ essent & siccæ , imo ad nigredinem vergentes , oblatum potum tamen nolebant assumere , atque os & labia claudebant. Est autem hoc symptoma satis molestum & *ἰσχυρὸν*. Quando vero additur horror , sive cum horrore , tum strictius significatur qualis sit ea fuga , soli enim Hydrophobiâ laborantes non tantum averfantur potum , sed & horrent simul ac liquor admoveatur propius. Toto corpore , & omnibus artubus contremiscere , non hominibus solis , sed & brutis convenit.

Morsus ca-  
nis rabidi.

Dico illud potissimum esse contractum è morfu canis rabidi. Quos canis rabidus momordit maximè obnoxii sunt hydrophobiæ ; non tamen necesse est dentibus fuisse læsum rabiosum , spuma etiam vestibis adhærescens inficit , atque ita absque morfu communicatur hoc venenum. Potest fortè contingere , à rabie aliorum animalium etiam affici homines , verum canes frequentius corripuntur , & ob fidelitatem passim in ædibus & plateis oberrant , adeo ut illorum morsum non ita facile effugiamus. Refert. *Fernelius l. 11. c. 14. de abditis rerum causis* , venatores quosdam lupum in varia obsoniorum apparatus , omnes autem quicumque esitarant , non multo post tempore , rabie correptos. Cum tamen symptomata horum non enumeret , an Hydrophobiâ omnes affecti fuerint non liquet.

Cur rabies  
canum fre-  
quentior?

Cur autem canes præ ceteris bestiis corripiantur rabie , operæ pretium est investigare. Ego ita existimo. Canes gaudent san-



sanguine admodum mobili, expansioni apto, adeoque comminutioni & fervori. Hoc patet ex insigni agilitate: motu, cursu, saltu gaudent canes. Canes sunt admodum salaces. Quando cultello anatomico subjiciuntur, odor, è visceribus exhalans, est foetidus, nares acriter feriens. Hinc meritò concluditur, sanguinem eorum esse admodum mobilem. Quemadmodum autem cursus tanquam effectus consideratus indicium præbet sanguinis mobilis, ita idem cursus continuatus, tanquam causa, sanguinis motum, agitationem, expansionem multum intendit, unde liquores secreti necessario evadunt acriores. Necesse habent canes ore aperto, & lingua exerta creberrimè respirare, unde vasorum salivalium sequitur exsiccatio, minor & acrioris salivæ ad os affluxus, adeoque sitis intensa. Si itaque aqua priventur, si neque sanguis neque saliva à recenti liquore diluantur, si acris accedat æstus, non mirum, si particulæ rigidiores sese exerant, exagitentur, acrimoniam acquirant, atque volatilitatem præternaturalem & quidem venenosam, fauces atque os malè mulctantem, explicatu arduam, vel difficilem. Cum autem venenum hoc salivam potissimum afficiat, mirum videri non debet, si morfu aliis communicetur. Caro viperina medicamenti loco usurpatur, morsus viperarum gravia infert symptomata. Forsitan *ἰδιοσυγχεσία* canum quoque aliquid facit ad rabiem suscipiendam.

Adest in Hydrophobia febris, æstus, & delirium: scilicet quando morbus ad eum statum pervenit, ut ægri revera potum averfentur; neque enim statim in principio hæc symptomata sese exerunt. Afficit venenum hoc sanguinem, & spiritus animales, adeoque majorem illius pressionem, horum motum inordinatum efficit, uti in sequentibus adhuc videbimus. Nec nos movere debet *Petri Salii* delirium negantis auctoritas; quamvis enim è pluribus ægris aliquis minus deliret, vel dilucida habeat intervalla, non ideo negare oportet symptoma, quod ordinariè cum Hydrophobiâ conjungitur.

In hoc consistit summa difficultas, quare hoc affectu correpti, constanter omnia potulenta averfentur? Hunc nodum ergo intricatissimum ut solvam, proponam aliquas animadver-

Adjuncta  
Hydropho-  
bia.

Quare ægri  
potum aver-  
fentur.

fio-



siones, verum hæsitans, quandoquidem difficile est hac in parte sibi & aliis satisfacere.

Salivæ vitium.

Observo itaque salivam in hisce ægrotis esse infectam, atque mediante salivâ infectionem aliis communicari. Mirum autem videri non debet, salivam in salivam, simile in simile, agere, quamvis vulnus pedi aut brachio fuerit inflictum, cum constet, etiam Mercurium solâ inunctione salivam afficere. In hoc autem conveniunt salivationes hæ ambæ, quod saliva à naturali statu multum desciscat, & partes oris malè afficiat. Immutatio salivæ post inunctionem odore sese manifestat, hydrophobiâ correptorum contagio; sive quod saliva maximè accommodata sit recipiendo huic veneno, sive quod venenum à salivâ in actum deducatur.

Ulterior explicatio.

Ut mens mea clarius percipiatur, duo obvia experimenta in memoriam revocare oportet. Aqua fortis talibus gaudet particulis, & poris, ut argentum, æs, ferrum facile dissolvat & contineat, aurum autem argento admixtum non attingat. Ex alterâ parte, mercurius vivus assumitur crudus in Ileo morbo absque ulla noxa, idem mercurius, ab aqua forti dissolutus, ita immutatur & activus evadit, ut pauca ejus grana maximas in corpore turbas excitent. Ita etiam res sese habet in morfu canis rabidi, vulnera infecta satis facile ad cicatricem perducere possunt, adeo ut venenum morfu communicatum sese non multum exerat in partibus solidis; verum ubi ope lymphæ & sanguinis ad salivam usque pervenit, tum noxia ejus vis sese exerere incipit. An autem saliva debeat tantum considerari tanquam veneni vehiculum? An vero tanquam sufficiens latentes ejus vires, dum sanguini erat admixtum, ut noxias facultates postmodum exerat, difficile est determinatu, forsân utrumque habet locum. Et hæc est ratio, quare, per aliquod tempus, possit delitescere venenum, ac postea suis indicibus sese prodere.

Suffocationis metus.

Salivæ hoc vitium partes vicinas primum inficit, imprimis fauces, forte etiam epiglottidem, ut sese claudere non possit, postmodum ulterius serpit. Vitium illud faucium sui generis est inflammatio, à qualitate venenata producta, & deglutitionem liquidorum omnino impossibilem reddens. Hinc est quod

po-



potulenta ita adversentur & horreant. Quis enim amet suffocari? Quotusquisque morti repentinæ sese faciliè exponat? Habeo consentientem *Petrum Salium*, cujus hæc sunt verba: *Sciant omnes vim deglutiendi in rabidis hominibus præpeditam esse.-- Hinc timent isti extinguī & ab assumptis, præcipuè autem à liquidis succis omnibus & potulentis: quapropter & hæc maximè omnium rerum potissimum abominantur.--* qua de re oppressa aspera arteria, suffocationis periculum impendit, quam læsionem rabidi persentientes, etiam liquida hinc præcipue abhorrent, tanquam ea à quibus suffocari debeant. Interrogati enim, ut pluries expertus sum, cur bibere non audeant, potumque omnem fugiant, respondent, potulenta nec posse penetrare nec permeare fauces gulamve, ob earum magnam angustiam & constrictionem. Hactenus *Salius*, quem postquam legi, admodum confirmatus sum in sententia mea superius proposita. Refert quoque *Martinus Lister. Exerc. 3. Jacobum Corton* Hydrophobia correptum sibi serio multoties asseverasse se salivam propriam ægre deglutivisse, id quod vel morte pejus erat. Non est mirum igitur, si ægroti, ob insignem hanc & morte graviolem molestiam, potum omnem expavescant.

Sanguinis & spirituum animalium vitium.

Quamvis autem, statim post morsum canis rabidi, nec sanguis nec spiritus videantur malè affecti, non possunt tamen non sensim à veneni contagio iidem lædi, id quod è causis & symptomatibus est manifestum. Deglutita enim est magna salivæ quantitas & ope venarum lactearum, ac ductus thoracici ad cor delata, antequam morbus ad ἀκμὴν perveniat. Hinc ejus crasis sensim vitatur, à maligna np. qualitate eidem impressa. Indicium ejus præbet febris, quam adeste in descriptione significavi. Febris hæc adveniens sanguinem magis exagitat, atque graviora producit symptomata.

Æstus.

Inter hæc est æstus; nempe pressio sanguinis aucta caloris præternaturalis causa est. Major solet hic esse quando inflammatoria dispositio, aut inflammatio conjunguntur febri. In hoc casu autem inflammationem faucium adeste, ex horrore & fuga potulentorum liquet. Non mirum ergo, si oculi evadant ignei & rubicundi, quandoquidem pressio major sanguinem eo majori vi propellit, arterias distendit, atque spiritus animales magis agitados producit, nervorum ope per univer-



sum corpus, & sensuum externorum organa copiosius distribuendos. Dicuntur oculi speculum animi, præcipuè hanc ob causam, meo iudicio, quod agitationis spirituum varia indicia in oculis sese manifestissimè prodant.

Delirium.

Non mirum ergo si delirent ægri, spiritibus animalibus nimium agitati, tum à febre, tum à malignitate. Hinc enim sedata illa & tranquilla objectorum consideratio: vestigiorum, cerebro ante impressorum, inspectio: attenta imaginatio, iudicium, ratiocinatio præcipitantur & pervertuntur.

Animi pathemata.

Ubi autem & sanguis est agitato, & spiritus animales, non possunt non vehementes oriri animi passionēs. Hoc est hominum ingenium, ut non considerent res absolutè & prout sunt, sed relativè, quatenus nobis commodum aliquod, vel incommodum afferre possunt; cum autem vehemens illa spirituum agitatio impetuosè nobis aliquid, tanquam bonum vel malum, repræsentat, eodem tempore necesse est spiritus in præcordia cum impetu insigni influere, unde sanguinis motus, & cordis systole ac diastole vehementiores excitantur, spiritus iterum perturbantur & agitantur, atque adeo passionēs vehementes excitantur.

Ira.

Eadem hæc spirituum & sanguinis commotio causa est iracundiæ, & animi ad lædendum dispositi: vindictæ cupiditas eos exagitat, par pari referre gestiunt, læsi alios etiam, nihil mali meritos, lædere. Quamvis enim *Petrus Salius* referat quosdam vix, aliquâ febre fuissè exagitatos, & satis benè ratiocinatione usos; si tamen ad ea, quæ ab aliis practicis dicuntur, si ad ea quæ sana dicat ratio attendamus, vix videtur fieri posse, ut (faucibus à veneno particulari ita dispositis, ut omnem potum averterentur ægri) febris nequaquam infestet. Ubi enim inflammatio, ubi difficilior in parte magni usus sanguinis adest circulatio, hinc statim pressio per universum corpus fit major, pulsus, diastole ac systole cordis frequentior. In hoc casu autem, ob liquidorum fugam, & salivæ defectum, sanguis celeriori circulationi est minus aptus, unde necessum est pressionem, & pulsum celeriores, adeoque febrem, sanguinis & spirituum insignem commotionem, adeoque delirium, indies augeri. Verum in explorando pulsu febrili



brili antiquos errâsse, cum doctrina de febribus admodum esset obscura, non est mirum, novimus enim etiamnum de febris præsentia vel absentia perversè admodum judicare & praticos. Nempe qui antiquorum præjudiciis sunt imbuti, existimant pulsum debere esse inæqualem (saltem tales ego audi vi ratiocinationes) cum sufficiat, si pulsus inveniatur præternaturam frequentior. In judicio circa signa morborum, etiam admodum obvia, non semel ego peccatum esse vidi. Ut ad iracundiam revertar: dicitur aliquis exæstare irâ, & revera ubi sanguis æstuat, ubi spiritus sunt commoti, non est mirum si ira facile erumpat. *Cartesius* in hac passione animi vult bilem commoveri; verum sine spirituum & sanguinis commotione bilis efficacia sola non sufficeret. Quicquid sit, ex iis quæ explicata sunt abundè patere arbitror, non esse à ratione & causis enumeratis alienum, si vehementiora animi pathemata comitentur hydrophobiâ correptos.

Observant quoque auctores convulsiones jungi huic affectui, id quod facile è sanguinis dispositione & febre deduci posset. Verum convulsione explicatio est majoris indaginis, adeoque è sequentibus erit petenda.

Singultus exinde oritur, quod salivæ particulæ quædam subtiliores ad ventriculum descendentes, eundem vellicent, atque spiritus animales alliciant ad ejusdem & diaphragmatis contractionem convulsivam. Quid? quod & sanguinis dispositio venenata, & febris facilè in partibus, copiosissimis vasis donatis, & nervorum truncis fatis magnis gaudentibus, adeoque exquisiti sensus, facile tensionem nervorum, repletionem fibrarum musculosarum, adeoque contractiones vehementes & convulsiones excitare possint.

Testantur quoque practici spumam circa os apparere, præcipuè ubi ægri debilitantur, id quod non est mirum. Saliva imprimis vitiata est, uti vidimus, adest febris continua cum æstu, salivam viscidiorum reddens: quod si ante morbi *ἀρχὴν* salivam multam ex ore profuderint, cum potum omnem respuant, necessum est salivam minui & tenaciorem reddi. Deglutitio læsa est, fauces angustiores redditæ, unde sequitur, ærem salivæ admixtum eam in bullas & spumam attollere,



quæ cum per æsophagum descendere non possit, sursum versus labia propellitur.

An ægri in  
aqua imagi-  
nem canis  
rabidi con-  
spiciant?

Jam facile perspicimus, non opus esse ut fingamus, ideo ad aquæ conspectum admodum expavescere ægros, quia imaginem canis rabidi in illa aqua conspiciunt. Unde illa imago? An venenum aquam, quam æger necdum attigit, immutavit? Si autem aqua nullâ veneni affinitate læsa est, quid est quod ei canis rabidi imaginem imprimat? Aqua speculi adinstar se habet & objecta opposita exhibet, itaque non potest aliam quam bibitori formam exhibere. Quemadmodum Narcissus propriam faciem in aqua conspectam adamavit, ita hi ad conspectum non canis, sed proprii vultus, deberent horrore corripiri. Sed non tantum limpidam aquam, verum & opacam, & omnis generis potum averfantur. Quid? quod horreant antequam ori admoveantur potulenta? tum enim necdum, tanquam in speculo, imaginem canis rabidi cernunt. Refert *Petrus Salius* ægrotos tales affirmasse, se non posse deglutire potulenta. Horrent igitur & valdè averfantur omnem potum, quia sentiunt faucium angustiam, & deglutitionis difficultatem à salivâ vitiatâ; metuunt ne suffocentur. Facit hic quoque peculiaris veneni dispositio: cumque spiritus animales & sanguis sint valde commoti, passio hæc animi multo, quam in sanis, est vehementior.

An homines  
sponte in  
hydropho-  
biam incide-  
re possint?

Dubitatur, an homines sponte, nullo præcedente morfu, nec salivæ inquinamento in Hydrophobiam incidere possint? Mihi equidem id non videtur simile vero, nec unicum exemplum id probare aptum est. Quamvis enim ægroti & adstantes negent simile quid accidisse, aut vulnus præcessisse, fieri potest illos non advertentes à salivâ fuisse infectos. Latet aliquando virus per aliquod tempus antequam erumpat. Latet per dies plures, per menses, & si auctoribus fides, per integrum annum. Narrat *Calius Aurelianus*, fartricem quandam, cum vestem, à rabido cane commorsam, ore & linguâ, ad eam farciendam, contrectasset, hunc morbum incurrisse. Deinde cum tot ægroti inflammationibus faucium, febribus vehementibus, & diversissimis infestentur symptomatibus, plures medici symptomata hydrophobia correptorum in ægrotis aliis observassent, imo hæc accidentia essent longe fre-



frequentiora. Neque hiſce obſtat obſervatio *Fabritii Hildani Cent. I. obſ. 86.* quæ talis eſt. *Daniel Perſin* anno 1602 tempore meſſis à fele rabioſo ſcalpturam in dextro pollice acceperat, adeo ut epidermis vix offeſa eſſet. Scalpturam nullus ſequēbatur dolor, nulla inflammatio, aut aliud ſymptoma, eaque non diu poſt ſponte coaluit. Poſtmodum tamen juvenis, qui leviffimam hanc læſionem neglexerat, cepit fieri melancholicus, & tandem rabioſus. Non obſtat, inquam, hæc obſervatio, quandoquidem non ſponte, ſed læſus in rabiem incidit juvenis, ſive illud factum ſit à cane, vel fele rabioſo perinde eſt, quæſtio autem erat, an abſque vulnere vel ſalivæ inquinamento aliquis poſſet affici? Forte hic ægrotus à ſaliva fuit infectus; nam cum poſt dimidium annum & ultra in hydrophobiam inciderit, procul omni dubio non ſatis exactè omnes circumſtantias in memoria habuit, aut narravit. Nimirum timidus eſt *Zacutus Luſitanus*, cujus hoc eſt præceptum *L. v. qu. 23. in comment.* *Quare caveant medici, & adſtantes ne circa rabioſos verſentur, aut eos alloquantur; nam in his tanta humorum eſt corruptio, ut illorum veneficam auram, & maxime contagioſam, continuo ab ipſorum exſpiratione elevatam, & aëri communicatam nemo poſſit effugere.*

Differentiæ Hydrophobiæ proprie tantum petuntur à circumſtantiis, ratione ſexus, ætatis, & ſimilium; verum hoc modo hujus morbi tractatio exigui eſt uſus, cum ſigna ſint lethalia, prognofis funeſta, curatio nulla. Ut igitur utilior evadat hujus ſymptomatis inveſtigatio, diſtinguenda eſt Hydrophobia in confirmatam, & eam, quæ eſt in principio. De Hydrophobiâ confirmata hætenus diſputatum eſt, ſc. quando jam omnino aquam & omnia potulenta averſantur & horrent ægri; eam quæ eſt in principio hanc dico, quando vel vulnus, vel ſaliva rabidi canis metum ſequuturæ hydrophobiæ incuſſit, quamvis à potu non abſtineant ægri. Quemadmodum enim in omni morbo, ita hic præcipuè principiis eſt reſiſtendum, ne poſt ſerò paretur medicina.

Signa incipientis mali traduntur anxietas & iracundia, nec non ventriculi gravitas & ſimilia. Quippe ſanguis nimium commotus & expaſus, ventriculique vaſa copioſiſſima replens,

Signa Hydrophobiæ incipientis.



non potest non producere has anxietates ; frustra enim sunt ii qui hanc *σενοχορίαν* ab halitibus, vaporibus & flatibus semper deducunt. Quamvis enim flatus aliquando producant anxietates, aut saltem eas aggravent in hypochondriacis & scorbuticis, potissima tamen causa in febribus vasorum repletio & expansio est, præcipuè difficili accedente per vasa capillaria transitu. Iracundia à sanguinis nimia & turbulentâ pressione, nec non spirituum animalium vehementi agitatione oritur, imprimis autem ab horum fluxu & refluxu, ut ita dicam, reciproco. Influunt à cerebro versus cor, pulmonem, præcordia spiritus animales eaque vehementer commovent, commotionis & agitationis sensum iterum ad cerebrum deferunt iidem spiritus, atque ita fluunt & veluti refluunt ; hinc passionum oritur vehementia, id quod probè observandum. Ab eadem illâ pressione & expansione sanguinis oritur ventriculi gravitas ; etenim cum viscus hoc copiosissimis vasis sanguineis gaudeat, eorundem distensio gravitatis sensum infert. Et hæc est causa frequentissima appetitus dejecti ob repletionis sensum, in febribus.

Signa canis  
rabidi.

*Galenus* in libro de *Theriaca* ad *Pisonem* rectè monet, medicum debere examinare, an æger à cane rabido sit demorsus ? Hunc in finem proponit signa canis rabidi. Idem à *Dioscoride* & aliis factum est, sunt autem talia. Averfantur canes rabidi cibum ac potum, ingrediuntur auribus & cauda demissis, vocem amittunt, aut raucam edunt, oculi sunt inflammati, lingua exerta, ex ore & naribus larga spuma & pituitosa colluvies profluit, segnius ferè incedunt, oculis torvis & rutilantibus homines intuentur, in quosvis notos, ignotos, familiares irruunt, ac sine latratu mordent. Non est tamen necesse ut signa hæc omnia adsint, nec morsus canis tum demum nocet, ubi omnino in rabiem est actus, sufficit si principium rabiei latitet. Ita celebris ille jurisconsultus *Baldus* miserè periit, à catulo læsus quem in deliciis habebat, quemque rabie incipiente laborare ignorabat. Quod si quis dubitet an vulnus sit inflicturn à cane rabido, medulla panis &c vulnerr imponitur, & Gallo vel cani objicitur devoranda. Vide *Sennertum* in praxi, & *Hoeserum* in *Hercule medico*.

Ubi



Ubi vero ulterius serpsit malum, accidit membrorum quædam veluti distensio, adest totius corporis & præsertim faciei rubor, ob sanguinis pressionem, motum nempe intestinum & progressivum majorem, hinc etiam sudor. Æger fit anxius, siue illud contingat à repletionem & expansionem vasorum, vel à metu quem morbus incussit miserabilis, vel etiam à flatibus circa ventriculum & in intestinis hærentibus. Habent rabidi oculos torvos & adspectu horribiles, ab agitatione tum sanguinis, tum spirituum, tum febre malignâ. Cum autem febris hæc non à causis externis & ordinariis, sed à veneno, toto genere præter naturam originem ducat, non mirum si omnia symptomata sint vehementiora. Quemadmodum autem ii qui brachium vel crus fregerunt, sæpe in somno exsiliunt, tanquam iterum in simile infortunium incidentes, ita non mirum si terrorem, à morfu canis rabidi, & spirituum agitationem nimiam non omnino sedet somnus, si ægri turbulentè dormiant, si cum clamore evigilent. Dicuntur quidem etiam more canum latrare, quod tamen mihi minimè sit verisimile, tum quod non semel contingat adstantes res longe aliter narrare, quam revera contigerunt, tum quod præjudicia ita hominum mentes sæpe obfuscent, ut ea se videre, quæ non vident, ea audire, quæ non audiunt, imaginentur. Non nego tamen sonum inconditum in convulsionum paroxysmo aliquando excitari, qui fortè à quibusdam fuit latratûs nomine donatus. Accedit tandem potus fuga & horror, de quo in superioribus est actum. Quæ autem traduntur de catulis in urina apparentibus, de frustis canis cum dolore excretis apud *Zacutum Lusitanum* l.v. Hist. 10. fabulosa, omnino sunt.

Signa morbi confirmati,

Prognosis ita habet: si à cane rabido demorfi statim benè tractentur, si medicus diligenter curationi incumbat, ea non est ita difficilis, quandoquidem morbus est in principio: si autem morbus sit confirmatus, si ab omnibus potulentis abhorreat æger, si convulsionibus infestetur, curationis prosperæ nulla est spes reliqua, nec interitus longe abest.

Prognosis.

Indicationes sunt, vulnus debito more curare, venenum illud in principio suffocare vel expellere, in progressu efficacius insistere, tandem, in casu desperato aliorum læsionem præcavere.

Indicationes

De



Curatio  
vulneris.

De Curatione vulneris non est necesse hoc loco agere, cum hæc ab auctoribus, tum antiquis tum recentioribus, abunde explicata sit, videri potest *Hildanus* in observationibus aliquoties de hac materia disputans. Emplastrum à *Galeno* laudatum vide sis apud *Hoeferum* l. v. c. 2. *Herc. Med. & Sennertum. Theriaca* imposita etiam præsentaneum est remedium docente *Gal. de Theriaca* ad *Pisonem*. *Cardalucius* habet descriptionem cataplasmatis, cujus vires admodum prædicat. Illud addere lubet, cum venenum morfu viperæ communicatum ejusdem viperæ pars applicata extrahat, forsan utile admodum futurum, si vulnere à cane rabido inflictio ejusdem canis pars vel intestina adhuc calentia imponantur, cavendo salivam. Vel si quis ab hoc remedio abhorreat, alium canem strangulet, & cum calentem vulnere imponat, vel partem vulneratam ejusdem ventri immergat. Ansam hæc cogitandi mihi dedit mira recens mactatorum animalium vis, si partibus læsis vel dolentibus applicentur. In specie hoc experimentum retulisse non erit inutile. Juvenis, quem ego tractavi, aliquot annos laboraverat carie ossis in tarso pedis: pes vehementer intumuerat, frustra varia in usum vocata erant remedia, noctes diesque quiescere non poterat. In hoc statu pedem abdomini calenti recens occisi canis insuit, cum summo successu: noctem totam placide dormit, mane pes detumuerat ob copiosum puris effluxum, canis removetur admodum foetens. In Indiâ occidentali adversus venenatorum animalium ictus utuntur Oleo in quo talia animalia sunt suffocata, cum summo successu.

Immergen-  
di in aquam  
consuetudo.

Imprimis ad curationem in principio, nostræ regionis incolis persuasum est plurimum facere, si æger vel vulneratus subito immergatur aquæ marinæ, ut ita ipsi insignis incutiatur terror. Itaque ægrotis verba dant, & cum ad mare perventum est, ipsos nec opinantes in mare præcipitant, & iterum extrahunt. Existimant liquoris aversionem, pathognomicum in hoc affectu signum, & molestissimum symptoma, hoc pacto præcaveri. Quod si occasio denegetur ad mare ægrotos deducendi, in fluvium demergunt eundem, vel etiam frigidâ copiosè perfundunt, ad terrorem incutiendum. Non est nuperum aut novum hoc remedii genus, meminit  
ejus



ejus *Celsus* l. IV. c. 27. his verbis : *Sed unicum tamen remedium est, nec opinantem in piscinam non ante ei provisam projicere, & si natandi scientiam non habet, interdum deprimere, ut invitus quoque aquâ satiatur; sic enim simul & sitis & aquæ metus tollitur.* Ad suffocandum itaque venenum hoc auxilium in usum vocari potest.

Ad expellendum autem venenum varia ab antiquis exco-  
gitata sunt remedia, imprimis decantatissima *Theriaca*. Hæc  
communi appellatione *Antidotorum* donarunt, quarum tres sta-  
tuebant differentias, quædam sumebantur adversus venena,  
quædam adversus morsus animalium, quædam adversum mor-  
bos è pravâ diæta originem ducentes. Cum autem *Mithrida-  
tes* & *Attalus* in captivis experimentum cepissent, quid simpli-  
cia valerent medicamenta adversus venena & morsus anima-  
lium, prior ille omnia illa miscens antidotum composuit, quæ ab  
ipso nomen mutuata est. Hujus quotidianus usus tantum di-  
citur valuisse, ut postmodum ipsi venena nocere non potue-  
rint, referente *Galeno* de Antidotis l. I. p. m. 424. Postmo-  
dum *Andromachus* *Neronis* medicus quædam adimens, quæ-  
dam addens, imprimis carnem viperinam *Theriacam* com-  
posuit, cujus usus postmodum invaluit. De *Theria-  
ca* tantam conceperat opinionem *Cæsar Aurelius Antoninus*,  
ut eâ quotidie uteretur. Hujus encomia & vires adversus mor-  
sus animalium, canis rabidi &c. ac diversos morbos versibus  
complexus est *Andromachus* elegantibus, qui apud *Galenum* d. l. p.  
428 & 429. videri possunt. Iisdem in libris diversæ aliæ di-  
versorum exstant compositiones. Non contentus *Gale-  
nus* amplam hic fecisse *Theriace* mentionem, duobus adhuc li-  
bris ad *Pisonem* & *Pamphylianum*, de *Theriaca* & ejus usu scrip-  
sit. Cum autem hæc medicamenta ab *Opio*, tanquam non in-  
fimæ notæ ingredienti, & nomen & efficaciam non con-  
temnendam nanciscantur, & *Athanasia* superius laudata, &  
similia hic etiam locum habere possunt. *Guernerus Neuhansen*,  
in *Homine Hydrophobo*, laudat è *Wedelio Orvietanum*.

Laudatur etiam cinis *Cancri fluviatilis* in sarmentis vitis albæ  
cremati, tanquam specificum, contra morsum canis rabidi.

Venenum  
expellen-  
dum.

Cinis cancri  
fluviatilis.



Antidotum illam versibus descripsit & mirè deprædicavit *Damocrates*, quorum hoc est initium :

Ἀντίδοτος ἐστὶ πρὸς τὰ τῶν λυσσόντων κυνῶν  
 Δῆγματα φέροντα παρακοπὰς ὑλακτικὰς  
 Φόβος ἀλόγος τε παντὸς ὕγρῃ ἢ ποτῇ,  
 Ὡς καὶ ἴδωσι παντελῶς ὕδωρ βραχὺ,  
 Τρόμοισι ἢ σπασμοῖσι κατέχοντ' αὐτίκα,  
 Ἐν ἀγρυπνίαις τε ἢ παρακοπαῖς συνεχέσι  
 Διὰ γόντες ἀποθνήσκουσι συντομώτατα. &c.

Ipsius descriptio est ut fumantur cineres *Cancrorum* uti dictum est part. ij. *Rad. Gentianæ*. p. j. *Gal.* de Antid. l. ii. p. m. 453. Convenit *Dioscorides*, *Theriac.* c. 2. Habet aliam descriptionem *Galenus* de simpl. Med. fac. l. ii. p. m. 148. qua *Æschrius empyricus*, expertissimus senex & Ipsius præceptor, utebatur. Nempe *Thuris partem unam*, *Gentianæ v. Cineris Cancrorum x.* commixtas & aquæ insperfas dabat quotidie ad cochlearis satis magni quantitatem, quadraginta diebus. Quod si non protinus ab initio, sed post aliquot dies uti cœpissent demorfi, quotidie duo cochlearia aquæ inspergebat. Hoc medicamento se fidere addit, quod nullus unquam mortuus sit, hoc usus medicamento. Postmodum addit qua ratione *Pelops* causam reddiderit efficaciam hujus medicamenti, breviter suam subjungens opinionem, de qua jam disputare non vacat.

Remedia  
recentio-  
sum.

Nostro tempore varia excogitata sunt ad morsum canis rabidi, & venenum susceptum superandum. Ita in *Pharmacopœa Bateana* videre est decoctum ad morsum canis rabidi fol. 33. Laudatur etiam *Bezoardicum volatile*, *Tinctura bezoardica*, *Sal. Volat. viperarum*. *C. C. Cranii humani*. *Succus Citri*, sedi majoris, *Acetum Bezoardicum*, *Camphora*, *Oleum vitrioli cum Aqua Absinth. Nitrata*, *Bezoardicum Lunare*. Vid. *Guerneri Neuhausen* Hominem Hydrophobum. §. 28. Laudatur etiam *Alexipharmacum Palmarii* quod apud *Sennertum* videri potest. Non inutilis quoque est *Pulvis Antilyssos Renodei* ad hunc modum compositus :

℞. Fol. Ruta, Verben.

Sal-



*Salvia min.*

*Plantag. Polypod.*

*Absinth. vulg.*

*Menth. Artemis.*

*Meliss. Betonic.*

*Hyperic. Centaur. min. aa m. j.*

Omnia ex arte siccentur & in tenuissimum pulverem reducantur.

Quod si autem ex iis, quæ ab auctoribus traduntur, ascendere placeat, & videre ad quas classes medicamenta quæ laudantur sint referenda, facile videbimus ea imprimis esse sudorifera & hypnotica, unde conclusio evadit manifesta, talibus imprimis esse insistendum. Sudoriferis, quandoquidem verisimile est particulas venenosas, antequam ad sanguinem & salivam perveniant, hac via optimè expelli. Hypnoticis, non tantum, quia in somno sudor optimè provocatur & copiosè profluere solet, verum etiam quandoquidem hæc omnem acrimoniam egregiè leniunt. Ego crediderim decoctum ligni *fraxini*, instar decocti lignorum usurpatum eximii futurum usus, si æger cubitum iturus non nihil *Opii* ritè præparati assumat, & singulis dosibus addat aliquid *lapidis prunelle*. Oportet autem tale decoctum non semel atque iterum, sed per aliquot hebdomadas assumere, ut omnino malum hoc superetur. Post assumptionem sudor expectandus, & stragulis æger cooperiendus est. Quandoquidem autem quædam dicuntur certo certius hunc morbum expugnare, cum interim tales descriptiones premantur, non inutile judicavi si ego quoque ex iis quæ legendo didici, vel ratiocinando collegi, formulam unam atque alteram proponam, quæ si non satisfaciant, aliæ commodiores substitui possunt.

℞. *Rad. Scorzonæ. ʒjss.*

*Vincetoxic. ʒss.*

*Fol. Thlaspios Alyssi dicti.*

*Acetosa.*

*Anagallid. terrestr. aa m. ij.*

*Cap. papav. alb. no. ii.*

Coq. s. a. ex aq. pura colat. ℥ij. Add.

M m 2

Syr.



*Syr. Acetos. Citri.* ℥i℥.

*Acet. Scyllit.* ℥j.

M.

Potest hujus Apozematis aliquoties quotidie assumi haustus calidus, sub horam somni imprimis, & sudor, exspectari, vel si sequens magis arrideat, eodem modo usurpetur :

℞. *Rad. Lapat. acut.* ℥i℥.

*Gentian.* ℥℥.

*Fol. Cardiacæ* (hanc plantam putant esse  
Alysson Galen.)

*Rutæ hortens. aa m.* ij.

*Pom. Citri no.* j.

*Capit. Papav. alb.* ℥ij.

*Ficuum pinguium no.* x.

Coq. f. a. ex aq. pura colat. ℔ij. Add.

*Syr. Violac. f.* ℥j.

*Lapid. prunell.* ℥j.

M.

Imprimis magni usus futurum existimo *Acetum Rutaceum, Calendula, Sambucinum, Scylliticum & Bezoardicum* superius descriptum. Sumat æger cubitum iturus hunc haustulum.

℞. *Antimon. diaphoret.* ℥j.

*Oc. Cancr. ppt.* ℥℥.

*Land. opiat. gr.* j.

*Acet. Bezoard.* ℥℥.

*Syr. Diacod.* ℥ij.

*Cum Decocto Allii.*

F. Haustus.

Commendat Platerus *Angelica radicem* cum Nitro, & *Vincetoxici radices* cum aqua Card. bened. quadraginta diebus potas, *Matthioli* remedium.

An V. S.  
conveniat?

Disputant auctores an V. S. in Hydrophobia conveniat nec ne? Videri possunt *Codronchus* de Rabel. 11. c. 6. *Petrus Salinus, Sennertus* &c. Plerique V. S. rejiciunt, quia metuunt ne V. S. venenum versus partes internas attrahatur. Verum post detectam sanguinis circulationem manifestum est, sanguinis motum à corde per arterias versus extremitates, ab extremita-



mitatibus per venas versus cor continuo peragi, nec V. S. contrarium induci sanguini motum, unde facile liquet, hunc metum esse inanem. Quantum ad V. S. in principio ad commotionem animi sedandam, de ea mihi videtur nullum posse esse dubium, si nihil eam impediat. Si enim quis è terrore in variolas, pestem, febrem possit incidere, nullum est dubium, quin utilissimum sit terrorem, à morfu canis rabidi susceptum, quamprimum superare. Quid ni enim ingentis illius commotionis impetus à V. S. aliquod recipiat levamen, ubi sanguinis imminuitur moles, ubi motus vehementia, pulmonem & arterias citius & vehementius replens, sedatur? De V. S. in progressu morbi instituendâ non idem est iudicium. Plures circumstantiæ expendendæ veniunt. Examinandum est vitæ genus, consideranda ætas, consuetudo, abundans vel minor sanguinis copia, imprimis autem vires. Si enim supponamus ægri vires esse adeo debiles, ut, V. S. institutâ, ab Antidotis aut medicamentis diaphoreticis nullus, vel saltem non sufficiens expectandus sit sudor, non quidem attrahetur virus versus cor, verum per circumferentiam corporis & cutis poros expelli non poterit, quod quidem è re ægroti non est. Quod si autem ab hac debilitate nullus sit metus, putem ego convenire V. S. & quidem largam. Si enim venenum pressio- nem sanguinis ejusque dilatationem augeat, si febrem acutam producat, si spiritus animales multum commoveat, an non conducit V. S.? V. S. sanguinem imminuendo validæ illi pressioni occurrit. V. S. pabulum subtrahendo spiritibus animalibus, furorem eorum mitigat. V. S. non tantum repentinis animi pathematibus compescendis, sed & febri & æstui inde productis mitigandis, imo & futuro delirio præcavendo imprimis utilis. V. S. ergo pluribus nominibus hoc in casu prodesse mihi videtur.

*Celsus*, ait, quosdam post rabiosi canis morfum protinus in Balneum mittere ægrum, eumque ibi pati desudare, dum vires corporis finunt vulnere aperto, quo magis ex eo quoque virus destillet: deinde multo meracoque *vino* excipere, hocque omnibus venenis esse contrarium. Huic ego omnino assentior, non tantum in principio, sed & in progressu morbi, quamvis

Externa.



repugnet *Sennertus*. Si enim sudor proficit, quid ni proderit balneum non tantum sudores promovens, sed & omnem acrimoniam cuti impactam temperans. Quod autem *Sennertus* ex *Aureliano* &c. metuit, balneum nociturum ex eo, quod ægri aquas horreant, frivolum est, etenim quando eouſque morbus perſit, ut ægri aquam horreant, jam tuto quidvis in uſum vocari poteſt; niſi enim aliquod præſentaneum in uſum vocetur remedium actum eſt de ægro. *Seneca* monitum: *Qui ſperat nihil, deſperet nihil*, hic locum habet: & *Hippocratis*: *Extremis morbis, extrema remedia*. Aph. 6. 1. Tandem *Celſi*: non poſſe vehementi malo, niſi æque vehemens remedium ſuccurrere. l. II. c. II.

In progreſſu  
efficacius  
inſiſtendum

In progreſſu morbi, præter ea quæ jam propoſita ſunt, conveniunt opiata in majori doſi ſudoriferis, vel etiam catharticis, miſta, & purgantia validiora. *Pilula Mathai* in *Pharmacopœa Bateana* deſcriptæ. p. 81. hic non tantum ob *opium*, ſed & *Helleborum* utrumque, de quo ſtatim agam, conveniunt. *Petrus Salius* commendat *Rad. Hellebori albi*, eorumque utendi modum docet. *Martinus Liſter* cum prius ab *Helleboro albo* eſſet alienior, poſtea tamén, lecto *Petro Salio*, non multum repugnat. *Platerus* è *Dioſcoride* commendat *Hieram colocynthis*, & *Helleborum*: dein & alia purgantia, imprimis ea quæ melancholico humori deſtinata ſunt. Commendatur & *Bryonia*, quæ in majori doſi exhibita ſatis validè evacuat, & forſan non infimæ notæ in *Hydrophobia* eſt medicamentum.

In morbo  
confirmato,  
quid agen-  
dum?

Quod ſi morbus ſit confirmatus, perſuaſum eſt multis ægrum debere ſuffocari, ne alios lædat: ego exiſtimo tum non diu ſupereſſe; ſi enim febris ſit vehemens, ſi ab omni potu abhorreant, ſi delirent, ſi convulſionibus & ſingultu vexentur ægri, qua ratione eorum vita protrahetur? Si *Opium* exhiberi poſſit, exhibeatur majori quantitate: vel V. S. ægroto adimantur vires. Hæc autem, quandoquidem ſufficienti deſtituor experientia, nolim aliter, quam tanquam conjecturas, conſiderari.

Diæta.

De diæta *Hydrophobicorum*, ſeu potius à cane rabido demorſorum agit *Dioſcorides* p. m. 425. adeo ut non ſit neceſſe huic immorari. Commendantur *Allium*, *Porrum*, *Cepa*, *Vini me-*



meracioris potus. Commendatur *Scorzonera* radix ejusque succus, ut & *Melissophyllum*. Cibi aromatibus condiantur. Hujus ratio à *Dioscoride* traditur : δυσμετάβλητα γὰρ τῇ συστάσει πάντα τὰ ἀρώματα ταῖς δυνάμεσι ἢ ταῖς ἰστίαις. c. 3. *Theriaces*. Vide quoque *Codronchum* de Rabie l. 11. c. 4.

## CAPUT DECIMUM.

*De Paralyfi.*

**Q**Uamvis Paralyseos tractatio prima fronte videatur satis facilis, nullus enim non videt, & quidem sæpius, Paralyticos, & videtur intelligere naturam ejus in debilitate consistere; tamen, re probè perspecta, ejus distincta tractatio non minus est difficilis, quam reliquorum cerebri morborum. Difficultatis hujus plures mihi videntur esse causæ, quas expendisse non erit inutile. Prima causa est, quod vox ipsa, auctorum culpâ, sit reddita ambigua. Altera, quod natura ejus non satis distinctè ob oculos ponatur, quando dicitur in Paralyfi motum posse permanere integrum sensu abolito. Tertia, quod causa Paralyseos statuatur nervorum obstructio. Quarta quod ea, quæ è cadaverum sectione deprompta sunt, sint pleraque ambigua. Denique quod ea, quæ de motu muscutorum traduntur non sint satis expedita. Breviter hæc percurramus.

Paralyseos  
tractatio est  
satis difficilis

Dixi vocem Paralyseos, auctorum culpa, redditam esse ambiguam. Quemadmodum enim voce Apoplexias apud *Hippocratem* aliquando Paralyfis intelligitur, ita etiam Paralyseos nomine aliquando Apoplexia indigitatur. Videri possunt *Fœsius* in *Oeconomîâ Hippocratis*, *Gorraeus* in definitionibus medicis, *Stephanus* in *Lexico*; *Dietericus* in *Narthecio*. Hinc factum putem, ut ea quæ Apoplexiæ convenirent tributa sint Paralyfi, & distinctionem esse ortam Paraplegiæ ab Hemiplegiâ, quasi paraplegia esset resolutio omnium partium totius corporis excepto capite, Hemiplegia dimidii tantum lateris. Ego non eo inficias, eos qui stuporem in membris quibusdam percipiunt, aut hemiplegia sunt affecti, posse etiam corripi Apoplexia, adeo.

Ob vocis  
ambiguitatem.



adeoque ambas hasce affectiones posse complicari, non nego etiam, post Apoplexiam superatam, posse remanere hemiplegiam alterius lateris, sed contendo distinctum tamen utriusque debere formari conceptum, ut causæ singulatim fiant manifestæ, & curatio tanto exactius possit tradi. Patentur auctores Paraplegiam seu Paralyfin universalem esse raram, ego existimo eam numquam dari, nisi fortè statuatur insignis læsio spinalis medullæ principii cerebro illæso, quæ tamen, vitâ superstitè diu continuari non potest. Ratio, quæ me movet ut hoc statuam, est, quod in Paraplegiâ deberet affici utrumque latus, quemadmodum in Hemiplegia unum afficitur: id è naturâ oppositionis est manifestum. Jam autem in Hemiplegiâ non tantum partes sub capite, sed capitis ipsius afficiuntur partes variæ, lingua adeo ut vocem articulatam proferre nullam possit, muscoli varii faciei, oris, adeo ut muscoli antagonistæ faciem & os distorqueant. In Paraplegia itaque non tantum sub capite partes, sed ipsum caput deberet affici, id quod hypothesein Paraplegiæ evertit. Quis vidit unquam caput, & sub capite partes resolutas nisi in Apoplexiâ? Non datur ergo Paraplegia ab Apoplexiâ distincta. Id amplius evincitur, si consideretur proportio inter cerebrum & spinalem medullam. Cerebrum in homine est viscus amplum, copiosos producens spiritus animales, qui proinde è spatiis amplioribus in magis angusta coacti, vi & motu gaudent vehementi, qui facile omninò supprimi non potest. Quemadmodum impetus fluminis major est, ubi angustis pontium repagulis coercetur, ita spirituum non minus quam sanguinis vis est major, quando è loco ampliori, & scaturigine capaciori, in angustiores coguntur tubulos. Hinc est quod illi, qui hemiplegia correpti in principio nec manum nec pedem loco movere possunt, postmodum tamen, licet imperfectius, obambulent per plateas, atque manuum & pedum ministerio fruuntur. Est ergo Paraplegiæ descriptio formata, è confuso Paralyseos & Apoplexiæ conceptu. Refert quidem *Petrus Salius Diversus* Paraplegiæ ab ebrietate ortæ exemplum, subsequente paralyfi omnium sub capite partium, quæ tamen intra tertium diem omnino sanata est. Annot. in librum *Donati ab Altomari* c. 14. Verum si aliud non



non detur exemplum Paraplegiæ, quam id quod à *Diverso* affertur, ego nullam dari Paraplegiam existimem. Quid? An vaporosa materia, ad principia nervorum transmissa, obstructionem in iis inducere, spiritus animalis viam intercipere, & motum inferiorum partium inhibere potest? An aliquis ab ebrietate tanta paralyfi repente fuit occupatus, ut mente constans (dicitur enim nocte mediâ cum timore maximo expergefactus) perforationem acus profundè factam, nec gladioli scarificationem omnino non sentiret, & ad omnem motum ineptus esset? Cum Paralyfis, minorem stuporem habens comitem, affectus sit curatu satis difficilis, quomodo hic tantummodo factis quibusdam revulsionibus, & inunctionibus intra tertium diem omninò fuit sanatus? Historia hæc abundè testatur medicos non esse immunes à stupenda narrandi κακοζηλία, adeoque non omnia ab auctoribus tradita promiscuè fidem mereri. Potest & illud addi argumentum, quod nempe in principio Hemiplegiæ mens aliquando planè sit obnubilata. Credemusne igitur Paraplegiam occupaturam omnes omninò sub capite partes, mentis functionibus integris permanentibus? id quidem mihi minus videtur verisimile. Inscriptio c. 18. l. III. apud *Paulum Aeginetam* mihi favet, quæ ita sonat: περι ἀποπληξίας, ἢ ἡμιπληξίας ἦτοι παραλύσεως.

Malè etiam dicitur sensus aboleri in Paralyfi, motu integro remanente. Ego libenter fateor me illud numquam vidisse. Vidi stuporem hujus aut illius partis non semel; verum aliud est stupor, aliud paralyfis, hi affectus minimè sunt confundendi. Paralyseos natura ex ipso nomine fit manifesta, membra affecta laxa, mollia, frigidiora sunt h. e. resoluta, id quod cum vocis significatione optimè convenit. Quis igitur erit adeo imperitus rerum æstimator, ut putet membra posse esse flaccida & resoluta, remanente motu integro? An flacciditas sensum non autem motum tollet, vel omnino vel saltem ex parte? Si autem sensus tollatur, nullâ flacciditate in membro remanente, luce meridianâ clarius est, non adesse tum Paralyfin sed quemlibet alium affectum. Habeo mihi adstipulantem *Rondeletium* cujus hæc sunt verba: *Necesse quoque est sensus & motus amissionem esse ut propriè dicatur Paralyfis. Nam se*

Quod sensus dicatur aboleri motu integro remanente.



*sensus tantum ledatur vel amittatur, stupor est.*

Quod in Pa-  
ralysi statua-  
tur nervo-  
rum obstru-  
ctio.

Causa Paralyseos statuitur obstructio nervorum ab humore pituitoso. Ego autem putem cuilibet attendenti manifestissimum esse, non posse à pituitâ in nervos influente eosdem obstrui. Sive enim cerebrum, sive spiritus animales, sive etiam nervos respiciamus, non potest in nervis statui talis obstructio. Et cerebrum quidem quod attinet, illud generationi non pituitæ, vel materiæ glutinosæ, sed spirituum animalium est dicatum: itaque cerebrum in nervos transmittere non potest humorem pituitosum, quem non producit. Neque hic obijci potest, sæpenumero humores serosos reperiri in ventriculis cerebri; quia id quod ventriculis cerebri continetur, in nervorum cavitates depluere non potest. Distingui debet actio cerebri ab actione & munere plexus choroidei, & membranarum cerebri. Novimus per membranas viscerum dispergi copiosè vasa lymphatica, quæ tamen in viscerum ipsorum substantiam profundè se non insinuant. Quando dixi cerebrum esse dicatum generationi spirituum animalium, cerebrum in specie intelligo quatenus à plexu choroideo, membranis, glandula pineali, pituitaria, infundibulo &c. distinctum est. Possunt humores hi serosi & similes, extra ambitum cerebri coacti, vel mole vel acrimoniâ magnas producere molestias, possunt premere medullam oblongatam, verum in nervorum cavitatem illabi, & infarctu obstructionem producere non possunt. His adde quod nervi sint continuationes medullaris cerebri substantiæ & medullæ oblongatæ, quæ constant è tubulis innumeris non pituitam aut serum, sed spiritus animales continentibus, qui idcirco etiam soli in nervorum cavitates defluunt. Non potest materia ventriculis contenta in nervos illabi, quandoquidem, uti *Willisus* docuit, ventriculi in inane veluti spatium definunt. Forte hæc opinio ortum habuit è perverso quam habuerunt de Catharris opinione, de quibus suo loco agendum. Si ergo cerebrum ejusque munus respicimus, obstructio nervorum ab humore pituitoso in nervos illapso non habet locum. Quod si spiritus animales respiciamus, hi sunt adeo subtiles & mobiles, ut obstructioni in nervis producendæ minimè sint pares. Etenim quis est humor magis subtilis,



lis, quam spiritus, quos nemo mortalium oculis lustravit unquam? Quid? quod nomen ipsum satis indicet, eos à tenacitate, quæ ad obstructionem producendam requiritur, quam longissimè distare? Novi spiritus esse aliquando minus subtiles, novi etiam aliquando esse torpidos; verum quantumvis sint parum defæcati, quantumvis videantur segnes, ad obstructionem tamen producendam sunt omnino inhabiles. Varia figmenta excogitarunt auctores: statuerunt spiritus acres, acidos, congelatos & coagulatos, nemo tamen, quod sciam, eos adeo degenerare dixit à naturali subtilitate, ut obstructiones producerent. Ergo obstructio non debetur spiritibus animalibus, neque ea horum respectu locum habere potest. Obstructio etiam locum non habet nervorum respectu. Eorum fibrillæ & tubuli adeo sunt subtiles, ut nullus adhuc cavitatem eorum (processus mammillares excipio) sensu assequi valuerit. Ratiocinatione colligimus, debere cavitatem aliquam inveniri in nervis, verum eandem oculis nullus detexit. Quomodo ergo in tubulos angustissimos influet humor tenacissimus obstructionem producturus. Si autem cavitates subire non possit humor viscidus, neque etiam à tali causa obstructio orietur. Novi etiam ab auctoribus mentionem fieri liquoris nervei, & succi nutritii; verum non sufficit nova nomina effingere; ostendendum erat præter spiritus animales alium humorem per nervos distribui. Ego nego alium liquorem nervis contineri præter spiritus animales, quem si alio nomine denotare placeat, per me id licet, verum facilè appellationum multitudine confunditur Lector, nec utile est, entia multiplicare citra necessitatem. Qualicumque autem nomine donentur spiritus animales, non ideo erunt minus subtiles, & soli apti ad nervorum tubulos minutissimos subeundos. Nervorum hanc angustiam animadvertentes Antiqui, statuerunt, facultatem animalem nervos transire, quemadmodum radii solis aërem aut aquam pertranseunt.

Concludo quum nec cerebri, nec spirituum animalium, nec nervorum respectu obstructio oriri possit, obstructio ab auctoribus excogitata fictitia est, adeoque hinc paralyfis deduci non potest. Consentientem habeo mihi *Felicem Platerum* insignem



practicum, qui, postquam de causa Paralyseos pituitosæ egisset, subjungit : *ut non opus sit, obstructionem quandam in nervis hic, qui solidi sunt, aut ex filamentis consiti, nec cavitatem ullam, quæ humorem illum crassum, uti quidam scribunt, excogitare.* Tom. I. l. III. c. 2. p. m. 294. Huic Rolfincius l. III. Conf. 19. contradicere studens, nihil affert quod modo laudati Viri sententiam aliquomodo labefactare possit.

Quod ea,  
quæ è cada-  
verum se-  
ctione de-  
promuntur,  
sint ambigua

Dixi etiam ea quæ post mortem in paralyticorum cadaveribus reperta sunt, esse admodum ambigua : adeo ut hinc vera paralyseos causa difficulter admodum erui possit. Res exemplis fiet clarior : iterum copiosum intra utramque meningem collectum, & in ventriculis repertum, nec non ex ostio magno occipitis promanans, statuitur causa motus impotentiae. Vid. *Boneti sepulchretum* Lib. I. sect. xv. obs. 3. &c. Verum feri copia etiam sæpe reperta fuit in cadaveribus eorum qui paralyti nequaquam fuere correpti. ex. gr. post Cephalalgiam. *ibid.* l. I. f. I. obs. 7, 14, 16, 17, 25, 26, 27, 30. &c. post Hemicraniam. obs. 18. &c. post Apoplexiam. *ibid.* sect. III. obs. 40, 41, 45. 47. &c. post Lethargum. *ibid.* sect. III. obs. 1, 2, 4. post Comatosum affectum. *ibid.* obs. 12. post Carum. obs. 10. post Coma vigil. obs. 45. post Catalepsin. *ibid.* sect. IV. obs. 1. post insomnia & incubum. *ibid.* sect. V. obs. 1. post delirium & amentiam. *ibid.* sect. VII. obs. 27, 28. post vertiginem. *ibid.* sect. XI. obs. 3, 4, 11. post Epilepsiam. *ibid.* sect. XII. obs. 5, 6, 8, 9, 10, 11, 12. &c. post convulsionem : *ibid.* sect. XIII. obs. 1, 4. &c. Adeo ut ego *Wepfero* omnino assentiar statuenti Paralytin non oriri à sero nervos nimium humectante : ejus verba adscribere non pigebit. p. 381. *Colluvies equidem feri ingens inter meninges & in ipsis cerebri ventriculis sectione reperta, vix non quemlibet persuasisset, quin graviores noxas actionibus animalibus, imo ipsam Apoplexiam attulisset; nisi diligenti observatione contrarium animadvertum fuisset; nam ad ultimas usque horas omnibus sensibus valuit, sana locutus est; manuum & pedum digitos, ipsosque artus aliquantulum movit : atque manifeste docuit, nervos medias intra undas natantes nunquam ita emolliri, aut structuram ipsorum eousque destrui, quin spiritus integre conservent liberumque transitum concedant, nisi prestantur, aut à circumfluo humore corro-*  
dar-



dantur & sphacelo enecentur. Hæc de fero sufficiant, quamquam multo plura afferri possent, ut pateat causam frequentissimè in dissectione paralyticorum inventam, non tantum in hoc casu, sed & pluribus aliis habere locum. Refert etiam *Fernelius* exemplum resolutionis omnium partium quæ sunt sub capite, verum cum tam multorum affectuum, quos recensuit, causam non aliam proponat quam bilem sinceram eamque prassinam circum jecoris cava libra pondo membranis coercitam, cujus portio etiam in spina nervos obrepserat: manifestum est, vel ipsum non satis accuratam instituisse anatomen, vel ea quæ invenerat mutila admodum descripsisse, vel hæc tantum adduxisse ut ipsius infervirent hypothese, adeo ut hinc nihil certi concludi possit. Vid. *Fernel. Pathol. l. iv. c. 10.* Non sum ego is, qui auctoritati tanti Viri quicquam detractum velim; verum cum hac in parte manifeste hallucinatus sit, album errori calculum adjicere nec volui, nec potui. Vidit illud ante me *Gulielmus Rondeletius* ante sesquiseculum, nempe cum auctoritati plus tribueretur, in schola Monspeliensi Professor regius, cujus verba *Method. curand. morbos. c. 32.* hic repetere non erit inutile: Non ergo satis mirari possum, quod tantus vir tam leviter, etiam sine ratione in hanc sententiam precipitanter adductus sit, ut quod sub finem februm intermittentium paralytin ortam, aliquando conspexerit, a bile in spinam dorsi, & nervorum originem effusa concitatam credidit, quasi bilis, quæ tunc evicta est & pauca, ad locum adeo dissitum & remotum accessu difficilem permeare queat. Quod enim pauca eo tempore sit, & coacta, non dubium est, cum morbus in declinatione sit. Sed quis ille aditus ad spinalem medullam esse potuerit? Aut enim a cerebri sinu posteriore delapsam esse, aut per vertebrarum foramina ad spinam pervenisse oportet. Quod si per cerebrum, cur non phrenitim potius in illis febribus excitavit? cur non etiam in ardentibus? Quod æquius videtur. Idem etiam præstat. Quod cum non fiat, nec in februm intermittentium declinatione per hanc viam fieri putandum est. Per vertebrarum autem foramina, quia cum sanguine simul deduci oportet, subisse cum sanguine, bilis videri non debet, aut in venis contentam fuisse. Quare ardentem aut continuam potius, quam intermittentem concitavisse oportuit. Adde quod vena illa, quæ per



vertebrarum foramina intra spinam pervadunt, nutritionis esse vertebrarum tantum, aut periostii interioris, quod efficere tertiam spinæ membranam crediderim, constituta sint. Quæ cum nec duram, nec tenuem ipsius membranam attingant, nec bilem etiam ad illas deferre posse credenda sunt. & quæ sequuntur. Hæc sufficiant, ut constet, iudicio opus esse in legendis auctoribus, ne falsa pro veris nobis obtrudi sinamus. *Willisus* in cerebri anatome c. 13. refert, se aliquoties cadavera à longâ paralyfi, & gravissimâ nervorum resolutione defunctorum aperuisse, & deprehendisse semper corpora striata præ aliis in Cerebro minus firma, instar amurcæ discolorata, striis multum oblitteratis. Verum cum hæc tantum afferat, ut evincat corpora striata τῆ πρώτῃ αἰσθητικῇ munere fungi (de quâ materiâ in capite de Morbo caduco agam) omissis aliis circumstantiis, nec hinc certo concludere licet, quæ causa produxerit paralyfin? Non nego hæc esse vera, verum possunt adfuisse, imo proculdubio repertæ sunt plures anomalix, quæ ad naturam paralyseos intelligendam non parum profuissent. Suffecit auctori ea recensuisse, quæ ipsius confirmarent hypothesin. Ut rem in pauca contraham, recensentur etiam exempla eorum qui post vulnera in Paralyfin inciderunt, in quorum capitibus post mortem inventa sunt abscessus, sanguis, sanies, ingens puris copia, meninx livens, cerebri sphaceus. Vid. *Bonet. Sepulchret. L. 1. Sect. XIV. obs. 18, 19, 20, 21, 26. &c.* Verum quandoquidem iisdem causis adscribuntur Sopor, Carus, Lethargus, Phrenitis, Delirium, Epilepsia, Convulsiones (Vide eundem. l. 1. S. III. obs. 23, 26, 32, 37, 38. Sect. VII, 10, 23. XII. 21, 23. XIII. 14. &c.) luce meridianâ clarius est, ea quæ in cadaveribus hætenus sunt observata, non satis causas Paralyseos illustrare.

Quod ea  
quæ de mo-  
tu musculo-  
rum tradun-  
tur non sint  
fatis expe-  
dita.

Dixi tandem, ea quæ de motu musculorum disputata sunt, non esse satis expedita. Hoc apparet si quis ea quæ *Willisus*, *Steno*, *Borellus* &c. de hac materiâ memoriæ prodiderunt, expendat. Hæc me movit ratio ut in *Cogitationibus meis* ea depromerem, quæ negotium hoc magis illustrarent. Non est ergo necessum hisce immorari. Sufficiat observasse, ad naturam Paralyseos intelligendam non esse inutile, distinguere inter  
mo-



motum voluntarium, convulsivum, & automaticum. Motum automaticum illum appello, qui à spirituum in nervos influxu dependet, absque voluntatis imperio, cerebro non parum læso. Talis observatur in Catalepsi, uti postmodum videbimus. Huc referri potest ille qui in Caroticis, somnambulis, & incubo vexatis observatur. Motus convulsivus est ille qui absque voluntatis imperio, violentè, aut cum facultatum principum læsione perficitur, talis in Epilepsiâ & Convulsionibus contingit: distinguitur à priori, quod hic cum impetu & violentiâ, iste autem moderatè peragatur. Voluntarius est ille, in quo spiritus animales à voluntate nostrâ in musculos hos vel illos determinantur, ad varios motus animales perficiendos.

Cum de motu automatico & convulsivo in sequentibus sit agendum, hic observare sufficiet, ad motum voluntarium debite perficiendum requiri 1. cerebri ejusque appendicum, medullæ spinalis & nervorum debitam dispositionem 2. spirituum animalium in musculorum fibras determinatum & sufficientem influxum. 3. Fibrarum muscularium debitam tensionem. 4. denique sanguinis, ad musculos replendos, sufficientem impetum.

De motu  
voluntario.

Requiruntur quidem plura, uti ex. gr. ossium debita unitas; neque enim motus membrorum perfici potest, si ossa sint fracta, aut malè affecta. Articulatio integrâ, quandoquidem membra luxata ad voluntatis imperium moveri non possunt. Artus debito modo constituti, quandoquidem nec in Rheumatismo, nec in variis arthritidis speciebus motus membrorum, ad voluntatis nostræ imperium perfici nequit. Verum cum hæc vitia pleraque à paralyfi longissimè distent, ea enumerare non fuit necessum. Non est tamen sicco pede prætereundum, quosdam ab ortu hujus vel illius partis laborare Paralyfi, ob pravam conformationem in utero materno contractam.

Cerebri dispositio debita consistit in ejus expansione moderatâ, tubulis patentibus, & substantia ritè disposita. Ab expansione dependet vigilia, hilaritas, omnium sensuum alacritas & vigor; quanto autem sensuum major est vigor naturalis, tanto motus etiam perfectior edi potest. Tubuli patentes spirituum animalium secretioni, & motui inserviunt.

Ad illum  
perficien-  
dum requi-  
ritur: cere-  
bri disposi-  
tio debita.

Huc



Huc facit quoque ejusdem consistentia debita, & integritas. Medullæ oblongatæ & spinalis eadem est ratio, quandoquidem horum ope & sensationes ab objectis externis excitatæ ad sensorium commune deferuntur, & spiritus per eorum tubulos ad membra & viscera distribuuntur. Nervorum opera spiritus animales ad omnes partes confluunt, adeoque eorum tubuli patuli, integri, firmi requiruntur. Verum non tantum horum omnium cavitates considerandæ sunt, sed & membranæ hæc viscera tegentes, quandoquidem à sanguine, eos debite irrigante & nutriente, eorum functiones imprimis dependent.

Spirituum  
determina-  
tus & suffi-  
ciens influ-  
xus.

Ad motum voluntarium peragendum requiritur quoque spirituum determinatus & sufficiens influxus. Nisi enim spiritus animales à voluntate nostrâ versus has vel illas partes determinantur, oriuntur motus convulsivi & automatici, quos à voluntariis distinguendos esse statim monuimus. Debet etiam esse sufficiens; alias enim excitatur Paralyfis. Neque enim in omni Paralyfi spirituum influxus aboletur, sed non sufficienter peragitur, uti patet in Paralyticis ambulantes, partem affectam extendentibus, flectentibus, & sic porro. Atque hac in parte videmus auctores non satis circumspectè loqui, quando ajunt Paralyfin esse abolitionem sensus & motus: neque enim hæ functiones semper omninò abolentur, sed debilius atque imperfectius obeuntur. Novi *Galenum* c. 5. l. 1. de causis symptomatum dixisse, membra prorsus sensus motusque expertia fieri in Paralyfi; verum hæc verba cum grano salis accipienda sunt. In graviore Paralyseos principio motus omninò perit, si membrum resolutum elevetur, decedit, sensus est obtusior; verum id in omni Paralyfi locum non habet. Videmus enim multos Paralyticos obambulare per plateas, omnia sua munia obire, altero latere existente debiliore: sunt tamen & per plures annos remanent Paralytici. Non debet *Galen*i auctoritas plus apud nos valere, quam quotidiana experientia & rerum usus.

Fibrarum  
musculari-  
um tensio  
debita.

Dixi etiam, ad motum voluntarium peragendum, requiri, fibrarum muscularium debitam tensionem. Fibræ musculares duplicis sunt generis, nervæ aliæ, aliæ carneæ. Hæ à sanguine arterioso intumescunt, uti statim videbimus; illæ ab influ-



fluxu spirituum animalium. Hæ duæ tensiones & motui voluntario & sensui excitando inserviunt, adeo ut non opus sit cum *Cartesio* supponere in nervis filamenta ad sensum versus cerebrum deferendum, & spiritus animales per tubulos nervorum ad musculos deferendos. Totum hoc negotium evadit manifestum, si hæc, quæ de fibris & tensione dixi, probe percipiantur. Tensio hæc duplex est, alia quæ resolutioni, alia quæ relaxationi opponitur. Prior tensio ordinariè & semper in sanis locum habet, sive agant, sive cessent, sive vigilant, sive dormiant. Oritur à jugi spirituum versus partes inferiores influxu, nervos eorumque filamenta modicè replente. Ab hac tensione dependet sensus; ab hac eâdem tensione, tanquam causâ sine qua non, dependet calor, firma partium consistentia & nutritio. Hæc tensio minuitur in Paralyfi atque hinc oriuntur sensus imminutio, frigiditas, mollities, & nutritionis debitæ defectus. Cum ergo in hac tensionis imminutione essentia paralyseos consistat, ea breviter explicanda est. Quemadmodum fides sonum aut nullum aut obtusum edunt, nisi tendantur: quemadmodum baculus aptus natus est ad regendum vestigia in tenebris, uti *Cartesius* rectè observavit, quandoquidem nos per baculum intermedium diversa corpora occurrentia percipimus, ad quæ visus acies non pertingit: quia simulac una pars impingit in corpus aliquod obvium, manus, aliam tenens extremitatem, ab impulsu illo movetur, cui usui funiculus non esset aptus, quandoquidem debitâ rigiditate destituitur. Eodem modo sese res habet in corpore nostro: nisi filamenta nervea, per universi corporis nostri musculos & membra dispersa, tendantur, seu debitè spiritibus repleantur, impulsus objectorum externorum ad cerebrum non satis vividè deferetur, adeoque sensus erit imminutus. Sensus enim non consistit in eo, quod objecta externa instar filamenti aut funiculi trahant nervosos tubulos, quemadmodum trahendo unam funis extremitatem, campanam quæ pendet ab extremitate altera, eodem tempore sonare facimus; sed sensus consistit in eo, quod filamenta nervea spiritibus animalibus repleta, simulac premuntur, motum, pulsus, seu nisum quendam ad cerebrum deferant, qui ad sensorium commune delatus va-



um sensum, pro varietate impulsus ab objecto externo membris nostris illati, excitat. His explicandis nolim ulterius immorari, quandoquidem possunt videri Philosophica magis quam medica; itaque sufficiet sententiam hanc paucis confirmare, & ab objectione satis difficili vindicare: hoc modo existimo negotium hoc intricatum evasurum manifestissimum.

Confirma-  
tur experi-  
mento.

Vidimus corpus solidum, si ab una parte impellatur, statim eundem motum altera extremitate exhibiturum. Ostendendum jam est, idem habere locum in fluidis, quandoquidem nervi, ope fluidi in ipsis contenti, spirituum animalium nempe, eundem motum cerebro communicant. Hoc patet è sequenti experimento. Sumatur tubus vitreus, cujus una extremitas vesicâ suillâ laxè circumligatâ claudatur: repleatur illa aqua ad summum usque: tum altera extremitas vesicâ stricte claudatur, manifestum evadet, simulac extremitas una, adeoque aqua impellitur, statim eundem motum sese alteri extremitati communicaturum. Si autem tubus ille ex parte tantum sit repletus, & teneatur perpendiculariter, statim quidem jucundo spectaculo, videbitur subsultus aquæ, non tamen in altera extremitate ullus percipietur motus, quandoquidem aqua eousque pertingere non potest. Si idem ille tubus ex parte repletus teneatur horizontaliter, vix aut ne vix quidem motus ad aliam partem pertinet. Eodem modo sese res habet in nervis, si nervi à spiritibus animalibus, corpore fluido, sufficienter sint tensi, simulac extremitates versus membra protensæ, ab objecto externo impulsæ, motum illum versus cerebrum deferunt, statius excitatur sensus manifestus: si autem flaccida sint illa filamenta, nec spiritibus sufficienter tensa, tum sensus magis vel minus erit imminutus. Id habet locum in paralyfi, adeoque putem me rectissimè superius dixisse, requiri tensionem sufficientem ad motum perficiendum. Quamvis enim jam tantum de sensu agam, idem illud tamen respectu motus habet locum uti in sequentibus videbimus. Tensionis hujus quoque meminit *Rondeletius*. *Paralyfis fit tendonum vel nervorum relaxatione.-- Debent enim secundum naturam tendi, quo levissima contractione facta, partem, cui tendo inseritur, trahere queunt.*



In eo maxima est difficultas, quod hoc pacto statuatur duplex in spiritibus animalibus motus, alter ab extremitatibus versus cerebrum, ad sensum perficiendum, alter è cerebro versus membra, qui cum sint contrarii, non videntur simul posse habere locum, sed potius sese invicem debere destruere. Hæc non parva est difficultas, quæ proculdubio *Cartesium* coëgit recurrere ad supponendum in nervis filamenta sensui dicata, ut nempe motus ope spirituum animalium posset sine ullo impedimento peragi: quemadmodum in organis musicis ope filamentorum ductus quidam aperiuntur, quibus apertis statim flatus eò penetrat ad sonum efficiendum. Verum hæc difficultas evanescet, si consideremus, & in corporibus solidis, & in fluidis duplicem posse esse nifum sive motum, quorum tamen neuter alterum abolet. Ex. gr. Statuamus duos homines *Alexandrum* & *Adrianum* baculum intermedium tenentes: *Alexander* ad ortum constitutus trumat baculum versus occidentem, ubi *Adrianus* est constitutus; horum autem amborum vires ita exactè sint pares, ut baculus loco non moveatur. Manifestum est utrumque percepturum motum protrusionis, alter versus occidentem, versus orientem alter cum tamen baculus loco non moveatur: uterque impulsus sentit, nec motus vel nifus hic contrarius impedit, quo minus ambo eundem motum manifestè persentiscant. In fluidis res adhuc est multo manifestior: statuamus tres homines (& quod de tribus dico de decem & pluribus potest affirmari) *Petrum*, *Philippum*, *Paulum* eodem tempore idem speculum intueantur: *Petrus* directè speculo sit oppositus, *Philippus* & *Paulus* obliquè, adeo ut *Paulus* *Philippum*, *Philippus* *Paulum* intueri. Manifestum est radios luminis à facie *Petri* directè debere incidere in speculum, ut imago ejusdem in speculo possit efformari, radios luminis eodem tempore debere reflecti à speculo versus oculos *Petri*, ut ipse faciem suam in speculo contemplari possit: itidem manifestum est, radios luminis à facie *Philippi* debere incidere in speculum & oblique reflecti versus faciem *Pauli*: eodem tempore radios luminis debere incidere à facie *Pauli* in speculum, & reflecti versus faciem *Philippi*: & tamen nulla visus observabitur confusio. *Petrus* sese ipsum distinctè contem-

Difficultas  
removetur.



plabitur, *Paulus Philippum*, *Philippus Paulum*, cum tamen radii luminis non tantum versus contrarias ferantur partes, sed etiam sese mutuo decussatim intersecant. Hoc exemplum notatu evadit dignius, si consideremus omne lumen à radiis solis derivari, adeoque eodem tempore debere radios luminis oblique à sole versus inferiora derivari, ut *Petrus* se ipsum, *Paulus* & *Philippus* se invicem possint contemplari. Eodem modo sese res habet in nervis & spiritibus nostris, duplex potest esse nifus ad sensum & motum efficiendum, atque uterque peragi, absque ullâ confusione. Spiritus animales sunt subtiles non minus quam radii luminis, & quando de sensibus fit sermo, metaphoræ, à visu desumptæ, sunt adeo solemnes, ut sæpe metaphoricè loquamur, existimantes non vocabulis uti in propria significatione. Libet hic adscribere *Willisi* verba: *Quamvis autem satis constat, tales spiritus (animales) functionum animalium auctores existere, ipsiusque animæ hypostasim constituere; attamen quid ipsi secundum propriam suam essentiam fuerint, explicatu difficillimum videtur, quia scil. vix quidquam in rerum natura occurrit, cui in omnibus conferantur. -- Quapropter longe melius, juxta hypothesin nostram, hos spiritus, è sanguinis flamma emissos, lucis radiis, saltem iis auræ, aërique intertextis, similes dicamus. Nam sicut lux ad visibilibus, aërque ad audibilibus omnium impressiones configurantur; ita spiritus animales, illorum, ac insuper odorum, & qualitatum tangibilium εἰκόνας impressas excipiunt easque πρῶτῳ αἰσθητηρίῳ sistunt. &c. de Anima Brutorum p. 1. c. 4.*

Hujus tensionis usus.

Docui hætenus quomodo sensus dependeat à tensione, sive repletionem fibrarum nervearum per universum corpus dispersarum, dixi ab eâdem tensione dependere calorem, firmam partium consistentiam & nutritionem, verum tanquam à causâ sine quâ non. Ostendi antea à pressione sanguinis dependere calorem nostrum, verum ut ille communicari possit, requiritur ut vasa sint patula, ne partes vicinæ flaccidæ influxum sufficientem sanguinis impendant. A spiritibus animalibus, fibras nerveas sufficienter tendentibus, dependet influxus sufficiens & satis validus sanguinis arteriosi, adeoque ab iisdem tanquam à causâ sine quâ non deducendus est calor partium. Ab eâdem



eâdem illa tensione dependet debita partium consistentia: quia nisi filamenta nervea debitè tendantur, sanguis minimos tubulos sufficienter replere non potest, id quod ad firmitudinem partis requiritur. Ab eâdem tensione dependet nutritio, quia scilicet nutritio requirit & calorem, & tubulos satis patulos, per quos sanguis influere possit. Non inconcinne membra nostra tentorio comparari possunt hujus respectu. Quemadmodum enim tentorium habitationi, & supellectili commodè disponendæ, non est satis aptum, nisi clavi sint confirmati, funes debitè extensi, aulæa ritè composita; ita etiam nutritio commodè peragi non potest, nisi fibræ nerveæ, firmitudinem membris præstantes sufficienter sint, à spirituum animalium influxu, extensæ. Dixi tamen nutritionem hinc dependere tanquam à causa sine qua non, quandoquidem nutritio non minus quas calor noster natus à sanguine dependet. Cum hæc non satis observassent *Angli*, finxerunt succum nutritium à spiritibus animalibus & sanguine distinctum, cujus quemadmodum nulla est existentia, ita nulla est necessitas. Argumenta ad hunc succum statuendum excogitata nihil aliud evincunt, quam emanationem spirituum debitam requiri ut nutritio absolvi possit. Hoc verissimum esse è jam dictis, patet; verum ille influxus spirituum animalium non nutrit, sed partes ad nutritione debitâ fruendum disponit, quia sanguineos tubulos patulos reddit, ad sanguinem sufficienter advehendum, qui proinde nutritionis causa principalis haberi debet. Si ergo tensio hæc deficiat, minor evadit calor, nutritio non satis debite peragitur, membra sunt flaccida.

Explicui hætenus tensionem priorem, quæ resolutioni opponitur, restat altera quæ relaxationi opponitur. Ea est, quando ad voluntatis nostræ arbitrium spiritus in muscoli fibras tendinosas & nerveas influunt, ad sanguinis motum progressivum aliquomodo sufflaminandum, unde tum repletio fibrarum carnearum sequitur, musculi ventrem inflans, & membrum, cui tendo insertus est, ad se trahens. De hac tensione in *Cogitationibus meis de Instauratione Medicinæ* egi. Itaque hic observâsse sufficiat, tensionem hanc priori esse proportionatam, adeo ut hæc validè & sufficienter fiat, ubi

Tensio Fibrarum altera.



prior illa non deficit, & è contrario hanc debilius peragi, ubi illa deficit, sive ubi membra reddita sunt paralytica. Quamvis enim supponamus aliquos spiritus influere in musculos, quos movere est animus, tensio tamen hæc sufficienter non fit, quandoquidem prior illa resolutio superata non est. Et hinc patet illos falli, qui existimant in Paralyfi aliquando sensum tolli motu superstitite, uti in superioribus vidimus. Nempe spirituum copiosior influxus, fibrarum tensio major requiritur ad motum, quam ad sensum peragendum, unde videmus in principio Paralyseos, quando membra omninò resoluta sunt, sensum tamen, licet obtusiores, esse superstititem. Rectè huic affectui nomen παραλύσεως impositum est; membra enim affecta sunt laxa, mollia, frigidiora. Quis ergo adeo imperitus erit rerum æstimator, qui putet membra posse esse flaccida, & resoluta motu integro remanente? An flacciditas sensum, non autem motum tollet vel omnino, vel saltem aliquâ ex parte? Si autem sensus hebetetur, nullâ flacciditate in parte affectâ conspicuâ, luce meridiana clarius est, non adesse Paralyfin, sed quemcumque alium affectum.

Sanguinis in  
musculos  
influxus.

Ultimum quod dixi requiri ad motum voluntarium peragendum, est sufficiens sanguinis in musculos influxus. Ab hoc influxu dependet ventris muscoli extensio, non ab aliqua explosione, non à contrarietate spirituum animalium & succi nutritii. Ansam huic commento dedit consideratio efficaciam, quam observare licet, quando musculus expanditur, tum enim non solum membrum, cui tendo insertus est, trahitur, sed quicquid ab illo membro ex. gr. manu comprehensum est: elevamus pondera gravia, corpora magna & ponderosa loco movemus, imo humeris onera fatis gravia portamus, non exiguo, sed longo tempore. Dependunt hæc omnia à sanguinis pressione, & celeri per universum corpus circulatione: unde sequitur, si sanguis aliquomodo cohibeatur in aliquo musculo, statim illum debere inflari, abbreviari, & magna vi attrahere membrum annexum. Hinc etiam patet musculos antagonistas posse reciprocè & celerrimè inflari & relaxari, quandoquidem simulac influxus spirituum ad cohibendum



dum sanguinis motum progressivum cessat, statim sanguis cohibitus effluit, imo etiam exprimitur ab intumescencia musculi antagonistæ. Hinc etiam patet quare magis fatigemur, quando eosdem musculos diu inflatos tenere cogimur, non item, quando musculi antagonistæ successive agunt. Nimirum sanguis facile per momentum temporis in musculo cohiberi potest, non item diu, quandoquidem impetus sanguinis, è corde validis & repetitis pulsibus expulsi, à tergo premens, vim infert tensioni illi fibrarum tendinosarum: fibris ipsis carneis à continua illa repletionem quoque infertur vis: id quod non ita contingit, ubi sanguis nunc in uno, nunc in alio brevi tempore cohibetur. Dixerunt antiqui triplices in corpore nostro dari partes: solidas, fluidas sive contentas, & impetum facientes; per impetum facientes intellexerunt spiritus animales; verum si rectè calculum ponamus, non sunt propriè spiritus animales illæ partes à quibus dependet impetus, nisi in quantum impetus sanguinis non deducitur in actum, absque spirituum animalium influxu. Sanguis non tantum primum movens est in corpore nostro, sed & movens maximarum virium. Quanta vis, quam immensa requireretur copia spirituum animalium, si ab illis solis deducendus esset motus omnis muscularis? Quanta conjungeretur dissipatio & jactura spirituum animalium, si illi disparerent postquam musculum inflassent, neque enim facile ad cerebrum remeare possunt? Hæc fuit ratio, quare *Cartesius* valvulas in musculis antagonistis excogitarit, quare alii alia supposuerint. Mihi abundè sanguis ejusque pressio sufficit, ad omnia phænomena, quæ in motu musculari observantur, explicanda. Sanguinis hæc actio non premitur difficultatibus, quibus aliæ laborant hypotheses. A sanguine nihil perit, adeoque diu motus continuari potest: sanguis celerrimè movetur, adeoque musculi citissimè inflari & detumescere possunt. Sanguis magna vi & continuis ictibus è corde propellitur, adeoque maximæ est efficacix. Sanguine non tantum arteriæ sunt repletissimæ, sed is è majoribus vasis, in minimas propellitur sensim angustatas fibrillas, uti alibi explicui. Adeo ut mirum sit *Raimundum Viennensem*, cum utilitatem vasorum sanguineorum musculi constructionem in-



ingredientium & viderit & adstruxerit experimento canis, cuius si descendens aortæ truncus valido stringatur vinculo, protinus subjectæ diaphragmati partes paralyti laborant; remoto autem vinculo, atque adeo sanguini libero com meatu reddito, eadem partes sensum motumque recuperant. Cum, inquam, hoc experimentum p. 247. referat, eadem tamen pagina statuit, ubi tenuissima fila ad se invicem accedunt propius, atque eorum interstitia minora fiunt in inflatione musculi, tum inde contingere, ut sanguis ipsis interjectus veluti exprimatur, & subito in venas refundatur. Etenim si sanguis exprimatur è musculo in ipsius actione, omnis ille tumor adscribendus esset spiritibus animalibus, quorum tum requireretur maxima copia, quorum contingeret ingens dissipatio, quod à ratione alienum esse non ego tantum, sed plures ante me viderunt. Si sanguis è musculo exprimatur, unde ipsius inflatio, unde tumor? An à spiritibus animalibus solis? Verum illi nervorum tenuissimis continentur filamentis, in expansione autem musculi non tantum fibræ nerveæ, sed & carneæ expanduntur. Hinc inflatio musculi, musculi hinc dependet durities vel sensui ipsi manifesta. Quid? quod inflatio musculorum à sanguine in musculos copiosius influente, vel oculis nostris sese offerat, ubi diligenter attendimus ad tubicines tubæ canentes; tum enim apparet faciem illorum colore sanguineo esse perfusam. Unde autem hic color? Unde? nisi ab influxu copiosiore & retentione sanguinis in musculis, ad inflationem tubæ suæ symbolam conferentibus? Ultimum itaque, quod ad motum voluntarium requiritur, putem me rectissime statuisse, sufficientem influxum sanguinis in musculos, ad illos inflandos, & motum perficiendum.

Paralytis affectus est ingravescentis ætatis.

Progrediendum jam est ad explicationem causarum paralyseos verarum, in quibus detegendis utinam essem tam felix, ut amoliri omnes possem difficultates, quemadmodum existimo me illas ritè perspexisse! Verum hic opus, hic labor. Optarem sanè ut mihi aliquot cadaverum paralyticorum fieret copia, cum ea, quæ literis consignata sunt, aliquando accommodata sint præconceptis opinionibus, aliquando debita destituantur

tur



tur ἀκριβέστα. Non ausim spondere me aliis satisfacturum, cum mihi ipsi vix satisfaciam, dicam tamen ea, quæ mihi maxime visa sunt probabilia: sperans fore, ut praxis medica tandem magis illustretur. Antequam autem causas detegam, non inutile erit præmittere, id quod *Paulus Aegineta* rectè observavit, Paralyfin esse morbum ætatis ingravescentis. συμβαίνει δὲ, inquit, τὸ πᾶσι περὶ τὴν πρεσβυτικὴν ἡλικίαν ταῖς φλεγματικωτέραις κράσεσι. L. III. c. 18. Rarius juvenes invadere hunc morbum, frequentius ætate provectos, non parum facit ad naturam ejus intelligendam. Nempe cerebrum in senibus sensim evadit magis flaccidum, unde spiritus animales, secreti ope hujus visceris, minus sunt copiosi, minus activi. Adest quidem determinatus eorum in musculos influxus, sed non sufficiens, nec satis validus. Etenim si senum mores & motum consideremus, patebit illos segnius, timidè gelideque res omnes administrare, id quod à spirituum minori copiâ, nec non minori vigore dependet. Hinc tremor, tardus & debilis incessus. Hisce si addamus, sensim poros aliquos obliterari, fibras ipsas reddi minus obsequiosas, interim autem sanguinem, per arteriarum ramos patentes, copiosè ad cerebrum deferri, manifestum est, cerebrum magis deprimi, ac magis flaccidum reddi. Flacciditatem auget serosorum humorum copia, ventriculos cerebri replens, atque partes subjectas premens. Hinc oculi senum ac nares sero & pituitâ madere solent. Hinc oritur nimia in somnum propensio, adeo ut mensæ affidentes, inter ipsa colloquia, sæpe in somnum labantur. Si autem nocte non æque placidum capiant somnum, illud non rarò à nimia oritur sollicitudine. Exactâ viâ viaticum quærunt, liberis prospiciendi cura torquet. Addamus & illud Poëtæ:

— *Senectus, si nihil aliud quicquam vitii  
Apportet secum, cum advenit, unum id satis est  
Quod diu vivendo, multa, quæ non vult, videt.*

Hinc morosi, difficiles, queruli, acti temporis laudatores, censores, castigatoresque minorum. Ab eadem cerebri dispositione, flacciditate, depressione, oritur ingenii imbecillitas,

Pp

obli-



oblivio, animus meticulosus. Non tantum in capite, sed & universo corpore quidam tubuli & pori oblitterantur, uti illud è rugis & fulcis apparet: interim quædam vasa sanguinea minora à continuâ circulatione ampliantur, quemadmodum illud ad oculum in manibus senum aliquando conspicitur. Adest etiam in senibus debilior fibrarum tensio, unde sensus externi fiunt hebetiores. Visus minuitur, evadunt surdastris. Nonnunquam de partis hujus aut illius queruntur stupore, qui non rarò paralyfin præcedit. Quod si autem tensio ordinaria ad sensum sit imbecillior, non mirum, si eadem, ad motum requisita, quoque sit debilior. Spiritus animales minus activi in fibras tendinosas non ita vividè influunt, ut sanguinis motum sufficienter remorentur, ad validam musculi inflationem perficiendam. Sanguis ipse redditur quasi effoetus, particulis activis minus prægnans, unde ipsius impetus quoque est minor. Cor debilius contrahitur, sanguis minus comminuitur, minori calore, minori vi elasticâ pollet. Cum autem ab hac sanguinis pressione omnes functiones dependeant, ventriculus chylum suppeditabit minus concoctum, unde minor copia talium particularum, quæ spiritibus animalibus pabulum præbere solent. Quid? quod sanguis ipse, particulis minus exaltatis constans, mole sua gravius cerebro incumbat? Quid? quod ipse hic sanguis minus aptus sit promptæ circulationi per minimas meningum & corticis cerebri arteriolas? Hinc spirituum expansio, & mobilis per nervos influxus non parum immittitur.

Transitio.

Hæc fuerunt præmittenda, ut constet quomodo senes ad Paralyfin sensim reddantur dispositi, jam explicandum restat, quæ sint veræ Paralyseos causæ, & quomodo hæc dispositio in actum deducatur. Ajunt Auctores Paralyseos causas esse, quicquid influxum spirituum in nervos & musculos impedit: hoc est verissimum; nam ab influxu impedito dependet minor tensio fibrarum, flacciditas & resolutio musculorum, in qua essentia Paralyseos consistit; verum rogo, quid sit illud quod influxum spirituum in fibras musculorum impedit? hic jam culpatur obstructio nervorum ab humore pituitoso & glutinoso, quam ego in superioribus demonstravi locum habere non posse.

Ego.



Ego existimo omnem Paralyfin oriri à compressione, vel solutione continui nervorum, medullæ oblongatæ, vel spinalis. Causæ Paralyseos.  
Causæ compressionis sunt variæ, tumores, sanguis sive extravasatus, vel nimium distendens partes, serum, pus, lymphæ, ossa.

Tumores possunt oriri in cerebro, quemadmodum ego aliquando puerum dissecai, in cuius cerebro reperiebatur tumor durus & subrotundus. Hi tumores tamen Paralyfin non produciunt, nisi adeo prope medullæ oblongatæ accumbant, ut vel eandem vel nervos comprimant. *Willisus* etiam tumorum scirroforum mentionem facit, illosque inveniri statuit in medulla spinali. Nolim illud planè inficias ire, ego tamen existimo eos facilius & frequentius in cerebro inveniri. Tumores tales influxum spirituum impedire nemo non videt, unde necessario sequitur, tensionem fibrarum nervearum ad musculos disperfarum imminui & resolvi, in quo essentiam Paralyseos consistere dixi. Si autem tensio ordinaria, ad sensum requisita, relaxetur & imminuatur, tensio ad motum necessaria & validior imminuitur vel planè aboletur. Possunt quoque oriri tumores prope nervorum exortum, à læsione membranarum, vel earundem vasorum. Hujus rei exemplum memorabile existat apud *Wepferum* in auctario hist. 14. *Ursula Aberlin Wolfachensis*, virgo 23 annorum plethorica, staturæ mediocris, carnosa, robusta, famula apud Cauponem, magnam graminum farraginem, ac pondere gravem capite gestatam ex agro domum deportavit. Sub onere sensit manifestè aliquid intra cranium ruptum fuisse: paulo post cibaria cum supellectili in loca montana vicina detulit, admodum gravata iterum fragorem intra cranium animadvertit. Ab illo tempore urinam minus retinere valuit, postmodum sinistrum latus motu & sensu privatum fuit. Vixit adhuc annum unum atque alterum, nunc melius nunc pejus disposita. In cadavere, præter serum in capite collectum, apparuit folliculus ovi gallinacei magnitudine, peculiari tunica vestitus, aquam turbidam continens. Hæc fuit paralyseos causa. Historia fusè descripta l. c. videri potest. Huc referri possunt cerebri Apostemata, & similes tumores. Vid. *Boneti Sepulchretum* l. 1. Sect. xv. obs. 18. Vel Tumores.



etiam lapis in cerebro inventus, quale exemplum refert *Bonetus* l. IV. Sect. III. obs. 1. §. 2. in eo enim ægro collum relaxatum fuit, & imbecillior motus observatus.

Sanguis extravasatus  
& vasa distendens.

Sanguis ἐκχύματα produciens, vel planè extravasatus, etiam compressionem medullæ oblongatæ & nervorum efficere potest. Ita ego præfui Matronæ, sexagenariæ circiter, quæ è gradibus decidua caput non parum læserat: hæc facta hemiplectica felicissimè restituta est, adeo ut postmodum nulla Paralyseos prægressæ indicia remanerent. Non dubito quin circa basin cerebri ἐκχύμωσις fatis gravis causa fuerit Hemiplegiæ, quæ, nervos comprimendo, sensum & motum sustulit, quandoquidem à denegato influxu debito spirituum animalium, musculi eorumque fibræ non potuerunt non resolvi. Post vulnera capitis non rarò contingit oriri Paralyfin. Historiam non unam apud *Bonetum* in Sepulchreto videre licet. Lib. 1. Sect. xv. obs. 26. §. 7. 8. &c. Accidit etiam aliquando, anteriorem cerebri cavitatem, aut ventriculos, sanguine & fero repleri, licet vulnus nullum præcefferit. Vid. ibid. obs. 9. 16. Facile autem intelligimus, à quacumque demum causâ sanguis effundatur, dummodo premat nervos, & medullam oblongatam, impediri spirituum influxum, atque adeo fibris nerveis minus tensis, sensu & motu aut magis aut minus privari ægrotantem. Paralyfis est morbus ingravescentis ætatis, ac senum, in quibus sanguis solet esse viscidior, & ad motum minus aptus. Hic ab arteriis majoribus in minores propulsus ramificationes, nec facile transiens, producit nimiam earundem repletionem, & extensionem, unde nervi non parum comprimi possunt. Talis dispositio sanguinis reperitur in corporibus cacochymicis, melancholicis & scorbuticis, unde hi homines ad motum fere sunt segniores, & sæpe anhelosi. Observarunt talia auctores, quando illa cum eorum præjudiciis conveniebant in melancholiâ, ubi noverant culpari sanguinem foeculentum. Vid. *Boneti* Sepulchretum l. I. Sect. viii. obs. 6. & Sect. ix. obs. 2. In Paralyfi ad hanc non videntur fuisse satis attenti, cum tamen hæc minime videatur negligenda. Nempe non rarò contingit stuporem Paralyseos prænuncium V. S. & medicamentis convenientibus superari. Ratio levaminis mihi

non.



non videtur alia, quam quod incipiens vasorum tumor immi-  
nuatur, ulterior præcaveatur. Quid? quod homines satis  
benè, ut videtur, dispositi ab animi commotione in Paralyfin  
incidant? Hujus rei non alia videtur causa, quam quod spiri-  
tus & sanguis validè & turbulentè agitati, tensionem majore-  
m fibrarum excitando, vasorum extensionem & reptatum  
aliquantulum immutent. Quemadmodum enim ab animi com-  
motione in variis partibus varia excitatur labe, ita non mi-  
rum, si in quibusdam etiam nervi eorumque vasa malè mulcten-  
tur. Quædam ab animi commotione in menstrua inordinata  
& superflua, quædam in eorum perpetuam incidunt suppres-  
sionem. Quædam in mamillarum tumorem, schirrum,  
cancrum. Quidam in tubercula pulmonis, vomitam, phti-  
sin. Plura possent enumerari. Horum omnium melior non  
datur explicatio, quam quod spiritus tumultuantes in has vel  
illas partes inordinatè influant, adeoque texturam vasorum &  
partium solidarum pervertant. Ut ad Paralyfin revertar,  
non accidit illa ab animi passione ita facile juvenibus, quam  
quidem senibus, cujus rei ratio ex iis, quæ superius explicata  
sunt, evadit manifesta. In senibus quippe sponte reptatus va-  
sorum immutatur, quædam extenduntur, quædam imminu-  
untur & contrahuntur: sanguis effoetus circulationi est minus  
aptus, cerebrum flaccidum, spiritus minus mobiles, itaque  
si commotio vim afferat vasis in basi cerebri, aut circa medul-  
lam spinalem copiosè dispersis, quid mirum si vasa à sanguine  
glutinosiore distendantur, si influxus spirituum satis copiosus  
impediatur versus fibras musculares debiliores, adeoque sub-  
sequatur Paralyfis. Quod si excipiat dolor & tristitia, tanto  
pertinacius causa hujus mali hærebit, & vix aut ne vix qui-  
dem superabitur. In juvenibus hæc non ita facilè habent lo-  
cum, præterquam enim quod animi affectus non sint ita stabi-  
les, sanguinis, cerebri, spirituum animalium tantus est vi-  
gor, ut hic à graviore isthoc symptomate eos eximat.  
Quamvis auctores in explicatione causarum Paralyseos præci-  
pue pituitam respexerint, fatentur tamen sanguinem quoque  
hujus symptomatis esse causam, quem *Rondeletius* c. 3. primo  
loco enumerat. *Hercules Saxonia* etiam V. S. in Paralyfi à



repletionem præscribit l. i. c. 10. & refert *Vallariolam* septuagenario cum fructu venam secasse : quæ quidem ad sententiæ meæ confirmationem non parum faciunt. Etenim si sanguis solâ copiâ producat Paralyfin , cur sanguine imminuto non statim expugnatur morbus ? Quæ est ratio productionis pertinacis mali ? Mihi quidem videtur nulla commodior , & cum symptomatibus & diuturnitate affectus magis conveniens posse statui quam ea , quam explicuimus , causa. Hanc etiam imminuisse videtur *Sennertus* , qui è *Galeno* , inter causas Paralyseos recenset *densationem seu coarctationem , cum nervus crassior , quam pro sua natura , habitum seu conditionem susceperit*. Crassior hæc constitutio mihi , circulationi sanguinis convenienter , non videtur commodius posse derivari , quam si à sanguine nutriente , & vasa minutissima , nervos & membranas perreptante , modo jam descripto , vel à lymphâ modo insequentibus describendo , deducatur. Auctores qui ante detectam sanguinis circulationem vixerunt , faciunt quoque mentionem sanguinis crassioris , qui alia ratione , quam modo jam dicto , non videtur posse explicari. Quid ? quod Paralyseos prodromus non tantum sit stupor , cujus meminimus , sed & læpe vertigo ? Vertiginem autem à repletionem nimiam vasorum ortum ducere , in superioribus , uti opinor , luculentissime demonstratum est. Exemplum Paralyseos , quam præcesserat capitis dolor , oculorum scototomia , & vertigo vide apud *Walsmadium* Casu xiv. p. m. 130.

Serum.

Serum potest etiam esse causa Paralyseos , verum tantum in quibusdam casibus , quandoquidem sæpenumero serum in capite copiosum est inventum post mortem , ubi nulla vexaverat paralyfis : quandoquidem ii qui hydrocephalo laborant , etiam non evadunt statim paralytici. Serum itaque , meo iudicio , producit Paralyfin ubi id , circa basin cerebri & nervorum exortum delapsum , medullam oblongatam , ac nervos : vel si idem medullam spinalem comprimat. Huc potest etiam accedere cerebri ipsius flacciditas , atque ita causam hanc , per se non satis efficacem , in actum deducere. Ita in exemplo , quod affert *Willisus* , ubi corpora striata fuerunt flaccida , fortè latex serosus , vel similes causæ adjuvantes una

pro-



produxerunt Paralyfin. Ad feri in cerebro majorem accumulationem facit, si membranæ spinalem medullam ambientes increascent, vel intumuerint à sanguine, uti in superioribus explicatum est. Vide *Boneti* sepulchretum L. I. Sect. 15. obs. 5. Quod si serum in reduplicatione duræ matris hæreat, & ita nervos premat, facilius Paralyfis succedere potest. *Bonet.* ibid. obs. 14.

Non raro etiam contingit Paralyfin oriri à pure in cranio collecto. Ita adolescens annorum tredecim fuste ligneâ percussus, absque insigni vulnere, absque cranii fissurâ, aut fracturâ, tamen in Convulsinẽ & Paralyfin cruris dextis & brachii sinistri incidit. Dissecto cranio, è regione partis vulneratæ, inter cranium & duram meningem pus inventum est. *Bonet.* Sepulchret l. I. Sect. xiv. obs. 20. Similis observatio existat. L. IV. Sect. III. obs. 9. §. I. Verum quemadmodum talis Paralyfis sequi solet vulnera, vel contusiones capitis, ita non solet esse admodum diuturna, quandoquidem illa sæpè ægros jugulat.

Pus.

Lympham etiam, membranas cerebri, spinalis medullæ, Lympha- aut nervorum distendentem, existimo præcipuè causam esse Paralyseos, quæ aurifabros à *Mercurii* halitu infestat. *Willisus* explicaturus quomodo halitus *Antimonii*, *Mercurii*, *Auripigmenti* quibusdam, inter Chymicorum & metallorum fornaces diu versantibus, membrorum debilitates, tremores & resolutiones inducant, recurrit ad particulas narcoticas & vitriolicas, quibus spiritus profligantur. Ego autem in hoc casu non tam spiritus animales malè affectos, sed imprimis lympham respiciendam esse existimo. Præterquam enim quod difficile admodum explicatu sit, qua ratione particulæ vitriolicæ & narcoticæ solo halitu sese spiritibus animalibus jungant, cum os Ethmoides planè clausum sit, plures sunt rationes quæ meam confirmant sententiam. Primum enim ea, quæ spiritus animales afficiunt, statim vim suam maxime efficacem exerunt, odor *Spiritus Salis Armoniaci*, *Sal. Volat. C. C.* *Oleum Succini*, *Assa foetida*, *Acetum* ac similia naribus admota, & spiritus animales in suffocatione hypochondrica, hysterica, animi deliquiis, ebrietate atque pluribus casibus, & ægrotos languidos, particula-

rum.



rum suarum efficacia, statim excitant. In hoc autem casu, uti *Willisius* experientiae convenienter rectissime annotavit, non nisi post longum tempus, ubi *DIU* inter fornaces fuerint versati, Paralyfis sequitur, manifesto argumento, non tam spiritus animales, quam quidem alios humores, aut partes affici, quibus dyscrasia ita subito induci non potest. Dein hi homines sensim redduntur, quantum ego quidem novi, minus sani, & debilitatis illorum varia sese promunt indicia, antequam in Paralyfin incidant, iterum indicio haud obscuro, humores & fortè partes solidas affici magis quam spiritus animales, à quarum debilitate si deduci possint symptomata omnia, non est necesse ad dyscrasiam spirituum obscuram, nec satis probatam recurrere. Ad hæc non raro contingit partes solidas quasdam à *Mercurio* malè mulctari, antequam spiritus animales esse infectos è certis signis colligi possit. Ita ego tractavi Centurionem, qui, cum post usum *Mercurii* sui non satis sedulam habuisset curam, in surditatem incurabilem inciderat: tractavi itidem alium, qui è causâ non admodum dissimili, inciderat in cæcitatem. Si autem spiritus animales afficerentur, non est verisimile, in hoc tantum aures, in alio tantum oculos, vaporum, spiritus animales inficientium, noxam sensuros fuisse. Quid? quod topi, post *Mercurii* usum in capite &c apparentes, satis indicent, partes solidas vel humores magis lædi à *Mercurio*, quam quidem spiritus animales. Denique symptomata, quæ suffragium vel usum *Mercurii* sequuntur, satis evincunt, partes solidas & fluidas, præcipuè lympham, magis affici quam spiritus animales. Quippe ante, & in ipsa salivatione solet caput, facies, fauces intumescere. Tumor faciei est œdematosus; talis potius qualis in Cacochymicis observari solet, quam inflammatorius aut erysipelatodes: adeo ut rectè mihi videar colligere in hoc casu membranas à lymphâ copiosius aggestâ intumescere, quæ fortè etiam vasa sanguinea intumescentiâ & copiâ in consensum trahit. Cum autem talis fumus nervis sit infestus, non est mirum si lymphâ & humoribus sensim accumulatis, si membranâ & tunicis vasorum tumidioribus redditis, tandem succedat Paralyfis, à compressione impedito spirituum animalium influxu, adeoque sensim



relaxatis fibris muscularibus. Dico *Mercurium* esse nervis inimicum; non quod credam à *Mercurio* nervos ipsos relaxari, seu in majorem extendi longitudinem, sed quod fumum *Mercurii* copiosorem sequatur totius corporis & nervorum refrigeratio. Ita novi, quempiam ab halitu *Mercurii* post *Cinnaberis* sublimationem extincti, subito conquestum esse ipsum toto corpore ita fuisse perfrigeratum, ut non potuerit calefieri, quicquid ad ejus conservationem in usum vocaretur. Si itaque talis refrigeratio subsequatur *Mercurii* fumum, non est mirum si lymphæ evadat minus mobilis, si vasa & membranæ tumore lymphatico intumescant, & fortè sanguis in consensum trahatur. Cum autem hoc sensim fiat, in nervis statuenda est hoc in casu compressio. *Bonetus* è *Rhodio* refert exemplum Paralytici lue Venereâ inquinati, in quo membranæ cerebri (fortè tumidiore reddita) craniò carioso tenacissimè adhærebant. l. i. sect. xv. obs. 27.

Ossium etiam luxatorum faciunt Auctores mentionem inter ossa. causas paralyseos, si ea sc. luxatione, vel subluxatione nervos comprimant. Quemadmodum enim à diutino infessu stupor in pedibus excitari solet, quandoquidem spiritibus animalibus liber commeatus à compressione denegatur, ita facile concipimus, si, à luxatione ossium, nervi vicini premantur, motum illarum partium, ad quas nervi pertingunt, debere ex parte sensu & motu privari. Verum, uti è superioribus patet, hanc causam minus respiciendam esse existimem ego, quandoquidem in luxationibus ordinariis musculi nimium contrahuntur, adeoque à paralyfi sunt immunes, deinde in luxationibus non tam paralyfis, si qua sit; sed luxatio ipsa respicitur. Itaque hæc causa præcipuè locum habet in casibus extraordinariis, ubi à contorsione, vel malè restitutâ luxatione membra incipiunt atrophia laborare, & vigore privari.

Enumeravimus causas nervos comprimentes frequentissimè Paralyfin producentes, si non omnes, saltem quamplurimas, restat ut ad solutionem continui transeamus, in qua non est magna difficultas, cum facilè concipiamus, si nervi continuitas sit soluta, non posse spiritus animales influere versus illas partes, ad quas nervus illè in statu sanitatis pertingebat.



Quamvis enim, quibusdam fibrillis discissis, aliæ illorum vices supplere possint, si tamen nervi major truncus dissectus sit, reliquæ fibræ minus promptè, minus potenter, minus copiosè eò spiritus convehere possunt, unde non est mirum, si pars illa sensu, aut motu vel omninò vel ex parte privetur. Paralysis autem ab hac causâ dependens semper est particularis, quandoquidem insignis læsio principii nervorum contingere non potest, quin plura sequantur symptomata, aut mors repente occupet. *Bonetus* è *Platero* refert puellam nubilem è pago vicino *Basileam* revertentem, resolutam fuisse inferiori corporis parte, exploso sclopeto à quodam. Post mortem deprehensum est, globum plumbeum spinalem medullam disruptissè. Vid. *Sepulchret.* l. 1. sect. xv. obs. 23.

Mala con-  
formatio.

Restat adhuc alia Paralyseos causa, nempe prava partium conformatio ab ortu sese prodens. Ita contingit brachium ex. gr. in utero materno malè dispositum esse ininus, frigidius & Paralyticum, atque tale per totam vitam permanere.

Causæ ante-  
cedentes.

Accedendum jam est ad causas Paralyseos antecedentes. Inter eas primo loco enumerandus est sanguis, vel copiâ vel intemperie peccans. Si sanguis copia peccet facilè vasa minima ita repleti possunt, ut inde nervi, vel spinalis medulla comprimantur. Quemadmodum hæc causa Apoplexiam producere potest, uti in sequentibus explicabitur, ita eadem Paralyseos potest esse causa antecedens, quando à causis superius enumeratis in actum deducitur. Intemperie peccat sanguis, quando in effoetis & senibus spiritibus orbatus est, uti de senum dispositione superius vidimus. Huc pertinet sanguinis dispositio scorbutica; nam datur etiam talis Paralysis, uti ab *Engaleno*, & *Charletono* annotatum est. Cum autem sanguinis dispositio scorbutica in eo consistat, ut vasa minima minus promptè permeare possit, facile intelligimus, hinc posse oriri nimiam arteriolarum, membranas & nervos perreptantium, repletionem, adeoque compressionem. Quid? quod constitutio varicosa vasorum hinc ortum habere possit, quemadmodum ea in cerebro aliquando observata fuit? Quod si sanguis nimium expandatur, expansio hæc etiam nervos comprimere potest. Talem historiam refert *Walsmidius*. Viri literati & ple-



plethorici, qui in synocham inciderat cum Paralytica affectione. Casu 65. Sed nescio quare ad turbatam sanguinis mixtionem recurrat, cum in allato exemplo, præter plethoram, adfuerit manifesta expansio sanguinis. Plethoram ipse rectissimè observavit, scribens, *Plethoram inclinare ad febres*. Expansionem autem sanguinis majorem febribus jungi, cui-libet attendenti facile patebit; verum illa sub conceptu fermentationis vel turbatæ mixtionis quibusdam imponit; illud autem probare non est hujus loci. Inter causas antecedentes etiam recenseri debet nimia cerebri flacciditas, quemadmodum illam in senibus habere locum in superioribus ostendimus. Inter causas antecedentes locum sibi vendicant quoque animi passiones, vel subitaneæ, vel magis lentæ. Spirituum inordinatus & turbulentus in membranas influxus tensione præternaturali sanguinis motum per minimas fibrillas variè immutare potest, adeo ut inde exoriatur compressio nervorum, & immutatus vasculorum reptatus, uti in superioribus explicatum est. Ab passionibus magis lentis, tristiciâ & mœrore, ortum habet cerebri flacciditas, sanguinis constitutio lenta, glutinosa, scorbutica: spiritus animales minus alacres. In genere, varii in diætâ errores ad Paralyfin disponunt: si quis sæpe vino sit madidus, si quis sit gulosus, veneri nimium deditus, somnolentus, segnis, variis sanguinis evacuationibus exhaustus; si quis habitet in ædibus calce recenter obductis: huc refer aërem humidum & paludosum, decubitus in lecto humido, moram sub radiis lunæ: frequens opiatorum usum quoque valde noxius. Plures aliquando causæ concurrunt ex. gr. plethora, dispositio scorbutica, spirituum motus inordinatus. Arteriarum tunicæ suas habent arteriolas à quibus nutriuntur, membranæ gaudent nervorum minimis propaginibus, à quibus exquisitus earum sensus dependet. Si in hæc propagines spiritus vel magis vel minus influant, adeoque vel majorem vel minorem producant tensionem, si sanguis sit effœtus, lentus, scorbuticus, minimæ arteriolarum propagines varie distendi possunt, nervi comprimi & spirituum influxus satis copiosus versus musculos impediri. Et hæ causæ sunt satis efficaces, quandoquidem arteriarum



riarum & venarum rami minutissimi per membranas copiose itidem disperguntur, nervorum fibrillis proximè accumbunt, & una mirabilem illam vasorum minimorum texturam constituunt.

Paralyseos  
descriptio.

Explicatâ hætenus Paralyseos naturâ, non erit difficile descriptionem convenientem subjungere; nempe *Paralysis est relaxatio fibrarum muscularium unius lateris, vel hujus aut illius partis in specie, cum frigiditate, motus impotentia & sensu hebetiore, orta à compressione vel vulnere nervorum, ac diminuto spirituum animalium influxu.*

Ea expli-  
catur.

Essentia hujus morbi consistit in relaxatione fibrarum muscularium, uti in superioribus vidimus. Relaxantur fibræ musculares unius lateris, vel harum aut illarum partium in specie, quandoquidem Paralysis universalis omnium sub capite partium non datur, vel saltem rarissimè, nisi simul aboleantur facultates principes, uti illud in Apoplexia contingit. Frigiditatem, motus impotentiam, & sensus hebetiores in superioribus explicui. Dixi autem potius motus impotentiam quam ejusdem abolitionem, cum multi dentur paralytici, in quibus motus nequaquam aboletur, sed qui per plateas obambulant. Itaque vel monendum fuerat abolitionis vocem in latâ omnino significatione sumi, vel aliud substituendum erat vocabulum. Aboletur motus in quibusdam, non omnibus, impotentia in omnibus adest, quandoquidem motus est debiliior & imperfectior in parte paralytica. Comprimuntur nervi vel circa eorum exortum à medullâ oblongatâ, vel etiam ii qui à medullâ spinali originem ducunt. Prius illud locum habet, quando Paralysis sequitur Apoplexiam, vel vulnera capitis, vel etiam quando causæ comprimentes, in superioribus explicatæ, circa basin cerebri hærent. Signum est, si muscoli dimidiæ partis faciei simul afficiantur. Si autem facies nullo modo afficiatur, sed tales partes, quæ à medulla spinali nervos accipiunt, tum spinalis medulla, vel nervi ab eadem orti afficiuntur. Quod si cui mirum videatur, quare alterum tantum latus afficiatur, is cogitet, & medullam oblongatam, & spinalem gaudere parte dextra atque sinistra, à sese mutuò distinctis. Hinc corpora striata sunt gemina, gemini thalami ner-



vorum opticorum, nates & testes gemini. Spinalem medullam esse geminam è *Blasii anatomia spinalis medulla* patet. Vide quoque *Raimundi Vieussens Neurographiam universalem* l. III. c. I. in fine, ut & ejusdem Tab. XIX. Potest quoque reddi alia hæc ratio, quod spirituum transitu in uno latere impedito, impetus in altero fiat robustior, adeo ut obstacula minora, si quæ sint, facile perrumpat. Quod si tumor comprimens in uno tantum latere reperiatur, spirituum influxus etiam in eodem tantum impediatur. Hæc mihi videntur satis esse manifesta, major est difficultas, quomodo accidat Paralysis unius lateris si sanguis copia & lentore minimas arteriolas repleat, & comprimant, uti in superioribus explicatum est, cum constet non tantum arterias vertebrales & carotides sibi mutuò inosculari, sed & carotides utriusque lateris sibi mutuò jungi. Similis est inosculatio vasorum versus medullam spinalem dispersorum. Verum hæc difficultas evanescit, si consideremus ea quæ superius de animi passionibus disputata sunt. Quamvis in animi pathematibus spiritus animales & sanguis simul per universum corpus afficiantur, tamen hæc aut illa pars sola noxam imprimis luit. Ex. gr. Fœmina valdè commota in una tantum mamilla principia tumoris scirrofi vel cancrofi sentire incipit, quamvis arteriæ mammariae utrimque ex arteriis subclaviis, non longè ab earundem ex arteria aorta exortu, originem ducant. Quid? quod arteriæ non tantum exteriora perrepant, sed & interiorem substantiam medullarem subeant. Illud ab anatomicis observatur, quando cerebrum lamellatim, qui antiquorum fuit mos, dissecant. Medulla spinalis proportionaliter non minus copiosè irrigatur à sanguine, quam ipsum cerebrum, non tantum exterius, sed etiam interius, uti ego illud aliquando expertus sum: postquam enim per duos circiter dies medullæ spinalis ovillæ partem aquæ immerfisssem, atque aquam sanguinolentam semel atque iterum removisssem, in dissectæ medullæ ambabus lacunis vasorum sanguiferorum vestigia guttis sanguinolentis erant conspicua. Itaque partes medullares ac molles, & externè & internè sanguine copiosè irrigatæ, ab animi passione, & turbulenta sanguinis commotione comprimi facile possunt.



Errores de-  
teguntur.

Malè describitur Paralyfis, quod fit abolitio motus & sensus in partibus unius lateris. Motus & sensus non abolentur simul, nisi in Apoplexia aut Gangræna & Sphacelo. Verum gangræna aut sphacelus totum dimidium latus non occupant, homo exstinguitur, antequam malum eousque serpat. Apoplexia facultates principes simul abolet, quod hic locum non habet, ideoque *Jonstonus* in descriptione Paralyseos rectissimè dicit eam contingere absque rationis læsione. Cum hi affectus sint à se mutuo sejuncti, oportet ut talis descriptio afferatur, quæ alium ab alio distinguat. Non credidi necessarium descriptioni meæ addere Paralyfin rationem non lædere, quandoquidem eo ipso, quod sensum imminutum dixerim, satis patet, sensum non esse omnino sublatum, adeoque nec facultates principes.

Confirma-  
tur Paralyfin  
oriri à com-  
pressione.

Ex antedictis, ut & descriptione Paralyseos, patet me potissimam causam statuere compressionem, non autem obstructionem nervorum. Multa sunt quæ hanc sententiam confirmant. Nempe Paralyfin frequentissimè præcedit stupor membrorum. Unde autem stupor? Stupor oritur à compressione nervorum, uti illud patet, si quis diutius ulnæ innixus caput fulciat, si quis diutius nervos crurales sedendo comprimat. Stuporem hunc nos nostro idiomate solemus explicare dicendo: *mijn voet slaapt*. Quando compressio illa sublata est, animadvertimus influxum spirituum iterum instaurari, & sentimus dolorem quasi pungitivum. Eodem modo, quando post insultum Paralyseos sensus & motus incipiunt restitui, in parte affectâ dolor iterum sese exerit: quia scilicet spiritus incipiunt in partes relaxatas influere. Observavi etiam aliquando in membro paralytico sentiri subsultum & motum aliquem, in vehementi conatu ex. gr. exonerandi alvum pigram: manifesto, ut quidem mihi videtur, argumento, compressionem adesse non autem obstructionem. Hoc ut intelligatur oportet considerare, id quod alibi explicui, inspirationem vehementem non parum facere ad motum voluntarium tanto majori vi perficiendum. Insuper considerandum est, in illâ inspiratione cerebrum quasi extendi, unde tum sequitur, spiritus animales validius ab exteriori cerebri circumferentiâ propelli



PELLI versus tubulos medullares, & nervos ipsos. Illud observare licet in parturientibus, quæ sentiunt in capite molestant illam, à vehementi conatu, distensionem, unde, si benè meminimus, aliquando sequitur futurarum cranii hiatus. Si itaque spiritus, ab inspiratione validâ & continuatâ, ita propellantur versus nervos, non est mirum, spiritus per nervos compressos aliquomodo influere, atque ita motum & subsultum aliquem in membro paralytico sentiri, quamvis eo ipso paralyxis non solvatur. Non oriretur illud, si causa Paralyseos esset obstructio; etenim si spirituum influxus obstructionem solveret motum aliquem excitando, paralyxis ipsa postmodum deberet esse sublata, quod tamen ita sese non habet. Est itaque causa paralyseos frequentissima, compressio nervorum.

Manifestum evadet hoc idem, si ea, quæ ad motum voluntarium requiri, superius indicavimus, breviter percurramus. Cerebrum ipsum propriè paralyxin non producit, quia cerebro validius affecto τὸ ἡγεμονικὸν itidem tollitur, jam autem distinguendo Paralyxin ab Apoplexiâ patet, Paralyxin infestare absque rationis læsione. Itaque cerebrum tantum concurrat ad facilius producendam Paralyxin, si illud sit flaccidum, uti in senibus contingit: flacciditas autem illa debet considerari tanquam causa adjuvans compressionem. Neque enim audiendus *Willisus* de A. B. p. 11. c. 9. statuens, ubi post mentis hebetudinem, oblivionem & stupiditatem sequitur Paralyxis tum materiam morbificam sensim delabi versus caudicem medullarem. Flacciditas cerebri non tam ab humorum id irrigantium copia (tum enim potius timere deberet) quam à spirituum dependet penuria. Vel si adsit humorum serosorum colluvies, ea, externè ut plurimum, coacervata potius depressionem efficeret. Melius paragrapho sequenti mecum compressionem statuit causam Paralyseos. Meæ sententiæ favet *Platerus* l. 11. c. 2. de motus impotentiâ: quia sc. sensus interni simul cum motu cessarent, si cerebrum pars princeps afficeretur, quod negat hic fieri: itaque causam in nervo, vel in instrumento quod movet, musculo inquirendam esse statuit. Quod si tumor aliquis in cerebro sit excitatus, tanto manifestius evadit, compressionem Paralyseos esse causam, uti in superioribus vidimus. Medullam oblon-

Ulterior  
confirmatio.



oblongatam quod spectat, ea non videtur ita à naturali constitutione subito posse degenerare, ut inde sequatur Paralyfis; verum à partibus, vel humoribus, vel tumoribus posse comprimi, imo aliquando debere comprimi, perquam manifestum est in vulneribus & concussionibus cerebri. Nervi soli, ratione suæ relaxationis, non possunt esse causæ paralyseos, uti è *Wepfero* vidimus: obstrui non posse, putem me in superioribus evicisse. Cerebri membranæ causa Paralyseos esse non possunt, quoniam tantum transmittunt aut vestiunt nervos, nisi intumuerint, intumescencia autem, vel tumor aut humor intra duplicaturam collectus, compressionis est causa. Spinalis medullæ eadem est ratio cum medulla oblongata. Quærit *Willisus*, quare in paralyfi muscoli faciei motum suum retineant? Respondeo illum supponere, id quod à veritate est alienum, sc. musculos faciei in Paralyfi non affici; Verum hoc secus sese habet, etenim in Hemiplegia faciei musculos unius lateris relaxari, & os omnino distorqueri quis ignorat? Deceptus fuit proculdubio auctoritate eorum, qui Paralyfin à spinali medulla deducebant. Nervos autem à medulla oblongata derivatos affici à casu, nullo modo affecta spinali medullâ, in nupero casu mihi fuit manifestum, etenim mulier gravida, è commotione cerebri, non tantum in convulsionem s. Epilepsiam incidit, sed & postmodum planè cœca est reddita: eo tempore autem quo visus erat abolitus, prægressa symptomata erant superata, nulla rationis, aut motus, in ulla corporis parte, erat imminutio, adeo ut in hoc casu soli nervi optici fuerint affecti. cœcitas autem non fuit diuturna, sed ipsa paucorum dierum spatio omninò restituta. Quod ad spiritus animales attinet, illi nunquam adeo pauci sunt vel torpidi, ut ab hisce solis paralyfis possit produci. In extenuatis, & à diuturno morbo fractis, adest quidem summa debilitas, verum ea à paralyfi longissimè distat. *Willisus* l. c. explicaturus quâ ratione spiritus, à particulis narcoticis, eorundem velut extinctoriis, item qua ratione in scorbuticis & cacochymicis, afficiantur, postmodum exemplum affert compressionem admodum confirmans. Existimat paralyfin hominibus non secus ac uredinem arboribus accidere, in quantum venti nonnulli halitibus plusquam



quam frigidis, scilicet spiritu nitroso aut vitriolico præditi, cum virentes tenerosque frutices sufflant, eos repente emarcescere faciunt, in quantum stamina tenella, nervorum instar, foliis & frutici passim intertexta, maligni aëris afflatu ita penitus constringuntur, ut succum è trunco, aut radice suppeditatum, non amplius suscipiant, ob cujus defectum exarescunt. Non ab simili ritu, statuit, particulas extraneas, intra sensus & motus organa admissas, quatenus una poros constipant, & spiritus animales dejiciunt, vel à motu supprimunt, partibus respectivis quasi uredinem inducere. Verum venti uredinem inducentes externè arbores ita afficiunt, ut pori earum inepti evadant, nutritivo transmittendo succo, hic autem statuitur, succum intus contentum, sc. spiritus animales malè affectos esse, quod multum differt à causâ extrinsecus adveniente, & tubulos succi transmissioni ineptos reddente. Itaque non obscure allato exemplo non tantum confirmat, à spiritibus solis non posse deduci paralyfin, quantumvis statuantur pauci, aut minus activi, sed & illustrat ea, quæ ego superius dixi, de texturâ vasorum à passionibus diversimodè modificatâ. Illud verum est, si spiritus sint pauci, si sint languidi, uti illud in senibus contingit, tum facilius posse excitari Paralyfin, quandoquidem eorum influxus à minori & debiliore impedimento facilius sufflaminari potest. A sanguine etiam solo non potest derivari paralyfis, quoniam ille non evadit ita paucus, vel effoetus, ut illius minor copia, vel activitas possit resolutionem producere; quantumvis enim magnam jacturam sanguinis quidam sint passi, quantumvis sint debiles, non tamen possunt dici paralytici. Restat Paralyfin effici à solâ resolutione fibrarum muscularium, productâ à minori spirituum influxu, ob compressos præcipuè, tum etiam vulneratos nervos aut malè conformatos, uti in superioribus explicatum est.

Explicata Paralyseos naturâ & causis, videntur mihi jam evanescere causæ illæ, quæ in principio hujus capitis enumeravi, tanquam reddentes hunc affectum explicatu arduum. Non patiemur nos in errorem deduci ob vocum ambiguitatem, nec statuemus Paraplegiam, ab Apoplexiâ distinctam, resoluturam omnes sub capite partes, quandoquidem ea sententia ex eo vi-

Causæ in superioribus  
proposita  
examinantur



detur originem sumpſiſſe, quod ſtatuerent in Hemiplegia tantum affici principium ſpinalis medullæ, cum pateat cauſam ſæpe in cerebro hæſere, & faciei muſculos quoque affici. Non ſtatuemus etiam in Paralyſi ſenſum aboleri, motu ſuperſtite, quandoquidem tenſio ordinaria ſufficit ad ſenſum peragendum, cum major, & quidem ſanguinis motum progreſſivum ſuſflaminans, cauſa requiratur, ut motus voluntarius peragi poſſit. Non ſtatuemus etiam obſtructionem nervorum, quandoquidem ea repugnat cerebri conſtitutioni & muneri, ſpirituum animalium ſubtilitati & motui, nec non nervorum exilitati & ductibus minimis: denique, quandoquidem in explicatione recurritur ad ea, quæ potius fibrarum compreſſionem evincunt. Non etiam nos à veritatis tramite deducunt ea, quæ in obſervationibus anatomicis occurrunt ambigua. Facile enim intelligimus, ſeri copiam, membranas cerebri exquisiti ſenſus vellicantem, producere Cephalalgiam aut Hemicraniam, non item Paralyſin, niſi ſimul comprimat nervos, ex uno latere medullæ oblongatæ prodeuntes. Quod ad ſerum Apoplexiam, ut videtur, producentem, intelligimus cauſas congeneres poſſe producere & Paralyſin & Apoplexiam, quoniam poſt Apoplexiam aliquando remanet Paralyſis, adeo ut Apoplexia ſit quaſi Paralyſis univerſalis & gravior: deinde quod Apoplexiæ jungatur membrorum reſolutio: quæ autem ulterius in Apoplexiâ animadvertenda ſunt peculiari capite explicabo. Non mirabimur etiam ſerum poſt mortem, in cadaveribus Lethargicorum, Comatoſorum, Caro affectorum, fuiſſe repertum, cum in omni ſomno ſit aliqualis cerebri compreſſio, ſi itaque cum cauſis in ſuperioribus explicatis jungatur ſerum, compreſſionem cerebri aggravans, non eſt mirum, ſi pluribus malis ægri ſuccumbant. Ad Catalepfim quod attinet, ea numquam à ſolo ſero producitur, quamvis poſſit contingere, eos, qui cerebro gaudent humidiorē, in Catalepfim incidere. Deinde, ex iis, quæ poſtmodum de Catalepfim dicenda ſunt, evadet ma-ni-feſtum, Catalepſeos cauſas difficulter, è ſolis cadaveribus poſſe erui, cum plura, notatu digniſſima, circa ejus fiendi modum ſint animadvertenda. Quid? quod Auctores, qui Catalepſeos naturam explicare ſunt conati, non tam ſeri, quam ſpi-  
ri-



rituum coagulatorum, aut congelatorum faciant mentionem? Spiritus animales autem tales, quis mortalium unquam oculis subjecit? Cum insomnia & incubus in somno contingant, ea, quæ somnum reddunt profundiorē, etiā ad horum affectuum generationem concurrere non est difficile intellectu. Verum cum in his casibus non tantum unum cerebrum hemisphærium, sed utrumque, nec nervi soli ita comprimantur, ut relaxatio fibrarum debeat sequi, sed tantum somnus subsequatur laboriosus, clarum est, alio modo in Paralyfi, quam in incubo, insomnia, aut somni speciebus morbofis, cerebrum & nervos affici. Quod ad vertiginem spectat, si thalami nervorum opticorum ita comprimantur, ut ipsi nervi afficiantur, præcipuè si hinc sequatur major arteriarum carotidum repletio, faciliè intelligimus, serum ita posse concurrere ad vertiginem producendam, cum tamen hi homines à paralyfi sint immunes, etenim Vertigo, uti vidimus, præcipuè nervos opticos afficit, in paralyfi autem afficiuntur nervi ad musculos, ac eorum fibras distributi. In Epilepsiâ & Convulsionibus plura debere considerari, quam serum cerebrum madefaciens, tum ex hydrocephalo, tum ex iis, quæ inferius restant explicanda, evadet manifestum. Ut rem in pauca contraham, ex iis quæ de Paralyfi, quæque de singulis symptomatibus, aut jam explicata sunt, aut deinceps explicabuntur, faciliè nos extricabimus circa ea, quæ primâ fronte ambiguum reddunt Paralyseos explicationem. Denique nihil nos movebunt ea, quæ Auctores, ex præjudicio, attulerunt ad motum muscularem explicandum, cum ego existimem me sufficienter eum aperuisse, non tantum ad Paralyseos naturam, sed & longè plura phænomena clarissimè intelligenda & explicanda. Et sanè non semel miratus sum, homines ingeniosos, judiciosos, & in praxi non indiligenter versatos, potuisse ita facile adoptare, & ad explicationem symptomatum adhibere suppositiones, anilibus fabulis quam veritati longè similiores: succum nerveum vitiatum, explosiones, particulas spasmodicas &c. cum totum hoc negotium innitatur, non obscuris falsis, & inconcessis principiis, sed simplici & rectè perceptæ œconomiae animali. Tanto autem magis quispiam veritatem acu tetigisse censendus



duſ eſt, quanto veriora, certiora & pauciora ad explicatio-  
nem claram adhibet. Atqui ita mihi videor veritati conve-  
nienter Paralyſeos explicâſſe naturam & cauſas, quod ſi autem  
occaſio mihi detur cadavera Paralyticorum aperiendi, in id in-  
cumbam, ut negotium hoc ulterius detegam.

Paralyſeos  
differentiæ.

Accedendum jam eſt ad Paralyſeos differentias. Paralyſis  
aliquando à ſolis cauſis internis habet ortum, aliquando Apo-  
plexiam, vel vulnera aut contuſiones capitis ſequitur. In pri-  
mâ ſpecie ægroti absque manifeltâ προφάσει (niſi forte ſtupor  
præceſſerit) membrorum ſentiunt relaxationem, & in paralyſin  
incidunt. In altero caſu mens primum abolita eſt, poſtmo-  
dum redit & remanet Paralyſis. In reliquis caſibus, vel vulne-  
ra, vel contuſiones aut cauſæ ſimiles præceſſerunt. Paralyſis quo-  
que vel dimidium latus occupat, & dicitur Hemiplegia, vel  
has vel illas partes in ſpecie, & eſt Paralyſis particularis. Pa-  
ralyſis talis particularis aliquando oriri poteſt ab ingenti refri-  
geratione muſculorum, præcipuè ſi frigiditati jungatur hu-  
miditas. In hoc caſu nervorum læſio non adeſt, niſi in quan-  
tum muſculi ita affici non poſſunt quin ſimul afficiantur fibræ  
nervæ per muſculum diſperſæ. Paralyſis quoque eſt vel na-  
tiva, vel adſcititia, uti vidimus. Paralyſis quoque vel eſt ſo-  
litaria, vel comitata. In ſolitariâ mens conſtat, in comitatâ  
unum latus primum reſolvitur, ingruit febris, cerebrum ob-  
nubilatur inſtar Apoplecticorum, inquieti ſunt ægri, unum  
latus movent, aliud manet reſolutum. Paralyſis quoque eſt  
vel recens, vel inveterata, gravior vel levior. Paralyſis quo-  
que poteſt diſtingui, quod alia ſit ordinaria, alia ſcorbutica:  
de hac poſteriori ſpecie videndi *Eugalenus, Willifius, Charletonus*.  
Faciunt quoque Auctores mentionem Paralyſeos è Colica; hanc  
tamen ad Paralyſin non eſſe referendam rectiſſimè, meo quidem  
judicio, evi cit *Franciſcus de le Boc Sylvius Praxeos med. l. I. 1. 22.*

Signa.

Signa Paralyſeos è ſuperioribus ſunt manifelta, nempe motus  
imminutus vel ſublatus, cum refrigeratione. Animadverten-  
dum eſt, an muſculi ſint flaccidi? An pars elevata ſit frigi-  
dior? An ſtatim ſuo pondere decidat? An æger, præ reſolutio-  
ne, membrum loco movere poſſit, nec ne? Vocatus ſum ad  
ægum aliquando ego, laborantem Rheumatismo. Hunc Me-



Medicus & Chirurgus, qui ipsi ante meum adventum præfuerant, tanquam Paralyticum tractaverant: cum nulla adesset membrorum flacciditas, sed æger præ dolore (uti in Rheumatismo affolet) membra loco movere non posset. Summopere mirabantur me Rheumatismi facere mentionem, affectûs qui ne fando quidem ad illorum pervenerat aures. Præavertem & malè sedulæ diligentiae exitus erat funestus; eousque enim ægroti vires, à perversa medendi methodo, erant attritæ, tot symptomatibus ipse afflictus, ut non diu superviveret. Non omnis motus impotentia statim habenda est Paralysis, si æger præ dolore membrum loco movere non possit, ille alio infestatur morbo. Signa differentiarum pleraque sunt manifesta: si enim nulla externa causa præcesserit, interna dispositio produxit Paralyfin: vulnera, casus, vel contusiones, tum visu, tum è relatu adstantium, innotescunt. Si à seculo producat Paralysis fluctuatio nonnunquam percipitur. An Paralysis sit solitaria, an comitata, ex eo dijudicari potest, quod mens aliquando planè sit obnubilata, & minor gradus Apoplexiæ jungatur Paralyfi: dico minorem Apoplexiæ gradum, quandoquidem in graviore membra sunt resoluta, cum hic non raro ægroti sint inquieti & alterum latus moveant. An Paralyseos minor gradus à febre producat, colligitur, si febris præcesserit, & paralyseos signa in paroxysmo sint manifestiora. Exemplum Paralyseos à Synocha productæ habet *Walsmidius* Casu LXV. An febris jungatur Paralyfi è pulsu, inquietudine &c. non difficulter colligitur. An Paralysis sit recens, vel etiam inveterata, nativa vel adscititia? è relatu adstantium, & inspectione ægroti cognoscimus. Scorbuti signa è tractatione de Scorbuto desumuntur.

In genere Paralysis est affectus difficilis. Si sit vehemens, & plura jungantur symptomata, aliquando ægrum brevi persumdat, aliquando imminuitur, licet non omnino tollatur. Curatio difficilior est, si ægrotos ætate provecos affligat, si sit inveterata, si Apoplexiæ graviore successerit. Quare autem curatu adeo sit difficilis, ex iis, quæ de causis superius disputavi, evadit manifestum. Si nervi ita comprimantur,

Rr 3

ut

Prognosis.



ut sufficiens influxus spirituum ad tensionem ordinariam peragendam, desideretur: qua ratione ad voluntatis arbitrium spiritus influent, ad inflationem muscoli absolvendam? Deinde si tumores nervos, vel unum latus medullæ oblongatæ, comprimant, qua ratione illos superabis? Si reptatus vasorum immutatus causa sit compressionis nervorum, qua ratione eum emendabis? Si serum sese ad basin usque cranii insinuaverit, aut si medullæ spinalis fistulam repleverit, qua ratione id exhauries? Si fumus *Mercurii* lympham copiosius accumulaverit, manifestum est, nisi tempestivè æger à vaporibus tetrarceatur, & venienti occurratur morbo, postea serò medicinam parari, ubi per longas moras malum invaluit. Paralysis à discisso nervo non curatur, quandoquidem nervi non coalescunt. Non curatur quoque Paralysis ab ipsa nativitate infestans, quandoquidem pravam conformationem corrigere non valet medicus. Paralysis à commotione cerebri, vel ecchymomate aliquando non admodum difficulter curatur. Si ab externo frigore, vel humiditate hic vel ille musculus afficiatur, curationis non parva affulget spes. Si membrum paralyticum extenuetur spes exigua, vel nulla, curationis affulget. Paralysis luxationem subsequens, sequitur naturam luxationis.

## Indicationes

Indicationes generales sunt: compressionem & causas paralyseos tollere, cerebrum nervos & musculos roborare, spiritus animales excitare.

## Cura.

Curatio compressionis pro causarum varietate multum variat: tumores, qualescumque demum sint, quemadmodum difficulter cognoscuntur, ita difficillimè curantur. Si enim tumores illi, quibus manum admoveere licet, quibus emplastra & cataplasmata imponere possumus, non semper emolliuntur, aut discutiuntur, quanto difficilius superabimus tumores, ad quos medicamenta non, nisi longo factò tramite, perveniunt? Itaque cum hoc sit potissimum naturæ opus, curatio in tribus potissimum mihi videtur consistere: in sublatione causarum antecedentium per purgantia prudenter, ita ut æger non multum debilitetur, exhibita: per incidentia & attenuantia, & externa, quæ, caput à frigore muniendo, ad discutiendos tu-



tumores non sunt omnino inutilia, verum de hisce in præcedentibus est actum, & agetur in sequentibus.

Curatio sanguinis extravasati non uno modo instituitur, quandoquidem & copia & circumstantiæ variæ sunt. Si enim sanguis extravasatus habeat adjunctum vulnus, vel cranii, vel capitis, curatio est instituenda, quemadmodum illud docetur à scriptoribus, qui de vulneribus capitis ex professio scripserunt. Non est nostri instituti de hac materia agere, tum quod amplius hic sese pandat campus, quem percurrere mihi non est propositum, tum quod vulnera graviora, gravioribus quoque stipentur symptomatibus, Apoplexia, Convulsionibus & similibus, de quibus in sequentibus erit agendum. Si autem concussio cerebri absque vulnere necdum graviora produxerit symptomata, sed metus sit, ne illa brevi subsequantur, statim ad V. S. est recurrendum. Cum enim cerebrum sit viscus molle, & vasis sanguineis abundè irrigatum, cum membranæ cerebri copiosissimis & tenuissimis gaudeant arteriis, facile effundetur sanguis, nisi tempestivè huic malo obviam eatur V. S. Quamvis plures hujus possint produci rationes, libet jam tantum duplicem indigitare usum. Prior est, quod post V. S. vasa sanguinea non ita validè extendantur à sanguinis copiâ, uti illud ordinariè in hominibus repletis locum habet. Quanto autem extensio est major, tanto facilius sanguis effundetur, si vis aliqua vasis sit illata. Alter est, quod sanguis tanto minori impetu è corde versus cerebrum iteratis propellatur pulsibus. Quanto autem impetus est minor, tanto minus imminet periculum copiosæ effusionis sanguinis. Impetum esse minorem, patet ex eo, quod in præcedentibus indicavi, nempe sanguinis vim moli ejus esse proportionatam. Mechanicè functiones nostræ vitales & animales peraguntur, jam autem in mechanicis est apertissimum, mallei impetum ejus ponderi esse proportionatum, eadem fistucæ est ratio: quanto fistuca est gravior, quanto magis in sublime ab operariis trahitur, tanto vehementius in caput tigni decidit, illudque valido impulsu altius adigit. Exempla hæc sunt admodum apposita, quandoquidem sanguinis vis non tantum ab ejus mole dependet,

Sanguinis  
extravasati  
vulnerum  
&c.



det, sed & pulsu peragitur. Nec obstat, quod malleus & fistuca sint corpora solida; non enim minor vis est liquidorum, uti patet in molendinis ab aquâ circumrotatis, & aliis machinis hydraulicis. Patet illud quoque in fluminibus & lacibus aggeres perrumpentibus, præcipuè si accedat ventus vehementior, & unda undam premat ac pellat. Hæc ideo sunt inculcanda, quandoquidem pernitiola caligo aliquorum medicorum mentes ita excæcavit, ut non dubitent affirmare sanguinem laudabilem non posse esse nimium, adeoque eum V. S. nunquam esse imminuendum. Hi homines sunt suffeni, & sibi videntur pulchrè sapere, cum prima praxeos elementa ignorent. Ut ad negotium nostrum revertar, sanguis ideo in validâ cerebri concussione est imminuendus, ut ejus moles & impetus, à quibus gravia, in hoc casu, metuenda sunt symptomata, imminuantur. Et quandoquidem hic V. S. est facta mentio, non erit inutile hic conjunctim tradere ea, quæ circa hanc in Paralyfi sunt observanda; neque enim semper utile est venam pertundere, uti rectè ab Auctoribus observatum fuit.

De V. S.  
quando ea  
conveniat?

Si Paralyfis ortum suum debeat repentinæ & vehementi animi perturbationi, illi, in hoc casu, potissimum occurrendum est V. S. quandoquidem opiata, quæ in animi pathematibus diximus esse insignis usus, in hoc casu suspecta sunt. Itaque statim in principio, antequam spiritus tumultuoso suo influxu fibrillarum nervearum contractionem validam, aut vasorum sanguineorum nimiam intumescientiam, atque nervorum compressionem insignem produxerint, larga instituenda est V. S. habitâ ætatis & virium ratione. Eadem illa V. S. habet locum si nimia adsit sanguinis copia, si stupor partis affectæ præcefferit. Quod si sanguinis visciditas jungatur copię, non ideo omittenda est V. S. Possæt hoc alicui videri mirum, cum tamen sit verissimum, itaque hujus rei ratio est reddenda. Nempe sanguinis viscidioris nimia moles, valida cordis contractione, iteratis pulsibus, ad caput, cerebrum, membranasque ejusdem delatum, non potest non vim afferre parti, copiosis arteriis ditatæ, visceri molli, membranis exquisiti sensus, & proximè ossibus accumbentibus. Itaque si V. S. nimia quantitas aliquomodo imminuatur, pressio sanguinis à tergo minori per-



perficietur impetu, adeoque progressivus motus facilius, & cum minori vasorum distensione perficietur. Hac ratione præcavetur partis mollis & medullosæ nimia compressio, ac symptomata inde originem ducentia. Quod si febris ingruat, id quod non rarò contingit, tanto magis requiritur V. S. quandoquidem hoc modo præternaturali pressioni & expansioni occurritur. Quid? quod parte sanguinis, ad motum inepti, educatâ, reliqua facilius emendetur? Quinimo in desperati locum, convenienti diætâ, alius potest generari sanguis magis mobilis, nec spiritibus ita destitutus. Convenit quoque V. S. in commotione cerebri, metu extravasationis, sanguinis ecchymomate, capitis vulneribus, statim in principio instituta, ubi autem sanguis extravasatus in pus mutatus est, sero recurritur ad remedium neglectum, dum vires adhuc essent integræ.

Tandem convenit V. S. in vulneribus nervorum, non ad curationem Paralyseos; vidimus enim nervorum vulnera consolidari non posse, sed ad præcavenda symptomata. Sive enim nervum dissectum consideres, sive etiam vasa sanguifera simul amputata, necessum est secare venam. Nervorum vulnera sequuntur gravia symptomata, febres, convulsiones, itaque ut hisce eatur obviam, ne sanguis nimîâ mole & expansione molestiam creet, is prudenter imminuendus est. Vasa sanguifera simul amputata eandem requirunt V. S. Nimirum ubi vasa sanguifera, imprimis arteriarum majores rami amputata sunt, hæmorrhagia quidem cohibetur à chirurgo prudenti, verum sanguis continuatis ictibus è corde propulsus, non desinit vim inferre vasis, per quæ transitus est denegatus, cumque ibi vi sibi viam facere non possit, distenduntur arteriæ læsæ, & per alios ramusculos minores copiosius propellitur sanguis, nutritioni & vivificationi membri ultra vulnus inserviturus. Itaque necesse est, partes vicinas intumescere, dolorem, inflammationem & febrim excitari. In dolore spiritus animales excitati, copiosius, non tantum versus partem vulneratam, sed & cor confluunt, unde pulsus frequentior redditur, adeoque major pressio sanguinis excitatur. Jam autem manifestum est, si tempestivè sanguis imminuatur,

Sf

tum



tum & tumorem, dolorem, inflammationem, imo & convulsiones posse præcaveri, quandoquidem vis, ejus moli respondens, imminuta est. Deinde ubi moles est imminuta, expansio itidem erit minor, adeoque omnia symptomata mitiora. Hæc est vera ratio juvaminis quod V. S. adferret in similibus casibus. Paucis mihi videor multa dixisse, quæ latius deducere non esset difficile; verum dictum sapienti sat est.

Objectionis  
solutio.

Nec est quod mihi quispiam objiciat, paralyfin esse morbum ingravescentis ætatis, adeoque non esse secandam venam. Quemadmodum putem me antea dixisse, ita jam repetere libet, senes facilius V. S. ferre quam vulgo existimatur, dummodo ea moderatè instituatur. Hujus rei hoc recens habeo exemplum, quod mihi retulit Vir celeberrimus dum cogitationes meas de Paralyfi in chartam conjicerem. Is octogesimo secundo circiter ætatis anno incidit in hæmorrhagiam narium copiosissimam, à qua non nisi post secundam V. S. fuit liberatus. Liberatus autem fuit tanto cum successu, ut à variis senectutis molestiis post secundam V. S. videretur restitutus. Non determino, num nimia sanguinis copia fuerit educta, num satius fuisset hæmorrhagiæ alia ratione occurrere, nec hæmorrhagiæ nec V. sectionibus affui ego. Summum quod senserat levamen ipse mihi retulit satis sanus & vegetus, gratulans sibi tanquam de re benè gestâ, & lætus se in illo ætatis flexu tantum robore valere: ego auritus narrationis, oculatus deambulationis sum testis. Eodem tempore mihi narravit Idem, sibi ante XIV. annos similem casum accidisse, atque tum etiam geminata V. S. feliciter evasisse, & multos annos satis vegetum vixisse. Quod si quis contendat, posteriorem V. S. debuisse omitti, huic ego nolim repugnare, sed illud mihi videtur clarissimum, naturam non nisi nimio onere gravatam hæmorrhagiam provocasse, adeoque moderatam evacuationem utilem, quod si nimia copia fuerit exhausta, affirmandum est, ejus usum esse bonum cujus abusus est malus, saltem vita tot annos incolumis traducta evincit & hæmorrhagiam & V. S. septuagesimo octavo ætatis anno instituta fuisse utiles. Insigne etiam exemplum habet *Valleriola*, is

meam



meam confirmans sententiam l. iv. obs. 4. cujus hæc est inscriptio: *Andreas Gondandus sacrificus, septuagenarius senex optimi habitus magnarumque virium, ex Paralyfi dextra partis solâ sanguinis missione, & purgatione, lenique ad cervicem unctione integrè sanatus.*

Vidimus quando V. S. utiliter institui possit & debeat, videndum jam quando à V. S. sit abstinendum? Non est instituenda V. S. in decrepitis, & quorum vires exhaustæ sunt, ne sanguinis imminutio majorem languorem, ac spiritus animales pauciores & debiliores efficiat. Non est instituenda, in tumoribus strumosis & aquosis, quandoquidem hoc pacto tumores imminui nullo modo possunt. Hæc tamen ita intellecta velim, tumores hosce qua tumores nullam indicare V. S. non rarò tamen contingit alias circumstantias concurrere quæ V. S. suadeant, in quo casu diligenter perpendendum est, quæ indicationes sint potiores. Non convenit V. S. ubi feri nimia copia produxit Paralyfin. Serum humor est frigidus & aqueus, cujus copia non rarò producitur, ubi calor nativus multum imminutus est. Itaque si sanguinem imminuas, imminues quoque calorem ad discutiendos humores utilem. Ubi sanguis extravasatus in pus immutatus est, serius ad V. S. recurritur, cum V. S. pus educere, aut in sanguinem laudabilem iterum convertere non possit. Non convenit quoque V. S. ubi à fumo hydrargyri lymphatica vasa nimium repleta sunt. Hæc Paralyseos species, uti in sequentibus videbimus, potissimum requirit sudorifera: sudorifera, nisi à calore sanguinis, in actum deduci non possunt, itaque danda est opera, ne is intempestivè educatur. Ossa luxata, aut nervos comprimantia non indicant V. S. quandoquidem ea hujus ope restitui non possint: potest tamen ea utiliter in usum vocari in hominibus plethoricis, ubi à dolore aut contusione graviora expectanda sunt symptomata. Non convenit etiam V. S. in malâ conformatione partium nativâ, uti illud per se patet.

Si post casum, aut cerebri commotionem, sequatur Paralyfis cum symptomatibus mitioribus, & suspicio sit ecchymomatis, illius curationi incumbendum. Fit illud duplici ratione, vel præcavendo novum humorum affluxum, uti medici

Quando à V. S. abstinendum.

Cura ecchymomatis.



dici loqui solent, vel discutiendo sanguinem leviter extravasatum. Priori indicationi satisfaciemus, si ægroto imperetur quies, si validæ corporis concussiones vitentur. Itaque vitanda sunt vomitoria, ac omnia medicamenta validam corporis commotionem producentia. Si sponte ad vomitum sit proclivis æger, ille compescendus est, vel *Sale Absinthii*, vel *Diascordio incompleto*, vel *crusta panis secalitii*, aut etiam *emplastro stomachico* ventriculo imposito: denique iis medicamentis, quæ ad vomitum compescendum esse efficacia in hoc casu usus docuit. Sanguis extravasatus discutitur medicamentis sanguinem fluidum reddentibus temperatioribus, ut & sudoriferis. Conveniunt *Bezoardicum minerale*, *Antimonium diaphoreticum*, *Unicornu ppt.* *Sal. Card. bened.* *Absinth.* *Liquor. Tartar. Nitri fix.* *Aqua Prophylactica* &c. quorum amplam segetem vide apud *Matthiam Tilingium* in *Prodromo Praxeos chymiatricæ*.

Ex hisce variæ possunt concinnari formulæ, ex. gr. pulveres sequentes

℞. *Bezoard. mineral.*

*Lapid. Prunell.*

*Bezoar. occid. aa ʒß.*

*Croci Britannic. ʒß.*

F. Pulvis. dividendus in v. doses.

Medica-  
menta ex-  
terna.

Dum medicamenta interna usurpantur, possunt etiam externa, si necessitas id flagitet, in usum vocari. Animalia viva dissecta, fomenta, cucuphæ hic sunt utiles, de quibus in superioribus est actum.

Causa nimiae  
repletionis  
vasorum.

Si nimia vasorum repletio producat Paralyfin, danda est opera ut illa tollatur. Si animi affectus huic dederit occasionem, illi occurrendum est eo modo, qui non semel in superioribus fuit explicatus. Quod si humores visci, repletioni vasorum nimiae dederint ansam, illi imprimis educendi, & sanguini suus restituendus est vigor. *Hartmannus* in Paralyfi curanda eadem commendat, quæ in Apoplexiâ habent locum, & primo quidem loco *Mercurium vitæ*. Verum cum *Mercurius vitæ* facile possit evadere *Mercurius mortis*, malim, ad vomitum excitandum, uti medicamentis blandius & tutius operationem exercentibus, imprimis *Tartaro Emetico*, *Aqua benedicta*



*medicæ Rulandi &c.* Vid. *Willis. Pharm. rational. Sect. 11. c. 2. Fr. Dekkers Exercit. Med. pract. c. 4. Matthiam Tillingium in Prodomo. Joh. Helfricum Junkens in Medico præsentis seculo accomodato p. 11. sect. 1. c. 3. Rolsincius tale præscribit:*

℞. *Mercur. vitæ gr. viij.*

*Mass. Pilul. Cochiar. q. s. ad incorporationem.*

*Cum Syr. de Ira Arthetica.*

*M. F. Pilulæ no. v.*

Verum cum ego non amem *Mercurium vitæ* præferrem ejusdem Syrupum :

℞. *Vitri Antimon. gr. v.*

*Infunde in vini optimi ℥ij. per noctem.*

*Post filtretur & misceatur.*

*Cum Sacchar. albiss. ℥iij.*

*Solut in Aq. Rosar. ℥ii.*

*Cinnamom. optimi. ℥ss.*

*M. F. Syrupus.*

Hujusmodi *Sennertus* :

℞. *Rhaphani in taleolas incisi ℥iss.*

*Sem. Raphan. Atriplic.*

*Rad. Asari aa ℥ij.*

*Coq. in hydromelite Colat. ℥iv.*

*vel v. vel vj. Add.*

*Oxymellis f. ℥ss.*

*M.*

Quemadmodum autem in superioribus demonstravi, præparantia non necessario præmitti purgantibus, ita idem illud & ratione emeticorum, & ratione purgantium in Paralyfi locum habet. Supponamus enim quempiam repentè Paralyfi corripì, ventriculum & intestina habere humorum saburrâ onusta, an præparabimus hos humores? h. e. An reddemus hos humores fluidos? An expectabimus dum malè concocti venas subeant lacteas, sanguini glutinosiori materiam subministraturos? Atqui vidimus hunc sanguinem esse causam nimix vatorum repletionis. Cur sanguinem reddemus humoribus crudis foetum, postea magno molimine depurandum? An

Præparantia  
non præmit-  
tenda pur-  
gantibus.



ventriculus, in hoc casu, dissolutioni, fermentationi, concoctioni est aptus? Num vitia primæ concoctionis corriguntur in secunda? Itaque nullâ interposita mora ventriculus & intestina expurganda sunt, id quod in plerisque casibus repentinis quoque locum habet. Quid? quod in provectioris ætatis hominibus, in constitutione scorbuticâ, ordinarie saliva sit glutinosa, in constitutione scorbuticâ, ordinarie saliva sit glutinosa, quæ hac ratione optimè educitur? Habeo consentientem Sennertum, cujus hæc sunt verba: *Itaque alvus & prima via primo expurganda, ne attenuantium & preparantium usu humores crudi in ventriculo & primis viis hærentes, majori copia ad penitiora corporis & nervos deducantur. Ut & Saxoniam l. i. c. 10. In Paralyfi recenti & facta post Apoplexiam, post Colicam, post alium affectum similem, statim ab initio conveniunt purgantia validissima: quia ex usu purgantis sperandum est, materiam posse quamprimum ex loco affecto purgari: quod ego sum edoctus fieri posse. Riverius, cæteris purgantibus parum proficientibus, non inutile esse existimat ad vomitoria chymica transcendere. Verum si in progressu morbi, viribus imminutis, possunt in usum vocari vomitoria, quid ni statim in initio exhibeantur, ubi vires omninò constant? Ita non semel contingit medicos prudentes habitos, revera autem timidos & cunctatores, eoque optimorum remediorum usum aspernari, donec ea in usum vocandi occasio amittatur. Rectius sentit Dolæus: In quacunque Paralyfi VOMITORIA magni facimus; ventriculus enim Paralyticorum scatet sæpius pituitosis & viscidis humoribus: in hunc finem exhibere solemus vini nostri emetici ℥ss. vel Tartar. emet. à gr. j. ad gr. v. Si quis malit Rad. Asari à ℥ss. ad 3j. vel Vitriol. album per nos licebit. &c. Confirmatur hæc sententia à Rulando Curat. Empyr. Cent. i. cur. 3. Qui, cum virum nobilem D. Leonhardum à Kennata in Rosenberg Paralyfi diversarum partium correptum, observâisset laborare è nimia repletionem, hanc brevem curandi rationem instituit.*

Primo die exhibuit: *Aqua Benedicta 3j. cui aqua fontana tantundem admiscuit, quæ multa biliosa & pituitosa expulit.*

Tertio die *Extracti Esulæ 3j. Furis Pisorum ℥iv. unde iterum rectè purgatus fuit. Postmodum adhuc quædam in usum vocavit, & refert ægrum cœpisse rectè valere, & omnium partium motus integros recipere.*

Nec



Nec nos movere debet *Hippocratis* auctoritas jubentis concocta medicamenta purgante educere non cruda. Ille enim Aphorismus rectissimè, meo quidem iudicio, explicatur, de signis concoctionis in urinâ apparentibus. Nempe circa statum morbi acuti urina aliquando est valdè inflammata, aut turbida, sedimenti albi, levis, æqualis, quod habetur signum concoctionis, sicut medici loquuntur, nulla adfunt vestigia, in hoc casu sæpissimè utilissimum est quiescere, & exspectare vel crisin, vel morbi declinationem, vel enema vocare in usum. Casus autem, de quo nunc agimus, planè est alius: non in vigore, sed principio morbi versatur æger, habet ventriculum onustum, metus est ne hinc morbus incrementum capiat, nisi tempestivè exoneretur æger, huic non est contrarius *Hippocrates*, saltem non contraria ratio & veritas. Hæc tamen ita intellecta velim, ut diligenter perpendat medicus, an hæc valida concussio, in hoc *Petro*, in isto *Paulo* debeat in usum vocari? Non sunt medicamenta generosiora promiscuè proponenda, sed videndum, num sint quæ nos à talibus cogant abstinere. Potest aliquid in genere consideratum esse utile remedium, quandoquidem pluribus satisfacit indicationibus, quod tamen in praxi non semper habet locum, quandoquidem non homines in genere, sed individua tractat medicus.

Quod si emeticis non sit locus, aut si iis jam usurpatis blandius agere sit animus, ad viscidos humores educendos utimur purgantibus. Eligimus in hoc casu *Phlegmagoga* dicta medicamenta, non quod pituitam solam educant, sed quod inter ea sint amaricantia & potentiora medicamenta, quæ abstergendi vi pollent, & simul humores viscidos aliquomodo emendandi ex. gr.

Purgantibus  
phlegmagogis.

℞. Elect. Phlegmagog. Sylv. ℥iij.

Sal. Absinth. gr. vj.

Aq. Betonic. q. s.

M. F. Haustus.

Non malè conveniet quoque hæc, aut similis formula:

℞. Mass. Pilul. Cochiar. ℥ss.

Trochisc. Alhand.

Diagrid. aa ʒss.

Sal.



*Sal. Tartar. gr. vj.*

*Cum Tinctur. Castor.*

*F. Pilulæ no. xv.*

*Pro iij. dosibus.*

Non malè quoque audiunt in hoc casu *Mercurialia*, *Mercurius dulcis*, *Præcipitatus albus*, *Turbith. minerale*.

*℞. Extract. Cathol.*

*Mercur. dulc. aa ʒß.*

*Resin. Jalapp. gr. ij.*

*Cum Tinctur. Croci.*

*F. Pilulæ. no. iv.*

*Rolfincius* has præscripsit pilulas :

*℞. Mass. Pilul. Cochiar. maj. ʒß.*  
*de Agaric. ʒj.*

*Trochisc. Alhand.*

*Diagrid.*

*Castor. aa gr. iij.*

*Cum Aq. Salv. q. s.*

*F. Pilulæ no. xxi.*

Adjungit & hunc pulverem facilis compositionis :

*℞. Spec. Diacarthemi. ʒß.*

*Resin. Scammon. gr. vj.*

*in chartâ.*

hujus ʒj. ante noctem horâ somni exhibet.

*Riverius* ad hunc modum pilulas componit.

*℞. Mass. Pilul. foetid. maj.*

*Cochiar. min. aa ʒß.*

*Trochisc. Alhand. gr. iv.*

Capiat semel in Septimanâ. Concinnior est descriptio

*Pauli Barbette.*

*℞. Resin. Jalapp.*

*Agaric.*

*Aloes lucid. aa gr. iv.*

*Sal. Succin. gr. vj.*

*Ol. Menth. gr. ij.*

*M. S. F. Pil. Num. v. deaurentur.*

quarum optimus fuit successus.



*Dolens* commendat infusa & vina medicata, quæ sensim alterando & purgando officium peragunt. v. gr.

℞. *Herb. Chamæpyt.*

*Chamædr. Salv.*

*Flor. Pæon. Stachad. Arab.*

*Anthos. aa m. ℞.*

*Rad. Valerian. Pœon.*

*Doronic. Caryophyll.*

*Hermodaët.*

*Mechoacann. alb. aa ʒj℞.*

*Fol. ferm. f. st. ʒj℞.*

*Rhabarb. flav. ʒiij.*

*Galang. Cinnam. spicæ Ind. aa ʒ℞.*

*Concisa & contusa D. ad sindonem pro mensura vini.*

Sanguinis  
robur in-  
staurantia.

Sanguini suus restituitur vigor, per medicamenta inciden-  
tia & attenuantia, quæ dicuntur cephalica. Horum in superio-  
ribus quoque facta est mentio. Tale decoctum præscripsit  
*Sennertus,*

℞. *Rad. Ireos, Helenii, Acori veri aa ʒ℞.*

*Salvia, Betonic. Hyssop. Rorismarin. aa m. j.*

*Flor. Stachad. Arab. m. ℞.*

*Sem. Anis. Fœnic. aa ʒij.*

Coq. in aquæ puræ ℔ij. ad remanentiam ℔ij. colatura  
dulcoretur Sacchar. vel Melle Rosat. vel Anthos. ℔℞.  
& aromatiz. pulv. Cinnamom. ʒj. Zinzib. alb.

*Nucis Muscat. aa ʒ℞.*

*Cubebæ. ʒj.*

atque per manicam Hippocratis trajiciatur.

Electuarium hoc paralyticum extat in Pharmacopœa Bateana.

℞. *Sem. Sinap. siccæ. & pulv.*

*Nasturt. aa ʒij.*

*Syr. de Succo Salviæ ℔j. vel q. s.*

F. Electuarium.

D. ʒ℞. quotidie per menses aliquot.

Non est in solis medicamentis, Galenicis dictis subsistendum.  
in usum vocanda Chymica tanquam efficaciora. Talia sunt Spir.  
& Sal. Volat. Fuligin. C. C. Succini Armonicalis, Sanguinis. Tin-

Medica-  
mentorum  
chymico-  
rum usus.



*clura sulphur. terebinth. Tinct. Antimon. Succini, Castor. Elix. prop.* Quandoquidem quidam *Galenicorum* placita etiamnum ita exosculantur, ut medicamentis optimis & maximè efficacibus non dubitent sese opponere, cum summo ægrotorum damno, juvat proponere exemplum medici nimium timidi, ut sui expressam intuentes imaginem, umbram suam metuere definant. Quem proponam est *Johannes Heurnius*, cujus verba c. 25. de Paralyfi adscribere operæ est pretium. *Quidam audacter præscribunt Olei Sulphuris per campanam extracti guttulam, cum Malvatico vino.* Insignem vero audaciam, integram *Olei Sulphuris* guttulam cum *Vino Malvatico* præscribere!

*Illi robur, & æs triplex  
Circa pectus erat !*

Quemadmodum *Heurnius* metuit *Oleum Sulphuris*, ita quosdam territat *Antimonium*. Ut medicamentum egregium atro notetur carbone, sufficit, si dicatur ex *Antimonio* fuisse præparatum; cum tamen illud crudum assumi, atque in aqua decoqui largâ satis quantitate possit. Ex *Antimonio* & mitia & efficacia præparantur medicamenta, blandius & certius operationem suam perficientia, quam è vegetabilibus præparata. Rectè itaque *Tulpius* concludit: *optime agi cum medicamentis chymicis, ubi in gravi morbo, dantur à providâ manu universalibus jam ritè administratis.* L. IV. obs. 2. Itaque hisce valere jussis nos medicamenta chymica in Paralyfi non dubitabimus in usum vocare. Talem Spiritum commendat *Walsmidi*us:

℞. Spir. Cephalic.

C. C. compos.

Sal. Volat. oleos. Cephalic. aa ʒij.

M. Dosis 15 guttæ.

℞. Tinctur. Antiscorbut. Bontikoei ʒiij.

Laudatur quoque *Extractum diateffaron* cujus descriptio existat in *Pharmacopœa Bateana*. *Theodorus Majerne* habet *Spiritum antiparalyticum* non contemnendum, cujus descriptio apud Auctorem videri potest. *Doleus* hanc præscribit formulam:

℞. Aq. Cerasor. nigr. Salviæ aa ʒij.

Epileptic. Lang. ʒvj.

Ex-



*Extract. Chamæpit. Chamadr. Castor. aa ʒß.*  
*Syr. Stæchad. ʒj.*

M.

Habet *Mynsichtus Liquorem diaphoreticum*, quem dicit quotidie exhibitum in Paralyfi miraculosè juvare, cujus hæc est descriptio :

℞. *Aq. Theriacal. nost. ʒvj.*  
*Sp. Tartar. aliquoties recti ʒiij.*  
*Terra sigillat. per se destill. & rectif.*  
*Lign. Guajac. rectif. aa ʒj.*  
*Liq. Acidi Perlar. orient.*  
*Acidi Corall. rubr. aa ʒß.*

Misc. & in vitro clauso per tres aut quatuor septimanas probe digerantur, postea liquor filtratus ad usum servetur.

Dosis a ʒß. ad ʒj. & ʒij. in aq. *Corn. Cervini* noctu.  
 vel *Card. bened.* vel aliâ morbum propriè respiciente.

Diaphoretica.

Transeundum jam esset ad alia diaphoretica, ut & medicamenta externa; verum cum de iis in sequentibus futurus est dicendi locus, transeundem est ad Paralyfin à sero ortum ducente.

Ubi serum causa est morbi, ejus evacuationi omnino incumbendum per medicamenta purgantia, diaphoretica, diuretica.

Cura feri redundantis.

Cum de purgantibus in præcedentibus sit actum, sufficiet observâsse in hoc casu medicamenta *Mercurialia*, & *Gummi Gotte* eximii esse usus. Ex. gr.

Purgantibus.

℞. *Electuar. Panchymagog. nostr. ʒijß.*  
*Tartar. Vitriolat. non acid.*  
*Gumm. Gotte aa gr. iij.*  
*Aq. Ruth. q. s.*

M. F. Haustus.

℞. *Mass. Pilul. Mastichin.*  
*Mercur. dulc. aa ʒß.*  
*Trochisc. Alband. gr. ij.*  
*Ol. granor. Junip. g. ij.*

F. Pilulæ. no. v.

Cum de diaphoreticis in sequentibus sit agendum, transeamus ad diuretica, quæ talia eligantur, ut non tantum urinam

Diaphoreticis & diureticis.



ciendi facultate polleant, sed & Paralyfin respiciant. Talia sunt *Alcalia volatilia*, *Salia volatilia urinosa*. *Sal. Volat. C. C. Succin. Sal. & Spir. Fuligin. Essentia Castorei*, *Sal. Volat. Oleosum*, *Balsamus nervinum Scefferi*. Utilia quoque sunt è Viperis præparata medicamenta, quarum volatili sale *Wizelius* dicitur *Principem Nassovia Paralyticum* feliciter restituisse.

*Dolæus* hunc præscribit haustulum :

℞. *Aq. Card. bened.*

*Chamædr. aa ʒj.*

*Sp. C. C. Succinat. gr. xij.*

*Essent. Antimon. Tartarifat. gr. xv.*

*Syr. de Scord. q. s. ad gratam dulcedinem.*

M. Potiuncula pro una vice.

*Walsmidius* vero hunc habet haustulum qui diaphoreticus est,

℞. *Theriac. recent. ʒj. Solve cum*

*Aq. Fl. Sambuci. Add.*

*Sp. Tartar. compos.*

*Tinctur. Antimon. è scoriis aa ʒj.*

M. pro dosi.

*Fredericus Dekkers* hanc potiunculam cum successu usurpavit:

℞. *Aq. Card. bende. ʒij.*

*Theriacal. s. ʒvj.*

*Antiparalyt. Amstel. ʒiij.*

*Sp. Sal. Armon. g. xvj.*

M. pro Haustu.

Apud *Dolæum* adhuc sequentes inveniuntur formulæ.

℞. *Off. Microcosm. ppt. ʒiij.*

*Spin. Viperar. ʒj.*

*Cinnab. Antimon. ʒiv.*

M. F. Pulvis. Dosis. ʒj.

vel

℞. *Tinctur. Bezoard.*

*Ess. Lign. compos. aa ʒj.*

*Spir. nostri cephalic. ʒj.*

M.

Cura puris

Si pus fuerit collectum circa Medullam oblongatam, & nervos, nullum autem vulnus in cranio, nec circumstantiæ quæ trepanum exigunt, naturæ opus erit illud superare. Memorantur



rantur exempla eorum qui pus thorace contentum per urinam excreverint ; verum tales casus sunt oppido rari : qui pus circa basin cerebri & medullam oblongatam hærens excreverit ego vidi neminem. Potest tamen, meo quidem iudicio, in tali casu exhiberi *Balsamus Sulphuris juniperinus*, *anisatus* aut similis, nisi æstus aut febris superveniens ad magis temperata, lenientia, & traumatica cogat. Quamvis enim ego *Balsamum Sulphuris* magni faciam, nolim tamen eum promiscuè in usum vocari, cum illius præposterum usum non parvas ægrotis creâsse molestias experientia me docuerit.

Videamus jam quæ cura adhibenda sit illis, qui è *Mercurii*, aut simili vapore in Paralyfin inciderunt? Hujus non est difficilis investigatio cogitanti, qua ratione tractandi sint ægri, qui illitione aut suffimigio *Mercurii* ad salivationem excitantur. Imprimis vitandum est omnis generis frigus, æger continendus in hypocausto calido, & sudor provocandus. Sudor provocatur in hoc casu optimè *Decocto Lignorum*. Itaque præmissa primarum viarum evacuatione, vel Clystere, vel medicamento per os exhibito, præscribatur hoc vel simile decoctum:

Cura Paralyseos à Mercurii vapore.

℞. Rad. Sals. parill. ℥iij.  
Rasur. Lign. Guajac. ℥vj.  
Liquerit. ℥ij.  
Lign. Sassafras ℥iβ.

Infundantur per xxiv. horas in aq. puræ ℔x. Deinde decoq. in vase accuratè clauso ad tertiæ partis consumptionem, vel ad medias, colatura detur pro Decocto.

Sequens formula est *Theodori Majerne*:

℞. Sals. parill. alb. & medullosa. ℥iv.  
Rad. China.  
Rasur. Lign. Rorismar. &  
Juniperi nostr. aa ℥ij.  
Sem. Pœon. maris. ℥j.  
Flor. Betonic. & Anthos. aa p. iij.  
Herb. Paralyf. p. viij.

Infunde per horas 4. super cineribus calidis in lbviij.  
*Aqua fontana purissimæ*, mox F. Decoctio ad me-



dietatis consumptionem. Add. sub finem coctionis. *Coriandr.* ʒj. Colatura dividatur in octo partes æquales reponendas in totidem ampullis probe obturatis, pro totidem dosibus, sumendis manè horâ vj. provocando sudorem in lecto, superpositis stragulis & circumpositis lagenis, aquâ calidâ plenâ. Hoc f. per octiduum.

Quod si quis medicamenta minus composita malit, ut tanto certius de eorum efficacia iudicium ferat, potest è *Rasura Lign. Guajac.* solâ, cum *Rad. Liqueritiae* fieri decoctum satis efficax, sudorum procurationi & Paralyseos sublationi accommodatum. Ipso quippe gustu discernere licet, partes gutturis interiores post usum talis decocti adhuc vellicari, à particulis valdè tenuibus & acribus, decoctionis ope aquæ communicatis.

Distuli hucusque verba facere de *Decoctis lignorum*, quandoquidem ea in hoc casu imprimis videbantur requiri, conveniunt tamen quoque in plerisque aliis speciebus, quemadmodum eorum in superioribus quoque feci mentionem. Itaque ubi cerebrum est flaccidum, ubi cerebrum sero est madidum, ubi sanguinis visciditas emendanda, ubi tumores œdematosi adsunt, ubi suspicio est puris, in omnibus hisce casibus in usum vocari possunt decocta lignorum. Ad sudoris uberiores promotionem utiliter potest quoque in usum vocari *Laconicum*. Non tantum enim in usum vocanda sunt medicamenta interna, sed & externa internorum effectum promoventia. Vide ea quæ *Hartmannus* in *Praxi Chymiatrica* habet de *Contractura è Mercurii inunctionibus*. Commendat *Pulverinus Balneorum Puteolorum & Ænariarum*, & illius, quod dicitur *subveni homini*, usum, in quorum defectu artificialibus uti possumus. Sed de his inter medicamenta externa faciemus mentionem.

*Fred. Dekkers* diaphoreticis jungit purgantia hac ratione:

℞. *Rad. Lign. Guajac.* ʒiij.

*Juniperin.* ʒij.

*Cort. Guajac.* ʒj.

*Aq. Fontan.* ℥vij. Coq. f. a. per horas tres, tum Add.

*Baccar. junip.* ʒj.

*Rad. Angelic.* ʒss.

*Fol.*



*Fol. Majoran. nob. Salv. Rorismar. aa m. ℥.*  
*Senn. m. ℥j.*

*Hermodact. 3vj.*

Coq. ulterius vasis optimè clausis ad colat. ℥iv.  
 quibus adde.

*Aq. Antiparalyt.*

*Theriacal. f. aa 3j℥.*

*Sp. Sal. Armon. 3j.*

M. Dentur in cantharo lapideo opti-  
 me clauso.

Quomodo ossium luxatio & subluxatio tolli possit & debeat  
 è scriptoribus chirurgicis est petendum.

Cura Os-  
 sium luxa-  
 tionis.

Idem dictum sit de curâ vulnerum.

Vulnerum.

Mala conformatio ab ipso ortu curationem fere respuit: si  
 quid sit agendum, id fiet frictionibus asperioribus, doloris ex-  
 citatione, linimentis & similibus, de quibus in sequentibus di-  
 cendum erit.

Mala con-  
 formationis.

Absolvimus primam indicationem, quæ nervorum com-  
 pressionem & causas Paralyseos respiciebat, accedendum ad  
 secundam, quæ præcipit ut robaremus cerebrum, nervos,  
 musculos. Roboratio cerebri & nervorum præter ea, quæ  
 jam in superioribus explicata sunt, respicit cerebrum flacci-  
 dum, qualis in senibus locum habet. Difficulter id roborat-  
 ur, quandoquidem partibus solidis impressa labes non facile  
 superatur. Danda tamen opera ut otium, ignavia, & omnes  
 causæ spiritus dissipantes, tellantur, atque contrariæ in usum  
 vocentur. Deinde, ut exhibeantur ea, quæ huic nego-  
 tio creduntur appropriata. Nolim hisce multum immorari,  
 quandoquidem horum catalogus apud plures auctores exstat,  
 sive eum ipsi concinnarint, sive ab aliis tradita repetierint. Non  
 inutile est tale conditum:

Cerebrum  
 & nervos  
 roborantia.

*Rx. Conserv. Cochlear.*

*Anchos.*

*Absinth. aa 3℥.*

*Rad. Zinzib. in Ind. cond. 3ij.*

*Galang. min. ʒj.*

*Cort. Winteran. ʒ℥.*

Cum



Cum *Syr. Stachad.*

F. Conditum. usus ejus est, assumere bis vel ter quotidie ad quantitatem nucis muscatæ.

Addunt nonnumquam auctores *Mithridatium*, quod etiam non incommodè, vel solum, vel aliis admixtum usurpari potest, præcipuè ubi ægri sunt somni parci. Commendatur etiam *cerebrum leporis*. *Cerebrum* quoque roborant Cucuphæ externè capiti applicatæ, nec non suffimigia varia.

Evacuatio-  
nes particu-  
lares dictæ.

Habent hic quoque locum evacuationes cerebri particulares per *Errhina*, *Masticatoria*, de quibus satis copiosè scripserunt auctores practici. Ego commendarem masticationem *Cubebarum*. Imprimis hæc juvant, ubi suspicio est feri copiosius in cerebro cumulati.

Nervos &  
musculos  
roborantia.

Possunt considerari nervi vel tanquam cerebri appendices, & tum roborantur, ubi cerebro prospicitur, vel tanquam musculis inserti, & tum roborantur quando musculis prospicitur per externa. Fit hoc per medicamenta topica dicta: frictiones, cucurbitulas, rubificantia. Inungenda sunt membra relaxata oleosis & spirituosus. Metuunt quidam practici usum linimentorum, existimantes ab oleosis & pinguibus cutis poros nimium obstrui. Mihi videtur metus hic omnino vanus. Quam noxam poterunt afferre aromatica & oleosa cuti externè illita? Nonne hic adest relaxatio, & resolutio fibrarum muscularium? Nonne tali ratione spirituum copiosior influxus allicitur, ad tensionem debitè absolvendam? Non conjunguntur huic affectui ea, quæ inunctionem vetare possunt. Non adest affluxus humorum, suâ copiâ musculos flaccidos reddens, sed flacciditas oritur à defectu influxus spirituum animalium. Non adest inflammatio, non erysipelas: saltem non sequuntur hæc symptomata è natura Paralyseos: quod si autem ab alia causa hæc jungantur Paralyfi, tum horum habenda est ratio. In hoc casu non omittuntur ideo oleosa, quod ea Paralyfi non conveniant, sed quod superveniant symptomata eorum usum prohibentia. Quid? quod *Oleum Caphuræ* è radicibus *Cinnamomi arboris* elicited, sit medicamentum potentissimum, si statim in principio calidè inungatur parti affectæ? Ego itaque contendendo unguenta, olea, & oleosa magis convenire, quam sola spi-



spirituosa, quia scilicet non ita facilè dissipantur, & magis permanentem calorem musculis & membris Paralyticis imper-  
tiunt. Non repugno tamen, si oleosis misceantur spirituosa,  
& salia volatilia. ex. gr.

℞. Unguent. Martiat.

Ol. Lumbricor. Laurin.

Philosophorum aa ʒij.

Caphura è radicibus Cinnamomi  
arboris elicita.

Tinctur. Castor. aa ʒʒ.

Sp. Matrical. ʒj.

Sal. Armon. ʒʒ.

M.

Inungatur pars affecta unguento hoc calidè, ante ignem è  
ligno Quercino, vel Juniperino excitatum. Inungatur non  
tantum membrum, & musculi affecti, sed & principium spinalis  
medullæ, aut illa ejus pars, è qua nervi ad locum affectum distri-  
buuntur. *Pulverinus* in vitio spinalis medullæ commendat A-  
quam *della bella*, vel *dello piscicula* à vulgaribus nuncupatam,  
quibus substituit aquam ardentem aromatizatam.

Inter remedia externa non infimum locum obtinent Ther-  
mæ tum naturales, tum artificiales. Artificiales præparantur  
ad libitum è decocto variarum herbarum cephalicarum. Inter  
naturales, præter superius laudatas, eligendæ eæ, in quibus Sul-  
phur & Nitrum abundat. Laudantur *Teplizenses* in *Bohemia*,  
*Badenses* & *Ferina*. Vid. *Conradum Gesnerum de Thermis Germanicis*.

Non potui præcedentes indicationes absolvere, quin medi-  
camentorum, spiritus excitantium, aliquoties fuerit facienda  
mentio. Spiritus excitant *Cephalica* dicta, spiritus excitant  
*Salia volatilia*, spiritus excitant *decocta lignorum* quandoquidem  
sanguinem diluunt, atque ejus visciditatem emendant. Præter  
ea quæ in superioribus laudata sunt, possunt in hisce regionibus  
in usum vocari *Antiscorbutica*, quandoquidem nullus mor-  
bus longus est, quin aliquid scorbutici habeat admixtum. Ita-  
que *Aqua Antiscorbutica*, *Spir. Cochlearie* ritè destillatus, & si-  
milis spirituosa magni sunt usus. - Posset etiam ad imitatio-  
nem *Sal. Volatilis oleosi* præparari *Sal. Volatile Antiscorbuticum*

Spiritus  
animales  
excitantia.



dicendum. Profunt in hoc casu etiam *Flores Benzoini*, *Oleum Sassafras*, *Succini*, *Cort. Arant. granor. juniperi*, *macis stillatum*. Ad spiritus animales excitandos quoque facit, si herbe cephalicæ, in pulverem redactæ, naribus attrahantur, quamvis nulla sequatur sternutatio. Ex gr.

Rx. *Fol. Thymi*,

*Rorismarini*,

*Salvia*,

*Majoran. nob.*

*Flor. Lilior. convall. aa ʒß.*

F. Pulvis.

Commendat *Pulverinus* cauterium actuale in parte affecta excitatum, tum ad partem roborandam, tum quia calore & dolore spirituum aliqualis concursus speratur.

Non est necesse specialibus differentiis immorari, cum tractationis ordo postulârit in specie de causis agere: quæ reliquas differentias spectant non difficulter ex antedictis eliciuntur.

Diaeta.

Subjungenda est paucis Diaeta. Aër ad caliditatem & siccitatem vergat, vitetur nebulosus, humidus, paludosus, frigidus. Vitetur imprimis commoratio vel decubitus in tali aëre, & locis frigidis & humidis, quales sunt cellæ subterraneæ. Vestimenta frigori arcendo sufficienter inserviant. Capiti imprimis prospiciatur. Quemadmodum omnis subita mutatio noxia est, aut periculosa, ita imprimis in hoc casu noxium est, si aliquando caput diligenter tegatur, mox calefactum iterum exponatur frigori repentino. Cibi sint facilis concoctionis: affati, elixi, herbis cephalicis vel aromatibus præparati, pro varia ægroti tum constitutione, tum etiam appetitu. Cerebrum leporis peculiari facultate Paralyticis prodesse creditur. Lac & lacticia vitentur. A piscibus plerisque ut & fructibus horariis potius abstinendum. Vinum convenit generosum, *Salvium*, *Enulatum*; verum modica quantitate: laudatur quoque *Hydromel* in declinatione morbi: omnis intemperantia hic valdè noxia. Quæri potest, an *Petum* in hoc casu conveniat? sed facilis est responsio. Iis qui hunc fumum ferunt, qui copiosam phlegmatum exspuunt copiam, proculdubio utilis est hic fumus. Iis autem quibus caput hinc nimium gravatur, aut qui non ferunt,



tunt, eo abstinendum potius est. Interim meminisse & hic oportet, omne nimium naturæ esse inimicum. Ingluvies & crapula, quemadmodum ad flacciditatem cerebri, ita ad paralyfin viam sternunt. Motus & exercitium non tantum concoctionem promovet, sed & spiritus excitat, nervosum genus & musculos roborat. Itaque quæ ante de hac materia disputavi, ita sunt intelligenda, ut à motu corporis debeant in actum deduci; cum vita sedentaria, & exercitii neglectus plus noceant, quam medicamenta prodesse possent. Loquor jam de præcautione Paralyseos, vel de eo amplius superando, quando ægroti membra ad motum incipiunt disponi. Excreta & retenta debito modo sese habeant, ita tamen ut alvus sit potius laxa, quam adstricta. Menses ritè fluant. Mucus è naribus expurgetur. Somno minimè indulgendum, præcipuè diurno. Nocte septem horas dormisse sat est. Habenda tamen ratio temporis morbi. Etenim in principio, & affectu gravi exactus servari modus non potest. Animi pathemata vehementia vitentur, gaudium & mens hilaris multum juvant.

## CAPUT UNDECIMUM.

*De Convulsione in Genere; Emprostotono, Opisthotono, & Tetano in specie.*

**M**Otus localis animantium explicatio in sanis, convulsivi in ægris præcedenti seculo multorum torfit ingenia. Nec mirum, cum unicuique, ad ea, quæ contingunt, attento, difficile conceptu videri debeat, quod homines & animalia bruta tantis in statu sanitatis polleant viribus, uti quotidie oculis cernimus. Nec minus mirum in statu morbofo, homines loquentes, obambulantes, sedentes vel etiam decumbentes, omnium sensuum ministerio gaudentes, subito concidere, omnibus sensibus internis & externis orbatos, loquela destitutos, mox convelli, os, faciem, oculos, genas, artus, manus, pedes tanta vi contrahere, ut eorum vires sanorum longo intervallo superent, spumam ore rejicere, sonum incondi-

Morborum convulsivorum hypotyposis.



ditum edere, sibi ab igne, aqua, combustione non cavere, imo nec eandem, quantumvis vehementem, persentiscere: post aliquam temporis moram iterum ad se redire, loqui, obambulare, negotia obire sua, omnium gestorum immemores. Symptomata hæc horrenda considerantes antiqui Epilepsiam, non infimæ inter affectus spasmodicos notæ, appellarunt *Sacrum morbum*, *Herculeum*, *Sonticum*, *Lunaticum*, & ut erant ridiculè superstitiosi, *Comitiales*, quod cum quis tali morbo corripètur, Comitiales peragere non liceret ob malum omen. Hinc spuebant antiqui, nesc. à mali contagio læderentur, teste *Plinio* l. xxviii. c. 4. Despuimus comitiales morbos hoc est contagia regerimus.

Ad horum  
explicatio-  
nem causæ  
stupendæ  
sunt excogi-  
tata.

Ad affectus hos graves & stupendos explicandos, putarunt auctores excogitari debere causas itidem stupendas; cumque sibi aliquid probabile invenisse arbitrarentur, imaginationi freno laxarunt, caput condiderunt intra nubila, adierunt orbem lunarem, vagati sunt

*Extra anni solisque vias.*

Finxerunt *partículas spasmodicas*, *copulas explosivas*, *combinationes iniquas*, *irrequieta materiae & spirituum collisiones*, *crebras vehementesque explosiones*. &c. Quantumvis autem falsæ sint hæc hypotheses, avidæ tamen sunt arreptæ, quandoquidem ea, quæ ab antiquis erant tradita, hominibus emunctæ naribus non satisfaciebant: Ita passim adhuc intelligimus Viros iudicii satis perspicacis particularum spasmodicarum &c. facere mentionem, non obscuro argumento, ipsos ab hisce suppositionibus non esse valdè alienos, vel saltem ea tantisper adoptare, donec veritas magis in aprico collocetur.

Quarum  
refutationi  
non est im-  
morandum.

Non est nostri instituti hæc omnia refellere, quod quidem foret facillimum; verum quare in re minus necessariâ frustra nectemus moras? Enumerâsse, est refutâsse. Sufficiet si in id incumbamus, ut veritatem ipsam quam apertissimè ob oculos ponamus; ita enim figmenta illa facile corrueant, quemadmodum Sol, jubare suo terram illustrans, somnum, insomnia & vanas dormientium imaginationes facile dispellit. Rectum curvi est regula.

Di-



Dicitur *σπασμὸς ἀπὸ τῆς σπᾶω* à trahendo, quod in hoc affectu membra valide trahantur. Latine Convulsio, quod membra veluti convellantur, & potest in genere describi quod fit, *involuntaria & vehemens musculi aut fibrarum muscularium contractio*. In eo convenit spasmus cum motu voluntario, quod in utroque musculi contrahantur, seu quod venter musculi intumescat, caudà ad caput accedat, atque ita moveatur membrum, cui tendo est insertus. In hoc differt à motu ordinario spasmus, quod hic motus præter voluntatem contingat; neque enim à mente, seu voluntatis nostræ arbitrio, pendet hunc motum coercere. Ex quo patet, quam malè antiqui facultates corporeas tribuerint animæ. Dico etiam esse vehementem, quod nulli potest esse ignotum, qui manibus membra convulsione exagitata tractaverit: vehementia tanta est, ut plures aliquando adstantes uni ægroto continendo minimè sint pares. Mentionem facio non tantum musculorum, sed & fibrarum muscularium, ne motus convulsivos à generali descriptione excluderem. Intellego autem in genere & fibras musculares, & tendines, quorum subsultus in pluribus convulsivis non obscurè percipitur. Non facio mentionem sensuum internorum abolitorum, quandoquidem in pluribus convulsivis speciebus, & in motibus convulsivis mens constat. Descriptio talis erat proponenda, quæ universæ Convulsivis generalis, postmodum producendæ, æqualiter conveniret.

Quandoquidem ergo hic agitur de præternaturali contractione musculorum, manifestum est, statum hunc percipi non posse, nisi motus voluntarius in statu naturali rectè intelligatur, id quod etiam à *Willisio* rectissimè est observatum. Verum cum ego antea de hac materiâ egerim, nolim hic explicata repetere: sufficiat in mentem revocasse ad motum muscularem & voluntarium nihil aliud requiri quam spiritus animales, & sanguinem, nec non organa ad horum generationem & distributionem, atque membra musculosque ad motum hunc obediendum comparata. Tango hæc tantum, non explico, ne necesse sit ante dicta repetere. Cum autem in hoc casu, finito paroxysmo, membrorum motus soleat esse restitutus, non tam considerata sunt membra, quam cerebrum & spiritus

Status præternaturalis non intelligitur nisi cognito statu naturali.



animales. Refertur hic affectus rectissimè ad pathologiam cerebri & nervosi generis; verum diligenter tenendum est, sanguinem ad cerebrum delatum, non minoris esse efficaciae, quam spiritus animales, quandoquidem sanguine malè disposito aut moto, cerebrum & spiritus animales ejus noxam luunt.

Convulsio-  
nis causa est  
Repletio &  
Inanitio.

*Hippocrates* Convulsionem statuit fieri è repletione vel inanitione Aph. 39. S. VI. σπασμὸς γίνεται ἢ ὑπὸ πλερώσει, ἢ κενώσει. ejus exempla sunt manifesta. Non raro contingit homines plethoricos primo in capitis gravitatem, dolorem, vertiginem & convulsiones vehementes incidere, à quibus sola V. S. liberatur, quale exemplum ego memorabile antea retuli: est ergo convulsio à repletione. Contingit etiam non rarò post V. S. liberaliorem, aliquem in lypothymiam, hinc & convulsiones, cum sensuum internorum abolitione, incidere. Observantur Convulsiones in jugulatione & mac-tatione animalium semper. Eadem accidunt nonnunquam post purgationem vehementem. Est itaque Convulsio ab inanitione. Convulsiones à repletione & inanitione explicantem suo modo vide *Gorrhaem* in definitionibus medicis Tit. σπασμὸς. *Willisius* sese sententiae *Hippocratis* & Antiquorum opposuit, rejiciendo has causas: qui haecenus non omnino fallitur, quod viderit exempla de corio, & fidium nervis, ab aëre madido impletis, aut nimis inanitis, contrahi solitis, non satisfacere: verum cum exempla à me adducta veritatem dicti Hippocratici evincant, sententia ipsa repudianda non est, sed explicatio quærenda vera, & veritatis avido animo satisfaciens. *Pareus* cum *Hippocrate* facit, convulsionis causas easdem statuens repletionem & inanitionem, quibus addit sympathiam seu condolentiam ac dolorem, nec non putredinem, verum in explicatione fallitur, exemplum corii & fidium adducens. Fallitur etiam quando Convulsiones, seu Epilepsias febri-les ad inanitionem refert, quia sc. nervi tum, ex ejus mente, exsiccantur. Epilepsiarum symptomaticarum in febribus planè alia est ratio, uti in sequentibus videbimus; illæ pleræque è repletione originem ducunt.

Explicatio.

Quandoquidem hæc tractatio tantum est generalis, & mihi pro-



propositum est hoc negotium fufius explicare, capite de Morbo caduco, feu Epilepfîâ periodicâ, breviter convulfio à repletionem ita intelligenda est, quod arteriæ carotides nimium repleantur, unde fequitur compressio nervorum, depressio cerebri, spirituum animalium verfus mufculos propulfio, fibrarum tensio, sanguinis progressus retardatus, mufculi inflatio, partis tendini annexæ vehemens & involuntaria contractio. Convulfionem ab inanitione folet præcedere lipothymia, faciei pallor & flacciditas, genæ collabefcentes, unde facile intelligimus eodem tempore cerebrum expansionem suam non minus quam faciem amittere, adeoque veluti subfidere: subfidentia hæc spiritus animales inordinatè verfus mufculos premit, adeoque convulfiones ciet. Itaque caufas, meo quidem iudicio, *Hippocrates* veriffimas statuit convulfionis, verum modum explicare non potuit, quandoquidem nec circulationem sanguinis, & hujus fequelam preffionem per univerfum corpus, nec veram rationem motus voluntarii perspectam habuit. Novi quidem in *Hippocratis* scriptis quædam reperiri, quæ videntur innuere sanguinis circulationem; verum si illam distinctè noviffet, ampliorem ejus & clariorem feciffet, procul omni dubio, mentionem. Appellatio spirituum animalium, tanquam partium impetum facientium, fatis ostendit, antiquos in eâ fuiffe opinione, à spirituum animalium influxu impetum, ac proinde motum voluntarium dependere, quæ fententia à veritate omnino aliena est. Non explicarunt itaque recte hanc fententiam antiqui, quamvis effet veriffima.

Neoterici præcipuè confiderarunt irritationem. Et revera novimus nervorum & capitis vulnera non rarò excipere convulfiones: novimus etiam post affumpta venena sæpe fequi convulfiones. Hæc exempla non parum valent ad probandum, dari convulfiones ab irritatione; verum, re penitus perspecta, non videtur mihi difficile, irritationes hæc ad repletionem vel inanitionem reducere: faltem fine confideratione repletionis vel inanitionis, hæc irritatio non videtur mihi fatis distinctè poffe intelligi. Quandoquidem punctura nervi fupeditat argumentum maximi roboris, meo quidem iudicio, ad evincendum, irritationem effe caufam convulfionis, non  
erit

Irritatio.



erit inutile hanc causam penitus perscrutari. Concedo convulsiones subsequi puncturam nervi; verum velim diligenter attendi quomodo illud contingat? Dico ergo, non sequitur statim ab ipso inflictu convulsio, sed plerumque dolor vehementissimus, tumor, inflammatio, partis affectæ cum æstu insigni solent præcedere. Hinc concludo, irritationem ipsam non debere separatim considerari, verum prout stipata est omnibus hisce symptomatibus. Si autem symptomata diligenter examinentur, si consideretur quæ immutatio in cerebro, spiritibus animalibus, sanguine, debeat subsequi, jam facile videbimus revera repletionis & inanitionis considerationem huic toti negotio faciem præferre. Nempe à dolore vehementi spiritus animales rapidissime & turbulentè agitantur, influunt in cor & præcordia, hinc sanguis per universum corpus propellitur impetuose: cum autem sanguis, humor consistentiæ non admodum liquidæ, sit quidem proportionatus ordinariæ pressioni, non autem vehementi tali, hinc arteriarum carotidum trunci & ramuli nimium replentur & expanduntur, unde convulsiones, modo in superioribus explicato, & in sequentibus magis explicando. Fortè nervorum punctura, quandoquidem dolor ope nervorum ad cerebrum deferretur, sanguinem etiam magis versus cerebrum & arteriam carotidem propellit. Quod si dolor ægrotum in lypothymiam conjiciat, simili modo sese res habet, uti superius, de deliquio animi à sanguinis detractione nimia, disputavi. Quod si consideremus convulsiones ab assumpto veneno excitatas, illæ aliquando paucarum horarum hominem jugulant. Verum dolor & anxietates hoc in casu sunt vehementissimæ, unde eædem sequuntur irregulares motus in spiritibus & sanguine, quos statim explicui, quandoquidem partes solidæ non tantum afficiuntur, sed & exeduntur. Videmus ergo modum, quo irritatio operationes suas peragit, non posse debite intelligi, nisi simul consideretur spirituum & sanguinis motus, inanitio, & repletio. Quanto dolor est vehementior, quanto partes affectæ magis sensiles, tanto citius & gravius potest succedere convulsio; spiritus enim vehementer agitati sanguinem vehementer per universum corpus adi-



adigunt, & arterias minimas nimium replent. Non inutile tamen est irritationis facere mentionem, quandoquidem hæc, respectu repletionis & inanitionis, causæ rationem habet. Causarum autem consideratio in Medicinâ magni est usus: his sublati tollitur effectus.

Videor mihi explicasse breviter, quæ ad Spasmi naturam in genere intelligendam videntur sufficere. Necesse est ut Spasmi (ampla enim ejus est familia) distributionem subjungamus accuratam: ita enim nos facilius extricabimus e maximis difficultatibus, quæ in hac materia occurrunt. Spasmi vox apud Hippocratem est admodum vaga & incerta, quandoquidem generali hac notione nunc hanc nunc illam intelligit speciem, quemadmodum illud in vulgari sermone etiam sæpe observare licet. Quemadmodum à trahendo nomen derivatur, ita omnes contractiones *Tetani*, *Morbum caducum*, *Epilepsiam symptomatice*, *hystericæ*, *puerilem*, *Motus convulsivos* &c. sub sese complectitur. Spasmodum hunc in genere divido, in Convulsiones & Motus convulsivos. Convulsiones iterum sunt vel minus vel magis frequentes: Minus frequentes sunt, quæ rarò admodum accidunt, adeo ut multi medici eas non observarint. Tales sunt *Emprostotonos*. *Opisthotonos*, *Tetanos*. Magis frequentes sunt, vel *Graviores*, adeo ut ægros in majus periculum conjiciant, vel *Minus periculosi*, qui quidem molesti sunt, absque manifesto tamen vitæ periculo. *Graviores* vel *Adultos* infestant, vel *Infantes*. *Adultos* vexat *Morbus caducus*, *Epilepsia* vulgo dicta, vel *Epilepsia* propriè dicta *symptomatica*. Hæc iterum est vel *Febrilis*, *Hypochondriaca*, *Hystérica*, *Scorbutica*. *Levior* Spasmi species complectitur vel subsultus in somnis: vel Spasmodum flatulentum dictum. *Motus convulsivi* sunt vel *Febriles*, vel *Hystericæ*, vel *Hypochondriaci*, *Scorbutici*, vel si qui sunt alii, dolorem vel alios affectus subsequentes. Quandoquidem autem hæc videbuntur forsan obscuriora, non inutile duxi omnia hæc, in brevi tabella delineata, oculis distinctius adhuc repræsentare.

Distributio  
Spasmodorum.



Tabula.

*SPASMUS in genere complectitur.***A. CONVULSIONES** propriè dictas,  
**§. UNIVERSALES.****A. Minus frequentes***α. Emprostotonum,**β. Opistotonum,**γ. Tetanum.***B. Magis frequentes; Hi iterum sunt****§. Graviore, majus vitæ periculum inferentes, & infestant****A. Adultos. Tales sunt***A. Morbus caducus, Epilepsia vulgò dicta.**B. Epilepsia, propriè dicta, symptomatica.*

Hæc est

a. Febrilis.	{	ordinaria	{	in principio	{	vexans.
		extraordinaria epidemica.		in progressu		

b. Pedisequa	{	Dolorum.
c. Hysterica.		Purgationum.
d. Hypochondriaca.		Hæmorrhagiæ.
e. Scorbutica.		Vulnerum & ulcerum.
		Repletionis.

**B. Infantes, vel statim à nativitate  
vel circa dentitionem &c.****1. Leviores, suntque***a. Subfultus in somno.**b. Convulsiones, seu motus convulsivi in somno.**c. Spasmus flatulentus dictus.**d. Hæmorrhagiam excipientes. &c.***2. PARTICULARES.** Convulsio particularis oculorum dicitur *Strabismus*. Si in dentibus accidat dicitur *τρίσμος*, si in labiis, *Spasmus cynicus*, *Risus Sardonius*: Si in pudendo *Satyriasis*. Dantur adhuc duæ aliæ Con-

vul-



vulsionis particularis species, quæ primum possent obtinere locum, sc. *Sternutatio* & *Singultus*. Aliæ differentiæ particulares nominibus propriis carent.

**B. MOTUS CONVULSIVOS** dictos. Hi iterum sunt

a. Vehementiores	} utrique {	Febriles.
b. Minus Vehementes		Hysterici. &c.

Potest videri hæc tabula intellectu fatis facilis, in praxi medica & auctorum lectione diligenter versatis, quoniam tamen hæc in juniorum & magis rudium manus fortè incidet, libet quædam majoris elucidationis gratia subungere. Observare itaque licet, me Spasmi appellationem in latâ admodum sumpsisse significatione, adeo ut omnes morbos hosce suo ambitu complectatur. Imitatus sum *Hippocratem*, in cujus scriptis eadem vocabuli est latitudo, uti in superioribus quoque annotatum est. Labet hanc sententiam paucis confirmare.

Spasmi vocabulum admodum latè patet apud *Hippocratem*.

Minus frequentes convulsiones omnes Spasmi nomine venire, adeo manifestum est, ut probatione non indigeat. Vide *Paulum Aeginetam* l. III. c. 19, 20. Morbum caducum etiam Spasmi nomine venire, manifestum est si conferatur *Aph.* 28. Sect. III. cum ejusdem *Sectionis Aphor.* 25. Epilepsiam symptomaticam febrilem Spasmodum appellavit *Hippocr.* *Aph.* 70. S. v. nec non *Aph.* 26. II. & 13. f. VII. Ἐπὶ καυμασιν ισχυροῖσιν σπασμὸς, ἢ τέτανος, κακόν. Pedissequam dolorum itidem *Aph.* 25. f. v. *Aphorismus* 18. f. VI. Ἐπὶ ἀγρυπνίῃ σπασμὸς ἢ παραφροσύνη de utroque hoc Spasmo potest intelligi, quandoquidem vigiliæ, aut febres, aut dolores solent consequi. Spasmodum quoque appellavit *Hippocrates* Epilepsiam pedissequam purgationum nimiarum. *Aph.* 25. f. VII. I, 4. v. 16. IV. ut & hæmorrhagarum nimiarum. *Aph.* 3. 9. f. VII. Vulnerum 2. v. Ulcerum 22. v. Repletionis 5. v. Epilepsiam symptomaticam hysteri- cam appellavit *Hippocrates* in *Coacis* & *Prorr.* Spasmodum his verbis: οἱ ἐν ὑπερικῆσιν ἀπύροις σπασμοὶ εὐχερέες. Cum affectionis Hypochondriacæ & Scorbuti explicatio, fusior & magis distincta apud recentiores quam *Hippocratem* existet, hisce non immerabor. Posset tamen huc non incommode referri. §. 34. S.



11. Coacar præn. & Aph. 56. vi: Epilepsiani infantes corripiantem quoque Spasmodum dixit *Hippocrates* Aph. 25. S. 111. De motibus convulsivis intelligi potest Aph. 66. S. iv. Saltem verus est & de convulsionibus, & motibus convulsivis, quidni ergo sumatur Spasmi vocabulum in significatione latâ? Videtur alio loco motus hos convulsivos *σπασμοτρόμος* vocabulo designasse *Hippocrates*. Vide *Gorrhai* definit. med. h. t. Quemadmodum autem *Hippocrates* voce Spasmi Epilepsiam aliquando denotat, uti *Foësius* annotavit in voce *σπασμός*, ita non foret difficile probare *Hippocratem* vocibus Epilepsiæ & Spasmi tanquam Synonymis uti: verum nolo hisce immorari. Ad meum negotium sufficit demonstrasse, hanc Spasmi distributionem magnam partem niti auctoritate *Hippocratis*. An autem alicujus usus sit, tum in *Hippocratis* mente rectè explicandâ, tum in exerenda praxi, hæc tabella, practici judicabunt.

An Emprostotonos  
Opistotonos  
&c. sint  
Convulsiones universales, an vero particulares?

Quod ad distributionem generalem spectat, retuli Spasmodum Emprostotonum, Opistotonum, Tetanum inter Spasmos universales, secutus *Gorrhaum* in definitionibus Medicis & plures alios: quamvis *Foësius* in Oeconomîâ videatur referre Emprostotonum & Opistotonum ad convulsiones particulares, cervicis & scapularum præcipuè faciens mentionem. Verum si ea quæ, *Hippocrates* l. 111. de Morbis xiii. 6, 7. & xiv. 5, 6. &c. habet, consideremus, non videtur incommodè his spasmi speciebus inter universales tributus locus. *Tulpius*, in observatione postmodum laudandâ, morbum caducum versus posteriora corpus convellentem Opistotoni appellatione donavit. Ego hæc distinguo; si quis tamen aliter sentiat, is suo fruatur arbitrio.

Morbum caducum, Epilepsia symptomatice.

Distinguo Morbum caducum, Epilepsiam vulgo dictam, ab Epilepsiâ symptomaticâ, quandoquidem hi affectus, longo inter sese intervallo distant. Alius est affectus quando homines sic satis sani, uti apparet, repente concidunt, convelluntur, spumam ex ore rejiciunt, iterum restituntur, & munia solita obeunt: post aliquod tempus iterum iisdem infestantur symptomatibus, eodem modo liberantur, nec à diris hisce periodicis contractionibus cum sensuum omnium abolitione, toto vitæ tempore, omnino liberantur: alius quando in febribus acutis,

ma-



malignis &c. incidunt in Epilepsiam, quæ aliquoties repetens, curato morbo, ita evanescit, ut postmodum horum insultuum nulla remaneant vestigia. Rectissime nostro idiomate hos affectus distinguimus, priorem nempe dicimus *de vallende siekte*, posteriorem autem *stuppen*. Appellationes hæ genuinæ Latinæ & Græca lingua optimè exprimuntur, si priorem dicamus Morbum caducum, quandoquidem stantes & obambulantes cadunt, alterum Epilepsiam ἀπὸ τῆ ἐπιλαμβάνεσθαι, quod significat manus injicere, hominem manu prehendere, involare. Æschin. ἀπάξειν εἰς δέσμοτῆριον ἐπιλαβόμενον τριχῶν, in capillos involans. Quamvis autem Morbus caducus etiam subito prehendat, non est tamen in morbis ἐπιγεγόμενον σύμπτωμα. Epilepsiâ, convulsionibus antea minime obnoxii, tanquam morbi symptomate, corripuntur ægri. Ejusdem generis sunt Epilepsiæ pedissequæ Dolorum, Purgationum, Hæmorrhagiæ &c. quandoquidem itidem hos morbos tanquam symptomata excipiunt, postmodum etiam, superato morbo, non redeunt.

Hæmorrhagiam facio causam duplicis Epilepsiæ, alterius quidem gravioris, & juxta *Hippocratem* periculosæ, alterius autem levioris, quæ etiam caret periculo, uti illud in V. S. largiori manifestum est. Potuissim similia in aliis etiam speciebus observasse, quod tamen, ne confusio excitetur, neglexi: in unâ monuisse sufficiat.

Hæmorrhagia.

Non est mea mens de omnibus hisce fusè agere, uti nec de Epilepsiâ puerorum, quandoquidem, si præcipuæ species explicatæ sint, reliquæ non difficulter intelligantur: Epilepsia puerorum ad affectus eorundem pertinet. Non agam quoque de convulsionibus particularibus, quandoquidem si generalia hæc exactè intelligantur, & ea, quæ auctores tradiderunt inspiciantur, unusquisque se facile extricabit. De sternutatione & singultu suo loco disputandum.

Scopus Auctoris.

Convulsionem particulares omnes vulgari modo enumeravi, quamvis non ignorem eas non unius esse generis, nec omnes propriè convulsionem dicendas. Non est in omnibus vehemens & morbosâ contractio; sed videtur talis ob muscoli antagonistæ relaxationem. Nempe ex iis quæ superius disputa-

Convulsionem particularem.



vi patet, spirituum influxum in statu naturali tensionem fibrillarum muscularium continuo producere, hinc in musculis debet adesse dispositio ad contractionem. Quod si experientiam consulamus ea revera adest, uti illud in fracturis ossium manifestum est: hinc repositionem ordinariè præcedit extensio. Itaque, si musculus antagonista resolvatur, sequitur sponte contractio alterius non læsi. Tales affectus, strictè loquendo, potius ad Paralyfin sunt ablegandi. Verum tantum sese scribendi aperit campus, ut hisce immorari non libeat, monuisse sufficiet.

Hercules  
Saxonia.

Quemadmodum autem contraria juxta se posita magis elucescunt, ita ad illustrationem eorum, quæ in præcedentibus dicta sunt, nonnihil faciet, si ea quæ ab aliis tradita sunt, paucis examinemus. Est mihi ante oculos, dum hæc scribo, *Hercules Saxonia*, Professor olim practices primarius & ordinarius: Is in *Pantheo Medicinæ selecto* l. i. c. 13. agit de Spasmo seu convulsione: quem ita describit. *Convulsio est symptoma motus voluntarii solius depravati, & impediti ob nervosæ substantiæ contractionem.*

An Spasmus  
sit sympto-  
ma motum  
voluntarii.

Dicit esse symptoma motus voluntarii. Ego putem symptoma esse effectum morbi corpori inconvenientem: itaque improprie admodum dicitur symptoma motus voluntarii, quum motui voluntario non accidat aliquis effectus, sed motus voluntarius ipse læsus sit. Motus voluntarius ritè procedens est sanitatis effectus, convulsivus est morbi symptoma, itaque, quemadmodum motus voluntarius, tanquam effectus, sequitur dispositionem debitam partium, ita convulsio sequitur pravam dispositionem, illiusque est symptoma. Aliud est, quando ad distinctionem accuratiorem enumerantur symptomata imaginationis, memoriæ, sensuum internorum, motus voluntarii &c. aliud hisce terminis in descriptione uti. Sed hæc transeant; possunt enim videri subtiliora.

Majoris est momenti, quod addit *SOLIUS* motus voluntarii, id enim dicit factum esse ad differentiam Epilepsiæ: quam dicit esse convulsionem cum læsione principum facultatum, cum in convulsione hic descriptâ principes facultates non lædantur. Hinc jam apparet quam confusè debuerit tra-

ctari



etari integra hæc convulsionis materia. Nempe si duo sint statuenda summa genera omnium convulsionum, ad alterutram horum omnes omnino convulsiones debebunt reduci, & distinctionis *κρίσις* erit, quod sensus interni lædantur, vel non lædantur. Vide autem quæ hinc sequantur absurditates: Epilepsia symptomatrica & morbus caducus sub uno titulo debebunt tractari, tanquam symptoma ejusdem generis, cum tamen hæc longis parafangis à se mutuo distent. Epilepsia febrilis & hysterica erunt ejusdem generis affectiones, quandoquidem ambæ adjunctam habent læsionem facultatum principum. Epilepsia pedissequæ dolorum, evacuationis sanguinis nimia, repletionis, purgationum erunt omnes ejusdem generis, quandoquidem tantum duæ statuuntur, cum tamen hæc non tantum ab aliis speciebus, sed inter sese longissimè distent. Epilepsia infantum & adultorum, quæ dentitionem sequitur, & quæ cum dentitione nullum habet nexum, convenient. Epilepsia hysterica aliquando ad Epilepsiam, aliquando ad Convulsionem erit referenda, cum in ea aliquando mens aliquomodo constet, aliquando sensus omnes sint aboliti. Quid? quod prior species tum cum motibus convulsivis esset confundenda? Quid? quod ipse *Saxonia* motus convulsivos capite de Epilepsia tractet? Tantæ est utilitatis morbos & symptomata à se invicem accuratè dispescere. Qui bene distinguit, benè docet.

Postmodum causam redditurus, quare motum dixerit non tantum depravatum, sed & impeditum, recurrit ad Convulsionem fientem & factam, agit de nervorum substantiâ contracta & extensa: nervosam substantiam explicaturus intelligit nervum, musculum, tendonem, & ligamentum. Denique Catalepsin ad Convulsionem absurdissimè refert. Quæ si singula discutere vellem, & mihi ipsi, & forsan aliis essem molestus. Recitasse est refutasse.

Non ago etiam de descriptionibus & distributionibus neotericorum fictitiis, persuasus de iis satius esse tacere, quam pauca dicere, qui tabulam, in superioribus propositam, & ea, quæ hic explicata inveniet, ante oculos habuerit, is, sese non ita difficulter expediet, nisi me fallit animus, ex iis, quæ



quæ antea potuerant videri difficilia. Monuisse tamen non est inutile, distributionem morborum convulsivorum in eos, qui propter originem nervosam præcipuè affectam oriuntur, vel quorum causa circa nervorum extremitates, aut intra plexus nerveos subsistit, imaginariam esse & falsissimam.

Convulsio-  
nes minus  
frequentes.

Hisce in genere prælibatis accedendum jam est ad Convulsiones minus frequentes, Emprostotonum, Opistotonum, Tetanum. Dixi hos affectus minus frequentes, quamvis Auctores in descriptione Convulsionum horum soleant facere mentionem. Crediderim tamen idem hic habuisse locum, quod in Catalepsi, pauci viderunt hunc affectum, unus ex alio descripsit, ita ut non malè ab *Heurnio* sit pronunciatum suo tempore: qui unum legit practicum, omnes legit. *Hercules Saxonia* refert se multa habere exempla Emprostotoni, verum unicum tantum affert his verbis: *In cœnobio divi Petri est virgo Monialis, quæ eo laborat jam annos septendecim.* Ego autem dico; quomodo species morbi acuti, apud *Hippocratem* paucis diebus ægrotos enecantis, potuit affligere per septendecim annos? Fuit proculdubio hic alius affectus, quemadmodum ego aliquando vidi rigiditatem Scorbuticam plures annos anum infestantem, adeo gravem, ut sese anus ne minimum quidem inflectere potuerit, omnia ipsi exhiberi debuerint, tanquam infanti recenter nato. Non sequar ego antecessentium gregem, liberè profiteor, horum convulsionum exempla mihi in praxi occurrisse paucissima. Mirabuntur fortè quidam meum candorem; ego tantum veritati statuo pretium, ut credam hanc diligentissimè esse investigandam, præcipuè si ea proximo possit esse utilis. Non sum confisus, hoc in casu, meâ experientia, potest enim quis in plures hoc morbo affectos, alius, in alios incidere. Datâ occasione plures medicos in longâ & uberrima praxi versatissimos, consului, interrogavi, num ipsis Emprostotoni, Opistotoni, Tetani varia occurrissent exempla? Alius negavit se hunc affectum vidisse: alius se unum aut alterum tractasse; cum autem diligentius expiscarer, quæ in hisce casibus observassent, referebant diu esse ex quo illa accidissent, atque adeo memoriâ excidisse circumstantias. Hinc itaque concludendum sum



arbitratus, non mihi esse vitio vertendum, si hac in parte sufficienti destituerer experiëntiâ, cum idem aliis accidisset. Judicavi itaque, affectus modo nominatos in hisce regionibus esse minus frequentes. An olim in Græcia & regionibus calidioribus fuerint magis familiares, ambiguum videri possit. Saltem illud non malè mihi videor concludere, vel hosce affectus fuisse magis consuetos, vel vocabula in latiori sumpta esse sensu, vel ex uno aut altero experimento generaliter de omnibus fuisse pronunciatum.

*Hippocrates* l. iiii. f. 13. & 14. de Tetano & Opistotono agit, verum descriptio constat brevioribus enunciationibus, adeo ut meritò habeatur obscurior, quæ forte est ratio quare ea, quæ Neoterici tradiderint, non sint usquequaque expedita.

Hippocratis  
obscuritas.

Hisce in genere prælibatis, referam, quæ in praxi viderim ego. Vidi ego duo exempla tetani, ambo in infantibus paucorum mensium. Omnia membra, totum corpus rigeat, imo aliquomodo livebat: rigiditas hæc, quæ matribus impedimento erat, cum membra flectere non possent, coegit eas meam implorare opem. Fuerunt ambo, quantum memini, curati, exhibendo mixturam aliquam cephalicam, & inunctione spinæ dorsi. Opistotoni exemplum non memini me vidisse, nisi semel in virgine hysterica, quæ convulsionibus vexata versus posteriora identidem convellebatur. Non judico tamen hanc speciem à reliquis hystericis affectionibus esse distinguendam, quandoquidem exigua symptomatum varietas sæpe ab *ἰδιοσυγκρασίᾳ* dependet; nec mutat speciem. Audivi etiam querelas ingentes de cervicis dolore, in læsione tendinis musculorum gastrocnemiorum. Fortè fuit hic gradus quidam ad Opistotonum. Emprostotoni exempla rarius occurrere ex eo liceat concludere, quod hujus exigua ab *Hippocrate* fiat mentio. Emprostotoni exemplum nullum me vidisse memini, nisi illud Emprostotonum placeat appellare, quando ægroti periculose decumbentes, & morti vicini, continuo sese versus anteriora incurvant, adeo ut adstantibus molestum sit, illos continuo elevare, & caput pulvinaribus imponere. Simulac enim hoc peractum est, iterum sese incurvant & delabuntur. Est hoc malum, quantum ego quidem

Tetani duo  
exempla.



dem observavi, plerumque *ῥαδάσιμον*; verum non est dicenda Convulsio aut Emprostotonos, cum absque membrorum contractione violentâ aut rigiditate, sed potius flacciditate accidat. Fortè illud contingit, quod hic situs aliquod levamen videatur afferre anxietatibus circa præcordia, quemadmodum videmus non rarò homines flatibus, ventriculum distendentibus, vexatos, manibus ventriculum comprimere, & pronum reliquis præferre situm. Fortè etiam molestum est ægris hisce capite erecto decumbere, quamvis hac de re non conquerantur, quandoquidem mens obnubilata est.

Convulsiones exemplum singulare.

Et quoniam hic de convulsionibus ago, libet exemplum Convulsionis stupendæ narrare, quod mihi aliquando videre contigit. Vidi ego virginem miro convulsionis genere correptam, in quo sese ne per momentum quidem quietam continere potuit, sedens in lecto & mentis omnino compos. Torquebat sese mirè ægrota, & membra cum capite in gyrum veluti contorquebat. Si quando cerevisiam peteret bibitura, necesse erat poculum ori prudenter admove, & ipsius motui circulari obsequi, poculum elevando circumducere, donec sitis esset sedata. Cum autem bibisset testabatur liquorem non recta descendere, sed in circulum circumagi, & veluti per gradus, trochleæ in modum constructas, descendere, usque dum in ventriculum delaberetur. Est omnino verisimile non tantum artus, sed & oesophagum convulsionibus fuisse infestatum. Feliciter tamen, quantum memini, evasit. Est hoc exemplum, in cuius explicatione ingenia curiosorum sese exercere possunt. Convulsionum admirandarum exempla non pauca *Schenkins* refert, de Spasmo obs. 12, 13. &c.

Causa Tetani.

Causas Tetani, quas ego vidi, judico fuisse dispositionem scorbuticam, ex eo fortè ortam, quod lintea, quibus involvi solent infantes, non satis benè fuerint exsiccata, aut calefacta. Non parum confirmat meam sententiam, quod ambæ matres, quarum ego infantes tractavi, fuerint in re minus lautâ. Si quando plura exempla tetani mihi offerantur, causas ulterius investigandi mihi dabitur occasio.

Opisthotoni.

Opisthotonum præcipuè oriri è læsione tendinum, vel nervorum, aut febre, aut dolore, inflammationem, consequente,

ex



ex eo conjecturam capio, non tantum, quod ipsemet in læsione tendinum tales audiverim querelas, sed & quod *Hippocrates* magnæ navis gubernatori, cujus digitum medium & os dextræ manus confregerat anchora, succedente febre & dolore, prædixerit, ipsum futurum opistotonum. Prædictionem excepit eventus & mors infausta. Ego memini, in discissione tendinis illius magni muscutorum gastrocnemiorum, uti superius quoque innui, me intellexisse gravissimas querelas de rigiditate cervicis, hæc fortè fuit principium Opistotoni. *Parvus* etiam de hisce Spasmi speciebus inter symptomata vulnerum agit. Lib. VIII. c. 9. *Schenkius* refert Opistotoni exemplum è clavo pedis digito infixio, de Spasmo obs. 15.

De Emprostotono nihil addo, nisi tantum, illum, expensis accurate symptomatibus & circumstantiis, facile explicatum iri, dummodo quis convulsionis naturam intelligat, & ea quæ dicta sunt, & in progressu adhuc explicabuntur, expendere dignetur.

Emprostotoni.

Differentiæ Spasmi in superioribus propositæ sunt. Signa generalia è descriptione satis sunt manifesta, singularum specierum singula suo loco explicabuntur.

Differentiæ.

Prognosis in genere vix institui potest, ob multiplices convulsionum differentias: itaque graviores species sunt habendæ malæ, leviores periculo vacant. Tetanus *Hippocrati* in quatuor diebus interficere dicitur. Aph. 6. f. v. Alio loco ad quatuordecim dies extenditur temporis spatium, in quo perit æger. L. III. de morbis. XIII. §. 11. Opistotono correpti tribus diebus interire dicuntur. ibid. XIV. §. 12.

Prognosis.

Indicationes, sunt repletionem aut inanitionem tollere, spiritus excitare, nec non irritationem, viam ad utramque sternentem, mitigare.

Indicationes.

Non est quod curæ generali multum immoremur. Repletio quibus tollatur manifestum est. V. S. Purgationibus, Diaphoreticis, inediâ, exercitio, &c.

Cura repletionis.

Inanitio tollitur Virium refocillatione, medicamentis cardiacis, cephalicis, victu conveniente.

Inanitionis.

Spiritus excitantur Salibus volatilibus, imprimis *Spir. Sal. Armon.* Irritatio respicit ejus causas, de quibus in sequentibus.

Irritationis.

Hippocratica curatio.



*Hippocrates* jubet in Tetano exhibere piper devorandum, id potest facere ad spiritus excitandos. Exhibet etiam *Helleborum nigrum*, ad repletionem tollendam utilem. Jusculum è volucris pingue, calidum, ad inanitionem tollendam, vel purgationem promovendam, utile. Præcipit etiam sternutationem esse movendam, id quod non parum facit ad spirituum excitationem. Fomenta optimè videntur convenire, quando è causa superius explicata oritur Tetanus. Huc etiam facit provocatio sudoris, quò fortè respexit *Hippocrates*, quando jubet calefactoria humida & pingua in vesicis & utriculis apponi, maximè autem ad partes dolentes.

De medica-  
mentis An-  
tispasmodi-  
cis dictis.

Ea, quæ hætenus disputata sunt, videntur aliquomodo labe-  
factari ex eo, quod apud Auctores recentiores mentio fiat  
medicamentorum *Antispasmodicorum*. Hinc facile nasci posset  
cogitatio, hæc exinde appellatione tali fuisse donata, quod  
particulas spasmodicas, quarum etiam meminit *Willisius*, cor-  
rigere & expugnare apta essent nata: adeoque non sufficere in  
tractatu de Convulsionibus in genere, meminisci Repletionis &  
Inanitionis, sed & particularum spasmodicarum, ac inde ortæ  
explosionis præternaturalis, debere fieri mentionem. Tales  
cogitationes videntur speciosæ, nec destitui fundamento, re-  
tamen penitus perspectâ, sunt parvi momenti. Itaque nego-  
tium hoc penitus examinandum est. Medicamentorum  
*Antispasmodicorum*, primus *Willisius*, quod sciam, vel saltem  
primi meminerunt recentiores. Terminus hic, medicamenta  
*Antispasmodica* est notio secunda, non quid illa medicamenta  
propriè sint, aut qua polleant efficaciâ, in genere considerata,  
sed quam relationem habeant ad convulsiones, significans. Non  
est planè rejiciendus hic modus loquendi, dummodo accura-  
tè teneamus, illum tantum inservire compendio loquendi, &  
conceptui relativo formando. Non est planè rejiciendus, sed  
animadvertendum, illum nequaquam inservire exprimen-  
dis facultatibus illorum absolutis, sed prout tantum eorum usus  
in Convulsionibus tractandis aliquis esse potest. Diligentius  
autem eorum operatione perspectâ, apparebit, antispasmodi-  
ca posse commodè referri ad quatuor hæc classes. Sunt vel  
spirituosa, vel salia, tum volatilia, tum alkalia, vel diaphore-  
tica,



tica, vel diuretica. Omnia autem hæc imprimis apta nata sunt ad Spasmodum expugnandum, prout ille à me descriptus est. Omnia hæc vel spiritus excitant, vel depressionem cerebri emendant, vel sanguinem fluidum reddunt, vel diaphoresin promovent, vel urinam provocant, adeoque & repletioni & inanitioni sunt contraria. Repletioni contraria sunt spirituosæ, prudenter usurpata, quandoquidem & spiritus excitant animales, & sanguinem fluidiorem reddunt, & depressioni cerebri resistunt, & cerebri flacciditatem emendant. Repletioni contraria sunt eadem spirituosæ, quoniam sudorem & urinam provocando, nimiam repletionem imminuunt. Spirituosæ illa eadem contraria sunt inanitioni, quandoquidem spiritus excitando, deliquio spirituum obviam eunt: quandoquidem juncta jusculis instaurantibus, viscera ad sanguinem novum & laudabilem generandum, disponunt. Salia volatilia itidem spiritus excitant, sanguinem viscidiorum attenuant, adeoque illum ad promptius subeundum, & pertranseundum vasorum minimas ramificationes aptum reddunt. Eadem illa salia, ut & alkalia fixa, sudorem & urinam movent, adeoque depressioni cerebri, à sanguine minus mobili ortæ, resistunt. Quid? quod evacuatio per sudorem & urinam, copiam etiam humorum, adeoque repletionem tollat? Quid? quod eadem salia, sanguinem incidendo & attenuando, eundem aptiorem reddant novis spiritibus animalibus generandis, qui præcipuè in inanitione desiderantur? Sudoris promotio non tantum feri viscidioris, sed & inflammatoriæ dispositionis remedium est, unde spasmi symptomatici, scorbutici, hysterici, hypochondriaci, ut & febriles ortum sæpe habent. Easdem virtutes obtinent diuretica, quæ in mensium obstructione, à qua sæpe spasmi vel oriuntur, vel graviores redduntur, & ad earum promotionem, & ad depletionem corporis universalis, summi sunt usus. Itaque tantum abest, ut hæc medicamenta Antispasmodica dicta evertant, ut potius omnino confirment meam sententiam, quandoquidem vel deplent corpus in universum spectatum, vel præcavent, ne humorum minor fluiditas repletionem particularem cerebri producat.

Non recensebo hic catalogum medicamentorum Antispasmo-



dicorum, titulus est admodum vagus & universalis. Videri possunt auctores, qui de hac materia scripserunt, imprimis *Willisus*, *Untzerus*, *Quercetanus* &c. Sufficiet observasse, illa non esse promiscuè in omnibus speciebus in usum vocanda. Quædam magis respiciunt morbum caducum, quædam Epilepsias symptomaticas febriles, quædam Epilepsias pedisse-quas hæmorrhagiæ, purgationum, quædam Epilepsias Hystericas, Hypochondriacas & Scorbuticas. In tantum distant à se mutuo Convulsiones, ut *Opium* & *Opiata medicamenta* in quibusdam casibus omnino sint omittenda, in quibusdam primas absolvant.

## CAPUT DUODECIMUM.

*De Affectu malè Tetano existimato : Lumbagine dicendo.*

Definitionis  
nominum  
utilitas.

**H**ÆC est insignis Geometriæ prærogativa, quod demonstrationibus suis soliti sint præmittere definitiones, ne nominum & vocabulorum ambiguitate quis deceptus in errores incidat. Non eadem est Medicinæ felicitas: medici vocabulis, è vulgari sermone desumptis, absque sufficienti determinatione utentes, non rarò lectorem reddunt suspensum, & de auctoris mente incertum. Apparet illud in Botanices scriptoribus non tantum; sed & *Hippocratis* interpretibus. Idem etiamnum contingere patet ex affectu, de quo nunc disputamus. Nempe cum aliquando contingat homines è lumbis laborare, adeo ut sese inflectere non possint sine summo dolore, hunc affectum quidam putant esse Tetanum. Hujus rei ratio non est admodum obscura. Tetani mentio fit apud antiquos scriptores: tetanus rarò occurrit: in tetano dorsum riget: in tetano crura contrahere non possunt ægri. In hoc affectu inflectio corporis non sine ingenti difficultate peragitur. Videntur ergo hæc duo symptomata sic satis convenire. Alii Tetanum existimarunt spasmus flatulentum ordinariè dictum, de hac spasmii specie in sequentibus erit dicendi locus.

Ut



Ut autem de hoc affectu commodius agam, imponendum est nomen verum. Dicitur linguâ nostrâ vernaculâ, *het spit in de lendenen*, Latinâ, *Lumbago*. Patet hoc non tantum è *Festo*, sed & *Philoxeni Glossario*, si unius literæ immutatione loco *Lumbaga*, legamus *Lumbago*. Græca magis corrupta sunt, legendum enim est *ισχίς νόσημα*, cum jam perperam scriptum sit *ισχίς νόσηματα*. Non est tamen *Ischii* morbus, sed *lumborum*, uti postmodum videbimus: verum hoc condonandum est *Lexiographo antiquo*, in *Medicina* forsan non multum exercitato.

Lumbago.

Est *Lumbago* *levis contorsio vertebrarum lumborum*, cum rigiditate & flexionis insigni dolore.

Ejus descriptio.

Non esse hunc affectum *Tetanus* patet, quia nulla adest musculorum contractio p. n. in qua convulsionis natura consistit. Ubi æger decumbit quietè, situ commodo, nullus adest dolor: dolor exacerbat, quando corpus inflectitur; flexio autem hæc manifesta, contractioni violentæ spasmodicæ contraria est: flexio pro libitu, quamvis cum difficultate, evincit hunc affectum non esse *Tetanus*.

Non est Tetanus.

Locum affectum esse vertebrae lumborum patet è dolore qui ibi percipitur: dolor ille sese exerit, quando æger corpus flectit, præcipuè quando pronus decumbit, & aliquis blandâ manus impositione contorsionem illam emendare conatur.

Locus affectus.

Dixi hunc affectus esse contorsionem, ut eum à luxatione & subluxatione distinguerem, quandoquidem hæc graviora sequuntur symptomata, quandoquidem hæc magis indigent manuali operâ. Si quis tamen subluxationis vocabulo in latissimâ significatione uti velit, ut & hanc contorsionem suo ambitu complectatur, per me licet. Contorsio illa facit, ut ad motum corporis quemcunque, statim in lumbis sequatur dolor, quia scilicet corpus moveri non potest, quin simul vertebrae moveantur. Quemadmodum si inter manducandum vel minima membranula, vel fibrilla inter dentium commissuras fortius adigatur, atque ibi hæreat, statim solemus incommoditatem illam persentire, licet dentes è suis alveolis non dimoveantur, ita non est mirum, si vertebrae lumborum aliquomodo contortas sequatur dolor, ubi vertebrae illæ commoventur.

Est contorsio.

Cau-



Causa.

Causa est subita, cum aliqua animi intensione, corporis inflexio, ponderis gravioris elevatio, vel superioris corporis partis circumductio; tum enim statim percipitur dolor, & flexionis difficultas, ita quidem, ut in primo insultu respiratio ipsa aliquomodo intercipiatur. Ubi autem ad difficiliorem spirituum influxum accedit refrigeratio, tum postea dolor intenditur.

Differentiæ.

Differentia statui potest, quod alia sit gravior, alia levior. Deinde quod alia sola invadat, alia symptomatibus sit comitata.

Signa.

Signa non essent admodum necessaria, nisi aliquando contingeret ægrotos negare, se vel circumflectione, vel incurvatione, vel ponderis elevatione esse læsos, id quod mihi non semel contigit, in quo casu oportet digitum loco affecto imponere, & explorare, num revera sit lumbago nec ne? Oportet interrogare an stupor pedis accedat? Oportet signa doloris nephritici habere perspecta, ne quis fallatur.

Prognosis.

Affectus hic omnino caret periculo, si tamen in principio negligatur, si quis admodum refrigeretur, potest satis esse molestus.

Indicationes

Indicationes sunt contorsionem illam quam primum restituere, nervos roborare, & symptomatibus occurrere.

Cura.

Curatio perficitur extensione & restitutione, id quod facile perfici potest, si æger è manibus pendeat, & quispiam peritè admoveat dextram. Utile quoque est si manus, digitus, vel pollex loco affecto imponatur comprimendo, & crus celeriter ac cum impetu incurvetur. Vidi ego Chirurgum illud scitè & celeriter peragentem. Multum etiam juvat, si quis pronus in lecto cubet, manibus faciei admotis, & ita sese elevare annitatur. Dolent quidem lumbi, & locus affectus, postmodum tamen juvamen percipitur. Utile quoque est, si lumbi arctè constringantur.

Nervorum  
roboratione

Nervi roborantur, si pars affecta linimentis calefacientibus inungatur: ex. gr.

℞. Unguent. Martiat.

Ol. Laurin.

Lumbricor. aa ʒij.

M.

Sym-



Symptomata præcipua sunt dolor & febris. Dolor deliniri potest utilissime, exhibendo medicamentum aliquod hypnoticum & sudoriferum. ex. gr.

Doloris mitigatione & sudoriferis.

R. *Athanasia nostr.* ʒß. vel ʒij.

*Cremor. diaphoret.* ʒß.

M.

sumat cum cerevisia, vel vino tepido, sub horam somni.

Febris quomodo curetur non est hic dicendi locus: sufficiat observasse V. S. in plethoricis, & medicamenta sudorifera temperata hic multum præstare.

Cura febris.

## CAPUT DECIMUM TERTIUM.

*De Morbo caduco, Epilepsiâ vulgò dicto.*

**M**Emini me in *Platone* legisse, *Socratem* crus contrahentem & perfricantem, observasse, dolorem & voluptatem, quamvis videantur duo contraria, tamen sibi mutuo ordinariè succedere, & quasi in una summitate esse copulata. Ὁ δὲ Σωκράτης, ἀνακαθίζόμενος εἰς τὴν κλίνην, συνέκαμψε τὸ σκέλος, καὶ ἔτριψε τῇ χειρὶ καὶ τρίβων ἅμα, ὡς ἄτοπον (ἔφη) ὧς ἄνδρες εἰσὶν οἱ καλῶσι οἱ ἄνθρωποι ἡδύ· ὡς θαυμασίως πέφυκε πρὸς τὸ δοκῆν ἐναντίον εἶναι τὸ λυπηρόν. τῷ ἅμα μὲν αὐτῷ μὴ θέλειν παραγίνεσθαι τῷ ἀνθρώπῳ· ἐὰν δὲ τις διώκῃ τὸ ἕτερον καὶ λαμβάνῃ. σχεδὸν τι ἀναγκάζεσθαι αἰεὶ λαμβάνειν καὶ τὸ ἕτερον, ὥσπερ ἐκ μιᾶς κορυφῆς ἡμμένῳ δύο ὄντες. *Plato* in *Phædone*, statim in initio. Ita mihi liceat affirmare motum voluntarium & convulsivum, quamvis videantur multum inter sese distare, tamen respectu causarum ab iisdem spiritibus animalibus, ab eodem dependere sanguine. Illud ex eo facile colligitur, quod symptomata hæc sint transeuntia, non permanentia, aliquando sanos & semel tantum invadentia, à causâ solummodo externa. Deinde ii, qui ex intervallo morbo caduco sunt obnoxii, concidunt subito, os torquent, convelluntur, mox iterum resurgunt, ratiocinantur, ad munia ordinaria revertuntur. Adeo ut adstantes & spectatores quidem multum commoveantur è tali miserabili insultu, mirentur effectus stupendos, cum

Socratis de dolore & voluptate iudicium.

Zz

tamen



tamen ante & post paroxysmum exiguum in motu humorum observetur discrimen. Hinc concludere licet, absque spirituum & humorum ingenti *δυσκρασία* Convulsiones posse produci. Hæc ideo animadvertenda fuerunt, ne ad effectus hosce stupendos producendos concurrere credamus ea, quæ in rerum naturâ non dantur, miras & à veritate longissimè remotas succi nervei intemperies, sanguinis insignem immutationem, effervescentiam horum amborum, explosiones & similia, quibus immorari non libet.

Auctoris institutum.

Quandoquidem autem ego id mihi negotii solum credidi esse datum, ut absque suppositionibus falsis, è sola partium structurâ, nec non sanguinis ac spirituum motu omnes explicarem morbos, omnia symptomata, videamus, an in morbo hoc stupendo idem præstare valeamus?

Non est mihi propositum de variis, quibus hic morbus gaudet appellationibus, ac earum causis hic agere, factum est illud non semel à practicis, videri potest *Philothens Elianus Montalto* in Archipathologia, *Sennertus* & alii.

Nominis ratio.

Quando huic capiti titulum facio de Morbo caduco, Epilepsiâ vulgo dicto, non ea mihi est mens, Morbum caducum non posse dici rectè Epilepsiam, sed quod clarioris distinctionis gratia Morbus caducus, nostro idiomate *Dallende siekte* dictus, debeat distingui à reliquis Epilepsiæ symptomaticæ speciebus, quæ ab hoc toto cœlo distant: cujus rei causas in superioribus explicavi. *Cartesium* hac in re imitor, qui cum Animæ vocem admodum ambiguum esse animadvertisset, Mentis vocabulo, ad animam humanam significandam, uti maluit.

Descriptio Morbi caduci.

Ut ordine procedamus, à descriptione Morbi caduci faciendum est exordium. Morbus caducus est *Convulsio universalis & repentina, per intervalla repetens, cum sensuum internorum abolitione, è repletione potissimum ortum ducens.*

Ejus explicatio.

Dico morbum caducum esse convulsionem, quandoquidem, ut in superioribus vidimus, omnes omnino Epilepsiæ ad Spasmodum in genere reducuntur. Addidi autem eam universalem esse, ut à spasmodis particularibus distinguerem. Omnia membra, omnes partes convelluntur, os contrahitur, faciei muscoli convelluntur: caput in terram aliquando ita impingunt,



gunt miseri, ut vulnerati discedant, manus, pedes, corporis truncum mirè contrahunt: clamant aliquando & vocem inconditam edunt. Stercus, urina, semen non semel involuntarie excernitur.

Quando addidi morbum caducum per intervalla repetere, illius memini proprietatis, qua potissimum ab aliis speciebus Epilepsiæ symptomatice distinguitur. Epilepsiæ febriles, hæmorrhagiam, purgationem vehementem, vulnera &c. excipientes, tum affligunt, ubi causæ illæ adsunt, sublatis iisdem non amplius repetunt. Adeo ut hæc specie non tantum Morbus caducus, sed & Epilepsia periodica rectè dici possit. Ideo Morbus caducus miserandum est symptoma, quandoquidem hoc correpti numquam sunt tuti, variis exponuntur periculis, ab igne, aqua, casu sibi non cavent, præcipuè quando absque ulla προφάσει adoritur. Est tamen non infrequens Epilepsiam hysterica etiam per intervalla repetere: verum in hac specie ordinariè vel præcesserunt, vel comitantur symptomata hysterica: vel commotio animi, odor gratus *Moschi*, *Sibethi*, aut simile quid ansam dedit novo paroxysmo. Aliquando etiam tanta est affinitas inter Morbum caducum, & Epilepsiam hysterica, ut ægre distinguantur.

Morbus caducus per intervalla repetit.

Adest in morbo caduco omnium sensuum internorum abolitio, quod in Epilepsiâ hysterica non semper locum habet. Memini me adfuisse matronæ, hisce convulsionibus fatis vehementibus correptæ, quam nos credebamus sensuum internorum omnimoda obnubilatione correptam, quæ tamen à paroxysmo liberata, referebat sese omnia, quæ gesta & dicta essent intellexisse, non potuisse tamen perceptionis signa edere. Convulsiones particulares, motus convulsivi, subsultus in somnis, spasmi flatulenti dicti, ab hoc affectu, mentis alienatione distinguuntur. Non videbatur necesse addere, sensus externos etiam aboleri, quandoquidem horum abolitio necessario nexu cum internorum abolitione cohæret. Ubi sensus interni sunt aboliti, sensuum externorum officium cessat. Licet hi non credantur munere suo fungi, dummodo sensus interni vigeant, manifestum postea fit, ægrotas actorum esse conscias,

Sensus internos abolet.



uti ex allato exemplo patet. Qua ratione homo sensuum internorum exercitio privetur, ex iis, quæ de somno præternaturali disputavi, aliquomodo perspicuum evadit, verum hic breviter dico : homo in morbo caduco sensibus internis privatur, quandoquidem impulsus externi ad organa sensuum externorum quidem, non autem ad sensorium commune, pertingunt. Verum difficile admodum est determinatu, quodnam sit sensorium commune? Sensorium hoc commune non tantum exercuit, sed & plurimum torfit hominum acutissimorum ingenia. Quandoquidem autem ego in superioribus promisi, me, hoc capite, hanc materiam pertractaturum, age, periculum faciamus, an negotium hoc arduum explicare, an nodum hunc Gordium solvere nobis liceat? In tractatione hujus quæstionis eâ utar Methodo, ut primo negativè examinem, quid non sit Sensorium commune, deinde affirmativè exponam quid sit revera Sensorium illud? Circumducendus mihi est lector, ut tanto facilius in meam, quam unicè veram credo, sententiam pertrahatur.

Glandula  
pinealis non  
est senso-  
rium com-  
mune.

Dico igitur, glandula pinealis non est sensorium commune. Præterquam enim quod glandula hæc variis incommodis exponatur, illæsis mentis functionibus, situs ejus non est satis commodus, ut hoc munere defungi possit. Vidit *Regnerus de Graef* in glandula pineali arenulas asperas, quarum aliquæ calculi nomen ob magnitudinem merebantur, illæsis mentis functionibus. Vide *Boneti* Sepulchretum l. i. f. i. obs. 88. Glandula pinealis à *Johanne van Horne* nulla inventa. ibid. sect. xvj. obs. 8. *Kerkringius* itidem observavit, naturam glandulæ pinealis ne vestigium quidem elaborasse in Juvene xiv. annorum. *Bonet.* ibid. sect. x. obs. 5. Nec obstat quod hic fuerit mentis hebetioris, sensuum internorum exercitium non fuit planè sublatum, deinde & lapis in cerebro repertus, substantia ejus flaccida, aqua falsissima in ventriculis reperta &c. non parum fecerunt, ad ingenii acumen obtundendum. Situs glandulæ pinealis est in ventriculis cerebri, quos opinionis hujus auctor malè supposuit spirituum animalium scaturigines & promptuaria, cum potius excrementa serosa in iis sæpissimè accumularentur. Res est adeo manifesta, ut probatione non indigeat, vide



vide passim *Boneti* Sepulchretum. Rectius *Willisus* docuit, hosce veluti in inane spatium definere : qui videri potest. Quid? quod nulla sit communicatio, nullus nexus extremitatus nervorum cum glandula pineali? Itaque hæc opinio rectissime à *Thomâ Bartholino* repudiatur Anat. Reform. l. III. c. 6. Potest ad illustrationem & hoc addi. Si requiratur tam exquisita oculi structura ad radios luminis recipiendos, refringendos, & transmittendos si tantus humorum diversorum numerus, tanta tunicarum requiratur varietas ad organi visus constitutionem : si aurium tam varia & admiranda necessaria sit conformatio : quanta & qualis debebit esse structura illius partis solidæ, quæ ab hisce diversis objectis, pro singulorum naturâ diversimodè afficietur? Debebit esse oculorum oculus, aurium auris, linguæ lingua, omnium sensuum externorum veluti compendium : adeoque artificiosissimè & è diversissimis partibus contexta, quod cum in glandula pineali non reperiatur, hinc nascitur opinio, glandulam pinealem non esse sensorium commune. Quando ego affirmo, spiritus immediatè mentem afficere, uti è sequentibus patebit, non eadem remanent difficultates, quandoquidem fluida diversissimis motibus agitare, diversissimè partes afficere possunt. Aëris diversus motus visum, auditum, odoratum, caloris & frigoris sensum in nobis efficit : quid ni spirituum animalium diversissima agitatio, diversissimas in mente sensationes excitet?

Corpora striata *Willisi* non sunt sensorium commune. Præterquam enim quod nervorum omnium extremitates eò non pertingant, sensorium commune est substantia non duplex, sed una & simplex. Non agimus de sensoriis communibus, uti de sensibus externis, sed de sensorio communi, quod eo ipso supponimus non esse geminum. *Willisi* autem corpora striata sunt duæ distinctæ cerebri partes, atque adeo mens deberet simplices sensuum impressiones tanquam duplices recipere, adeoque semper in numero errare. Denique non videtur cum natura mentis quadrare, eam vel in uno (glandulam pinealem intelligo) loculamento, tanquam militem excubias agentem, collocare, vel eandem illam mentem simplicem

Nec corpora striata.



cem & cogitantem substantiam, extensionis expertem, tanquam *κειμήλιον* aliquod duabus arculis includere.

Nec cerebellum.

Sensorium commune non est cerebellum, aut partes cerebri posteriores, quandoquidem sensuum externorum organa ope spirituum animalium distinctissimas sensationes in mente nostra producant, quod non fieret, si cerebellum fungeretur sensorii communis munere. Præterquam enim quod nulli nervi à cerebello, nec omnes à protuberantiâ annulari oriantur, longo nimis intervallo varii nervi à cerebello distant, quam ut impressiones distinctas hinc in eodem excitari possint. Deinde nervi anteriores versus posteriora, posteriores versus anteriora, per varias ambages, motus spiritibus animalibus impressos versus cerebellum deberent deferre, unde confusio ingens ortum ductura videtur. Denique cum sensorium commune tale debeat statui, quod non tantum percipiat, sed & immediatè, pro voluntatis arbitrio, determinet spiritus animales versus hos vel illos musculos, sensorium commune tale debet statui, quod immediatè non tantum in spiritus, minori copiâ à cerebello productos, sed & in omnes omnino à totius cerebri compage secretos, imperium obtineat: quod cum cerebello tribui non possit, nec cerebellum rectè statuetur sensorium commune.

Ne quartus cerebri ventriculus.

Non potest quoque quartus cerebri ventriculus, ab *Herophilæ* calamo scriptorio comparatus, dici sensorium commune, quoniam non tantum omnium est minimus, sed & extra cerebri, cerebelli, & medullæ oblongatæ pomoeria constitutus. Quamvis enim hic dicatur nobilis, non est tamen vera nobilis, sed tum impositum est illud nomen, cum cerebrum laminatim dividendo eum postremo loco invenirent. Quid? quod hæc opinio supponat ventriculos cerebri spirituum animalium esse promos condos?

Non partes cerebri posteriores.

Nulla etiam posteriorum cerebri partium, in oppositione ad anteriores, potest statui Sensorium commune, quandoquidem si ad ea, quæ in nobis fiunt, diligenter attendamus, experimur in attentâ cogitatione anteriora cerebri quasi expandi, ibidem quasi lumen quoddam, mentem nostram illustrans, diffusum esse. Deinde in obfuscatione intellectus, somnolentiâ,



tiâ, & fomno naturali, in quo sensuum exercitia interrumpuntur, anteriores cerebri partes videntur manifestius affici. Est aliquis somnolentus? Visus obscuratur, palpebræ concidunt, oculi clauduntur, caput nutare incipit. Evigilat aliquis? Videntur anteriores partes cerebri quasi illustrari, unde impressiones ab objectis externis emanantes ad interiora vividè transferuntur; mens percipit, vigilantium munia obeuntur.

Non possunt etiam anteriores cerebri partes statui sensorium commune, quandoquidem omnes partes ejus (infundibulum & glandulam pituitariam negligo, corpus callosum, fornix, septum lucidum huic muneri sunt inepta, de glandula pineali egi) sunt geminæ, ipsa medulla oblongata gemina. Gemina fornicis crura, gemini thalami nervorum opticorum, adeoque eadem huc quadrant, quæ antea de corporibus striatis disputavi. Sensorium commune quærimus, non sensoria.

Nec anteriores.

*Galenus* τὸ πρῶτον αἰσθητικὸν μέρος dixit esse τὸν ἐγκέφαλον, illique tribuit siccitatem & calorem, manifesto argumento, ipsum minus distinctum formasse conceptum sensorii primi. Nam, ut alia præteream, quæ è dicendis elucescent manifestissimè: an totum cerebrum omnesque ejus partes simul sensorii communis fungentur munere? An singulæ seorsim aut successivè? Atqui omnes partes simul sensorii communis munere defungi non poterunt, quandoquidem constitutione diversissimæ sunt, numero plures, pleræque geminæ, sensorium autem commune debet esse unum & simplex. Eodem modo evincere possumus, partes aliquas seorsim non fungi hoc munere, quandoquidem illæ partes debebant determinari, deinde sensorium commune sese non habet instar cohortis militaris, cujus singuli milites sibi mutuo in statione & excubiis succedunt. Quod si quis velit, cerebrum nominari totum, partem vel partes singulares significari, dico malè, in hoc negotio, partes singulares totius denominari appellatione. Deinde cerebrum ita affabrè factum est, ut quædam ejus partes inserviant secernendis spiritibus animalibus, quædam transmittendis, quædam distribuendis. Quod si autem hæc munia pervertantur, maxima orietur confusio. Quid? quod munia hæc immutari non possint, quin simul fabrica deberet immutari, quod valdè absurdum est, fabrica enim functionibus exercendis proportionata est.

Nec cerebrum ipsum.



Transitio.

Facilius aliorum sphalmata culpantur, quam propria vitantur. Facilius aliquis ædes antiquas, infirmas, nec satis commodas diruet, quam meliores & nullis vitiis obnoxias, ædificabit. Itaque inquirendum restat, si omnes hæ sententiæ consistere non possint si illæ partes, quæ hætenus creditæ sunt sensorium commune, imo si quicquid considerationem aliquam mereri potest, munere hoc excidat, quodnam debeat statui sensorium commune? Quandoquidem aliis licuit suas opiniones & conjecturas etiam falsas obtrudere, detur mihi venia, in materiâ adeo arduâ, meam sententiam veram (ut opinor) proponere.

Quid sit sensorium commune?

Antequam autem explicem meam mentem, inquirendum est, quid per sensorium commune *Aristoteli* τὸ πρῶτον αἰσθητήριον *Galeno* τὸ πρῶτον αἰσθητηρικὸν ὄργανον intelligatur? Ratio, quare omnes auctores hallucinati sint, ex eo videtur originem præcipuam habuisse, quod significationem vocabuli non satis determinantes, ipsius rei vagum & confusum formarint conceptum. Ne in eandem Charybdim & incidam ego, primo inquirere statui, quid per sensorium, tum quid per sensorium commune debeamus intelligere? *Stephanus in Lexico*: αἰσθητήριον. 8. τὸ. *Sensorium, pars sensoria. Alii exponunt sentiendi organum, seu instrumentum: nonnulli αἰσθητήριον Domicilium sensus, seu sedem sensoriam. Quidam & partem sentiendi ministram interpretati sunt.* *Martinius in Etymologico. Sensitorium & Sensorium sunt BARBARA scholastica pro αἰσθητήριον: id est, organum sentiendi. Hebr. v. αἰσθητήριον pro ipso sensu, hoc est intellectu ponitur. — Verbum שָׁאֵל est inter alia sonare, tonare & sentire. quo etiam confirmari possit, quod de etymo verbi sentio supra diximus. SENTIO, 1. cognosco sensu, quod ad corpus pertinet: speciem corporalem organo corporeo percipio: 2. cognosco quovis modo, animadverto, intelligo. 3. Judico: unde SENTENTIA, iudicium seu iudicatum. Hæc sunt admodum ambigua, nisi probè distinguantur. Vocabulum sensorii latissimam significationem explicant. Videntur intelligere sensorium externum, sed non intelligunt se huic tribuere id, quod ad sensorium commune & mentem ipsam pertinet. Non distinxerunt tres sensus gradus, quo-*



quorum primus ad corpus, reliqui ad mentem pertinent.

Itaque sensorii vocabulo propriè intelligimus sensuum externorum organum, seu organum corporeum affabrè factum, in quod propria objecta diversimodè agunt, hoc est, varium motum imprimunt. Ita sensorium est oculus, auris, lingua. Huic admodum impropriè tribuitur cognitio, cum ea ad organa externa non pertineat.

Cum autem sensorium commune, eâdem sensorii appellatione gaudeat, imaginati sunt Auctores & Philosophi partem unam in cerebro debere inveniri, quæ ab omnibus sensibus æqualiter pateretur, quæque cum oculus non sit, à motu corporeo afficeretur, quæque cum auris non sit, nihilominus audiret; cum lingua non sit, nihilominus gustaret, & sic porro, hancque existimarunt, si non structurâ, saltem mole & soliditate debere aliis sensoriis esse similem. Cumque diceretur *membrum & particula*, scrutati sunt omnes cerebri recessus, ut corpusculum aliquod invenirent huic officio par, atque alius hanc, alter illam statuit partem, uti vidimus. Verum vanus & irritus fuit labor, cum constet partes excogitatas huic muneri esse ineptas. Sensorium commune adeo mihi sensus communis sedes non malè videtur posse appellari. Debet esse planè aliud, quam quod hætenus indefesso labore à pluribus quæsitum, à nullo, quod ego quidem sciam, inventum est. Gaudemus quinque sensuum externorum organis, hæc autem propriè non sentiunt; neque enim oculus propriè videt, nec auris audit, aut lingua gustat, aut nares olfaciunt, præterea sensus famis & sitis, voluptatis & doloris in nobis excitatur, plane dissimilis motui corporeo, cujus occasione perceptio hæc in nobis oritur: quatenus nempe à motu corporeo spiritus animales variè impulsæ, & agitati motum illum versum interiora deferunt, sensationem producturi. Hinc enata opinio omnes illos motus varios in uno veluti centro debere congregari, ad sensum h.e. sensationem excitandum. Illam autem partem, in qua omnes non tantum sensuum externorum, sed & partium & viscerum motus, ultimò terminarentur, donarunt nomine *sensorii communis*.

Vidimus in genere, quid per sensorium commune intellexerint



rint auctores : verum ut magis distinctè possimus cognoscere ea, quæ in sensorio communi requiruntur, non inutile erit illa enumerare.

Requiritur I. ut sit pars una, quia motus à duplicibus sensoriiis externis in eo velut uniri debent. Hinc ab auctoribus in nomine singulari de sensorio communi τῷ πρώτῳ αἰσθητηρίῳ agitur.

2. Ut illa pars motus spirituum animalium ab omnibus organis & membris delatos recipiat. Alias enim sensorium commune non posset esse, nisi afficeretur à spirituum animalium motu.

3. Ut motus spirituum animalium ad illud, tanquam metam, pertingentes, ibi veluti finiantur, & quasi desinant. Ideo enim sensorium commune statutum fuit, quia spiritus animales in sensoriiis externis & membris agitati, illum motum ulterius deferunt. Hinc *Martinus* malè statuisse censendus est, quando primam significationem vocis *sentire* dixerit *cognoscere sensu*, seu, quod idem est, sensus primum gradum existimaverit cognitionem in suo conceptu involvere, cum cognitio ad sensus externos non pertineat nec motum in suo conceptu involvat. Melius *Cartesius*, uti videbimus, primum sensus gradum ad motum corporeum restringit.

4. Ut sensuum externorum objecta varia percipiat, inter sese comparet, ac dijudicet. Hinc dicitur τὸ πρῶτον αἰσθητήριον, quandoquidem illud primum percipit id, quod ab objectis externis, ope spirituum animalium, versus interiora defertur. Nam nisi αἰσθάνεσθαι hic esset percipere, frustra τὸ πρῶτον fuisset additum, cum sensorium externum prius quam sensorium commune afficiatur. Vidit hoc *Cartesius*, quando in conario, seu glandulâ pineali ideas depingi statuit. Hinc sentiendi vocabulo & percipere, & cognoscere, & judicare, intelligitur, uti vidimus.

Lubet & quintum, de quo *Cartesius* egit, munus addere; scilicet sensorii communis munus est, determinare motum spirituum animalium versus has, vel illas partes. Huic negotio putabat admodum aptam glandulam pinealem, quia ea in medio ventriculorum sita facile in hanc & illam partem vergere poterat.



terat. *Stephanus Chauvinus* in *Lexico Philosophico* sensorii communis non meminit, sed sub titulo *sensationis communis* ea habet, quæ hisce lucem foenerantur. *Sensus communis* differentias inter variorum sensuum externorum objecta apprehendit, à se invicem distinguit. Videtur hic *sensus communis* duplicem involvere actum: quorum prior, per quem, tanquam sensum reflexum, animal cognoscit, seu sentit se sentire: cum enim *sensus externi*, horumve sensoria suas actiones non percipiant, id est, oculus non sentit se videre, nec lingua se degustare &c. requiritur superior quaedam facultas, quæ *sensationes* externas percipiat, & per quam de illis judicemus, id est non tantum videamus, sed observemus non videre. Deinde idem *sensus* etiam *sensibilia* distinguit illa sc. quæ sunt diversorum sensoriorum objecta. v.g. colorem & saporem, sed & ejusdem proprie sensorii v. g. rubrum ab albo. Hæc si quis diligenter perpendat, is facile perspiciet partem cerebri solidam nullam dari, cui hæc omnia tribui possint. Examinavimus singulas: quæ considerationem aliquam mereri posse videbantur, sicco transivimus pede nullam, nulla inventa est. Deinde perceptio & judicium, quæ in conceptu sensorii communis necessario involvuntur, corpori tribui non possunt. Denique sensorii communis appellatio, quemadmodum vocabulo idem est cum sensoriis externis, ita reverâ longè ab hisce distat, quandoquidem ad hoc cognitio & judicium pertinet. Nihil sentit, hoc est, *sensationes* percipit, præter mentem. Partibus corporeis præter extensionem & motum nihil tribui potest.

**MENS IPSA EST SENSORIUM COMMUNE, QUATENUS CORPORI UNITA, AB OMNIUM SENSUUM EXTERNORUM ORGANIS AFFICITUR, ATQUE ITERUM SPIRITUS VERSUS MEMBRA DETERMINAT.**

Mens absolutè considerata intelligit, cogitat, vult, judicat. Mens corpori conjuncta sentit, se sentire percipit, de objectis corporeis judicat, iterum in corpus solo voluntatis nutu agit. In mentem, hoc modo consideratam, omnia illa quadrant, quæ in sensorio communi requiruntur. 1. Mens est una, una ab omnibus sensoriis afficitur. Sensorium commune, id est, mens, non est pars corporis, sed pars nostri.



*Parte tamen meliore mei supra alta perennis.  
Astra ferar.*

2. Mens corpori unita omnes spirituum animalium motus recipit : adeoque est sensorium universale & primum. Mens est oculi oculus, auris auris, gustus, olfactus, tactus, appetitus instrumentum, organum organorum, & ut cum *Platone* loquar Mens est αἰσθήσεων αἰσθήσις. in *Charm.* p. m. 472.

3. Motus corporei in mente finiuntur, quandoquidem ad mentem delati, sensum, hoc est perceptionem efficiunt, adeoque desinunt esse motus corporei; sed 4. sensationes, quam *Cartesius* rectè alterum sensus gradum constituit. Comparando has sensationes inter se, mens de sensuum impressionibus iudicat. Datâ operâ & consulto, in enumeratione eorum, quæ ad sensorium commune requiruntur, secundum & tertium sensus gradum conjunxi, quoniam uterque ad mentem pertinet: ex utroque æque firmum petitur argumentum, sensorium commune esse ipsam mentem. Sensatio omnis, quæ cogitationem in suo conceptu involvit, evincit mentem esse sensorium commune. 5. Tandem mens, prout corpori est unita, solo voluntatis nutu spiritus animales versus varias partes determinat, adeoque motum voluntarium efficit. Pars nostri melior absolute considerata dicitur *mens*, quatenus corpori unita est *sensorium commune*, diversis appellationibus eadem res, diverso respectu, exprimitur, uti videbimus.

Videbuntur forsan hæc quibuldam ingens paradoxum, videbor fortè aliis nihil novi dicere. Utrisque est satisfaciendum. Ostendendum ergo est, hæc esse verissima, ostendendum porro, ante me hæc dixisse neminem, sed omnes in eo delusos esse, quod cum non animadverterent, sensorium commune dici ipsam mentem, in quantum ea consideratur, tanquam corpori unita, adeoque talis, quæ à sensibus externis possit affici. Sensorium commune non potest esse pars corporea, quandoquidem excellentissimum, quod ad sensorium requiritur, quodque hoc ab externis distinguit, cogitationem involvit. Sentire, ut rectissimè *Martinus* explicuit, est COGNOSCERE SENSU, in eo tantum lapsus est, quod cum cor-



pus sensoriiis gauderet externis, putaverit τὸ cognoscere ad corpus quoque pertinere: motus sensoriiis externis impressus pertinet ad corpus, motus spirituum animalium, fibrillas nervorum ad sensoria externa dispersa replentium, delatio ad intima cerebri penetralia, ad corpus pertinet: ibi non afficitur corpus solidum, organum corporeum, domicilium mentis, sed ipsa mens, quæ propriè *sentiendo cognoscit*. Non malè etiam observavit *Martinus* in Epist. ad αἰσθητήρια *Hebræos* poni pro intellectu, quandoquidem ibi sermo est de sapientia, quæ acquiritur legendo & audiendo sacras literas; sermo enim Christi in nobis habitare debet in omni sapientiâ. Fides est ex auditu. Ita que quando legendo diligenter, & audiendo attentè & reverenter proficimus in sapientiâ & prudentia spirituali, tum dicuntur αἰσθητήρια γεγυμνασμένα πρὸς διάκρισιν καλῶς τε ἢ κακῶς. Operæ pretium est sententiam meam in superioribus propositam confirmare.

Confirmatur hæc opinio & ab Antiquis, & à Recentioribus. Non quod illi idem dixerint, quod ego in antecedentibus, sed quod ea dixerint, ex quibus argumenta formari possunt, quæ sententiæ meæ stabiliendæ non parum conducunt. Licet ego quibusdam fortè videor dixisse ingens paradoxum, hinc patet, me non dixisse heterodoxum, quandoquidem illi ipsi, qui hæc ignorarunt, aliqua dixerunt, quæ ad confirmationem meæ sententiæ faciunt. Aristoteles l. III. de Anima. c. 3.

Confirmatio  
petitur  
ab Antiquis.

Ἐπεὶ ὅτι δύο διαφοραὶς ὁρίζονται μάλιστα τὴν ψυχὴν κινήσει τε τῇ κατὰ τόπον, ἢ τῷ νοεῖν ἢ τῷ κρίνειν, ἢ αἰσθάνεσθαι. δοκεῖ ὅτι τὸ νοεῖν ἢ τὸ φρονεῖν ὥσπερ αἰσθάνεσθαι τι εἶναι. ἐν ἀμφοτέροις γὰρ τέτοις ἢ ψυχὴ κρίνει τι ἢ γνωρίζει τι τῶν ὄντων ἢ οἱ ἀρχαῖοι τὸ φρονεῖν ἢ τὸ αἰσθάνεσθαι τὸ αὐτὸν εἶναι φασιν, ὥσπερ ἢ Ἐμπεδοκλῆς εἶρηκε

Πρὸς παρεὸν γὰρ μῆτις ἀεξέται ἀνθρώποισι.

ἢ ἐν ἄλλοις

--ὅθεν σφίσιν αἰεὶ

καὶ τὸ φρονεῖν ἄλλοῖα παρίσεται.

Proponit in principio hujus capituli *Aristoteles* sententias Antiquorum postea jugulandas. Nolim refutationi, nec iis, quæ  
Aaa 3  
hoc



hoc capite animadversione dignissima occurrunt, discutiendis immorari, sufficiet observasse ea, quæ senserunt, non parum facere ad confirmationem sententiæ in superioribus propositæ. Vides itaque antiquos opinatos esse animæ vim sese in duobus potissimum exerere (sc. in quantum corpori conjungitur) in motu locali, & in intelligendo, discernendo & sentiendo: sentire autem & sapere idem esse. Debet itaque anima, seu mens, necessario esse sensorium commune, quandoquidem illud solum sentit: non potest esse aliud quam mens, quandoquidem sentire & sapere idem est. Nihil potest sentire, quin simul possit sapere, hoc est, sapientiæ esse capax: jam autem sapientia menti soli competit: mens ergo sola sensorium est commune.

Fernelio. *Fernelius sensum communem dixit principis sensus unam facultatem, quæ externarum rerum varietates discernit, internoscit, & judicat. Cum autem discernere, internoscere, judicare sit mentis solius opus, manifestum est, sensorium commune esse ipsam mentem, uti diximus. Itaque improprie cerebrum proprium sentiendi instrumentum appellat, cum spiritus animales, qui immediatè mentem afficiunt, quidem in cerebro generentur; sed tamen illi ipsi spiritus cerebro vim sentiendi, internoscendi, discernendi & judicandi tribuere non possunt.*

Sennerto. *Sennertus hæc habet: Communis sensus omnino ponendus est. Cum enim animalia cognoscant differentias inter variorum sensuum objecta propria, sensus autem externi hoc præstare non possint; cum quilibet tantum suum objectum proprium agnoscat, omnino aliquis sensus internus statuendus est, qui omnium sensuum objecta apprehendat (unde etiam communis sensus appellatur) & à se invicem discernat, & colorem à sono, odorem a sapore, saporem a calido, calidum a nigro, &c. differre cognoscat. Præcipua enim officia sensus communis sunt, omnium exteriorum sensuum objecta mediis sensibus externis percipere: cognoscere & sentire, nos sentire. &c. Epit. Nat. Scient. l. vii. c. 7. Dico ego objecta apprehendere, discernere, percipere, cognoscere, & sentire nos sentire, sunt omnes mentis operationes, uti postea à Cartesio patebit. Cum autem hæc sensui communi tribuantur sensorium commune erit ipsa mens. Dixit ergo Sennertus & Antiqui ea, quæ ad sententiæ meæ proba-*



baſionem manifeſtè faciunt : ille ipſe tamen *Sennertus* ea ignoravit, quæ ego hic ſtatui, quæque ex ipſius verbis manifeſtiſſimè evici. Hoc ut pateat, ſciendum eſt, verba à me citata deſumpta eſſe è paragrapho ſecundo, in primo dixerat : ſenſus internos per externos *moveri*. Qui tantillum aſſuetus eſt de rebus formare diſtinctos conceptus, is novit, quicquid extensionem & motum in conceptu ſuo involvit, id pertinere ad corpus, nihil ad mentem pertinere præter cogitationes, ergo *Sennertus* eidem tribuens & *cognoscere cum conſcientia & moveri*, ſtatuit ἀόϋσαλα, adeoque ea, quæ ego hic confirmo, ignoravit. Deinde ſtatuens *ANIMALIA* cognoscere differentias inter variorum ſenſuum objecta propria, tribuit unum idemque brutis & hominibus, cum manifeſtum ſit, brutis deeſſe mentem cogitantem & cum conſcientiâ cognoscentem. Quid? quod brutis *judicium* diſcernendi coloris à ſono tribui non poſſit? Itaque rectè hinc mihi videor concludere, *Sennertum* conſuſè de ſenſu communi egiſſe, adeoque ignorâſſe ea quæ ego in ſuperioribus ſtatui, quandoquidem ea diſtinctionem mentis à corpore ſupponunt. *Sennertus* autem animæ brutorum ea tribuens, quæ menti noſtræ ſoli conveniunt, manifeſtiſſime declarat, ſe nec mentis humanæ, nec animæ brutorum unquam diſtinctum conceptum formaſſe.

Confirmatur mea ſententia imprimis è *Carteſio*, qui rectiſſimè Carteſio. ſtatuit : *perſpicuè videmus nullam extensionem, nec figuram, nec motum localem, nec quid ſimile, quod corpori tribuendum ſit, ad naturam noſtram pertinere, ſed cogitationem ſolam.* — Cogitationis nomine, illa omnia intelligit quæ nobis conſciis in nobis ſiunt, quatenus eorum in nobis conſcientia eſt. Atque ita non modo intelligere, velle, imaginari, ſed etiam ſentire, idem eſt hic, quod cogitare. Part. I. Princ. Phil. §. 8, 9. Vides, ſi ſentire ſit cogitare, ſi cogitare ad mentem planè pertineat, ſenſorium commune non poteſt eſſe pars corporea, nec glandula pinealis, quum ea ſentire, hoc eſt, cogitare non poſſit, adeoque nec ſenſorii communis munere fungi. Id amplius confirmatur ex iis, quæ de tribus ſenſuum gradibus habet modo laudatus Auctor in Reſponſ. ad Object. VI. §. 9. Ut rectè advertamus, quanam ſit ſenſus certitudo, tres quaſi gradus in ipſo ſunt diſtinguendi. Ad primum pertinet tantum illud, quo



quo immediate afficitur organum corporeum ab objectis externis, quodque nihil aliud esse potest, quam motus particularum istius organi, & figura & situs mutatio, ex illo motu procedens. Secundus continet id omne, quod immediate resultat in mente ex eo, quod organo corporeo sic affecto unita sit, talesque sunt perceptiones doloris, colorum, soni, odoris &c. quas oriri ex unione ac quasi permixtione mentis cum corpore, dictum est. Tertius comprehendit omnia illa judicia &c. Vides tres gradus statui sensus, in primo organum corporeum afficitur: in secundo mens IMMEDIATE: itaque inter motum organi externi, & perceptionem mentis, non intercedit aliud organum glandula pinealis, quod percipiat, quandoquidem sensorio externo moto (intellige & spiritum animales versus illud distributos) in mente immediate resultant perceptiones doloris, soni, coloris, quod non fieret, si necesse foret intercedere tanquam internunciam glandulam pinealem; alias enim mens, à motu organorum corporeorum, non afficeretur IMMEDIATE. Denique cui bono tertium quid intercedet, cum spiritus animales satis vividè mentem afficere possint? Quod potest fieri per pauciora, quid opus est ut fiat per plura? Perceptiones tales mentis oriuntur ex unione, & quasi permixtione, mentis cum corpore. Potestne aliquid dici magis confirmans determinationem sensorii communis, a me in superioribus propositam? Mens est sensorium commune, quatenus ipsa ab omnium externorum sensuum organis afficitur, atque etiam spiritum versus membra determinat: nam illa perceptio, & determinatio spirituum, debetur unioni mentis cum corpore.

Causæ ignorantiae & errorum.

Cum explicatio & determinatio Sensorii communis, à me in superioribus proposita, sit adeo manifesta, mirum videri possit, quare hoc à perspicacissimi ingenii Viris & Philosophis hætenus animadversum non sit, itaque rem nec ingratam nec inutilem me facturum crediderim, si fontes errorum detegere coner. Illud enim ad formandum iudicium non parum conducit. Causæ errorum plures mihi videntur.

I. Prima causa est, quod nomenclatura nos sæpe decipiat. Existimamus non rarò ubi diversa nomina pronuciari intelligimus, diversas res illis nominibus debere significari, quod

ta-



tamen non semper est verum. Eadem res, idem subiectum, sæpe distinctis appellationibus insignitur, quæ quamvis diversissimæ sint, unum tantum hominem, vel unam rem significant, verum sub aliâ relatione. Ex gr. *Alexander Magnus* potest dici *Philippi filius* : *Macedonum Rex* : *Victor Darii* : *Conditor tertiæ Monarchiæ* : *Discipulus Aristotelis* : *Interfector Clyti*. Omnium harum appellationum unum idemque est subiectum, relationum variarum diversitas, diversitatem appellationis peperit. Hæc facile percipiuntur, nec hæc obvia nos in errorem inducunt. In Philosophiâ diligentius attendendum est, an diversa nomina res diversas, an eandem sub aliâ relatione denotent. Materia prima, & corpus in universum spectatum, non sunt duæ res diversæ, sed una & eadem diverso respectu, in quantum materia prima non differt quidem à corpore in universum spectato, sed consideratur respectu ad corpora particularia, quæ ex eâ constitui posse intelliguntur. Corpus in universum spectatum, est appellatio absoluta, materia prima, relativa. Forma substantialis, & dispositio varia corporis respectu magnitudinis, figuræ, motus, quietis, cohæsionis, proportionis minimarum particularum, è quibus totum componitur, re ipsâ non differunt, differunt tantum modo considerandi, & appellatione, quæ illi considerandi modo innixa est. Figura, motus, quies, particularum varia constitutio, &c. possunt dici modi corporis, in quantum corpora ab hisce varie modificantur, si nempe singula hæc seorsim, & in genere considerentur, possunt tamen simul sumpta, quatenus ab iis dependent omnes omnium corporum differentiæ, considerari tanquam forma, quia ab hisce simul sumptis, & consideratis tanquam tale corpus in specie ex. gr. aurum, argentum, æs constituentibus, omnis diversitas & distinctio corporum pendet. Eodem modo sese habet res in hoc negotio. Mens & Sensorium commune est eadem omnino res, denominatio & relatio differunt. Mens absolutè consideratur tanquam substantia cogitans, intellectu & voluntate prædita. Sensorium commune eandem illam mentem significat, verum quatenus corpori organico est arctissime conjuncta, adeoque ab illo affici, atque iterum in illud agere potest; vel si distin-



ctius loqui velimus, prius illud sensorii communis & primi appellatione à veteribus indigitatum est, atque sensorio communi tributum est, alterum, regere corpus τῆ ἡγεμονικῆ munus est, uti in sequentibus explicabo. Mens est nomen absolutum, mentis essentiam exprimens: Sensorium commune non mentis essentiam, sed relationem, quam habet ad sensus externos, & spiritus animales, ope motus corporei sensationes in eâ, modo à nobis incomprehensibili, excitantes, exprimit. Mens est nomen generale, complectitur unum hoc vocabulum omne id, quod ad ejus essentiam pertinet: verum cum cognitio nostra sit finita, mens de rebus ad sese pertinentibus, de variis suis facultatibus successivè, & sub alia atque aliâ relatione cogitat: variis nominibus hæ relationes exprimuntur. Dicitur sensorium commune respectu perceptionis objectorum, quæ illam ope organorum exteriorum & spirituum animalium afficiunt, & hæc est maximè propria hujus vocabuli significatio, quamvis aliquando latius etiam à *Cartesio* sumatur, nempe prout spiritus versus has vel illas partes determinat: verum uti statim vidimus, hoc ab antiquis nomine ἡγεμονικῆ expressum est. Expressit illud pulchrè *Sallustius*, *Anima imperio, corporis servitio utimur*. Tribuuntur etiam menti, vel cerebro (confusè enim hæc traduntur) facultates principes, in quantum intelligere, ratiocinari, judicare, velle, multo excellentiora sunt, quam cibum capere, excrementa excernere, manibus victum quærere &c. Atqui hæc mihi abundè sufficere videntur, ut detegatur primus confusionis & ignorantiae fons, quem appellationum diversitas peperit. In sequentibus adhuc plura explicabo vocabula; hæc enim sunt scitu jucunda & pulchra.

II. Altera erroris causa est, quod mentem & corpus non satis distinxerint. Hæc antiquos omnes in errores varios impulit. Impulit hæc eadem causa *Cartesium* nec non ejus sequaces in errores circa sensorium commune, quamvis absolutè de mente & corpore agentes sese ab erroribus antiquorum vindicassent. Quæ siverunt *locum* & *sedem* animæ. Verum, uti in sequentibus videbimus, mens nullam ad locum relationem habet, mens tantum agit intelligendo & volendo. Corpus extensum est, corpus dividi potest in

par-



partes plures: in mentem nec extensio nec divisio cadit. Sensorium commune relationem ad unionem mentis cum corpore involvit, hoc cum non animadverterent Philosophi, confusa & erronea de sensorio communi tradiderunt. Hoc ut amplius, pateat dico: mentes separatæ, angeli, dæmones sensorio communi carent: carent quoque sensorio communi bruta animantia cuncta. SOLI HOMINES GAUDENT SENSORIO COMMUNI, id quod sententiam in superioribus à me propositam, non parum illustrat & confirmat. Sunt hæc verissima & certissima, quamvis à communi philosophandi ratione remotiora. Latius hæc possent deduci; verum hic desino, ne perspicacioribus hæc de re ulterius cogitandi furripiatur occasio.

III. Tertia erroris causa est, quod mentem humanam, substantiam cogitantem, uni alicui parti solidæ veluti alligandam censuerint. Si rem ipsam diligenter trutinemus, hoc præjudicium insigne plures videtur habere causas. Harum α. prima est, quod locum quendam menti tribuendum facile existimemus, quia sc. ille corporibus (de quibus multum cogitamus, quæque nobis ordinariè tanquam hoc vel illo loco sita, aliis corporibus minus aut magis vicina, imaginamur & repræsentamus) necessariò tribuendus est. Itaque in cerebro invenientes glandulam aliquam solitariam & exiguam Conarium dictam, putarunt hanc huic negotio aptissimam. Cum enim pleræque cerebri partes essent geminæ, hæc erat una. Erat etiam valdè exigua, quasi ea ipsa minor moles magis quadraret in mentem, quam nôrant extensione carere. β. Altera causa est, quod corpora illa, quæ minus sensus nostros afficiunt, quæque fluida sunt instar aëris, non soleamus considerare tanquam corpora, hinc error ille irrepsisse videtur, quod existimaverint corpus solidum debere inveniri in cerebro, quod in mentem posset agere: quasi mens à spiritibus animalibus affici non posset, absque solidi corporis interventu: quasi spiritus animales minus essent corpora, quia visus aciem effugiunt, quandoquidem sunt fluidi, ac in continuo motu, denique quandoquidem *spiritus* (quo nomine etiam substantias incorporeas significamus) dicuntur animales. Ex hoc eodem fonte & γ. tertia pollulat ratio, quod



scilicet, cum conjunctio mentis & corporis sit stabilis, à primo vitæ halitu ad extremum spiritum perseverans, ea non videatur satis solidum nacta esse fundamentum, si statuatur tantum fundari in unione cum spiritibus animalibus, qui sunt fluidi, & in perpetuâ dissipatione, nisi interveniente parte cerebri solidâ ideo: in id incubuerunt tum Philosophi, tum Medici, ut partem illam solidam detegerent. Verum cogitandum est, quamvis spiritus in specie dissipentur, spiritus tamen, generaliter considerati, nunquam deficiunt, quamdiu vita est superstes. Sanguis etiam est pars fluida, sanguis dissipatur, sanguis exhauritur, in locum deperditi tamen continuo alius suppeditatur, adeoque ejus fluiditas & jactura non impediunt, quo minus à sanguine ejusque pressione continuâ, vita, calor, nutrimentum, augmentum corporis semper dependeant. Ut facilius veritatem hanc cernas, oportet cogitare spiritus animales & partes corporis fluidas non minus esse partes corporis nostri, quam solidas, imo à fluidis, eorumque influxu ἐνεργείαν partium solidarum dependere. Deponendum est antiquum illud præjudicium, nobis admodum familiare, corpora subtilia esse minus corpora, quam solida, imo illa, quæ sensus non afficiunt, quasi nihil esse. Spiritus animales mentem nostram afficiunt, in illam agunt: mens vicissim in spiritus agit, mens voluntate sola spiritus versus has vel illas partes determinat. Quomodo illud fit, dices fortasse, cum substantia cogitans & extensa toto cœlo differant? Respondeo me illud non intelligere, nec quemquam mortalium. Interim mentem à corpore pati, & in illud agere, continuo experior, & in hoc consistit unio mentis nostræ cum corpore. Non est negandum τὸ ὅτι, quoniam τὸ πᾶς non intelligimus. Ille novit, qui omnia novit. Hujus mira sapientia, summa potentia, ineffabilis bonitas, in mirabili hac mentis cum corpore unione elucescit. Quid? quod eadem remaneat difficultas si sensorium commune statuatur pars solida! Rogo enim, qua ratione glandula pinealis aget in mentem? Qua ratione mens aget in glandulam pinealem?

IV. Quarta erroris causa est, quod non definiverint sensorium commune satis distinctè. Quando sermo instituitur *de loco & sede animæ*, vel metaphoricis vocabulis confusus adumbratur conceptus, vel describitur res quam in corpore nostro frustra quæsieris.



En difficultatem, quæ tot Virorum subtilium ingenia torfit, Conclusio.  
 facile explicatione sublatam! En nodum Gordium solutum!  
 En fontes ignorantiae & erroris detectos! Sensorium commune est id, quod à spiritibus animalibus, ab exteriorum sensuum organis, oculis, auribus, naso, linguâ, membris varie agitatis, afficitur, quodque inde varias sensationes recipit, cum conscientiam percipit, ac inter sese comparat. Sensorium commune est id, in quod spirituum animalium motus ultimo terminatur. Incipit cogitatio, ubi motus spirituum definit. Quid autem & quale est illud sensorium? nullum aliud, quam ipsa mens considerata cum relatione ad sensus externos, qui ipsam mediantibus spiritibus animalibus afficere possunt.

Confirmavi superius meam sententiam ex antiquorum & recentiorum placitis, juvat jam illud quoque illustrare, quod postmodum dixi, nempe eandem rem aliquando pluribus appellationibus indigitari, cum tamen ab uno principio variae producantur operationes. Illustrabo hoc è *Burgerdicio* & vulgari Philosophiâ. In explicatione sensus interni, quem dicit esse facultatem unam, edentem varias operationes, manifestè asserit, illum esse appellatum variis nominibus sc. sensus communis, phantasiæ, æstimatoriæ five cogitativæ. *Burgerdic. Id. Phil. nat. Disp. xxii. Th. 3, 4, 5.* En unius facultatis varia nomina! Vis plura? Lege sequentia: *Et sensus communis quidem appellatur, quatenus species ab externis sensibus oblatas, eorumque functiones percipit ac dignoscit.* Quibus si addamus ea, quæ *Disput. xxvii. Th. i.* habet, dari sensum internum ex eo probari, quod animalia sentiunt se sentire, manifestum est, sensum hunc internum & communem in mente ipsâ collocandum esse, quoniam parti corporeæ cogitatio cum conscientiam tribui non potest, adeoque mentem revera esse sensorium commune. Possent hæc pluribus deduci, verum sufficit, si intelligamus illum vidisse per nebulam, sensum communem in ipsa mente esse statuendum: illum vidisse facultatem, vel rem eandem pluribus aliquando donari nominibus, pro vario considerandi modo. Illud, quod sentit se sentire, est ipsa mens. Illud quod cogitat, est ipsa mens. Atqui sensus internus, qui, unus cum sit, variis insignitus nominibus, inter alias facultates, & cogitationem complectitur. Cogitare est mentis. Vide quoque *Hercul. Saxoniam. Prælect. pract. p. i. p. m. 58.*



Objectionum  
solutio

Accedendum jam est ad objectionum, quæ forte moveri possent contra meam sententiam, solutionem. Dicit fortè aliquis. Abuteris tu quidem vocabulo, ego intelligo per sensorium commune, partem illam cerebri solidam, versus quam omnes nervi feruntur, in qua motus spirituum animalium ultimo terminatur, & à qua mens immediate afficitur: quodque suo motu & veluti nutu spiritus animales versus has vel illas partes determinat. Respondeo: Pygmæos quæris, Cyclopas quæris, quæris id, quod in rerum naturâ non datur. Primò enim, nervorum extremitates non terminantur in uno eodemque loco, principia nervorum nimis longè à se invicem distant, atque è variis medullæ oblongatæ partibus oriuntur, adeoque omnes ad unam & quidem solidam partem non pertingunt. Deinde mens immediate à spiritibus animalibus afficitur, motus spirituum animalium velut terminatur in ipsam mentem, & hæc est unionis mentis cum corpore ratio, quod illa à spirituum vario motu diversimodè afficiatur, atque iterum in spiritus voluntatis nutu agat. Itaque si nolis per sensorium commune aliud intelligere, quam partem talem solidam, cui ex præjudicio nomen sensorii communis imposuisti, nullum datur sensorium commune, quandoquidem talis pars in rerum naturâ non est. Ergo negandum est sensorium commune dari. Hoc autem cum sit absurdissimum, fatendum est, nullum aliud esse sensorium commune, quam mentem ipsam. Mens est sensorium commune in quantum motus spirituum animalium immediate illam afficiunt. Mens sensorii communis appellatione gaudet, quando illa non absolutè consideratur, sed respectivè quatenus à spiritibus animalibus afficitur, & omnium sensuum externorum impressiones sentit, hoc est cum conscientia percipit, & dijudicat. Eodem modo hic se res habet, quam si quis petat sibi exhiberi unicornu: ubi autem ostenditur unicornu vulgare, neget illud esse unicornu, quandoquidem illud non est enatum è capite animalis quadrupedis, equi figuram habentis, sed depromptum è marina belluâ, sive quia non est tale, quod convenit cum præconceptâ sua opinione, & præjudicio. Ut autem scias te Chimæram quærere, rogo, quando sensorium commune investigas,  
an



an quæris ens quoddam? an vero figmentum? Si dicas te figmentum quærere, tum in alia omnia abis: in aëre piscaris, in mari venaris:

*Non profecturis littora bobus aras.*

Ego ens revera existens quæro. Si dicas, te itidem rem revera existentem quærere, dico, nulla res datur, quæ sensorii communis appellatione gaudere possit, præter ipsam mentem, quæ sola à spiritibus animalibus afficitur, quæ sola objecta sensuum omnium sentit, adeoque sola est sensorium commune. Præjudicium est existimare, mentem toti corpori, mediante unâ particulâ solidâ, esse conjunctam. Denique, non communicantur mediante particulâ aliquâ solidâ sensationes menti, nec, mediante particulâ illâ eâdem, spiritus per universum corpus distribuuntur. Mens à spiritibus animalibus immediatè afficitur: mens immediatè, voluntate solâ, agit, seu spiritus animales determinat. Omnia illa fluunt è præjudicio, quod tibi de sensorio communi formasti; è præjudicio, copulante cum hoc vocabulo ideam rei fictitiæ, quæ in rerum naturâ non datur. Itaque tu abuteris vocabulo,tribuendo illi significationem rei, quæ non existit, & iniquus es, quod illam rem existere velis, cui perversam illam, significationem tribuisti.

Alia adhuc formari objectio posset, quod nempe, ad confirmationem meæ sententiæ, adduxerim auctorum de sensu communi disputantium testimonia, cum de sensorio communi agamus, adeoque argumenta inde deprompta esse nullius ponderis. Ego ultro fateor me verba auctorum de sensu communi agentium in superioribus proposuisse, sed contendo illud à me rectissimè, & ad confirmationem meæ sententiæ convenienter factum esse. Rogo enim: an *sensorium commune*, & *sensus communis* debeant considerari, vel tanquam nullo affinitatis vinculo juncta, vel tanquam relationem quampiam inter se habentia? Nemo facile dixerit esse contraria, nec ubi unum invenitur, ibi necessario aliud excludi; etenim vel vocabula, vel significatio illud debent evincere; verum vocabula sunt  
cogna-



cognata, atque eorum significatio sibi mutuo non est opposita. Neque aliquis facile dixerit sensum communem, & sensorium commune nullo affinitatis vinculo juncta esse, cum vocabula ipsa paucis tantum literis, & exigua pronuntiationis, ac significationis differentia sint inter sese discreta. Relinquitur igitur, relationem quampiam intercedere: quæ autem erat illa relatio? Mihi videtur non alia commodior, quam si sensorium commune sumatur tanquam substantia, sensus communis tanquam qualitas, ut cum veteribus loquar; vel tanquam ens & ejus attributum; vel tanquam subjectum atque ejus adjunctum. Veteres sanè ubi de facultatibus agunt, etiam agunt de sensu communi, cum autem accidens sine subjecto, modus absque ente, cujus est modus, dari non possit, necesse est dari substantiam: illa substantia secundum Veteres est anima, distinctius loquendo mens; verum hic considerata tanquam facultatis hujus capax, seu prout corpori conjuncta est. Si sensus sumatur tanquam attributum aliquod, quærendum est, cujus rei sit attributum? Non corporis, quandoquidem percipere, distinguere, cogitare cum conscientia ad extensionem nullo modo referri potest, pertinet igitur ad mentem, adeoque sensorium commune, quod consideramus tanquam ens, sensus communis subjectum, non aliud erit, quam ipsa mens, quatenus consideratur tanquam ea, quæ à sensibus externis affici possit. Etenim si sensui communi ea tribuantur, quæ cogitationem in suo conceptu involvunt, manifestum est non posse aliquem bonâ fide existimare, sensorium commune, cujus activitas dicitur sensus communis, esse partem cerebri solidam, in qua motus spirituum animalium terminatur, quandoquidem ostensum est, motum spirituum animalium immediate afficere ipsam mentem. Deinde quandoquidem parti solidæ, corpori extenso, tribui non potest perceptio, ratiocinatio, cogitatio cum conscientia, quæ à natura extensionis longissime sunt remota. Si sensus communis consideretur tanquam adjunctum, mens erit necessario ejus subjectum, quandoquidem adjunctum absque subjecto intelligi non potest. Itaque quocumque modo consideremus relationem, quæ inter sensum communem, seu sensus internos & sensorium commune



intercedit, tantum abest ut ea evertat meam sententiam, & argumenta in superioribus proposita, ut potius confirmet. Nempe si sensus communis percipiat, cogitet, judicet, si sciat se percipere, non est statuenda substantia auctor harum operationum, quæ extensionem & motum in suo conceptu involvit: illa enim cogitationis capax non est. Si attributa sint talia, ut ea corpori tribui non possint, cur quæris organum corporeum, cui ea attributa, quæ cogitationem in suo conceptu involvunt, minimè conveniunt? Si adjuncta sint talia, ut omnino corpori tribui non possint; cur non ultro fateris, te fuisse delusum, quando, è præconcepta opinione, sensorium commune conceperas tanquam partem aliquam cerebri, in qua motus corporei terminarentur, cum motus corporei, motus spirituum animalium, immediatè mentem ipsam afficiant. Quid? quod differentia inter sensus externos & internos in eo consistat, quod sensus externi motum corporeum in suo conceptu involvant, interni cogitationem? Vides, me non tantum non malè, sed rectissimè adduxisse testimonia auctorum de sensu communi agentium? Vides hanc ipsam objectionem mihi ansam dedisse amplius confirmandi sententiam in superioribus propositam?

Accedendum jam est ad tertiam objectionem, quæ formari posset. Dicet fortè aliquis: ex tua sententiâ non potest determinari, quo in loco mens operationes suas exerceat, imo exinde videtur sequi, eam pluribus locis simul existere debere, cum nempe videt, audit, dolorem pedis percipit; ego autem ideo in sensorium commune, tanquam in organum corporeum unum, inquirendum esse putavi, ut locum possem determinare, in quo mens ageret. Quamvis hæc obiectio primâ fronte minus subtilis videatur, quæque adeo in homines ingeniosos, & mentem à corpore distinguentes, non possit cadere, quicumque tamen attentè consideraverit, quo pacto auctores subtilissimi, de organo corporeo, tanquam Sensorio Communi egerint, quo pacto *locum & sedem animæ* quæsierint, is videbit hanc objectionem necessario nexu, cum iis, quæ in ipsorum scriptis occurrunt, cohærere. Planè mihi videtur verisimile, illos de mente non tantum confusum, sed & cras-



sum habuisse conceptum, tanquam de re, quæ loco aliquo indigeret. Respondeo ergo: *ἀσύστατα* conjungis, agis de sensu communi, quod cogitationem in suo conceptu involvit, & vis invenire locum, quasi ageres de re, quæ extensionem in suo involveret conceptu. Mens cogitans nullam ad locum relationem habet, mens ibi est, ubi agit. In hoc consistit differentia *loci* & *ubi*, quod *locus* planè relationem ad extensionem, & corpora alia illi vicina habeat, cum nihil tale τῷ *ubi* tribui possit. Ubi tantum explicat relationem ad operationes mentis, adèoque planè falleris, quando è præjudicio ideo organum corporeum tibi inveniendum putaveris, ut posses scire, quo in loco terminaretur motus spirituum animalium. Finis motus spirituum animalium, est mentis perceptio; ibi terminatur motus spirituum animalium, ubi mens incipit percipere. Quo in loco? In nullo, quandoquidem mens ad locum nullam relationem habet. Si quæris, in quo ubi? Illud melius fortè negativè conceperis, quam positivè. Non extra corpus, quia ibi non agit: non in organis corporeis externis, quandoquidem in oculis, auribus, lingua, naso, &c. nihil concipio, nisi motum corporis, qui mentem ibi afficere non potest, quemadmodum nec visus objecta distinguere, quando nimis propè aliquid oculis admovetur. Non in manu, pede, corde, ventriculo, liene, hepate, quandoquidem hæ partes munia sua sic satis bene obire possunt, & tamen sensus interni planè aboleri, seu, quod idem est, sensorium commune, seu mens munere suo nequaquam defungi. Dico suo munere mentem non defungi, intelligo autem ea munera, quæ à conjunctione mentis cum corpore dependent, quandoquidem mens, considerata, ut sensorium commune, eam relationem in suo conceptu includit. Alias mens semper cogitat, semper activa est, quandoquidem cogitare omnino est de essentiâ mentis. Non inutile quoque est sibi repræsentare, quod quamvis sensorium commune seu mens, relativè ad sensuum externorum organa possit dici videre, audire, gustare &c. tamen respectu mentis, illi diversi modi afficiendi omnes, uno perceptionis vocabulo explicari possunt & debent. Mens audiendo, videndo, gustando percipit, diversæ, ut videntur, hæ operationes mentis,



tis, ad unam reducuntur perceptionem, adeoque non in singulis sensoriis perficiuntur, nec in suo conceptu locum aliquem includunt; *ubi* tantum requiritur, quod ergo ad has vel illas partes in specie, ad hæc vel illa organa relationem localem nullam habet. Explicui negative *ubi* mentis, explicabo tamen etiam positivè. Mens exercet operationes suas in intimis cerebri penetralibus; verum cave, ne illa consideres tanquam *locum*, qui menti non competit, sed tantum tanquam *ubi* nullam relationem ad extensionem, sed solummodo ad operationes mentis includens. Illustrari fortè hoc negotium aliquomodo potest, si in mentem revocemus ea, quæ veteres de anima dixerunt, nempe eam esse totam in toto, & totam in qualibet parte: quamvis enim mens non possit dici esse in omnibus partibus, nisi in quantum spirituum motum ad sensationem efficiendam ab omnibus partibus excipit, atque iterum versus omnes partes eisdem spiritus determinat, illud tamen videntur innuisse: adeo remotam esse mentem ab omni relatione ad locum, ut quodammodo per totum corpus veluti diffusa considerari possit. Verum longè melius concipiemus *ubi* illud spirituum nullam relationem ad locum includere, si in mentem revocemus Deum, actum, ut ita dicam, purissimum, simplicissimam & perfectissimam mentem, ab omni extensione corporeâ longissimè remotam, tamen non longè abesse ab unoquoque nostrum, quandoquidem in ipso vivimus, movemur, & sumus. Actor. xvii. v. 28. Si in mentem revocemus Deum è nullo loco excludi, nullum tamen occupare locum: Deum ubique præsentem esse, quandoquidem omnia portat verbo potentia suæ, hinc etiam dici cælum & terram implere, cum tamen nullum occupet locum. Verum egent hæc exercitatione longâ, antequam quis mentem ita à sensibus abducere possit, & veritatem nudam contemplari. Sufficiat è jam dictis concludere, conceptum illum de loco absurdum, & objectionem inde formatam nullius esse ponderis. Imo potius hanc ipsam considerationem *loci*, & *ubi* nos magis confirmare in sententiâ superius propositâ.

Videor mihi satis fecisse iis, qui sententiam meam de sensorio communi, existimaturi erant, tanquam ingens paradoxum, satisfaciendum quoque est iis, qui fortè arbitrabuntur me

An hæc sententia debeat videri nova?



nihil novi dixisse. Sunt enim quidam, qui sibi pulchrè placent, adeo ingrati, ut nolint agnoscere, nedum laudare illos, per quos profecerunt. Volunt videri ea scivisse, quæ revera ignorarunt, & cum tanta sit veritatis vis, ut assensum aliquando invitis extorqueat, se antea scivisse hæc, vel non esse magni momenti ea, quæ detecta sunt, præ se ferre solent. Expertus loquor, itaque his quoque est respondendum: retundendus est paululum male feriatorum fastus. Ego existimo, ea quæ in superioribus à me sunt asserta, hæcenus incognita fuisse, vel saltem à nullo, quod ego quidem sciam, explicata. Evolvantur libri, legantur Auctores, & fiat periculum, an ex aliquo hæc mea excerpserim? Demonstretur mihi quispiam, qui eadem dixerit cum iis, quæ in superioribus disputavi. Ego mihi probè sum conscius, me è nullo hæc mea hausisse, attendendo diligenter, meditando distinctè, tandem aliquando hæc perspexi. Obscura & confusa, quæ ante me tradita sunt, omnia. Non sufficit per nebulam aliqua vidisse, oportet ut eadem sint demonstrata, oportet ut nihil magno molimine adstructum sit, quod hanc evertat sententiam. Si aliquis eadem dixerit, ille erit vel Medicus, vel Philosophus, vel quispiam alius. Non Medicus, quandoquidem vidimus in superioribus & *Galenum* & *Willisium* fuisse deceptos: quod ad reliquos attinet, illi vel *Galeni*, vel *Chymicorum*, vel *Cartesii*, atque ejus sequacium, placita exosculantur. Qui *Galenum* sequuntur, ii variis præjudiciis impliciti, ejus sententiæ confirmandæ, vel illustrandæ ferè incumbunt. Chymici in destruendis antiquorum opinionibus, quam in novis statuendis fundamentis, fuerunt feliciores. Qui *Cartesium* sequuntur, non minus sententiæ ejus adhærescere, quam prisca *Aristoteli* solent. Inter recentiores medicos videtur tamen animadvertisse *Johannes Bohnius* sententiam de Glandula pineali non posse consistere, itaque breviter & obscurè rem est complexus in *Circulo Anatomico Physiologico*. Progymnasmi. 28. Probabiliorem *E. judico opinionem illorum*, qui, si non in toto cerebro, certè una hujus parte, functionum harum singulas exerceri autumant, ut prolixè satis *J. C. Claudinus*, de Sede facult. principum, docet: quem pariter profiteri fere videtur *Vieussens* superius allegatus;

quan-



quando sensationem certum sensibilis motum proprio ac congruo sibi sensorio impressum, & ad albos usque striatorum superiorum & mediorum corporum tractus prorogatum & propagatum vocat, ulterius vero, & ad centrum ovale, seu corpus callosum Willisii, id est, medullarum cerebri substantiam, si continuaretur motus ille, imaginationem primam seu sensum communem fieri asserit. Paragrapho sequenti fatetur se satis mancum in hisce fuisse. Vidit Bohnius defectum, non correxit. Et Philosophos quidem quod attinet, ii sunt vel antiquiores, vel recentiores. Et antiquos quidem, ac qui eos sequuntur, admodum confusum de animâ habuisse conceptum, adeo clarum est, ut confirmatione non egeat. Id superius in transitu attigi, ubi Sennerti sententiam de sensibus internis produxi. Quamvis autem *Cartesius* in id diligenter incubuerit, ut mentem à corpore accuratè distingueret, manifestum est tamen, illum hanc veritatem ignoravisse, ex eo, quod eam non docuerit expressis verbis, deinde quod planè alia docuerit. Non docuisse ex eo patet, quandoquidem putat nimis absurdum esse statuere spiritibus animalibus mentem tantum, nulli autem solidæ parti unitam esse. *Part. II. epist. 50.* Partem itaque solidam investigandam putavit, in qua motus spiritibus animalibus impressus terminaretur. Motus autem spirituum animalium terminatur, hoc est, afficit ipsam mentem. Deinde mens non mediante corporis parte solidâ, sed voluntate solâ determinat spiritus animales. In hoc consistit unio mentis cum corpore. Spirituum motus variè afficiens, non glandulam pinealem, sed ipsam mentem, diversas in eâ sensationes efficit: voluntas non movet glandulam, sed determinat spiritus animales versus hos vel illos musculos, modo à nobis inexplicabili. Quid? quod *Cartesius* planè alia docuerit? Quanto molimine, quantis ambagibus agit de Glandula pineali? Quomodo se variè torquet? Quanto intervallo veritatem deferit? Manifestum est, ex eo, quod quæsi-  
verit glandulam, illum mentem ipsam prætervectum esse, manifestum est, illum in materiâ de Glandula pineali ad priscam Philosophorum confusionem delapsum esse. Non ideo quod sensoria externa sint corporea, sensorium commune ejusdem est naturæ. Locum & sedem animæ tribuere, an  

Ccc 3

non



non est mentis formare conceptum corporeum ? Vid. Part. II. ep. 36. *Loci enim & spatii nomina non significant quicquam diversum à corpore, quod dicitur esse in loco, sed tantum ejus magnitudinem, figuram, & situm inter alia corpora designant.* Vid. Princ. Phil. Part. II. §. 10, 11, 12, 13. Itaque animam in loco quopiam esse supponens, non obscure dicit, eam esse corpoream. Quid ? quod asserat Ideam formari in *superficie glandulae pinealis* ? nonne hoc est, tribuere cogitationem corpori ? Vid. *Cartes. de homine*, à La Forge editum p. 146. Etenim nomen *Idea* generaliter sumitur pro omni re cogitatâ, quatenus tantum habet esse quoddam objectivum in INTELLECTU. in Dissert. de Methodo. p. m. 22. Hæc qui absque præjudicio, nec amore aut cœcâ veneratione, aut etiam malevolentia abreptus, expendet, is certe cogetur fateri, quamvis sæpè vir ingeniosus de mente & corpore distinctissimè egerit, tamen hac in parte à veritatis tramite non parum aberravisse. Credidit ille partem unam corpoream necessariam, in quâ motus & impressiones spirituum animalium terminarentur. Huic parti tribuit illa quæ sensorio communi convenire existimabat, etiam illa, quæ cogitationem in suo conceptu involvunt. Ab hujus motu putabat spirituum animalium determinationem dependere. Verum eo ipso mentem & corpus, quæ pluribus locis rectissimè distinxerat, confudit, cum sensorium commune sit ipsa mens, ut demonstratum est. Et si distinctissime loqui velimus mens, anima, sensorium commune, τὸ ἡγεμονικὸν re ipsa conveniunt, considerandi modo differunt. Mens nempe absolute considerata substantiam cogitantem, partem nostri meliorem significat. Anima eandem substantiam, quatenus corpori viventi conjuncta est, & quatenus à dispositione partium, & metu fluidorum, nec non passionibus affici, atque iterum agere in corpus potest, τὸ θυμοειδὲς ἢ τὸ ἐπιθυμητικόν. V. *Galen. de Hippocrat. & Platonis decretis*. Sensorium commune significat eandem animam, quatenus ab objectis sensuum externorum afficitur, percipit, de iis judicat. τὸ ἡγεμονικὸν eandem mentem, sive animam, quatenus gaudet facultatibus principibus dictis, vel etiam in specie, quatenus regit, seu determinat spiritus animales. Adeoque non semel lapsus est *Cartesius* ; nempe cum



tres docuisset esse gradus sensuum) de quibus in superioribus vidimus) sensorium commune statuit corporeum, cui tamen non tantum primus, sed & secundus sensuum gradus conveniret. In eo etiam deceptus fuit *Cartesius*, quod sensorio communi tribuerit determinationem spirituum animalium versus musculos. Fateor quidem me eodem modo de sensorio communi egisse in superioribus, verum cum de vocis significatione, & Sensorio communi agerem juxta auctorum mentem, non potui ab eorum placitis recedere. Hic autem locus jam postulat, ut specialius & verius hæc determinem. Determinatio spirituum animalium ἀπὸ τῆς ἡγεμονικῆς in specie, hoc est à voluntate dependet. Iterum dico: *Anima imperio, corporis servitio magis utimur*. Voluntas autem proprie non ad sensorium commune, sed ad facultates principes pertinet. Hæc qui attentè velit considerare, is videbit, quantum juvet claros formasse conceptus. Diu ego me torsi, antequam hoc negotium totum perspexerim. Possent hæc multis confirmari, & nec injucunda, nec inutilia adduci, si necessitas id postularet. Juvat tantum nunc ex *Antonino* de rebus suis, hætenus dicta illustrare. Cujus Lib. 11. §. 2. hæc sunt verba. Ὅτι τίποτε τῆτό ἐστι σὰρκίᾳ ἐστὶ ἢ πνεύματιον ἢ τὸ ἡγεμονικόν. Non putavit Imperator, se ex tribus diversis substantiis constare, sed è carne seu corpore & mente, quæ ambo conjuncta variis passionibus agitantur. Eandem rem clarius & aliis verbis expressit l. 111. §. 16. Σῶμα, ψυχὴ, νῆς. σώματ' αἰσθήσεις, ψυχῆς ὁρμαὶ, νῆς δόγματα. Iterum tria diversa vocabula, res eadem, ordo idem. Ad corpus pertinent sensoria externa, ad animam passionibus, ad mentem opiniones. Quod si vocabula essent numeranda, non sensus respiciendus & diversa relatio, homo è pluribus constaret. Viden' Imperatorem eadem sensisse quæ ego in superioribus explicui? Noverat hominem ex duabus substantiis constare, corpore, & parte meliori, mente, statuit tamen tres, videlicet, quia ex harum unionem oritur utriusque in utramque actio & passio, unde animi pathemata. hæc ad ψυχὴν pertinent. Non dissimilis est tertius locus: l. XII. §. 3. Τρία ἐστὶν ἐξ ὧν συνέστηκεν σῶματιον, πνεύματιον, νῆς· τῶν τ' ἄλλα μέχρι τῆς ἐπιμελεῖσθαι δεῖν σὰ ἐστὶ τὸ ὃ τρίτον μόνον κυρίως σόν. Quia



Quia sc. facultates principes intellectus & voluntas absolutè ad mentem pertinent : ad corpus extensio ; quodque adeo ab occurſu corporum aliorum lædi, & ægrotare poteſt, tandem vitâ privari debet. Hoc igitur non eſt in noſtra poteſtate, juxta *Stoicos*. Non ſunt etiam in noſtra poteſtate paſſiones, & illa quæ ex utriuſque unionem reſultant. Vid. *Gatakerum* ad h. l.

Poſſent longè plura adduci, ſi neceſſitas id poſtulareret, ſed hæc ſufficiant ut conſtet *Carteſium* non tantum hæc ignorâſſe, ſed & confuſiſſimè de ſensorio communi egiſſe. Res ferè eodem modo hic ſe habet, quam ſi quis velit contendere, Priſcos & vulgares Philoſophos diſtinctum formâſſe mentis humanæ, & animæ brutorum conceptum, cum dicerent, *Hominem eſſe animal rationale* : eo enim ipſo quod rationale exiſtimarent conſtituere differentiam ſpecificam hominis, non obſcurè ſignificarunt, ſenſationem, judicium, rationem & cogitationem adeo homini convenire, ut ea omnibus aliis animantibus ſit deneganda. Atqui in ſuperioribus vidimus illos, ubi de ſenſu communi agunt, brutis etiam tribuiſſe perceptionem, cogitationem cum conſcientiâ, judicium & ſic porro. Non poteſt aliquis exiſtimari ſententiam aliquam noviſſe, quando eam manifeſtis verbis nequaquam docet, ſaltem quando is talia amplectitur & inculcat, quæ cum ſententia propoſita omninò pugnant. Eſt & aliquando Olitor valdè opportuna locutus, eſt tamen & remanet Olitor, nemo facile dixerit Olitorem aut Philoſophum eſſe, aut in Phyſicis & Ethicis verſatiſſimum. *Jacobus Rohaultius*, quamvis in tractatu Phyſico *Carteſii* veſtigia legat, tamen dubitans ſuam in re arduâ proponit ſententiam. Part. I. c. 31. *Ex oppoſito veriſimile eſt, ut in nobis unica eſt ſenſatio, quæ ſequitur ad duas impreſſiones ab eodem objecto factas, in exteriora duo organa ſenſuum, quæ afficiuntur, adeſſe quoque in cerebro locum ſingularem, in quo concurrunt duæ hæ impreſſiones: Arduum forte fuerit locum illum determinare: ſed, ſive parva ſit glandula, a medicis Conarium appellata, vel quapiam alia corporis pars, vix concipi poteſt collectionem poſſe fieri, niſi quapiam re æquivalente conſtituta.* &c.

Eâ in re non minus deluſus fuit *Rohaultius* quam *Carteſius*, quod partem unam corporis ſolidam inveſtigandam putaverit



in qua mens tanquam in loco sentiret, hoc est, perciperet, quo mens tanquam organo uteretur. Unum aliquod requiritur: mens est illud unum, mens est sensorium commune: mens non utitur ad sensationem absolvendam organo aliquo corporeo, per se ipsam sentit, ejusque sensationis est conscia, per se ipsam judicat, nisi quod ex unione mentis cum corpore sequatur, spiritus animales immediatè afficere mentem; adeoque mens dicitur sensorium commune, in quantum motus corporeos spirituum animalium recipere potest. Mens est organum organorum. Mens non est in loco, quoniam nullam extensionem in suo conceptu involvit; mens ibi est, ubi agit, h.e. cogitat, percipit, sentit, vult, judicat.

Dicet fortasse aliquis, se illa novisse, quandoquidem hæc innituntur distinctioni, quæ inter mentem & corpus intercedit. Dices: scivimus motus non posse tribui menti, cogitationes substantiæ extensæ. Verum non omnis, qui triangulum rectangulum vel vidit, vel finxit, statim 47. *propof. l. I. Euclidis* novit, nec fundamenta quibus illa innititur. Ita eodem modo, quamvis hæc veritas adeo manifesta sit, ut non videatur tam diu demonstratione potuisse carere; tamen, quantum ego quidem scio, à nullo hætenus in aprium deducta fuit, vel si à quopiam demonstrata fuerit, velim mihi monstrari illum virum, qui hæc primus dixerit, gaudebo me viri ingeniosi vestigia calcasse. Verum tu, qui putas tibi hæc fuisse perspecta, dicam quæ ignoraveris. Ignorasti motus spirituum animalium immediatè afficere, adeoque velut terminari in ipsam mentem. Ignorasti te oleum & operam perdere, quando in brutorum cerebris quæсивisti sensoriam partem solidam. Ignorasti sensorium commune sensuum externorum aciem effugere, sola ratione pervideri. Ignorasti bruta carere sensorio communi. Ignorasti soli homini concessum esse gaudere sensorio communi. Ignorasti mentem esse sensorium commune. Ignorasti sensorium commune non esse organum corporeum. Ignorasti organum corporeum statuendo, te corpori tribuere id, quod ad mentem pertinet, id quod cogitationem in suo conceptu involvit. Ignorasti mentis sedem & locum non esse quærendum. Ignorasti mentem & sensorium commune pronuncia-



tione quidem; non autem re ipsa differre, nisi in quantum sensorium commune involvit in suo conceptu relationem ad unionem mentis cum corpore, cum mens sit appellatio absoluta. Non existimasti corpus fluidum, quales sunt spiritus animales, immediate mentem afficere. Existimasti tibi corpus aliquod solidum & unicum in cerebro esse quærendum, in quo tanquam in sede & loco mens operationes suas exercent. Quamvis ergo in genere sciveris, hominem è duplici constare substantia, mente & corpore. Quamvis sciveris cogitationem menti, extensionem corpori convenire, quæ siviisti tamen in cerebro partem solidam, quæ sensorii communis officio fungeretur, h. e. quæ sentiret, in qua ideæ formarentur, quæ cogitaret. Quicquid tergiverferis, tales formasti conceptus confusos. Hæc sunt enim, quæ in conceptu sensorii communis involvuntur. Hæc sunt sine quibus sensorii communis idea formari non potest. Ut autem appareat, me super hoc negotio attentius cogitasse, dico tale corpus solidum dari nec necessarium, nec possibile esse. Non est necessarium, quandoquidem spiritus non minus afficere mentem possunt, quam corpus aliquod solidum. Non est necessarium, quandoquidem in spirituum motu vario facilius innumeras motûs differentias possumus concipere, quam in corpore solido: quemadmodum aëris diversum motum, in nobis oculos, aures, nasum, membra corporis nostri respectu humiditatis, siccitatis, caloris, & frigoris diversimode movere animadvertimus. Deinde, si talis pars sit necessaria, cum in superioribus demonstratum sit, illam non dari, aliquid, quod ad perfectionem corporis nostri requiritur, desideraretur, id quod est admodum absurdum. Deus enim corpus nostrum ita affabre concinnavit, ut nihil (non loquor de peccato imputato, vel inhærente, loquor de perfectione omnium membrorum) ipsi desit. Non potest etiam talis dari pars, quandoquidem parti cogitanti hoc modo tribueretur extensio, vel parti extensionis cogitatio, id quod contradictionem implicat. Non datur ergo, nec dari potest tale sensorium commune quod, extensione gaudens, tamen perceptionis cum conscientia esset capax.



tissimi opinionem convellere sim aggressus, quam illi sibi arctè tenendam acriterque defendendam putant, & objicient: non videris tu quidem *Cartesii* mentem plenè affecutus: ipsi fuit animus explicare mechanicè actiones omnes humanas; adeoque supposuit, machinam quandam, huic nostræ per omnia similem, mente tamen destitutam, ut doceret, quo pacto è mechanica structura partium solidarum, & motu fluidorum actiones, quæ tum in homine, tum in brutis observantur explicari possent. Respondeo: Amicus *Plato*, amicus *Socrates*, magis amica veritas: probè ego novi *Cartesium* in principio tractatus de *Homine* fundamenti loco statuisse, omnes homines ex anima & corpore esse compositos, adeoque necesse esse, ut corpus primo separatim, deinde seorsim anima quoque describatur & tandem ostendatur, quomodo utramque illam substantiam conjungi atque uniri oportuerit, ut homines nobis similes constituerentur. Verum cum explicationem machinæ, huic nostro corpori planè similem, proponere in animum induxisset suum, atque actiones ex structura dependentes, explicare, conceptus hic mechanicus ipsi adeo arrisit, ut non animadverteret, se sensim eò delapsus esse, ut ex illa structura explicationem moliretur earum quoque actionum, quæ ab unione mentis cum corpore dependent, persuasus nempe, se sensationes, & motus voluntarii determinaciones, ex eodem fonte debere deducere. Hinc statuit glandulam pinealem esse imaginationis & sensus communis sedem, art. 31. impressionem idearum in organo sensus communis & imaginationis, retentionem idearum illarum in memoria &c. naturaliter ex organorum ejus dispositione sequi, adeo ut propter has non sit necesse aliam in ipsa concipere vegetativam, aut sensitivam animam. &c. art. ult. Atqui hoc ipsum est quod *Cartesium* in errorem impulit, quod etiam actiones illas humanas, quæ absque cogitatione intelligi non possunt, quæque ad sensum communem pertinent, à structura partium illius machinæ esse deducendas putaverit. Quæ Veteres tribuerunt animæ sensitivæ, ille conatus est explicare è structura machinæ: sed Veteres brutis tribuerunt sensum communem percipientem & judicantem, itaque *Cartesius* illos non obscurè imitatus est, quando imaginationem & memoriam è structura organorum deduxit. Hinc nata est tractatio sensorii communis, quod in brutorum cerebro non minus quam humano reperiri judicabat.



bat. Atqui in superioribus vidimus, bruta sensorio communi destitui, homines eo solo gaudere, quandoquidem è mente cogitante & corpore organico unitis, compositi sunt. An cogitatio de rebus præteritis brutis tribui potest? Atqui memoria nihil aliud est, quam rerum absentium repræsentatio tanquam præsentium, quæ cogitando peragitur. An imaginatio rerum præsentium, hoc est, perceptio cum conscientia, a partibus extensione sola gaudentibus dependet? Hisce figura varia & motus, cogitatio autem minimè tribui potest. Delusus itaque fuit *Cartesius* quando memoriam & imaginationem, adeoque animam sentientem omnibus animalibus tribuit. Homines soli, quatenus mente corpori unita gaudent, imaginantur & percipiunt res præsentis, cogitant de absentibus & præteritis. Si quis sentientem animam, & memoriam brutis tribuere velit, is cogitet, hæc vocabula adeo diversa in brutis & hominibus significare, ut unico conceptu distincto percipi non possint. Brutorum omnes actiones sunt automaticæ, à dispositione partium solidarum, à motu fluidorum procedentes: humanæ, in quibus est imaginatio, memoria, sensus communis, ab unione substantiæ cogitantis & extensæ dependent. Hæc toto cœlo differre, quilibet facile perspicit. Noverat hæc *Cartesius* in genere, sed insensibiliter, inescatus conceptu mechanico, delapsus est in errores, quos sibi evitandos decreverat. Videtur concepisse mentem in hoc tractatu tanquam substantiam cogitantem corpori sentienti, memoriâ & imaginatione gaudenti, veluti superadditam, cum cogitandum fuisset, sensum communem ab unione mentis cum corpore dependere, adeoque mentem esse ipsum commune sensorium, quatenus ea corpori organico viventi conjuncta est. Vita, motus, calor, à pressione sanguinis, & impetu spirituum animalium; sensus autem communis & memoria non ab iisdem, sed ab unione pendent. Quæ è mechanicâ partium structurâ sequuntur, clarè intelligimus, quæ ab unione substantiæ extensæ & cogitantis sequuntur, nullus mortalium unquam clarè & distinctè vel concepit vel explicuit. Quis unquam cogitando affectus est, quo pacto motus corporeus afficiat mentem? Quis unquam explicuit, quo pacto mens occasione varii impulsus organorum exteriorum, & diversi motus spirituum animalium, diver-



versimodè percipiat, adeo ut illa perceptio, nunc visus, nunc auditus nomine debeat donari? Quis unquam explicuit, quo pacto ad voluntatem mentis, spiritus animales nunc in loquelæ, nunc in motus voluntarii instrumenta determinantur? Itaque eo ipso quod conatus sit sensorium commune explicare è mechanicâ structurâ partium, clarum est, illum à veritatis tramite toto cœlo aberrâsse, atque adeo hanc objectionem eum ab errore non tantum non vindicare, sed & confusionis convincere. Brutorum actiones naturales & vitales cum hominibus conveniunt, animales longissimè à se invicem distant. Dixi ego, praxin hanc veris œconomiae animalis principiis esse innixam, non autem œconomiae animali, quandoquidem principia generationis, nutritionis, accretionis conveniunt, œconomia ipsa, quatenus ea sensum & motum complectitur, longissimè distat. Sensus & motus voluntarius in homine cogitationem involvit, sensus brutorum adeo differt ab humano, ut sensus nomen non mereatur: motus eorum omnis est automaticus. Qui brutorum œconomiam animalem explicaturus est, is ostendat, quomodo motus in sensoriis aut membris excitatus, diversam agitationem spirituum in medullâ oblongatâ producat, aptam ciendis actionibus, quæ cum nostris actionibus voluntariis; externâ specie perbellè congruunt. Dico actiones brutorum externa specie tantum convenire, quandoquidem differentia ex eo evadit manifesta, quod actiones brutorum nunquam virtutum aut vitiorum nomen, numquam præmium & pœnam, instar actionum humanarum, mereantur, quia scilicet absque cogitatione & conscientiâ peraguntur. Nunquam canis mœchatur, incestum aut furtum committit, nunquam pudore suffunditur. Quare? Fertur cœco naturæ impetu. Quemadmodum radii luminis è speculo necessariò reflectuntur, ita motus sensoriis externis impressus, spiritus animales commovet & versus has vel illas partes impellit, uti forsan alias latius explicabo. Homo si eadem patret & committat, mœchus est, incestus, fur. Homo nisi oculos eruat, manus amputet, membra, quæ in terris sunt, occidat, officio suo non defungitur. Quare? Quoniam intelligit, percipit, conscientia tanquam lampade Dei gaudet. Hinc actiones ejus, quamquam externâ specie si-



miles, brutorum actionibus, ex alio oriundis principio, dissimillimæ sunt. Itaque quocunque modo sententia nostra examinetur, quacunque cum opinione comparetur, manifestum evadit, eam non tantum non labefactari, sed magis magisque explicari & confirmari.

Transitio.

Explicui hætenus Sensorium Commune, objectionibus & difficultatibus satisfacere sum conatus. Fusior fui paululum, quod tamen in materiâ difficili, & viâ inviâ evitari vix potuit. Arduus & ingens labor, sese à veteribus præjudiciis liberare. Arduum etiam præconceptas & penitus hærentes opiniones ex aliorum animis evellere. Requiritur tempus, antequam quis inveteratis opinionibus, quantumvis falsis, remittat nuncium. Itaque & proponenda, & illustranda, & vindicanda fuit veritas. Quod si quis non sit mecum ejusdem sententiæ, is sanè fateri cogetur me ipsi ansam dedisse cogitandi de rebus, ad quas fortè nunquam fuerat satis attentus. Ita in profundissimo latens puteo veritas tandem eruitur. Ego saltem, me verissima proposuisse, persuasus, hæc premere nolui. Quod si quis aliorum laboribus obtrectare velit, is suo fruatur sensu, vel meliora afferat: *tum canent Cygni cum tacebunt Graculi.*

Quando  
sensus abo-  
leatur?

Ut è diverticulo in viam redeam, spiritus animales sensorium commune, hoc est, mentem non afficiunt, ad sensum producendum, quando sensuum externorum nervi ita comprimuntur, ut motus, spiritibus animalibus ab objectis externis impressus, in mente perceptionem immediatè producturus intercipiatur, antequam ad interiora cerebri perveniat. Illud enim accuratè tenendum est, mentem in oculis non videre, nec in auribus audire; sed requiri, ut motus sive undulatio spirituum, per oblongos nervorum tubulos, ad cerebri partem medullarem & medullam oblongatam, horum penum, deferatur, ut sensatio in sensorio communi, seu ipsa mente, excitari possit. Hoc patet in Gutta serena: oculus tum satis benè constitutus est, visus tamen omnino abolitus, quia in nervis opticis est vitium, motum spirituum animalium versus interiora cerebri impediens.

Quando  
motus vo-  
luntarius?

Ubi autem sensus interni aboliti sunt, ubi spiritus animales mentem afficere non possunt; tum etiam mens, pro voluntatis

tis



tis arbitrio spiritus in musculos determinare non potest, sed subsequitur, vel motus automaticus, vel convulsivus. Hæc ita proportionata sunt, ut abolitio unius necessariò abolitionem alterius habeat comitem. Et revera in sensu, quatenus ad mentem pertinet, spiritus animales agunt in mentem, in motu voluntario mens, determinando eosdem, agit in corpus, in qua mutuâ actione & passione unio mentis cum corpore consistit. Quando autem mens spiritus non determinat, ipsi autem in cerebro satis copiosi adsunt, non mirum est, si accedente causa satis validâ, illi in nervos confuso & violento motu propelli possint.

*Hippocrates in libro de Morbo sacro, cerebri constitutionem explicat.* Cerebri fabrica. explicanda nobis est quoque summi Conditoris in fabricando cerebro sapientia. Non tantum totam molem in Cerebrum, Cerebellum & Medullam oblongatam distinxit, verum etiam cerebrum in duo hæmisphæria, atque utrumque horum, in binas veluti provincias (utor verbis *Willisi*) distinxit. Distinctio hæc juxta nervos opticos conspicua est. Insuper cerebrum non est superficie æquale, sed gyris quamplurimis profundissimis conspicuum, uti omnibus, qui cerebri fabricam accuratius contemplati sunt, perspicuum est. Non inquiram jam exactius, cui muneri hæc omnia inserviant, illud solummodo animadvertere libet, hos omnes sulcos inservire transmissioni vasorum sanguineorum copiosorum. Ita videre licet arteriarum carotidum ramos insignes, ductu obliquo cranium perforantes, non tantum nervos opticos undique veluti circuire & amplecti, sed & ramificationes insignes versus anteriores, & laterales cerebri divisiones dimittere. Subeunt vasa hæc omnes cerebri sulcos, membranas cerebri, cerebri corticalem substantiam ita perreptant, ut ea sit veluti artificiosissima textura vasorum minimorum. Ne autem maximè necessario & copioso hoc latice destitueretur cerebrum, carotides & vertebrales arteriæ sibi mutuo inosculantur, & cerebri exteriora & interiora irrigant.

Defertur sanguis per arteriarum carotidum & vertebrarum majores propagines versus cerebrum, dirimuntur iidem rami in minores, ac rursus minimas ramificationes & fibrillas, ut

Ufus.



ut calorem nativum, in viscere principe, non tantum conservarent, & spiritus animales copiosos producerent, versus omnia viscera, versus membra corporis nostri universa distribuendos; verum etiam ut hominem, à laboribus & curis exhaustum & fractum, blando somno refocillarent.

Status præternaturalis.

In memoriam autem revocantes ea, quæ de somno naturali dixi, partem scilicet cerebri exterioriorem & corticalem versus inferiorem & medullarem blandè premi, facilè concipimus, si in statu p. n. transitus sanguinis per vasa capillaria fiat difficilior, arterias hæc admodum repleti, adeoque minores illorum fibrillas & majores truncos distendi, unde sensuum internorum & externorum exurgunt feriæ; premuntur enim vehementius tum corticalis cerebri substantia, tum medullaris, tum nervi organorum sensuum externorum, præcipuè oculorum. Cum autem pressio hæc impediatur, quo minus impressiones ab objectis externis sensoriis illatæ ad interiora cerebri, ubi mens eas percipit, deferri possint, cumque itidem hæc pressio impediatur, quo minus spiritus animales versus sensoria externa sufficienter, & placidè distribuantur, patet, pro causarum harum majori vel minori activitate, magis vel minus lædi sensuum internorum & externorum functiones.

Motus convulsivus.

Non sufficit autem perspectum habere, quomodo sensus interni & externi intercipientur, sed & novissè oportet quomodo convulsivi motus producantur, qui in eo differunt à voluntario, quod sint magis vehementes ac violentis & quod variis succussionibus membra per intervalla convellant. Abolentur quoque sensus in Caro & Apoplexia, non tamen semper succedunt convulsiones. Magna est affinitas respectu symptomatum & causarum, non tantum inter affectus cerebri naturales & præternaturales, inter somnum naturalem & præternaturalem, inter Lethargum, Coma somnolentum, Carum, Apoplexiam & Epilepsiam (id quod etiam à *Foresto* observatum est in Scholiis ad obs. 3. l. x.) adeo ut sibi mutuo succedant, & copulentur; est tamen etiam quædam differentia, quæ hic explicanda est, prout in morbo caduco locum habent. Conveniunt in eo omnes quod sensus vel magis vel minus, una cum motu voluntario, aboleantur, differunt, quod hic adsint

mo-



motus vehementissimi, & per intervalla repetentes, cum præternaturali musculorum contractione. Et vehementia quidem innititur hoc fundamento, quod motus celeritas & impetus debeat compensare angustiam loci, per quam liquores feruntur. Itaque consideranda est proportio quæ intercedit inter cerebri molem universam, & medullæ oblongatæ ac spinalis, illius respectu, multo minorem, nec non nervorum exiguos tribulos: unde sequitur, si cerebrum comprimatur, & spiritus exprimantur versus nervorum tubulos exiguos, illos debere magno impetu ferri versus fibras viscerum & musculorum. Ab influxu hoc versus viscera, sequitur cordis celerior & vehementior contractio, atque sanguinis per universum corpus pressio & propulsio. Si autem ab influxu spirituum fibræ musculorum tensæ, progressivum sanguinis motum impendant aliquomodo, & sanguinis motus rapidior vehementius musculos repleat, atque eosdam versus caput adducat, necessariò muscoli membra, quibus tendo insertus est, validissimè ad se rapient, adeoque motus membrorum sequetur violentus.

Hæc mihi videntur facilia intellectu, major est difficultas, ut intelligamus, quomodo succussiones hæ violentæ aliquando remittant, aliquando iterum repetant, & miris modis ægrum exagitent. Itaque observandum est, naturam partibus laborantibus omni molimine succurrere: seu eam esse corporis nostri texturam & liquidorum motum, ut, si aliqua pars in summas redigatur angustias, & illius difficultatis sensus aliquis, licet obscurus & confusus, anxietate, dolore, difficiliore transitu in aliqua parte, ad cerebrum deferatur, statim eò spiritus animales copiosius confluant. Ita licet animadvertere in moribundis, naturam magno molimine sanguinis motum per pulmonem, jam difficiliorem redditum, promovere. Nihil amplius sentiunt agonizantes, pulsus vix aut ne vix quidem observatur, spiritus animales sunt paucissimi, vel languidi, extrema frigent. Si rationis solummodo dictamen sequi placeret, videretur, omnem motum musculorum debere esse sublatum; verum secus sese habet. Respiratio cum aliqua vehementia peragitur, muscoli huic inservientes pectus elevant & contrahunt, ut, cum respiratio ordinariè quietè peragatur, in

Quomodo  
is in morbo  
caduco pro-  
ducatur?



hoc casu sit laboriosa & impetuosa : adeo ut omnes in universum spiritus superstites in eo solo videantur occupari , ut ne respiratio , & ab hac dependens trajectio sanguinis per pulmonem , omnino intercludatur. Qua ratione hæc fiant , jam explicare non vacat , cum illud non difficulter concipiatur , si quis probè perspectum habeat , nostrum corpus esse machinam pneumonico hydraulicam , cujus vita & actiones à sanguinis pressione & respiratione pendent. Sufficit observâsse hæc ita sese habere. Non sine ratione hoc exemplum adduxi , quandoquidem in Epilepticis , cum pulsu frequentiori , non rarò observatur spuma circa os , & respirationis difficultas. Hinc colligo , in Epilepticis sanguinem per pulmonem difficiliter circulari , saltem in Epilepsiâ à repletionem , ut autem natura huic incommodo subveniat , spiritus animales copiosius per nervos vagi paris , tum etiam spinalis medullæ non paucos distribuit. Si autem à cordis agitatione majore , sanguis difficiliter per pulmonem trajiciatur , in quo mali prima labes non hæret , quanto difficiliter idem ille sanguis per cerebrum , ejusque membranas distribuetur ? Itaque huic parti laboranti etiam opem ferre studet natura ; qua autem ratione , cum muscoli , caput & cranium investientes , non videantur aliquid opis posse adferre ? Subvenit natura eo modo quo potest , scilicet fibras utriusque membranæ cerebri contrahendo , & suo modo convellendo : unde tum spiritus vehementius & successive per reciprocas succussiones versus partes inferiores propelluntur cum maximo impetu. Hinc jam insultus & cessationis ratio explicari potest. Nempe ubi cerebri pia meninx sese contrahit , spiritus animales versus medullam oblongatam & spinalem copiose propelluntur , quandoquidem tubuli sunt repleti , & cerebri moles cum impetu contracta pondere suo vehementer propellit eodem. Duræ meningis alia est ratio : ea cranio arctissime annexa , non videtur cerebrum multum posse comprimere , nisi quatenus processus versus falcem & cerebellum dimittit. Facit tamen aliquid , quia per fibras tendinosas sinus contrahit , adeoque sanguinem expellit , unde tum circulatio aliquo modo promovetur , & paroxysmus desinere , vel minori impetu perfici incipit. Prout autem spiritus animales , pro variâ corporum dispositione , in  
hos



hos vel illos musculos & viscera impetuose, & inordinate influunt, ita hæ, vel illæ partes magis vel minus afficiuntur. Quandoquidem autem cor & sanguis eodem tempore admodum agitated est, proportionaliter vis debet intendi, prout spiritus ad aliquantulum cohibendum sanguinis motum progressivum in his aut illis musculis, sanguinis autem ad eundem continuandum, impetus sunt majores.

Hinc jam patet quare Carus, Coma somnolentum, Lethargus, Apoplexia cum Epilepsia magnam habeant affinitatem, quomodo iterum distinguantur: item quomodo Epilepsia symptomatice, de qua, ut & Apoplexiâ in sequentibus, non raro morbis soporosis copulentur. Nempe in omnibus hisce casibus cerebri ejusque vasorum & membranarum major vel minor est repletio, hinc etiam major vel minor mentis obnubilatio, quando autem hæc violentior contractio membranarum cerebri non adest, adest tantum stupor & somnus præternaturalis, ubi autem tanta adest repletio, ut contractio fibrarum sequatur, sequitur etiam propulsio violenta spirituum animalium & motus convulsivi, seu Epilepsiæ symptomatice. Atque ita patet, ex meis fundamentis, convenientiam & nexum naturalem horum symptomatum, item differentiam, quæ inter illa intercedit, clarissimè explicari. Hæc autem esse obscurissima, si hætenus inventæ hypothesæ admittantur, ii norunt, qui de hisce attentius cogitarunt.

Morborum  
soporoso-  
rum & con-  
vulsivorum  
differentia.

Explicasse mihi videor magnam partem definitionem Morbi caduci, explicui itidem, in quo consistat sensuum internorum abolitio, quod sit sensorium commune, & quomodo convulsiones abolitioni sensuum internorum jungantur. Explicui quæ sit convenientia & discrimen inter morbos soporosos & convulsivos, restat ut videamus quare adjunxerim in fine hunc affectum à repletionem potissimum originem ducere, cum antea contenderim à repletionem & inanitionem Convulsiones oriri?

Nempe quando Morbum caducum ab Epilepsiis symptomatice distinguimus, ad hoc caput tantum pertinet illud symptoma, quod illos, qui sibi & aliis videntur satis sani, affligit, per intervalla repetit, & aliquando per totam vitam perdurat, subsequente, sensim majori vel minori mentis hebetudine.

Morbus ca-  
ducus oritur  
potissimum  
à repletionem



Hujus autem tres præcipuè dari species existimo, nempe Morbum caducum à vitio cerebri dependentem: Morbum caducum ante eruptionem mensium aliquando infestantem, & Morbum caducum ab hisce vel illis partibus originem, ut videtur, trahentem. Omnes autem hi morbi caduci potissimum à repletionem, vel universali, vel particulari videntur originem fumere, nisi forte lypothymia vel syncope invadens faciat, ut affectus ad Morbum caducum ex inanitione non malè possit referri. Alias quædam Epilepsiæ symptomaticæ, uti videbimus, propriè & sæpe ab inanitione originem ducunt.

Morbus caducus à vitio cerebri.

Videtur mirum Morbum caducum pertinacissimum & curatu difficillimum esse morbum, cum tamen ita affecti munia sua quotidiana obeant, cibos appetant, benè digerant, egerant. Illud ex eo oritur, quod in hisce affectibus non tantum partes fluidæ, sed & solidæ male sint affectæ. Ego in talis, Morbo caduco vexati, capite inveni tumorem durum & rotundum. Eodem modo è *Rhodio Bonetus* refert, Epilepsiam obortam à carnosio tuberculo in cerebri ventriculo contento. *Sepulchret.* l. 1. Sect. xii. obs. 26. vide quoque obs. 27, 30. Ita *Falcoburgius* in dissectione cadaveris Epileptici, nullam aliam causam invenit, nisi ventriculorum cerebri angustiam. *Ibid.* obs. 28. Huc refer serum caput sæpe numero opplens. *Vid. ibid.* obs. 6. 10. &c.

Ante mensium eruptionem.

De Epilepsia ante pubertatem, & mensium eruptionem infestante agit *Hippocrates* Aph. 28. f. iii. & 7. f. v. Existimo autem hunc affectum potius ad Morbum caducum, quam ad Epilepsiam symptomaticam & hysterica referendam esse, quandoquidem hysterica Epilepsia post pubertatem non minus, quam ante pubertatem solet affligere: deinde quod non necessario huic malo hysterica symptomata conjungantur.

Per consensum.

Epilepsiæ ab his vel illis partibus originem ducentis memorabile exstat exemplum apud *Tulpium* obs. l. iv. c. 2. *Curtium Rogerium* uxore orbatum, ac moeste viventem invaserat morbus comitialis, sine ullo vel levissimo præfagio, sensit tamen insequentibus paroxysmos manifestam originem trahere è pollice pedis sinistri, indeque ab ipso articulo, vagum, ac oberrantem elevari vaporem, primum quidem genu, ac humero, deinde



de vero cervici, ipsique cerebro molestum, cum conspicuâ mentis labe, ac terribili nervorum contractione, reflexo capite versus dorsum, per eam convulsionis speciem quam Græci *ὀπισθοτόνον* vocant. *Sylvium* similem vidisse casum refert *Scenkius* L. 1. de Epilepsiâ obs. 17. vide quoque exempla alia Epilepsiæ è digito, manu, brachio, ore ventriculi suscitatae apud eundem obs. 6, 7. &c. Non succurrunt jam alia species, quin ad hæc facile reduci possint. Epilepsiæ ab Utero nullam facio mentionem, quandoquidem de Affectibus hysteris, quatenus convulsiones habent comites, *Willisi* exemplo, peculiari capite agam. Non facio mentionem Epilepsiæ symptomaticæ febrilis, vulnerum comitis &c. quandoquidem eæ proprie non possunt dici morbus caducus in specie, quia morbus caducus sæpius, & per intervalla invadit illos, qui sibi alias videntur sani, hæ autem Epilepsiæ species aliquando semel atque iterum invadunt, nec postea recurrunt. Epilepsiæ tamen è pollice pedis &c. fuit facienda mentio, ne viderer oblitus Epilepsiæ per consensum, cujus auctores solent facere mentionem. Vide *Zacutum Lusitanum* de Med. Princ. hist. 1. 1. hist. 18. 20.

Ostendendum jam est omnes has species potissimum originem sumere à repletionem. Nempe quando cerebrum, pars solida, vitiatam est, quando substantiam ejus tumor durus occupat, manifestum est, arteriarum propagines debere aliquomodo comprimi, adeoque sanguinis motum aliquomodo impediri. Hinc sequitur major repletio arteriarum carotidum, præcipuè, cum in tali casu succedat cordis celerior contractio, ut obstaculum illud removeatur. Tantum autem abest, ut obstaculum inde superari possit, quandoquidem tumor est induratus, ut hæc ipsa crebrior contractio multum faciat ad arterias, cerebri basin, substantiam, & membranas copiosè irrigantes, replendas. Hinc imprimis nervi optici premuntur & comprimuntur, scotomiæ oculis obversantur, uti ab auctoribus annotatum fuit, visus in paroxysmo omnino aboletur. Premuntur etiam alii nervi, imprimis his proximè accumbentes nervi oculorum motorii, hinc videre licet, oculos morbo caduco affectorum ante paroxysmi invasionem immo-

In morbo caduco, vitio cerebri producto, consideranda est repletio.



tos, & veluti rigidos persistere. Cum itaque hæc vasa cerebrum universum & membranas perreptantia repleta sint, premuntur substantia cerebri corticalis, tum medullaris, nec non medulla oblongata, sensus omnis perit, spiritus non determinantur motu placido versus musculos, sed vehementi & convulsivo, ægri concidunt, exprimuntur spiritus versus nervos per oculos, faciem, viscera, artus, distributos, cordis motus celeriter, & cum impetu perficitur, respiratio est vehemens & laboriosa, infimi ventris viscera etiam afficiuntur, artus convelluntur, manus claudit æger, pollices manui includit, pedes vehementer convellit, aliquando caput in filicem impacturus, nisi adstantes succurrant: plures non raro requiruntur fani, ut unius ægroti validos & convulsivos motus coerceant.

Nempe cum *natura*, observante *realdo columbo*, *semper conservandi operis sui studiosa*, ubi majus periculum impendet, ibi quoque *majora struat presidia*, in formatione partium, & statu naturali, ita etiam eadem impensè satagit laboranti parti succurrere. Hinc fibras meningum cerebri contrahit, ut id quod molestum est, excutiat: imo illa ipsa repletio vasorum ad contractionem facit. Quemadmodum enim motus musculorum ab impedito motu progressivo sanguinis, adeoque repletionem fibrarum muscularium, dependet, ita etiam contractio membranarum ab eadem repletionem fibrarum dependet, accedente, copiosiore spirituum animalium affluxu. A spirituum versus cor influxu dependet celerior & vehementior contractio ejusdem, adeoque sanguinis circulatio & pressio; cumque eodem tempore spiritus determinantur tumultuosè versus musculos, eorum fibras tendant, sequitur, motu progressivo vehementi cohibito, influxum sanguinis impetuosum quoque debere producere motum muscularem involuntarium, adeoque convulsivum. Quamvis enim determinatio spirituum in hos vel illos musculos causa sit, cur hi potius quam alii intumescant, quamvis etiam hic validus influxus sit causa majoris tensionis fibrillarum nervearum, vis tamen inflationis seu intumescentiæ musculorum, unde contractio, & motus artuum pendet, potissimum sanguini adscribenda venit. Itaque, cum in  
hoc



hoc casu, sanguis celerius circuletur, magis prematur, magis expandatur, non est mirum, motum muscularem tanta peragi vehementiâ, ut vires morbo caduco correptorum, sanorum vires longis parasanguis post se relinquant. Præterea si in memoriam revocemus ea, quæ de respiratione dixi, nempe quando sanguinis motus aliquomodo cohibetur per pulmonem, tum motum muscularem majori vi peragi, manifestum est, cum in hoc casu, transitus sanguinis per pulmonem sit difficilior, atque inspiratio laboriosa & vehementior, necessario vires debere esse majores. Confirmatur hoc *αὐτοψία*, nempe quando morbo caduco correpti vires suas exerunt, tum etiam validè inspirant. Habent hæc locum in morbo caduco, licet æger non sit plethoricus, ex eo, quod sanguinis motu per cerebrum aliquomodo difficiliore reddito, vasa arteriosa multum debeant repleri, quod si autem ad pravam hanc cerebri dispositionem accedat sanguinis in universo corpore copia, symptomata hæc omnia erunt graviora. Arteriæ carotides facilius & citius replebuntur, spiritus à depressione cerebri majori propellentur vi, magis agitabunt cor, sanguis majori vi versus pulmonem propelletur, adeoque vasa ejus magis distendet, respiratio tanto erit laboriosior. Turbulentus talis spirituum & sanguinis motus hic non supponitur à me, uti quidam falsa supponunt, verum ille sese pulsû facile manifestat, laboriosa respiratio in adstantium oculos etiam incurrit.

Atque hæc sufficere arbitror, ut pateat, in Morbo caduco à prava cerebri dispositione producto rectè considerari repletionem. Demonstrandum eandem illam repletionem habere locum in Morbo caduco, ante eruptionem mensium quibusdam contingente. Absolvemus hoc paucis in re manifestâ. Nempe ideo mensium eruptionem molitur natura, ut nimiam repletionem aliquomodo exhaustâ, tanto alacriores & vegetæ vivant foeminae, atque ad procreationem & nutritionem liberorum tanto sint aptiores. Quando de naturâ hoc pacto hic & alibi loquor, utor terminis & modis loquendi consuetis, non vi quomodo hæc sint intelligenda. Itaque quando hoc munere, hac evacuatione defungi non potest, corpus universum repleri nimium debet, adeo ut facile possint oriri symptomata

Morbi

Ut & in eo,  
qui ante  
mensium  
eruptionem  
contingit.



Morbi caduci, eo quo explicatum est modo. Oportet tantum considerare in hoc casu, sanguinem ordinariè esse magis viscidum. Eadem illa visciditas, quæ impedit ne sanguis per filamenta vasorum uteri effluat, etiam non satis aptum eundem reddit ad satis promptè pertranseundum minimas arteriarum carotidum propagines, adeoque repletionem earundem nimiam, & Morbum caducum producit. Quandoquidem tamen non omnes hoc morbo infestantur, sed aliæ his, aliæ longè aliis expositæ sunt symptomatibus, non negligenda est *ἰδιοσυγκρασία* & particularis cerebri ejusque vasorum dispositio, quæ procul omni dubio concurrat in illis, quibus hoc symptoma est familiare. Quod si causæ minus efficaces, feri copia, aut vasorum reptatus non admodum perversus tantum concurrat, erumpentibus mensibus juxta *Hippocratem*, cessare solet. Si vero vitium aliquod cerebri conjungatur magis noxium, per totam vitam affligere solet Morbus caducus, seu Epilepsia periodica.

De morbo  
caduco ab aliis  
partibus,  
ut videtur,  
originem  
ducente.

Major est difficultas explicandi qua ratione Epilepsia oriatur è pollice pedis, vel hoc, vel illo membro. Novi Auctores facere mentionem *veneni* membro tali *penitus insidentis*, novi eos facere mentionem halitus, vaporum è venenatâ illâ materiâ emissorum. Verum cum ego veritatem, non commenta anilia quæram, non debet videri mirum, si hoc negotium accuratius excutiam. Imponere potuerunt hæc dogmata ante detectam sanguinis circulationem, post eam detectam iis albus non potest adjici calculus. Itaque accuratè status controversiæ primum est determinandus, tum ostendendum, materiam talem venenatam pollici pedis (unico enim huic tantum, brevitatis gratia, immorabor exemplo) non potuisse insidere, nec exinde halitus emittere, quibus solis adscribenda esset Epilepsia. Non nego ægrum hunc *Curtium Rogerium* simile quid sensisse, non nego etiam de hisce symptomatibus fuisse conquestum, non nego insultum Epilepticum præcessisse hunc sensum, illud nego, è tali sensu rectè conclusum esse, materiam venenatam pollici pedis penitus insedisse, nego halitus hosce venenatos absque aliâ causâ produxisse hosce insultus. Medici quidem de tali causâ aliâ minus fuerunt solliciti,



ti, sibi imaginantes hos vapores omnino suffecisse ad sympto-  
mata hæc producenda; inde tamen, conclusio non valet,  
cerebri constitutionem fuisse laudabilem, nihil excrementitii  
in eo fuisse collectum. Ego puto has causas præcipuè respi-  
ciendas. Causas alias fuisse neglectas exinde patet, quod hi-  
storix plures existent de talibus Epilepsix speciebus, sed bre-  
viter tantum literis consignatæ, quasi res esset extra omnem  
dubitationis aleam posita, affectum hunc nullam aliam habere  
causam, quam vapores ex hac vel illâ parte elevatos. Vid. *Schen-  
kium*. l. 1. obs. 6, 7, 8, 14, 15. 17. &c.

Hæc ut fiant manifesta, non disputabo nunc philosophicè  
id quod nos sentimus, hoc est mente percipimus, aliud esse  
quam id quod in membris, & sensoriiis nostris contingit. Vul-  
neratur pars, cauterium admovetur, sentit æger dolorem aut  
æstum, cum tamen in parte affecta sit solutio continui, aut  
motus rapidissimus *subtilis aëris*, ut loquitur *Hippocrates*. Illud  
dicam, aliquando in nobis excitari sensum, qui, si ad veritatis tru-  
tinam examinetur, non videtur locum habere posse, cum opera-  
tiones corporis nostri mechanicè, hoc est, structuræ partium con-  
venienter, peragantur: unde evincitur explicationem talem esse re-  
jiciendam, quæ constructioni machinæ nostræ omninò repu-  
gnat. Id manifestum est in Catharris: laborat aliquis odontalgia,  
dicit sese sentire Catharros calidos, frigidos, in partem affectam de-  
labentes, cum tamen viæ, per quas defluere possint catharri tales à  
cerebro, sint nullæ. Itaque sensus, seu sensationes tales nos in erro-  
rem deducere non debent, uti ego illud forsitan, ubi ad Cathar-  
ros erit perventum, sc. Libro secundo, docebo. Itaque è  
tali sensu non potest concludi *vagum ac oberrantem elevari va-  
porem primum quidem genu, ac humero, deinde vero cervici ipsique  
cerebro molestum*: sed inquirendum est, unde ille sensus producat?

De sensatio-  
nibus in no-  
bis aliquan-  
do excitatis.

Verum distinctius negotium ipsum excutiamus. Nego  
venenum aliquod acre pollici pedis penitus insedisse. Quo il-  
lud probatur argumento? E sensu. Ego putem me evicisse,  
argumentum tale non procedere. Ut pateat venenum nullum  
pollici pedis insedisse, contendo nullas ejus notas in hoc casu  
fuisse conspicuas. Nullus manifestus dolor, nulla inflamma-  
tio, nullus tumor, nullum apparuit ulcus. Venenum totâ

De Veneno  
pollici pedis  
insidente.



substantiâ peccare dicitur, venenum partes, quibus insidet vel erodit, vel corrumpit, vel saltem malè afficit. Si *Mercurius sublimatus* fuerit assumptus, acerbissimum dolorem producit in ventriculo, ventriculum omnino corrodit, licet versus ventriculum continuò deferatur saliva, temperando veneno apta, licet oleum & liquores blandi assumantur, eidem scopo inservientia. Ergo ubi nulla talia symptomata, nulla signa insidentis veneni evadunt manifesta, nullum etiam in parte statuendum est venenum. Deinde quo pacto venenum hoc ad pollicem pedis fuisset delatum? An per arterias? An per nervos? An fuit generatum in pollice pedis? Quare à jugi sanguinis influxu non fuit vel penitus absorptum, vel etiam temperatum? Possent hæc latius deduci, verum hæc sufficere arbitror illi, qui præjudiciis minimè excæcatus, rem ipsam spectare voluerit. Si autem venenum ipsum pollicis pedis insederit nullum, clarissimum est, auram venenatam non potuisse elevari. Qua enim viâ vapores illi adscendissent? An per nervos? Atqui illi spiritus animales à cerebro versus membra deferunt. An per arterias? Atqui illi sanguinem à corde versus extremitates deferunt. An per venas? Atqui oportuisset vaporem illum fuisse acerrimum, qui sanguini venenoso, non tantum à pollice pedis, sed & omnibus aliis membris refluxo, confusus, non fuisset temperatus, antequam ad cerebrum esset perventum. An per vasa lymphatica? Atqui illa lympham quidem versus ductum chyliferum, non autem versus cerebrum deferre possunt. Concludo, cum venenum illud in pollice pedis fuerit nullum, cum halitus illi venenati cum structura & usu partium, atque sanguinis circulatione manifestè pugnent, non est explicatio satis commoda, ad formandum distinctum conceptum, quomodo morbus caducus in hoc casu producat?

Vera explicatio.

Si ergo hæc suppositio veneni, & halituum venenatorum examen sustinere non possit, age videamus, an explicatio possit excogitari, quæ hisce absurditatibus careat? Non erit hæc longè petenda, si tantum consideremus omnes Morbo caduco laborantes non semper, sed per intervalla tantum hisce symptomatibus infestari, unde rectè concludimus, licet dispositio ad hunc morbum adsit, eam tamen plerumque à causis externis,

vel



vel internis in actum deduci. Quamvis tuberculum in cerebro lateat, quamvis ventriculi sint angustiores, quamvis latex serofus copiosior cerebrum premat, non tamen semper convellitur æger, ubi sanguis moderatè & blandè movetur, quando arteriarum carotidum ramuli majores aut minores non ita replentur, ut sensus aboleatur, ut motus subsequantur convulsivi. Illud tum demum contingit, ubi sanguis à causa externâ vehementius agitatur, in quo casu obstaculum illud cerebri, impediens facilem circulationem, repletionis majoris arterio-  
larum, adeoque depressionis cerebri est causa. Ita notissimum est, quosdam ex animi commotione, ab æstu, ab odoribus suavibus, aut etiam fœtore, quosdam ab ebrietate, repletione, &c. in paroxysmos convulsivos incidere. *Curtius Rogerius* igitur laboravit morbo caduco à repletione, sanguis fuit glutinosior à mœrore, copiosior à defectu exercitii &c. serum fortè copiosius in cerebro aggestum, vel fortè aliæ causæ accesserunt, quæ non satis exactè annotatæ sunt. Itaque quando sensum illum persentire cœpit, commotus & metuens paroxysmum, eo ipso ad paroxysmum fuit redditus dispositus. Quid? quod sanguis, fortè frigidior, à pollice pedis per venas sursum delatus, aliquam circulationi immutationem afferre potuit. Etenim non ulla commodior, mihi videtur hujus sensus explicatio, quam si dicamus, eam eodem modo contigisse, quemadmodum in febrium intermittèntium principio, primum conspiciuntur ungues livere: postmodum ægroti conqueruntur febrem ab extremitatibus versus lumbos serpere, tandem symptomatibus variis futuram molestam. Itaque & hæc morbi caduci species confirmat meam sententiam, scilicet, morbum hunc potissimum à repletione originem ducere. Repletionem autem nimiam, & quidem fortè feri majorem habuisse locum in hoc ægro, curationis ratio perspicuum reddit; Quæ ad curationem in usum sunt vocata V. S. Cathartica, cucurbitulæ angustiores, ferrum candens, brachiorum & crurum manantia ulcera per tres menses, ea omnia apta nata sunt plenitudinem nimiam expugnare. Quæ hæcenus dixi ex eo confirmantur, quod mihi narravit Medicus longa praxi exercitatus, simile quid alii ægroto accidisse,



qui ab eo tempore quidem à paroxysmis morbi caduci immunis, verum semper mente fuit hebetiore. Forte serum mansit satis copiose aggestum in cerebro, ita tamen, ut novos paroxysmos Epilepticos periodicos excitare non valuerit. Saltem mentis hebetudo evincit, cerebrum ipsum ab omni labe non fuisse prorsus immune.

Quomodo  
repletio sit  
intelligenda?

Videor mihi sufficienter evicisse, in omnibus Morbi caduci speciebus potissimum repletionem esse respiciendam, quæ tamen ita explicanda est, ut simul debeat considerari contractio membranarum cerebri, cujus in superioribus est facta mentio. Repletionis & inanitionis conceptum Hippocraticum in morbis cerebri maximi usus, retinui, ut pateat, plurima ab auctoribus prolata examen sustinere non posse, causas has obvias sufficere. Quandoquidem tamen repletio in diversis cerebri affectibus habet locum, ut discrimen, quod est inter morbos convulsivos, & reliquos, in quibus convulsiones absunt, appareat, consideranda est hæc membranarum contractio. Quamvis enim *Baglivo* in iis, quæ de *fibra motrice* memoriæ prodidit, non assentiar, illud tamen verissimum est, non semper solum considerandum esse partium fluidarum vitium, sed insuper solidarum texturam, ut multorum morborum genuina pernoscat indoles. Illud itidem verissimum est, fibras membranarum sese variè posse contrahere. Apparet illud manifestè tum in aliis casibus, tum in mactatione animalium. Si enim diligenter attendas, post mortem & eviscerationem eorundem, crebra adhuc conspicitur membranarum contractio. Ita mihi videtur omninò verisimile, membranas cerebri, à nimia repletionem vasorum arteriosorum malè mulctatas, fibrarum contractione conari excutere molestiam illam, atque hac eadem contractione cerebrum comprimere, nec non spiritus animales, tubulos medullares replentes, expellere turbulentè versus viscera & musculos, atque ita excitare motus convulsivos vehementissimos. Movetur cerebrum, in statu vario observatur systole & diastole, id quod *Realdus Columbus* rectè annotavit l. 1. c. 5. de re anatomicâ; his verbis: *In bregmate, cum adhuc molle est, Systolen ac Diastolen planè perspicimus, id quod nobis optimè confirmat, perpetuo constrictionis ac dilatationis motu*



*motu cerebrum donari.* Movetur cerebrum in statu ægro in vulneribus capitis, ejusque membranarum, quæ non raro convulsiones excipiunt. Nempe ubi membranæ cerebri à fragmento osseo premuntur & irritantur in vulneribus capitis, facile convulsio sequitur, quia spiritus animales, ad partem affectam copiosius confluentes, tendunt fibras nerveas, sanguinis motum progressivum aliquomodo sufflaminant, ac contractionem fibrarum motricium producant. Quid ni in Morbo caduco contractionem convulsivam statuas, ubi naturaliter systole & diastole habet locum?

Contractio hæc convulsiva excutit quicquid cerebro molestum est, constrictione vasa deplet, sinus adducit, sanguinem impetuosius versus cor propellit, unde circulatio & pressio sequitur facilior. Arteriæ quippe, sinus aliquomodo exhaustos offendentes, sanguinem non ita difficulter propellunt, unde depressio cerebri & nervorum imminuitur, adeoque sensuum internorum actio, abolita ad tempus, iterum restituitur, & paroxysmus cessat. Et hæc mihi videtur vera esse causa, quare in Morbo caduco convulsionibus cessantibus iterum excitentur ægri, & ad munia sua redeant.

Quomodo  
paroxysmus  
desinat.

Dixi in descriptione Morbi caduci eum potissimum excitari à repletionem. Explicui qua ratione ego concipiam hoc fieri. Non inutile tamen est, hic quoque inanitionem considerasse. Quamvis enim inanitio in maximè propriâ significatione, locum habeat in Epilepsiis symptomaticis, à copiosâ & repentinâ evacuatione excitatis, potest tamen fieri in Morbo caduco quoque inanitionem non esse negligendam. Nempe quando à causâ externâ quispiam, Morbo caduco corripitur solitus, primum in Lipothymiam incidit, quam statim sequitur novus paroxysmus. In hoc casu propulsio sanguinis è corde minori perficitur vi, pulsus ferè aboletur, calor & dilatatio sanguinis imminuuntur, respiratio ferè tollitur, extremitates frigent, spiritus animales minori producuntur copiâ, adeoque inanitio omnino videtur locum habere. Cum autem systole & diastole cerebri, motui cordis & respirationi sint proportionatæ, necessum est, utrumque hunc motum reciprocum ad tempus ferè tolli. Non propellitur ergo satis vividè sanguis

De inanitione.



è sinistro cordis thalamo, novorum spirituum animalium jugis productio sufflaminatur, non expanditur modo consueto cerebrum, sed potius concidit subito, adeo ut pars inferior & medullaris, ab incumbente cerebro comprimatur. Concidit cerebrum eo tempore, quo tubuli medullares spiritibus copiosis adhuc gaudent, supponimus enim hominem, alias satis vegetum, repente lipothymiâ corripitur, concidens cerebrum pellit eosdem versus medullam oblongatam & spinalem spiritibus turgidam, atque hinc in nervos varios: spiritus hi versus musculos & viscera expulsi, fibras tendunt, tensione motum sanguinis progressivum, minorem quidem, non tamen omnino sublatum, cohibent, adeoque motus convulsivos cum mentis stupore producunt, Morbi caduci novum cient paroxysmum. Non putem in hoc casu convulsivum motum membranarum cerebri ita obtinere, quemadmodum in Morbo caduco à repletionem productum, sed præcipue considerandam molem cerebri flaccidam redditam, pondere suo partes subjectas prementem, atque ejusdem dispositionem ad Morbum caducum. Neque enim omnes lipothymia correpti in morbum caducum incidunt, sed ii, qui ei obnoxii sunt. Depressio hæc cerebritanto magis est efficax in homine, quanto hominis cerebrum ceterorum animalium, comparatione institutâ respectu magnitudinis corporum, magis superat. Quod si ulterius huic comparationi insistere velimus, medulla oblongata in homine cerebro directè substrata est, secus atque res sese in brutis habet, debet itaque subsidentia & compressio cerebri spiritus animales quaquaversum propellere satis magna vi, licet paroxysmus à lipothymiâ originem trahat. Influunt ergo hi spiritus versus oculos, palpebras, faciei musculos, nervos pari vagi: cor, pulmonem, diaphragma agitant: influunt versus nervos ad artuum musculos distributos. Itaque partes hæ omnes convulsionibus exagitantur. Non solet talis paroxysmus diu continuari, sed ubi lipothymia superata est, superatur Morbus caducus: imo ille ipse influxus spirituum versus cor & præcordia, cordis majorem motum excitando, simul lipothymiam & Morbi caduci paroxysmum tollit. Ita videmus rem sese habere: post convulsionem hæc cessantes ægrum oculos iterum aperire, surgere & discedere.



Refutatio  
omittitur.

Facile jam esset è hæctenus dictis erroneas aliorum opiniones convellere. Verum non immorabor refutationi Galenicorum, ventriculorum cerebri obstructionem statuentium causam Epilepsiæ, quoniam hæc opinio innititur præjudicio de ventriculorum usu, tanquam spirituum animalium promptuariis; deinde quoniam jam ante me vidit *Urtzerus* hanc sententiam examen sustinere non posse. Libro de Epilepsia c. 11. Vide quoque *Philothei Eliani Montalti* Archipathologiæ. Tract. xvii. c. 4. Non immorabor refutationi sententiæ *Averrhois*, Epilepsiæ causam statuentis flatum genitum quidem in ipsomet cerebro in Idiopathiâ, aliunde transmissum in Sympathia. Vid. eund. c. 5. Non immorabor refutationi sententiæ *Fernelii* venenatam qualitatem statuentis, cui se opponit *Zacutus Lusitanus*, L. 1. de M. P. H. quæst. 12. Non refutabor refutationi sententiæ Chymicorum, quandoquidem hi in causis explicandis & obscuri sunt & infelices. Non immorabor sententiis *Willisii*, *Sylvii*, aut *Neotericorum* refutandis, quandoquidem is qui mea hæc ritè perspecta habebit, is facile videbit quam futilibus hæc omnia innitantur fundamentis, nec esse necesse refutare opiniones inconcessis innixas principiis. Illud tamen addere non erit inutile: *Galenii* sententiam de obstructione ventriculorum atque ipsius cerebri, non malè posse conciliari cum iis quæ hæctenus disputavi. Ex abolitione principum facultatum illam colligebat: ego ex eadem causâ, ut & structurâ cerebri compressionem deduco, quæ non minus efficaciter spiritus animales intercipit. *Est enim animalis spiritus, qui in ventriculis cerebri continetur, PRIMUM* (verba sunt *Montalti* Tract. xvii. c. 4.) *ANIMÆ INSTRUMENTUM, tum in sensibilibus actionibus, tum in iis, quæ à consilio & voluntate procedunt.* En iterum confirmationem sententiæ, hoc capite propositæ. Ordinis ratio jam postulat, ut me accingam ad causarum antecedentium & procatacticarum explanationem.

Causæ anteceden-  
tes.

Causæ antecedentes variæ sunt, imprimis cerebri humiditas, & flacciditas; ita enim facile humores serosi incrementum capere, & tumores generari possunt: ita ad depressionem præternaturalem cerebrum redditur aptum. Ventriculus debior



bilior quoque, cibum non concoquens sufficienter, generationis humorum viscidorum, sanguinis minus defœcati, defectus evacuationis necessariæ causa est. Lympha, saliva, succus pancreaticus, serum copiosum sanguinem minus activum producant. Bilis si non sufficienter segregetur, aut non sit laudabilis consistentiæ, etiam ad minus laudabilem sanguinem, nec non ad tardiores secretionem & excretionem fæcum alvinarum facit. Quod si mesenterium tumoribus scirrosis facilem transitum chyli impediat, sanguinis quoque pressio minus robusta sanguinem minus laudabilem, minus defœcatum, nutritioni minus aptum reddit. *Hippocrates* in libro de *Morbo Sacro* inter causas præcipuè meminit pituitæ. Et revera, si partes glutinosiores sanguini sint permixtæ, sanguis ad promptè pertranseundum fibrillas minimas arteriolarum cerebri minus est aptus: unde tum necessariò sequitur earundem arteriarum major repletio, nec non cerebri depressio. Idem ille sanguis facile incrementum suppeditat tumoribus cerebri vel strumosis, vel etiam scirrosis. Idem ille sanguis minus aptus est evacuationi per vasa uteri, sanguinis menstrui excretioni dicata. Glutinosa hæc constitutio non parum intenditur, si lympha sit minus mobilis, aut si saliva & succus pancreaticus peccent aciditate nimia, quemadmodum videmus ab acido admixto humores multum inspissari. *Johannes Georgius Grenlichius* in *χοληλογία* p. 69. §. 30. à bile uterinas evacuationes deducit: ab eadem bile conclusa tum varia symptomata, tum etiam Epilepsiam derivandam esse censuit. Non enumero inter causas antecedentes tetros & malignos halitus ac vapores, sive in cerebro, sive extra cerebrum genitos, de quibus *Schenkius* l. 1. de Epilepsia. obs. 7. tum quod conceptus horum vaporum præjudicio innitatur, uti vidimus, tum quod vaporum explicatio adhibita sit, quandoquidem conceptus de obstructione à pituita non satis ardebat, tum etiam quandoquidem omnem Morbum caducum existimem esse idiopathicum, uti postmodum demonstrabo. Quod si abscessus repertus sit in cerebro, uti *Fernelius* testatur, tum frivolum est recurrere ad vapores, cum abscessus abundè sufficiat ad Epilepsiam producendam. Manifestum illud evadit



dit ex experimento *Fracassati*. Hic in Epistola ad *Malpighium* p. 253. refert, ab infuso spiritu Vitrioli sanguinem concretum produxisse symptomata epileptica. Sanguis autem atramentum futurum referebat. Quæ de Melancholia Auctores habent, ex hisce fundamentis sunt explicanda. Vid. *Montanum* Tr. xvii. c. 9.

Inter causas procatacricas primum locum sibi vendicat aër, non tantum quatenus frigiditate & humiditate cerebrum constringens & flaccidius reddens, occasionem præbet majoris accumulationis feri, sed & quatenus idem calidior, aut minus liber, aut etiam à turbâ hominum nimium vaporibus repletus sanguinis motum immutare, lipothymiam producere, atque ita novum paroxysmum provocare potest? Probè enim notandum est, quamvis dispositio ad producendum Morbum caducum in hisce miseris semper adsit, illos tamen per intervalla tantum in novos paroxysmos incidere, atque hos non rarò originem suam debere causis externis. Absque hoc si esset, difficillimum foret conceptu, quomodo lunatici per aliquot horas, dies, hebdomadas integras, possent omnino immunes esse ab hisce vehementibus convulsionibus, atque subito in easdem incidere, tum iterum liberari. Oritur illud ex eo, quod spiritus & sanguis levi momento exagitari possint, unde tum difficultas transitus, repletio vasorum, contractio meningum sequitur. Idem aër si odoribus aut tetris aut suaveolentibus, *Moschi*, *Zibethi*, *Myrrha*, *Thuris*, *Syracis* sit inquinatus, etiam facile ad novum paroxysmum disponere potest. Huc referri potest mora in sole & sub dio protractior; ita enim sanguis, cerebro contentus, calefit, expanditur, atque nimiam vasorum repletionem efficere potest. Quod si autem talis etiam sanos in gravem capitis dolorem, vertiginem &c. conjicere potest, non debet mirum videri, si idem, ad morbum caducum dispositos, in novum præcipitet paroxysmum. Ventus etiam meridionalis aut borealis, quatenus humiditati & sero accumulando, vel etiam cerebri refrigerationi occasionem præbet, inter causas procatacricas recenseri solet. Vide *Hippocratem* de Morbo sacro. Idem *Hippocrates* inter causas comitialis morbi recenset anni tempora Aph. 20. f. III. Τὸ μὲν γὰρ ἡρότα τὰ μανικά, ἢ τὰ ἐπιληπτικά, καὶ



καὶ, ἢ αἵματι & πύσιν. &c. Vide quoque Aph. 22. & 16. f. 111. Refrigeratio pedum in puellis, à defectu mensium laborantibus, admodum noxia. Existimant quidem astrorum positum, ad hunc morbum inducendum, aliquid facere, id quod mihi à veritate videtur esse omnino alienum. Quæ est connexio inter Morbum caducum, & Eclipsin Lunæ? Quare ii, qui in hac Eclipsi nascuntur, eo ipso ad hunc morbum redduntur dispositi? Sunt hæ aniles fabulæ, fortè ex eo ortæ, quod Lunæ lumen tum obscuratur. Hinc arbitrati sunt lumen mentis, in hoc morbo, ad tempus tenebris veluti involutum, à defectu lunari aut pendere, aut saltem cum eo relationem aliquam habere. Mutatio tamen tempestatum anni repentina, magnam in motu sanguinis mutationem efficiens, aliquid potest. Vid. Hipp. Aph. 20. & 23. f. 111.

Ea quæ extrinsecus adveniunt.

Non sunt sicco pede transmittendæ res extrinsecus advenientes. Nempe omnes res in caput validè impingentes, non tantum extrinsecus tumores & vulnera infligere, sed & internè cerebrum vehementer quatere, atque lædere possunt. Concussio illa cerebri si omnino superetur, læsi postmodum satis sani degunt, quod si autem tumores scirrofi, aut strumosi relinquuntur, tum postmodum morbus caducus, vitio cerebri exortus, diu affligere potest. Hæc prava dispositio cerebri, quatenus à rebus extrinsecus advenientibus producit, est huius loci, nam vulnera & ulcera, aut dolores hæc comitantes pertinent ad Epilepsias symptomáticas de quibus in sequentibus est agendum. Ad res extrinsecus advenientes possunt revocari Balnea, in quibus diutius commorari noxium, referente Gabelchovero obs. 59. Cent. iv.

Cibus & potus.

Cibus & potus non minimum locum obtinent inter causas procatacticas. Nam si repletio imprimis producat morbum caducum, omnia quæ in universo corpore repletionem, aut specialiter eandem in capite producere possunt, in causarum antecedentium catalogo rectè enumerantur. Itaque ingluvies, quatenus non tantum nimix vasorum repletioni, sed & sanguini viscidiori, hoc est, minus subactò, occasionem præbet, duplici nomine nocet, namque hoc pacto & æqualiter omnes arterias magis replendo, & arterias carotides minus promptè

tran-



transeundo, ad Morbum caducum disponit. Etenim si ingluvies, absque præviâ dispositione, Epilepsiam symptomaticam producere potest, cujus exempla in sequentibus narrabo, quanto magis eadem ingluvies & ad magis frequentes, & ad graves, aut subitaneos insultus disponit? Quæ de ingluvie dixi, etiam de crapulâ dicenda sunt. Habet hoc crapula peculiare, quod & cerebrum, & spiritus animales malè mulctet. Habet & hoc consideratu dignissimum, quod sanguinem non tantum exagitet, sed & vehementer expandat. Non mirum ergo, si crapula non minimum locum inter causas procatacéticas obtineat. Quemadmodum autem cibi & potus quantitate, ita etiam qualitate non parum peccare possunt. Non omnes cibi onere suo ventriculo æque molesti, non omnes cibi æque difficulter digeruntur. Itaque quicumque cibi ægrè manducantur, aut dentibus comminuuntur, illi cibi etiam à ventriculo non satis facile concoquuntur. Hæc, sunt inter se proportionata. Sunt tamen non pauca, quæ quamvis non ita difficulter comminuantur, non sunt tamen probi succi, *εὐχρηστοί*. *Franciscus Hildesheim* habet exemplum puellæ Epilepsiâ correptæ ex usu fructuum horariorum, & lactis nimîâ ingurgitatione. Anguillas itidem nocuisse refert *Forestus* L. x. obs. 57. in Scholiis. Hi cibi in Morbo caduco noxii. In specie enumerantur adhuc quidam cibi in hoc morbo vitandi, *Allia*, *Cepæ*, *Apium* seu *Petroselinum* vulgare, quia sc. vaporibus caput replent; verum re penitus perspectâ, absurda sunt ea, quæ de repletionem capitis à vaporibus proferuntur. Quod si autem facultates horum veras investigemus, sunt pleraque quodammodo aromatica, sale volatili & particulis crassioribus foeta, unde sequitur, chylum hisce imprægnatum, & ad sanguinem delatum, debere magis eundem expandere, unde major sequitur repletio vasorum, atque ea dispositio, è qua Morbum caducum facile suscitari superius innui ego. Adeo ut ea, quæ Auctoribus per experientiam innotuerunt, quæque perversè explicata sunt, non parum faciant ad sententiæ meæ confirmationem. Enumerantur adhuc quædam, quæ creduntur pollere facultate peculiari hunc morbum excitandi, ut sunt carnes *hædorum* & *caprarum*, *hepar hircinum* & *caprinum*, *passerum cerebella* & similia. Huc pertinet quoque *tuberum* frequens esus ut & co-



*thurnicum*. An autem hæc omnia æque sint noxia, ego aliis disquirendum relinquo. Nocet quoque vinum impenſe craſſum, aut turbidum, aut recens, nec ſatis deſœcatum. Quemadmodum autem ingluvies, ita etiam fames & inedia protracta noxia, uti illud exemplo *Diodori Grammatici* apud *Galenum* conſtat. Vide *Sennertum* l. i. p. ii. c. 31.

Motus &  
quies.

Motus & quies utraque in hoc morbo noxia, ſi ſint immoderata. Motus immoderatus non tantum preſſionem ſanguinis multum augēt, ſed & calorem, & expansionem. Non tantum cor celerius & frequentius contrahitur; verum motus muſculorum, cum reciproca antagoniſtarum diaſtole & ſyſtole perficiatur, quaſi cordi ſuccenturiatur; adeoque & preſſionem & expansionem multum auget. Itaque ſi obſtaculum aliquod hæreat in cerebro, uti explicatum eſt, facile ſuſcitatur novus paroxyſmus. Quies & otium diuturnum, vita ſedentaria, non tantum ſanguinem producit magis lentum, ſed & inſenſibilem tranſpirationem, & excrementorum evacuationem minus promovet. Hinc facile humores ſeroſi nimium capiunt incrementum, adeoque ventriculos cerebri replent, aut etiam ad tumorum in cerebro augmentum non parum faciunt. Perſuaſum quoque fuit, ſi quis *caprinâ pelle* recenter excoriata induatur, & ſic opertus mari intingatur, eum ſtatim caſurum; verum fides ſit penes Auctores.

Somnus &  
vigilia.

Cum Somnus & vigilia maximè cerebrum & ſpiritus animales afficiant, atque ope cerebri reliquas in corpore partes, perſpicuum eſt, utriuſque conſiderationem non eſſe ſuſque deque habendam. Somnus protractior ſpiritus animales ſegniores reddit, adeoque cerebri depreſſioni reſiſtendæ ineptiores; idem ſomnus excrementa in cerebro multum accumulât, adeoque utroque nomine in Morbo caduco noxius eſt. Spirituum animalium ſegnitiem, in Morbo caduco, alicujus eſſe momenti patet ex iis, quæ de Comate vigili, Phrenitide &c. diſputavi in ſuperioribus: tum enim illorum motus depreſſioni cerebri & ſomno reſiſtit.

Excreta &  
retenta.

Non minus ad diſponendum homines ad Morbum caducum faciunt, excreta & retenta. Et quidem colluvies ſeroſa, ſi in cerebro cohibeatur, manifeſtum eſt, hinc cerebrum ad hunc affe-



affectum disponi. Si menstruus fluxus desit, corpus non tantum, generaliter considerando, nimium repletur, verum etiam sanguis magis magisque ineptus evadit circulationi per minimas vasorum propagines commodè absolvendæ. Alvi adstrictio, ordinaria quibusdam, non tantum molesta, sed & summè noxia est: verum illa non tam facile medicamentis, quam quidam convenienti regimine superatur. Nimia venus & spiritus animales exhaustiendo, & sanguinem effœtum reddendo, ad hunc morbum vel excitandum, vel etiam aggravandum non parum facit. Vitanda, & cane pejus ac angue, fugienda illicita, moderanda licita, & animus regendus.

Dixi superius occasiones aliquas ordinariè, præcedere hosce paroxysmos, hæ sæpenumero sunt animi passiones repentinae. Sanguis & spiritus ab hisce exagitati cerebrum magis replent, membranis molesti sunt, adeo ut hinc sæpe exoriantur novi insultus. Passiones magis lentæ, & minus vehementes, tristitia, moeror & similes, sanguinem glutinosiorem, & circulationi absolvendæ per cerebrum, ejusque membranas ineptiorem reddunt. Eædem illæ passiones secretiones ordinarias & maximè necessarias non tam promovent, quam impediunt. Ubi autem secretio minor est, excretio itidem est minor, itaque sanguis minus defæcatus, spiritus minus evadunt mobiles. Hinc vigor corporis multum imminuitur, adeoque ægroti variis morbis, imprimis cerebri, magis redduntur expositi. Moeror etiam ad Scorbutum disponit, qui morbus non raro affectibus convulsivis stipatur, & ad pravas cerebri dispositiones homines reddit aptos.

Animi pathemata.

Accedendum est ad Morbi caduci differentias, quæ à circumstantiis præcipuè petuntur. Alius est hæreditarius, alius adscititius: observante *Hippocrate* libro de Morbo sacro, & *Zacuto Lusitano* in Praxi Medicâ admirandâ l. 1. obs. 33. Alius est recens, alius inveteratus. Alius Mares, alius Fœminas. Alius juniores, alius majores motu infestat. *Schenkius* l. c. obs. II, 12, 13. annotavit ex animi affectibus quosdam Epilepsiâ correptos, ut & pueros è terrore. &c. Alius ante pubertatem, alius serius incipit. Alius per signa consueta ægrum de instante paroxysmo monet, alius subito absque ullo, aut exiguo

Differentiæ.



guo sensu ingruit. Solent Auctores distinguere etiam hunc affectum in Idiopathicum & Sympathicum, quæ distinctio mihi in hoc morbo non videtur habere locum: est omnis Morbus caducus idiopathicus. Ut mea mens rectè percipiat, non nego Auctores de Epilepsia per Idiopathiam & sympathiam potuisse & debuisse tractare; verum non puto mihi istorum vestigiis insistendum. Illi capite de Epilepsiâ admodum diversas ejus species simul tractant, itaque hæ à se mutuo erant distinguendæ. Ego autem, ut confusionem illam, admodum (ut mihi quidem videtur) noxiam, evitarem, statim in principio hujus tractationis proposui tabulam exactam, nequaquam falsis imaginationibus, & perversis hypothefibus, sed praxi accuratæ innixam. In ea Morbum caducum, seu Epilepsiam periodicam, ab Epilepsiæ symptomaticæ diversis speciebus distinxi. Epilepsiæ symptomaticæ species possunt dici Epilepsiæ per consensum: cum autem in sequentibus de iis in specie sit agendum, Morbus caducus omnis mihi est Idiopathicus. Ne cui autem aliquis possit hæerere scrupulus, non erit inutile, tres à me propositas Morbi caduci species paucis percurrere. Primam igitur speciem esse Morbum caducum per essentiam, nulli potest esse dubium, quandoquidem ea à vitio cerebri oritur. Altera species etiam, ex iis quæ explicata sunt, debet statui contingere per Idiopathiam, quandoquidem ea non omnibus contingit ante mensium eruptionem, & non raro adjunctam habet & sanguinis & cerebri pravam dispositionem. Vide *Josephum Quercetanium* in principio Tetradis gravissimorum capitis affectuum. Contingit itaque iis tantum, in quibus cerebrum malè affectum est, adeoque censendus est, Morbus caducus per essentiam. Epilepsia hysterica, seu suffocationem hystericam excipiens, aut cum ipsa copulata, est Epilepsia per consensum; verum in hac specie, & ætate, non est necesse morbum caducum præcedere suffocationem hystericam ante pubertatis tempus non ita crebro aut graviter affligentem. Nec est quod mihi quispiam objiciat, non videri hic vitium cerebri insigne adesse, quandoquidem tales non raro liberantur: verum non mirum est in hisce affectum superari, ubi sanguis incipit esse melius dispositus, ubi spiritus red-



redduntur alacriores, cum tales adhuc totius corporis capiant incrementum, in augmento autem non raro vitia corporis, membrorum distorsiones sæpe, emendantur: quid mirum ergo, si sanguis & spiritus melius dispositi, si majori cum vigore circulationem & nutritionem absolventes, incipientem cerebri, aut ejus vasorum pravam dispositionem emendent? Putem me sufficienter evicisse hanc speciem etiam meritò referri ad Morbum caducum idiopathicum, si quis tamen ad hysteri- cam affectionem hanc ablegare malit, is suo fruatur sensu. Major videtur difficultas respectu tertiæ speciei, quæ, secundum Auctores, originem habet ab aurâ venenata ab his vel illis partibus adscendente. Verum ex iis, quæ superius disputata sunt, putem esse manifestum, per- versè statui aliquod venenum in illa parte latere, quando- quidem illud nulla sui præbet, colore, dolore continuo, actio- ne læsa, qualitatibus mutatis indicia. Si autem venenum tali in parte non lateat, nec ab illâ potest statui produci Mor- bus caducus. Quod si autem morbus caducus oriatur à levissi- ma membri ex. gr. refrigeratione, longè frequentiores debe- rent esse Epilepsiæ periodicæ. Cur in quartanarum principio non oritur Epilepsia satis gravis? cum non tantum à pedis pollice, sed ab omnibus digitis, ab omnibus unguibus lividis versus superiora & lumbos videtur serpere febris? Revera aura hæc Epileptica, cujus auctores faciunt mentionem, non melius potest explicari, quam exemplo modo allato, cum reptat- us sit omnino similis. Si autem quartana non ideo dicatur contingere per consensum, quia ejus indicia sese in extrema- tibus unguum livore produnt, non potest etiam Morbus ca- ducus, à pollice pedis, ut videtur, ortus, dici per consen- sum. Dicet fortasse aliquis, atque tu ipse hanc speciem à reliquis distinxisti: illud ego libentissimè fateor, atque illud erat ne- cessarium, ne illius viderer oblitus: deinde constituit etiam distinctam, speciem non quatenus per sympathiam aut idio- phiam affligit, sed quatenus non repentè ac sine sensu, ve- rum cum præviis signis invadit, & hæc est illa distinctio, cu- jus superius quoque memini.

Signa Morbi caduci non tantum ex iis quæ in superioribus Signa  
sunt



sunt tradita, elucescunt, sed ita cognita sunt, ut nec hominibus plebejis sint obscura. Illum instare aliquando indicat Vertigo, parva Epilepsia ab antiquis vocata, teste *Quercetano* in Tetrade c. 2. Verum quis sit nexus inter Morbum caducum & Vertiginem, demum è meâ explicatione liquidò innotescit. Capitis dolor & gravitas, nonnunquam & faciei pallor præcedit. Et hæc quidem signa meam & *Hippocratis* sententiam: Convulsionem oriri vel è *Repletionem*, vel ex *Inanitione*, admodum confirmant. Quæ est causa Vertiginis? Repletio. Quæ est causa doloris capitis? Repletio. Quæ est causa gravitatis capitis? Repletio. Quæ est causa palloris faciei? Inanitione. Repletio arteriarum carotidum à sanguine, & pressio in orbem nervorum opticorum causa est Vertiginis. Repletio vim inferens vasis & membranis cerebri, causa est capitis doloris. Repletio, nimia sanguinis quantitate caput onerans, causa est gravitatis capitis. Faciei pallor, à defectu influxus spirituum animalium, præcipuè si accedat Lipothymia aut Syncope, rectè ad inanitionem referri potest. In Convulsionibus, seu Epilepsiis sibi mutuo brevi succedentibus, observatur adhuc aliud signum imminentis, & jam jam invasuri novi paroxysmi, adstantibus admodum manifestum: oculi manent immoti ac rigidi, visus aboletur. Hoc symptoma, & signum manifestissimum, non ex auctorum lectione, sed è praxi diligenti, explicationem itidem non ab auctoribus, sed è meis fundamentis didici. Cur visus aboletur? Cur oculi persistent immoti? Cur, si manus ante illos moveatur, ne nictitant quidem oculi? Non pendent illa à vaporibus, halitibus, aut flatibus à partibus inferioribus elevatis: non à sanguine & liquore nervoso sibi mutuò contrariis, non à particulis spasmodicis, non ab explosione. Dependent illa à repletionem nimia arteriarum carotidum, à compressionem nervorum opticorum, atque oculos moventium. Dependent illa à denegato influxu spirituum, ob arteriarum, nervos ad oculum dispersos undique cingentium, tumore & repletionem nimia. Distat hæc repletio gradu à Vertigine. In Vertigine quippe adest aliqua, & in circulum leviter afficiens nervos opticos, compressio: in Epilepsia, talis, ut ita dicam, constipatio, ut visus ad tempus omnino aboleatur.



tur. Non replentur rami carotidum arteriarum, quin simul repleantur vertebrales, ejusque ramificationes laterales. Quamvis enim ego *Wepfero* assentiar, rete mirabile in homine neganti, promit tamen arteria carotis, promit arteria vertebralis ramificationes laterales non contemnendas, quæ hic negligendæ non sunt. Ab horum vasorum omnium repletione dependet compressio medullæ oblongatæ, protuberantiæ annularis, & nervorum ex hisce oriundorum. Cum enim basis cranii impediat, quo minus vasa hæc sese versus inferiora explicare possint sufficienter, medulla autem oblongata, protuberantia annularis, & nervi admodum sint molles, facile concipimus impetum irruentis sanguinis, repletionem vasorum ingentem, debere, non tantum visum, sed & reliquos sensus, tum in organis exterioribus, tum in universo corpore abolere. Ab hac mechanicâ vasorum, ut & cerebri universâ mole, perpendiculariter basi & vasis majoribus incumbente, petenda est ratio, quare vertiginosi non raro erecti titubent, & pejus habeant, melius decumbentes, cum alias videretur illos pejus debere habere, ubi situs declivis faciliorem progressum ad cerebrum concedit. Ubi hæc compressio omnimoda præcedit, non longè abest paroxysmus, quippe jam non tantum fibrillæ arteriarum minimæ, sed & trunci majores expansi sunt: itaque cerebrum à jugi cordis contractione, adeoque sanguinis copiâ, ulterius deprimitur, sensus abolentur, vis infertur membranis ejusdem, tenduntur fibræ nerveæ, sanguinis motus progressivus aliquomodo impeditur, convelluntur membranæ, & incipit paroxysmus. En facilem & veram explicationem symptomatis & signi frequenter obvii.

Distinguendus jam est Morbus caducus à reliquis Epilepsiæ symptomaticæ speciebus. Ab Epilepsia symptomaticâ febrili facile distinguitur, quandoquidem hæc excipit febres graviores sive in principio sive etiam in progressu subsequatur. Nempe in hoc casu ægri sæpe toto vitæ tempore ab hisce symptomatibus fuerunt immunes, febrilis orgasmus vehemens, & sanguinis expansio illa excitat. Eadem est ratio, si hæmorrhagiæ, vulnera, ulcera, dolor, purgatio nimia, producat convulsiones. Major est difficultas, ut distinguatur Morbus caducus ab

Hhh

Epi-



Epilepsiis hysteriis. Oportet attendere, an ægræ frequenter corripiantur suffocationibus hisce, an globi, veluti adscendentis ad fauces, tumor sentiatur? Non rarò etiam in affectibus hysteriis mentem non adeo esse obnubilatam, nec sensus internos ita abolitos, uti in Morbo caduco, observari solet. Hæc ita sese habere & ego, & alii animadverterunt practici, causam antecedentia explicant, nempe in Epilepsiâ periodica cerebrum malè affectum, in affectu hysterico cerebrum satis benè dispositum est. In Morbo caduco vitium præcipuè est in partibus solidis, in Suffocatione hysterica in partibus fluidis, nisi uterus male affectum velis in obstructione mensium. In Morbo caduco possunt intestina, & ventris inferioris viscera, sese satis bene habere, in Suffocatione hysterica plerumque flatus & rugitus, nec non convulsiones partium, infimo ventre contentarum, adsunt. Solent mulierculæ & homines plebei adhuc attendere, an pollex firmiter palmæ manus sit inclusus, hoc si contingat, non dubitant amplius paroxysmum morbi caduci, si absit existimant non morbum caducum, sed potius affectionem esse hystericam, saltem distinctam speciem ab hoc affectu. Posset hæc observatio primâ fronte videri parvi momenti, mihi tamen, attentius de eâ cogitanti, visa est non omnino negligenda. Nempe pollex non tantum musculis gaudet robustis, sed & è pari quarto & maximo nervorum, ad brachium distributorum, propagines recipit. Itaque ubi cerebrum malè affectum est; ubi sensus interni omnino aboliti, ubi spiritus animales tumultuosè è cerebro propelluntur versus medullam spinalem, non est mirum, si pollex vehementius contrahatur, adeo ut non nisi difficulter extricetur. Ubi autem cerebrum minus affectum est, valida hæc contractio non ita observatur. Comparisonem autem instituentes inter Morbum caducum, & Epilepsiam hystericam, facile intelligemus, spiritus animales in hac tumultuosius in nervos intercostales & octavi paris, versus viscera intimi & medii ventris distributos, influere, quandoquidem intestina laborant, & flatibus sunt distenta ordinariò, simulac autem illa molestia sentitur, cor in consensum trahitur, cerebrum primariò non est affectum; in Morbo caduco aliter res sese habet, cerebrum  
ipsum.



ipsum malè affectum est, mens obnubilata, ideoque spiritus versus medullam oblongatam & spinalem, nec non in nervos hinc prodeuntes influunt. Est ergo signum non contemnendum hoc, quod homines plebei observarunt. A reliquis speciebus & motibus convulsivis facile distinguitur Morbus caducus, quandoquidem plerumque sensus internos non abolent, præter convulsiones seu Epilepsiam infantum, has autem à reliquis ætas distinguit.

Morbus caducus est affectus curatu difficillimus, & sæpe nullis cedens remediis. Virginibus & puellis ante mensium eruptionem accidens, non rarò postmodum superatur. Huc pertinet *Hippocratis Aphor. 7. s. v.* Τα ἐπιληπτικὰ ὁκίσοισι πρὸ ἢ ἕξης γίνεται, μετὰ τὰς ἰσχει. ὁκίσοισι ἢ πέντε ἢ εἴκοσι ἐτέων γίνεται, τεττέοισι τὰ πολλὰ ξυναποθνήσκει. Ubi malum est hæreditarium rarissimè, vel nunquam tollitur. Sensim solent à crebris insultibus facultates animales debilitari, adeo ut postmodum ægrotis mentis acumen omnino obtundatur. Periculum vitæ in paroxysmis ordinariis non admodum manifestum, dummodo ægri à graviore lapsu, & similibus arceantur incommodis. Quanto magis malum est inveteratum, tanto difficilius tollitur, tanto facilius novus excitatur paroxysmus. Quemadmodum enim in iis, qui sæpius vomunt, à levissimâ causâ iterum excitatur nausea & vomitus, ita Morbo caduco sæpius correptis, è leviori causa novus oritur insultus. Igitur oportet attendere, ubi suspicio est novi paroxysmi, ad faciem, oculos, loquelam, ne subito & improvidè invadens Morbus caducus, ægrotum vehementer prosternat, vel aliâ ratione lædat. Morbus caducus in senibus & decrepitis difficillimè, vel nunquam curatur.

Indicationes generales in hoc morbo respiciunt, vel ipsum paroxysmum, vel extra paroxysmum in usum vocanda: paroxysmus quam ocissimè tollendus, extra paroxysmum repletio & inanitio expugnanda, specifica exhibenda: quibus indicationibus speciales in curationis tractatione adjicientur.

Curationis modus apud veteres fuit admodum *superstitiosus*, expiationibus & incantationibus perfici solitus, quasi Morbus caducus prorsus differret ab aliis affectibus, quem errorem vidit, & refutare conatus est *Hippocrates in libro de Mor-*



*bo sacro. q. v.* Curatio in paroxysmo perficitur spiritus animales excitantibus, quæ simul facultate pollent cerebri depressionem tollendi. Hujusmodi sunt *salia volatilia & spirituosæ. Spir. Sal. Armon. Spir. & Sal. Volat. C. C. Succini, Fuliginis, Oleum Succini, Tinctur. ejusdem ut & Castorei. Liquor. C. C. Succinatus, Aqua Antepileptica, Apoplectica &c.* Si enim talia naribus admoveantur, vel prudenter in os infundantur, solent recreari ægri. Imo ipse paroxysmus non diu perseverare solet, si cerebri concussio, casus vehemens, allisio capitis in filices præcaveatur.

De V. S. in  
paroxysmo  
in usum vo-  
canda.

Dubitatur, num in paroxysmo conveniat V. S. nec ne? Verum, antequam ad hanc quæstionem respondeam, observandum est, non tantum spectari Morbum caducum, sed & reliquas Epilepsiæ symptomaticæ species, adeoque eodem modo de hac quæstione agendum est. Nempe in Morbo caduco ordinariè V. S. non solet in usum vocari, quandoquidem is adeo brevis esse solet, ut vix possit advocari chirurgus, vix institui V. S. possit, quin insultus diu sit superatus, in reliquis autem Epilepsiæ speciebus, præcipuè à repletionem, paroxysmi plures sibi mutuo non raro succedunt, & priori finito novus ingruit, in hoc casu utile est disquirere, num V. S. conveniat nec ne? Respondeo itaque V. S. non tantum absque ullo periculo posse in usum vocari, sed & non rarò eam omnino requiri. Potest secari vena, quandoquidem æger satis est vegetus, adeoque nullum periculum ab ejus usu impendet. Quid ni homini plethorico venam pertundas? Quid ni copiam sanguinis imminuas, antequam æger succumbat? Danda tantum est opera, ut vulnus prudenter infligatur, ut induciæ ac dilucida intervalla observentur, vel brachium ita contineatur, ut non difficulter chirurgus officio suo defungi possit. Necessaria sæpe est V. S. quandoquidem ab ejus neglectu maximum impendet periculum. Si enim nimia repletio ægrum in paroxysmum conjiciat, antequam sanguis valdè agitetur, quanto magis eadem repletio, post validam & frequenter iteratam cordis contractionem, erit molesta, non tantum cerebro, sed & pulmone, sæpe itidem repleto? Difficultas circulationis non uno se prodit indicio. Possum ego testari, me aliquoties cum summo successu, non tantum jussisse venam pertundi in tali casu,



fu, verum etiam admodum copiose jussisse extrahi sanguinem, cum maximo ægrotantis levamine. Memini me tale exemplum in *Cogitationibus meis de Instauratione Medicinæ* narrasse admodum memorabile, quod diligenter animadvertisse junioribus est utilissimum. Referam in sequentibus aliud non contemnendum. Utile itaque est, & necessarium, in casibus difficilioribus, ad V. S. & quidem largam recurrere, etiam in ipso Epilepsiæ insultu.

Non sunt tamen hæc ita accipienda, quasi velim, in omnibus hominibus, aut in omnibus Epilepsiæ paroxysmis promiscuè V. S. esse usurpandam. Non est secunda vena in omni insultu, hoc pacto vires nimium attererentur, nec tamen tolleretur morbus. Potest enim quis Morbo caduco & Epilepsiâ infestari, qui non est admodum plethoricus. Nempe repletio arteriarum carotidum, est quidem causa paroxysmi, verum ea repletio non semper contingit ex eo, quod corpus universum nimiam humorum copiam laboret, sed ex eo, quod transitus impediatur à tumore, malâ conformatione, aut etiam sero nimio ventriculos replente. Judicio itaque opus est, & constitutio ægri, plethora, V. S. intermissio, vitæ genus, consuetudo, evacuationes suppressæ, vel nimix, vires &c. considerandæ sunt, antequam quis de V. S. statuât. Sunt plures casus in quibus à V. S. planè est abstinendum. Non convenit sæpe V. S. in Epilepsiis symptomaticis febrilibus. Non convenit in Epilepsiis ab hæmorrhagiâ nimiam excitatis. Non convenit in Epilepsiis ab inanitione, aut in quibus larga evacuatio produxit Convulsiones. Illud tantum volui indicare, Epilepsiam, aut ejus paroxysmos, per se, non vetare V. S. imo eandem sæpe in ipsis insultibus, cum summo successu in usum vocari. Specialior autem determinatio, ubi conveniat, nec ne, item qua quantitate &c. sit educendus, è circumstantiis ritè expensis, nec non ex iis, quæ postmodum de reliquis spasmodum differentiis explicanda sunt, determinandum.

Plura possent addi, quæ ad excitationem spirituum in paroxysmo faciunt, qualia sunt enemata, emetica, purgantia, cucurbitulæ, errhina, sternutatoria; verum cum Morbi caduci paroxysmus citissime soleat desinere, hæc sicco transeo pede,



ad ea, quæ extra paroxysmum in usum vocanda sunt, me accingens.

Extra pa-  
roxysmum.

Extra paroxysmum repletio & inanitio expugnanda. Quod si igitur repletio universalis producat Morbum caducum, ea est imminuenda, quandoquidem ab hac paroxysmi graviores dependent. Si æger sit plethoricus, V. S. repletioni proportionata in usum est vocanda. V. S. minuit nimiam humorum copiam, & pressionem imminuendo, faciliorem motum sanguinis per minimos tubulos efficit. Quemadmodum in Pleuritide V. S. difficiliorem motum sanguinis per minimas arteriolas faciliorem reddit, atque vasorum nimiam distensionem imminuit, ita etiam in Morbo caduco res sese habet. Quamvis enim hic inflammatio non adsit, nec sanguinis, minimas arteriolas replentis, æstus, adest tamen repletio arteriarum carotidum nimia, quæ non minus indicat V. S. quam minimarum fibrillarum inflammatio. Si menstruorum defectus producat paroxysmum, itidem V. S. habebit locum. In priori casu instituatur V. S. in brachio, in posteriori in pede. In priori casu majori quantitate educendus est sanguis, in posteriori parcius, ne vires, ad evacuationem promovendam requisitæ, nimium labefactentur. *Zacutus Lusitanus* è *Rase* habet exemplum frequentis Epilepsiæ, è sanguinis copiâ subortæ, V. S. curatæ. *Idem* refert quendam, sævissimâ Epilepsiâ frequenter concussum, sectâ ex intervallis saphenâ, ab eâ præservatum. M. P. H. l. 1. Hist. 26. & Obs. 22. Vide eundem in *Praxi Medica admiranda*. L. 1. obs. 24, 26, 27. *Riverius* obs. 38. Cent. iv. refert historiam puellæ xii. annorum, post multa remedia frustra tentata, V. S. liberatæ, unde colligit *Venæ sectionem* ad Epilepsiæ curationem plurimum conferre. Quemadmodum autem superius vetui in omni paroxysmo secari venam, ita nec velim semper recurri ad V. S. extra paroxysmum. *Dodonaus* sanguinem vitæ thesaurum dixit. Vid. *Gabelchov*. obs. x. Cent. vi. in annotationibus. Nolim absque urgente necessitate sanguinem imminui: nolim temerè exhauriri vitæ fontem, caloris nativi promum condum, in statu sano, & ægro optimum præsidium. Intempestiva V. S. sæpenumerò non morbum, sed hominem jugulat. Repletio arteriarum carotidum est quidem causa paroxysmi, quandoquidem sanguini obstaculum occurrit motum progressivum im-

pe-



pediens, non tamen est necesse hanc esse universalem, sufficit si sanguini agitato liber denegetur transitus. Prudentia itaque hic requiritur, & constitutio ægri, plenitudinis signa, vitæ genus V. S. intermissio, consuetudo, evacuationes suppressæ, & similia diligenter expendenda sunt, uti in superioribus quoque innui.

Sunt & alia evacuationis universalis genera, quæ hic percurrisse non erit inutile, nempe emetica, purgantia, sudorifera, diuretica, menses moventia. Emetica non parum corpus exhaustiunt, quandoquidem non tantum ea, quæ ventriculo continentur evacuant, sed & liquores, ope glandularum excernendos, alliciunt & imminuunt. Hoc autem in casu ea prudenter sunt in usum vocanda: quandoquidem non tantum considerata est evacuatio, hæc ratione procuranda, sed & dispositio cerebri prava, ne illa inde deterior reddatur, ac plura excitentur symptomata. Etenim in valido illo excernendi conatu, non tantum ventriculus vehementer contrahitur, sed & sanguis & spiritus vehementer exagitantur, cerebrum ipsum non parum concutitur. Concussio illa cerebri, uti superius de Paralyfi quoque monui, non semper est tuta. Agitatio sanguinis & spirituum, facile novum potest producere paroxysmum. Itaque ubi cerebrum malè affectum est, emetica potius omittenda, saltem non usurpanda ante institutam V. S. in corporibus plethoricis. In virginibus, è mensium defectu malè affectis, si nausea vexet, ea tutius in usum vocabuntur, quandoquidem sanguini viscidiori, mensium eruptionem impediendi, hoc modo subtrahitur pabulum. *Willisius* præscribit infusionem *Croci metallorum* in *Vino Hispanico* factam ab  $\mathfrak{z}\beta$  ad  $\mathfrak{z}\mathfrak{j}\beta$ . Vel *Tartar. emet. Mynsicht.* gr.  $\text{iv}$ . ad  $\text{vj}$ . & in iis, qui tenerioris sunt constitutionis. *Sal. Vitriol.*  $\mathfrak{z}\text{j}$ . ad  $\mathfrak{z}\beta$ . post horas superbibendo plures libras lactis cerevisiati: dein pennâ, aut digito gutturi indito, vomitus provocetur, & aliquoties iteretur. Laudat quoque vomitum *Untzerus*, ac varia enumerat emetica inter alia *Turpethum minerale* ad gr.  $\text{iv}$ ,  $\text{v}$ ,  $\text{vii}$ . *Vitriolum Veneris* ad gr.  $\text{xv}$ .  $\text{xviii}$ .  $\text{xx}$ . cum extracto *Liqueritiæ*. *Phlegma Vitrioli*. *Crystallos Vitrioli albi* ad  $\mathfrak{z}\text{j}$ . vel  $\mathfrak{z}\beta$ . cum *Aquæ Beton.* vel *Fenic.* *Zacutus Lusitanus* refert è *Rase* quendam Epilepticum

Conveniunt  
emetica.

cum



cum post assumptum medicamentum vomitum provocans, & melancholiam purgans, per tres menses præservatum fuisse à casu. Vid. *Ejusdem* H. M. P. hist. 25. & Praxin Medicam admirandam L. I. obs. 28.

Purgantia.

Insignis quoque usus sunt purgantia. Sive enim respicias tumores in cerebro enatos, sive serum copiosius aggestum, sive etiam humores tenaces sanguinem ad motum ineptiorem reddentes, purgatione hisce vel pabulum subtrahitur, vel illorum imminuitur copia. Variæ enumerantur ab *Untzero* pilulæ, morsuli laxativi, Vinum purgans, *Magisterium Ellebori nigri*, *Syrupus Helleboratus*, alia purgantia mineralia. Lubet adjicere formulam unam atque alteram *Willisii*.

℞. *Resin. jalapp.* ʒß.

*Mercur. dulc.* ʒj.

*Castor. gr.* iij.

*Conserv. flor. Pœon.* ʒj.

F. Bolus.

℞. *Pilul. Fœtid. maj.* ʒij.

*Resin. jalapp. gr.* v.

*Ammon. solut. in aq. hyst.* q. l.

F. Pilulæ. no. v. malim x vel xij.

Miris encomiis prædicat *Syrupum Nicotianæ*, *Zacutus* l. I. H. M. P. obs. 23. quo plures grandes natu se ait vidisse curatos, quibus plura auxilia, nec cauteria in capitis ambitu aperta, diuque servata opitulari potuerant. *Lazarus Riverius* observationem refert pueri trimuli, ab Epilepsiâ liberati fumo *Tabaci*, unde vomitus fuit concitatus. Vid. *Eund.* obs. 60. Cent. II. Quod si autem validiora medicamenta, in tenellâ hæc ætate, cum tanto fuerint usurpata successu, rectè colligimus in hoc morbo convenire purgantia validiora: *Mercurialia*, *Colocynthidem*, *Scammoneum*. Distinguebant Veteres corpus universum in tres regiones, & illarum respectu judicium ferebant num blandiora, vel etiam potentiora requirerentur purgantia. Itaque cum hic materia non tam in primis hæreret viis, quam in secunda, aut tertia regione, purgantia quoque usurpabant validiora. Possumus nos dicere, validiorem requiri vellicationem, ut succedat sperari laudabilis, ubi cerebrum malè affe-



affectum, aut obnubilatum est. Validum hoc medicamentum præscribit *Montanus*, quod ideo omittendum non putavi, ut appareat ita revera sensitse veteres, uti statim explicatum est. Est autem tale :

℞. *Confect. Hamech.* ℥℔.  
*Trochisc. Alhand.* ℥℔.  
*Syr. Rosar. solutiv.* ℥ij.  
 M.

Substituemus formulam concinniores :

℞. *Mass. Pilul. Mastichin.*  
*Mercur. dulc. aa* ℥℔.  
*Trochisc. Alhand. gr. v.*  
 Cum *Tinct. Castor.*  
 F. *Pilulæ. no. v.*

Tertium, inter evacuantia universalia, locum dedi sudoriferis, Sudorifera. hic etiam insignis usus, quandoquidem non tantum feri partem aliquam per cutis poros eliminant, sed & quod sanguinem reddant magis fluidum. Fluiditas autem sanguinis, insigni illi repletioni arteriarum, quæ in hoc morbo locum habet, remedio est. Quid ? quod discussio tumorum aliquando ope sudoriferorum obtineatur ? Conveniunt itaque in hoc casu decocta lignorum quorum in superioribus non semel est facta mentio. Conveniunt quoque Chymica medicamenta appropriata in hoc morbo, de quibus in sequentibus agemus. Non est tamen existimandum à sudoriferis, omissa V. S. posse obtineri sufficientem repletionis imminutionem. Sudorifera potissimum exhauriunt humores serosos & tenuiores, relicta massa caseosa non ita liquida. Sæpe autem hæc pars proportionaliter est nimium aucta, quæ cum alia ratione quam V. S. promptè imminui nequeat, frustra hunc scopum assequi quis studet solis sudoriferis, aut etiam purgantibus. Provoco ad omnes Practicos, qui non obfuscati præjudiciis, quæ multis imposuerunt, è lectione librorum vernacula lingua nimis confidenter conscriptorum, praxim sedulo & attentè exercuerunt, illi nôrunt hæc ita sese habere. Sudoriferorum encomia, & in eorum usu non negligendas cautiones, nec non enumerationes & descriptiones Vide apud *Untzerum* de Epilepsia l. II. c. 7. *Willisium* in fine



cap. 3. de Morbis convulsivis : ubi Methodus Therapeutica , ab ipso adumbrata , prorsus incassum cadit , suadet ad remedia magna devenire , in horum censu primum locum tribuit diaphoreticis. Refert quoque *Alfonsum Ferrum* plurimos Epilepticos simplici *Guajaci decocto* bis in die ad ℥vj. vel viij. præscripto , ejusque decocto secundario , vice potus ordinarii assumpto , curâsse.

Diuretica.

Sequuntur medicamenta diuretica , etiam in hoc morbo non contemnendi usus. Hæc itidem sanguinem fluidum reddunt , ferum copiosius evacuant , adeoque sero , in ventriculis collecto , vel colligendo , pabulum subtrahunt. Oportet medicum esse attentum , quo natura vergat , atque eandem eo ducere per loca convenientia. Ad diuretica non incommode referri potest *Hydromel* cum *Hyssopo* incocto , quod ab antiquis plurimum laudari tradit *Willisius* , & hoc ejusdem decoctum.

℞. Rad. Pæon. mar. Angelic.

Imperator. Valerian. aa ℥vj.

Fol. Betonic. Salv. Lili convall.

Puleg. aa m. j.

Sem. Ruta , Nigell. aa ℥iij.

Pæon. ℥ss.

Passular. ℥iij.

Liquerit. ℥ss.

incis. & contus. Coquantur in aq. fontan. ℔ vj. ad tertiæ partis consumptionem. Circa finem adde Vini Cerasor. nigr. ℔ss. vel ℥x.

F. Colatura quæ servetur in vasis occlusis.

Dosis ℥vj. ad ℥viij. bis in die.

Vel prædicta ingredientia exceptis *Liqueritiâ* & *Passulis* , coquantur in ℔vj. *Hydromelitis* ad consumptionem tertiæ partis.

A prædictis formulis non multum abludunt *Hydromel Antepilepticum* , ut & *Decoctum Untzeri* , quæ l. ii. de Epilepsiâ. c. ii. videri possunt.

Menses mo-  
ventia.

Quemadmodum ante menstruorum eruptionem in juven-  
culis sæpe oritur Morbus caducus , & post eorundem eruptio-  
nem tollitur , ita in id incumbendum est medico , ut naturæ mi-  
nus



nus debitè, vel planè non defungenti suo officio, succurrat. Repletioni à defectu mensium orto, eorundem evacuatio optimè succurrit. Itaque in hoc casu menses moventia sunt eximii usus. Non est hujus loci de iis in specie agere, sufficiat observâsse *Chalybeata* hic egregiè convenire: nec non hanc Morbi caduci speciem imprimis meam confirmare sententiam, nempe eundem originem suam debere repletioni. Formulæ concinnari possunt tales, ut *Chalybs* basim constituat medicamenti, adjectis cephalicis, & specificis antepilepticis. ex. gr.

℞. *Limatur. Chalyb. puriss.* ʒvj.

*Rasur. Ungul. Alcis. Cranii human. violenta morte extincti.* aa ʒij.

*Fol. Sabin. Ruth.*

*Sem. Apii Levisties.*

*Cort. Winteran.* aa ʒß.

*F. Pulvis.* Dos. a ʒj. ad ʒß. & ultra manè cum *Vino albo Gallico*, vel *Rhenano calido*, superdeambulando, vel corpus blandè exercendo.

Vidimus remedia quæ nimiam repletionem (ordinariam Morbi caduci causam) respiciunt, ac imminuunt, videndum quæ ratione inanitio tollatur. Non agemus hic de inanitione universalis, quandoquidem ea non producit Morbum caducum, sed Epilepsiam symptomaticam, de qua in sequentibus. Considerandum tantum est, quo pacto debeat succurri lypothymia, in iis, qui hoc morbo correpti sunt, novum paroxysmum producenti. Illud fit, deducendo ægrotum ex aëre concluso, & vaporibus aut fumo carbonum infecto, in aërem liberum. Eundem è sede altiori humo imponere necesse, quandoquidem multi non ferunt talem sessionem: ubi autem inferior corporis pars, vel totum corpus, excepto capite, humi prostratum est, defectui sanguinis, versus cerebrum parcius moti, succurritur, inanitio hæc occasionalis superatur, adeoque & paroxysmus. In genere oportet respicere causas lypothymiam producentes, easque removere, & in usum vocare ea, quæ in superioribus sunt laudata, tanquam excitantia ægrotum in paroxysmo. Si lypothymia à sanguinis defectu universalis non habeat originem, quod

De inanitione tollendâ.



in hoc casu supponimus, quandoquidem distinguimus Morbum caducum ab Epilepsiâ symptomatîcâ, è nimia sanguinis evacuatione ortâ, manifestum est, debere imprimis respici spiritus, qui eo modo excitandi sunt, uti jam innuimus. Ubi jam ad se redire incipit æger, non inutiliter potest exhiberi mixtura spiritus excitans. ex. gr.

℞. *Aq. Meliss.*

*Ruth. aa* ℥ij.

*Sp. Vini Cephalic. Mynsicht.* ℥j.

*Tinctur. Croci.* ℥jss.

*Sal. Volat. C. C.* ℥ss.

*Syr. Stachad.* ℥ss.

M.

De Specificis medicamentis.

Diximus in indicationibus generalibus, non negligenda esse specifica. Et hæc proculdubio est pars curationis, quæ non tantum in hoc, sed & plurimis aliis morbis, maxime desideratur. Non desunt quidem descriptiones plantarum, animalium, mineralium, non desunt descriptiones remediorum ad pompam concinnatorum, non desunt quoque encomia quibus hæc vel illa simplicia, aut composita celebrantur. Sed si veritatem libere profiteri liceat, pauca promissis respondent. Interim si quis innumeram varietatem plantarum, figura, odore, sapore, succo, efficacîâ differentium consideret, atque diligenter perpendat, hæc ad oculos pascendos non solum esse ab Optimo & Sapientissimo Creatore formatas, is certe in eam propendebit opinionem, hanc varietatem, procul somni dubio, esse proportionatam morbis quibusdam specificè expugnandis. In hisce facultatibus eruendis sumus negligentiores, quisque pro lubitu remedia extemporanea concinnat, in cortice, ut plurimum, hæremus, nucleum non attingimus. Optandum fanè est, ut huic defectui quisque auxiliatrices admoveat manus: imprimis illi quibus herbarum colendarum ampla est supellex! Ut ad negotium nostrum revertamur, recensentur quoque medicamenta ad curationem Morbi caduci appropriata. Non esse omnibus numeris absolutam hanc enumerationem ex eo est manifestum, quod hic plura, ille pauciora, alius alia laudet. Detur mihi venia eorum aliqua absque præjudicio examinandi,

&



& veritati plus, quam præconceptæ opinioni tribuendi. Medicamenta specifica possunt dividi in simplicia & composita. Inter simplicia quædam sunt *Galenica*, quædam *Chymica*, *Galenica* simplicia inter primum sibi locum vendicat,

*Pæonia*, cujus radix, flos & semen quacunque ratione usurpata, mirifica quadam facultate Morbi caduci feminaria elidere dicitur. Hujus laudatur signatura à *Crollio* in libro de *Signaturis*. Verum si ea quæ in superioribus de naturâ hujus morbi disputavimus, attentè perpendamus, & exiguum successum, qui ejus usum consequi solet, trutinemus, facile in eam propendebimus opinionem, huic plantæ deesse tam insignes, quibus ornatur, virtutes. Si porro ipsum florem examinemus, ejus odor multis aliis, si non magnitudine, certè efficacia, plurimum cedit. Radix particulis activis non omnino destituitur. Semen mihi minoris videtur efficaciæ. Signaturis plantarum nimium esse tributum emunctæ naris practici procul dubio mecum statuent.

*Ruta* planta egregia mihi inter cæteras non minimum arridet. Odor ejus est singularis: Sapor non dissimilis; facultatis eximiae: incidit, attenuat, discutit, adeoque non malè & sudorifera & diuretica statui potest. Cerebrum igitur roborabit, sanguinem attenuabit, spiritus excitabit, ventriculum ejusque digestionem adjuvabit, humores serosos & per sudorem & per urinam evacuabit, adeoque pluribus nominibus proderit. Hujus succus expressus naribus illinitur, & bibitur, bibitur etiam decoctum. Videri possunt de hac planta Botanici, & *Untzerus de Epilepsia*. l. III. c. II.

*Viscum quercinum* etiam valdè prædicatur: multis compositis antepilepticis miscetur, verum si odorem & saporem diligentius examines, dubitabis, nec immeritò, an laudes huic remedio tributæ non excedant modum? Si quid præstat, vires ejus in decocto sunt sudoriferæ.

*Castoreum* egregium medicamentum vires eximias & odore, & sapore statim prodit. Ideo in hoc morbo magni faciendum, quod non tantum cerebrum, spiritus animales, cor, viscera respiciat, sed & deficientem mensium evacuationem non mediocriter promoveat.

*Philothens Elianus Montalto*, in *Archipathologiâ*. tract. XVII.



c. 17. inter alia laudat *Smaragdum*, *Lapidem Bezoar*, *Aquam infusionis Lapidis* qui in ventre *Histracis* invenitur, & ex orientali Indiâ à Lusitanis advehitur, ab iisque nominatur *Pedra de Porco Espinho*. Quemadmodum de primo horum non admodum magnam concepi opinionem, ita duo posteriora ob vim diaphoreticam utilia censerī debent. Laudat idem *Leporis coagulū* cum *Aceto* ebibitum, *Cameli Cerebrum siccatum* eodem modo, *Mustelæ* quoque *cerebrum*, & carnem ejus arefactam, *Ungulam Asini*, *Cinerem Cuculi* &c. quæ apud prædictum auctores videri possunt.

*Cranium humanum* & *Ungulam Alcis* præterire non convenit, quippe quarum virtus odore sese prodit, si vel rascentur, vel destillantur. Sanguinem reddunt magis fluidum, adeoque cæteris palmam præripiunt, quando æstus & expansio ejus metuitur. Vide *Untzerum* l. 11. c. 11. *Schenkiū*. p. 119.

*Cornu C. vstū* minoribus pollet virtutibus, adeoque vires ejus in debellando Morbo caduco haberi debent admodum exiguæ, nisi in quantum humores acidos, qui inter causas antecedentes habent locum, aliquomodo temperare aptum natum est. Huic usui etiam possunt servire *Poeonia*, & *Viscum quercinum*; verum quantillum hoc sit ad *Morbū Herculeū* extirpandum, quisque facile judicabit.

Inter medicamenta *Hermetica* plura occurrunt maximè efficacia, adeoque debito encomio non defraudanda, inter ea primum locum dabimus *Oleo Succini*, medicamento minus grato sed potenti, siue enim cerebrum ejusque tumores, aut collectos humores serofos respicias prodest *Oleum Succini*. Si sanguinem ejusque minorem vigorem, aut etiam partes viscidiores respicias prodest *Oleum Succini*: menses movet, viscera roborat, sudorem promovet, urinam ciet. *Oleum succini* pluribus indicationibus satisfacit.

Quamvis Auctores *Oleum Succini* inter medicamenta Antepileptica tantum recenseant, non est tamen existimandum *Sal. ejusdem volatile* Morbum caducum nequaquam respicere. *Sal* hoc sudoriferum est & diureticum, sanguinem fluidum reddit, ad tumores discutiendos utile. Notandum enim non semper ex usu esse ægroti, exhibere medicamenta oleosa & valde efficacia,



cia, mitiora sæpenumero magis conveniunt. Laudatur quoque *Oleum Ligni Buxi*, *Oleum Ligni Heraclini*, *Oleum Cran. human.* *Ol. & Essent. Sanguin. hum.* *Tinctura Corallorum*, *Oleum Luna*, de quibus omnibus in specie dicere non est necessarium.

*Spiritus* tamen *Vitrioli* sicco pede præterire non possum, à *Crollio* tanquam specificum capitale laudatum, ab aliis in Morbo caduco; videri potest *Untzerus de Epilepsia* l. II. c. III. Ego ita existimo, in constitutione biliosa, diebus canicularibus, atque in iis, qui ab aromaticis læduntur, quique sunt siticulosi, plus profuturum hunc spiritum, quam per multas ambages undique conquistam medicamentorum farraginem. Si enim medicamenta sudorifera & diuretica hic eximii sunt usus, quid ni in usum vocabimus spiritum hunc, utrâque facultate donatum? Si nimia sanguinis expansio sæpe novos cieat paroxysmos, quid ni huic obviam eamus medicamento non contemnendo? Si tempus vernum, & inconsuetus aëris calor, sæpe noceat Morbo caduco vexatis, quid ni *Spiritu Vitrioli* sanguinem ad ordinariam reducemus temperiem? *Spiritus* ergo *Vitrioli* in Morbo caduco, non uno nomine, multum valet.

Medicamenta composita tum Dogmaticorum tum Hermeti-  
corum singula examinare non est necesse. Variæ formulæ apud *Untzerum*, *Philothæum Montalto*, *Sennertum* &c. videri possunt. Libet adjicere formulam, cujus efficacia prædicatur.

℞. *Ungul. Alcis* ℥j.

*Nucis moscata raspat.* ʒß.

*Carbon. Tiliæ arbor.* ℥j.

*Offic. talor. Leporis calcinat.* no. ij.

*Margarit. or. gr.* v.

*Sacchar. crystall.* ʒj.

F. Pulvis dividendus in viij. doses.

Assumat æger quotidie cubitum iturus unum pulverem, non negligendo diætam commodam, imprimis caveat sibi ab animi pathematibus.

Progrediendum jam est ad curam specierum Morbi caduci, quarum in superioribus facta est mentio. Si metus sit tumoris in cerebro exorti, omni ope annitendum, ne ille capiat  
in- Cura specialis tumorum.



incrementum, per intemperantiam, validas corporis concussionem, frigus externè susceptum: sed in id incumbendum, ut ille potius discutiatur. Hoc est quidem naturæ opus, at tamen ea adjuvari potest, exhibendo medicamenta sudorifera, & incidentia temperata. Libet adscribere verba *Philothei Eliani de Montalto* tr. xvii. c. 17. *Quod attinet interna, efficacissimum est præsidium in pituitosa materia — decoctum guajaci, aut parillie, aut China cum Sassafras Indica, salvia, Betonica & Stachade, Hyssopo, radice Angelica & Pœonia, aut aliis huic affectioni peculiariter conferentibus, per plures dies juxta consuetam normam, & exsiccantem victus rationem, sudorem bis in die ciendo. Quo vero tempore sudores dimanabunt, tonsō capite adhibeantur sacculi referti semine anisi, fœniculi, baccis Lauri contusis, ligno Aloes, salviâ, Chamæmelo, milio & sale torrefactis omnibus in sartagine.* Quæ ille generaliter tanquam efficacissima prædicat, ea etiam non malè quadrant in illa specie, de qua nunc agimus. Ad discutiendos tumores etiam faciunt medicamenta cephalica dicta, quæ sunt attenuantia, tenuium partium, ut & salia volatilia. Non nego ea rarius votis respondere medici & ægroti, cujus rei duplex mihi videtur causa, quarum prior est, quod tumores tales scirrofi & inveterati curationem respuant, altera, quod non satis diu in principio infistatur methodico eorum usui. Hinc Morbus caducus rarò curatur. Non debet tamen negligi æger.

Serosi laticis

Quando humor serosus ventriculos cerebri replet, & copiosius in capite aggestus est, illius evacuationi incumbendum. Fit illud per purgantia diaphoretica, diuretica, & evacuationes particulares dictas. De prioribus evacuationibus in superioribus est actum, adeoque illa hic repetere non est necesse. Ad dam tantum aliqua, quæ in hoc morbo laudantur, nempe *Spir. Card. benedicti, Tartari compositum, Fuliginis. Tinctur. Bezoardicam*, ut & *Antimonium diaphoret. cum Theriac. vel Mithridat.* exhibitum *Olea destillata Succini, Lign. Bux. Ruta, Caryophyll. &c. Walsmidi* laudat *D. Ludovici Pulverem Epilepticum*, quoniam autem hic Laudani opiatum quantitatem satis ingentem recipit, non nisi prudenter in usum est vocandus. Non amo ego opiata in affectibus spasmodicis, nisi producantur à vigiliis



liis protractis, in quo casu morbi causa est respicienda, nisi dolor & urgentia symptomata eorum prudentem usum flagitent: verum de hisce in sequentibus erit agendum. Restant evacuationes cerebri particulares, Errhina, Apophlegmatismi, Gargarismata, verum cum eorum jam ante sit facta mentio, & *Untzerus* atque alii practici hæc satis fusè pertractent, non judicavi necessarium hisce immorari: Setacea commendantur à *Platero* & *Sennerto*. De Fonticulis in sequentibus agam.

Altera species est ea, quæ oritur à mensium defectu. In hac specie menses moventia conveniunt, de quibus actum in superioribus. Addendum tamen, posse aliquando menses moventibus utiliter permisceri purgantia ex. gr.

℞. *Limatur. Chalyb. purif.* ʒß.

*Aloes lucid.*

*Trochisc. Alhand.*

*Resin. Falapp.*

*Castor. opt. aa* ʒj.

*Croci Brit.* ʒß.

Cum *Elix. prop.*

F. Pilulæ no. xxx.

pro vj vel vij. dosibus, vel etiam pluribus pro circumstantiarum varietate prudenter determinandis.

Restat tertia Morbi caduci species, in qua vapor venenatus & malignus ab hâc, vel illa corporis parte sursum videtur ascendere. Hoc in casu ferro & igne in partem illam debacchantur medici, de partis extirpatione deliberant, cauteria inurunt, quæritur an rectè hæc in usum vocentur, nec ne? Respondeo: ex iis, quæ in superioribus disputavi, patet, me minimè existimare focum mali, aut venenum in illa parte hærrere, omnem Morbum caducum esse idiopathicum, unde sequitur, me illius esse opinionis, frustra vario tormentorum genere excruciarî partem innoxiam. Quemadmodum enim in febribus intermittentibus, cum livore unguium incipientibus, malè & absque omni fructu digitis & unguibus admoverentur cauteria, quoniam ideo tantum hæ partes livent, quia à corde longissimè remotæ, febrilis paroxysmi indicia primum produnt,

Defectus  
mensium.

Tertie spe-  
ciei.



ita existimo etiam pessimè has partes aliquando crudeli instrumentorum apparatu vexari. Dicat aliquis, num illis partibus aliqua debeat fieri medicina, nec ne? Dico his partibus rectè posse fieri medicinam, sed eam tantum consistere in partis roboratione. Suppono enim partes has, è quibus aura talis videtur adscendere, esse debiliores, adeoque noxam sese ibi primum prodere; itaque roboratione opus est tantum, si nulla malè affectæ partis alia, quam quorum meminerunt vulgo auctores, signa appareant. Possunt ergo fomenta, emplastra, cataplasmata, balnea &c. in usum vocari, nulla autem alia, quam confortantia. Dicat aliquis, an omnino rejicis omnis generis cauteria? Respondeo: non rejicio omnis generis cauteria, sed nolim ea aliis locis quam consuetis, nisi summâ urgente necessitate, inuri: sc. nuchæ, brachiis, cruribus; ita enim pars aliqua laticis serosi, alias cerebrum malè mulctaturi, exhauritur, adeoque prava cerebri dispositio, Morbi caduci causa, aliquomodo corrigitur. Quantum ad cauterium futuræ coronali inurendum, si ritè Auctorum placita examinemus, videbimus, illud maximam partem innixum esse præjudiciis, de vaporibus versus cerebrum adscendentibus, præjudiciis de Catharorum origine, productione, descensu: adeoque his ratiocinationibus non multum tribuendum esse videbimus. Si porro objectiones & responsiones, ab Auctore propositas perpendamus, plurima falsa & erronea adduci satis patebit: itaque locum incommodum, & inustionem, quam aliquando dira exceperunt symptomata, posthabebimus locis ordinariis & consuetis. Quod si quis contendat, tamen hanc curandi methodum aliquando ægroto profuisse, existimo non hoc ideo factum esse, quod illa curandi ratio juxta rationis præscriptum sit instituta, sed quod evacuatio laticis serosi profuerit, & fortè minori medicamentorum apparatu & commodiori methodo, majus emolumentum potuisset afferri ægrotanti. Deinde si aliqua sunt exempla eorum, in quibus talis profuit inustio, sunt etiam non pauca in quibus malè cessit hic curandi modus. Testis mihi *Ludovicus Septalius*, libere pronuncians: *Ego vero libere affirmare possum, me quadraginta horum annorum spatio, quo in magna hac urbe Medicinam facio, nullum ex iis, quibus cauterium hoc inustum est,*



est, vidisse à tali remedio adjutum, sed aliquos etiam, inflammatione in parte excitata, esse periclitatos: potissimum primis annis juventutis meæ, quo tempore aliqui adhuc ex iis vivebant, qui barbaram sectantes Medicinam frequentius genus hoc auxilii in usum ducebant: sed subsequenti tempore Medicis spe sua fraudatis sapius, exolescere tandem illud, & posthaberi merito cœpit. Locus exstat *Animadv. Med.* l. i. p. m. 164. &c. q. v. De cauteriis latius disputantem vide *Untzerum* de Epilepsia l. ii. c. 9. *Conradum Victorem Schneiderum*, de Catharris l. iv. c. 11.. Profunt cauteria brachio vel cruri applicata, cujus exemplum habet *Zacutus Lusitanus* in *Pr. Med. admiranda*. l. i. obs. 20.

Restaret ut Diætam hic præscriberem commodam, verum cum ea non ita difficulter colligi possit ex iis, quæ superius disputavi, cumque practici de eâ soleant agere, non est necessarium eam adjungere: interim observari velim animi passiones imprimis hic debere considerari, id quod non tantum ex iis quæ in præcedentibus disputavi est manifestum, sed & è duplici *Gabelchoveri* observatione, Epilepsiæ ab animi commotione curatæ. *Curat.* 23. & 24. *Cent.* iv. quæ facit ad confirmationem sententiæ meæ in superioribus propositæ.

Diætā omittitur.

## CAPUT DUODECIMUM QUARTUM.

### *De Epilepsiis Symptomaticis febrilibus.*

**I**nscriptio hujus capitis, & tabula superius proposita ostendit, me existimare, hæc symptomata febrilia esse distinguenda à Morbo caduco, de quo capite præcedenti egi. Quamvis enim externâ facie in eo conveniant, quod in ambabus speciebus mens sit abolita, ægri nihil sentiant, nihil percipiant, artus, facies, &c. vehementer convellantur, in eo tamen longissimo intervallo à se mutuo distant, quod hæc à febre dependeant, non nisi febricitantes adoriantur, & curatâ febre omninò cessent. Differunt ergo quoque & causis, & curandi ratione. Quam utile autem sit ea, quæ & ab aliis dependent causis, & quæ aliam curandi rationem postulant, separatim tractare, nulli potest esse obscurum.

Morbus caducus differt ab Epilepsiâ febrili.

Possem has Epilepsiæ species ad febres ablegare, adeoque

Epilepsia febrilis hic tractanda.



eas sicco transire pede, nisi necessitas hanc tractationem planè flagitaret. Juxta Methodum quam mihi proposui, doctrina de Febribus non habebit locum, nisi post tractatos medii, & infimi ventris morbos, adeoque tempus requiritur non exiguum, antequam ea publici fiat prius. Quamvis enim hæc jam literis sit consignata, debet tamen iterum ad incudem revocari, antequam adspicere lucem possit. Itaque non tam diu suspensus est tenendus curiosorum animus, sed hic explicanda est Epilepsiæ febrilis natura, quatenus ea cum Febribus necessario nexu cohæret. Dari Epilepsias has febrilli nemini potest esse obscurum qui ad ea, quæ in praxi occurrunt, satis fuit attentus. Non tantum Epilepsiæ occurrunt, sed & satis frequentes, quamvis non semper Auctores earum inter symptomata febrium meminerint. Verum sæpe videas homines antecedentium sequi gregem, quam veritati investigandæ indefesso studio incumbere. Non est tamen omnino neglectum hoc symptoma. Vid. *Forest.* l. VII. 17. & *Sennert.* l. IV. c. 18.

Febrium  
causa sæpe  
est repletio.

De Febribus in genere non disputo, illud tamen velim diligenter animadverti, Febres non rarò è repletionem ducere originem. Quamvis enim sæpe externa causa præcedat, cui febris adscribi potest, tanquam occasione, febrilem paroxysmum primum producenti, causa antecedens ut plurimum est repletio. Atqui hoc respectu *Sydenhamius* non malè pronunciavit, Febres esse conatus naturæ illud superare gestientis, quod corpori molestum & noxium est. Ut aliquis hujus veritatis idæam animo concipiat, oportet cogitare ad nutritionem corporis nostri sufficere, si appetui nostro mediocriter satis fiat, ita partes, per insensibilem transpirationem avolantes, restituntur, ita jactura, ab excretis corpori illata, restituitur, ita homo ad opus ordinarium redditur satis aptus. Jam autem quotusquisque est, qui intra hosce mediocritatis cancellos sese continet? Quotusquisque est, qui non data occasione appetitui nimium tribuit? Quem non cibi & potus grati lenocinia seducunt? Qui à varietate ciborum & potus, nec non variis gulæ irritamentis delinitus, modum illi statuit justum? Ita omnes, quotquot sumus, ad intemperantiam reddimur proclives, sæpè intemperantiæ luimus poenas, non tantum  
post



post ingluviem, aut aliqualem crapulam gravati, sed & ex iisdem causis in varios, pro varia partium structurâ, incidentes morbos. Ita videmus, causas considerando non esse mirum, si repletio & intemperantia pariat febres. Quod si ea quæ usus docet examinemus, sæpe contingit quosdam è febribus, aut aliis morbis emergentes, emaciatos, alacres & vegetos per aliquot tempus degere, postquam autem corpus iterum multum repletum est, è levi occasione iterum in febres incidere. Quid? Quod V. S. neglecta in febre aliquando lethalia pariat symptomata? Quid? Quod febris unica purgatione & V. S. superetur? Vid. *Gabelchoverum* Curat. 8. & 9. Cent. vi. E priori observatione patet, ægrotos aliquando melius de curationis ratione judicare, quam medicos minus attentos, vel præjudiciis occupatos, quales non pauci occurrunt. In posteriori, non unum, sed tria curationis per V. S. & purgationem occurrunt, exempla: quæ tam facile morbum non jugulâssent, nisi repletio causa fuisset febris. Quanto autem major repletio hanc produxit, tanto facilius æger convulsionibus est obnoxius, uti è sequentibus patebit, ubi descriptionem hujus symptomatis proposuerimus.

*Epilepsia febrilis est vehemens corporis convulsio, cum sensuum internorum abolitione à febrili repletione & orgasmo producta, febre curatâ nullis novis paroxysmis affligens.*

Descriptio  
Epilepsia  
febrilis.

Quando dico Epilepsiam febrilem vehementem corporis convulsionem, eam distinguo à Motibus convulsivis, qui, quamvis quoque in febribus, & aliis morbis accidant, sunt tamen minus vehementes, nec crebris & repetitis concussionibus corpus universum exagitantes. Epilepsia hæc est adeo conspicua, ut nullus, qui ægrotanti adest, eam possit ignorare, vel eandem non animadvertere: motus convulsivi & tendinum subsultus adeo exigui sæpe sunt, ut non nisi diligenter attendendo observentur à medicis in exploratione pulsus. Videbatur autem mihi ad tractationem distinctam non nihil facit, si de Epilepsiâ hæc, & motibus convulsivis in specie agerem, quemadmodum nos hæc nostro idiomate distinguere solemus Epilepsiam febrilem dicendo *Stuipen*. Motus autem convulsivos *Schrikken* & *Trekkingen*.

Ea explicatur.



Abolitio  
sensuum in-  
ternorum.

Sensuum internorum abolitione convenit hæc Epilepsiæ species cum Morbo caduco, differt à Motibus convulsivis, in quibus mens sæpe constat, quamvis non rarò contingat eam esse obnubilatam; verum illud non est de essentia motuum convulsivorum.

Oritur à  
nimia re-  
pletione.

Dixi hanc Epilepsiam originem ducere à repletionem, & talis præcipuè locum habet in febrium initiis, quando à nimia sanguinis copia, non sufficienter imminutâ, statim ægri in hos incidunt paroxysmos. Ita videas homines admodum robustos, ante V. S. celebratam in initio febrium, admodum anxios, vertigine aut caro corripitur, quibus succedunt aliquando Epilepsiæ, quas nunc tractamus. Nempe si corpus, ante febris insultum, sit humoribus & sanguine onustum, necessum est, illud multo magis gravari, ubi febris ingruens pulsus celeriores, pressionem majorem, cum sanguinis insigni expansione & æstu produxit. Ita apparet Epilepsias, in principio febrium invadentes, à repletionem ducere originem. Eadem illa repletio habet locum in Epilepsiis, in progressu febrium, & augmento morbi, contingentibus, sed aliâ ratione. Tum enim non tantum consideranda est sanguinis copia, sed & immutatio, & à naturali statu recessus. Nempe à febrili orgasmo introducit in universum corpus & sanguinem dispositio inflammatoria, iisdem symptomatibus non raro stipata, quæ sanguinem ineptiorem reddit ad promptè subeundum minimas arteriarum carotidum ramificationes, unde tum repletio earundem major, sensuum internorum obnubilatio, visus abolitus, oculi fixi, ac insultus epileptici. Hanc immutationem sanguinis in febribus, inspectione ejusdem educti, sæpe observare licet. Non rarò contingit, eandem dispositionem sanguinis etiam in principio habere locum, verum illud non semper accidit, sanguis in principio febrium eductus, satis laudabilis nonnumquam conspicitur, in progressu autem Morbi, ubi hæc symptomata adsunt, immutatio illa sanguinis magis ordinaria, & si V. S. educatur, magis conspicua est.

De Epilepsiâ  
febrili ex-  
traordinariâ.

In tabula superius proposita feci mentionem Epilepsiæ febrilis ordinariæ, quam dixi, in principio vel in augmento febrium contingere, explicui utramque, prout illæ ad Febrem relationem ha-



habent, dantur adhuc Epilepsiæ tales, extraordinariæ, à medicæ, quæ scilicet febres Epidemias malignas, & pestilentiales comitantur. Nempe si febris mitior, vel non admodum maligna, gravia hæc producat symptomata, non est mirum, si eadem acuta & maligna, à contagio aëris producta, sanguinem & spiritus magis exagitans, majorem æstum, & dyscrasiam sanguinis producens, non sit immunis à gravi hoc symptomate. Refert *Willisus* è *Horstio* historiam Febris Epidemicæ per Hassiam grassantis, & Convulsiones graves seu Epilepsiam producentis. *Idem* habet historiam Febris Epidemicæ cerebro & nervoso generi potissimum infestæ, in *Anglia* anno 1661. increbrescentis in *Pathologia* cerebri p. m. 105. *Sennerius* in enumeratione symptomatum Pestilentia, qui morbus est epidemius, recenset etiam convulsiones. *Idem* fusè descripsit febrem malignam cum Spasmo qui anno 1596 & 1597 in Episcopatu Colonienfi, *Westphalia*, Comitatu *Waldeccensi*, & *Wittensteinensi*, atque *Hassia* grassatus est, quia vulgo die *Kriebel Kranckheit* / *Kriempffsucht* / oder *Ziehende Seucht* appellantur. *Laurentius Donkers* in tractatu de morbo punctulari, quoque meminit motuum convulsivorum. p. 206.

Non explico modum productionis harum Epilepsiarum, tum quoniam is è superioribus evadit manifestus, tum etiam, quoniam hæc tractatio hic tantum locum invenit, quatenus cum reliquis morbis convulsivis cognatione quâdam jungitur Epilepsia febrilis. Juvat tamen hæcenus explicata è *Willisio* confirmare. Is de Morbis convulsivis p. 120 & 121. annotavit ea, quæ in dissecto observaverat cadavere. Nempe *calvarie olla amota statim vasa meningum perreptantia, sanguine plurimum turgescere conspiciebantur: quasi fere tota cruoris massa in capite aggregaretur: porro membrana ista, ubi cerebellum invenit, atque altius instrata ipsum à cerebro dirimunt, sanguine pluribus in locis extravasato suffusa, colore atro purpureo insigniebantur: ut minime dubitandum esset, quin phlogosis, sive inflammatio illic circumcirca excitata, convulsionum, adeo atrociter infestantium, causa fuerit. Postmodum addit, ventriculos omnes aqua limpida fuisse repletos. An potest confirmatio illustrior sententiæ in superioribus propositæ adferri? Si vasa meninges perreptantia*

Præcedenti-  
um confir-  
matio.



tia post mortem fuerint inventa adeo turgida, ubi omnia sub-  
 fidere solent, quanto magis eadem illa intumuerunt, ubi à  
 corde crebrius contracto, æstuans continuo propulsus fuit  
 sanguis? Si sanguis, absque externa causa, fuit inventus extra-  
 vasatus, quanta debuit esse repletio antequam è tubulis effun-  
 deretur arteriosis? Si sanguis quasi universus in capite visus  
 fuit *Williso* aggestus, manifestum est, cerebrum debuisse  
 multum deprimi, sensus obnubilari, denique tandem convul-  
 siones induci. Si sanguis tanto impetu fuit propulsus, ut è va-  
 sis effunderetur quanta vis debuit cerebro, visceri molli, in-  
 ferri antequam læsio tubulorum fuit producta? Videmus ita-  
 que repletionem vasorum nimiam, cerebri depressionem, transi-  
 tum per arteriarum fibrillas difficilem, impetum sanguinis è corde  
 propulsi, & pressionem hic imprimis debere considerari. Quid?  
 Quod ægri in febribus sæpissimè de pulsatione molestissima  
 conquerantur? Contingit illud & ante & post V. S. etiam in  
 iis, qui convulsionibus necdum sunt obnoxii: ubi mens est  
 læsa querelæ cessant aliquando, quamvis causa doloris non sit  
 sublata.

Testimonium hoc, & hinc petita confirmatio tanto majoris  
 debet videri ponderis, quandoquidem depromptum est ex  
 ejus Viri scriptis, à cujus hypothese, mea sententia longis-  
 simo distat intervallo. Statuit ille *laticem pauperiorem*, & quasi  
*effœtum*. Liquorem *particulis heterogeneis*, partim *narcoticis*, par-  
 tim *explosivis* refarctum. Statuit ille vitia hæc à *sanguinis dyscra-  
 sia* (quam postmodum explicat, quod *spiritu & sulphure* aliquan-  
 tum depresso, *particule aquose*, cum *sale & sulphure* impuro si-  
 mul evectis, fuerint exaltatæ) & *cerebri dispositione prava*, o-  
 riginem habuisse. Rogo autem, quæ harum omnium suppo-  
 sitionum in cadavere apparuerint vestigia? Quæ *laticis paupe-  
 rioris*, quæ *particularum heterogenearum* indicia? Quæ *salis*,  
 quæ *sulphuris impuri* signa? Si *inflammatio*, si *phlogosis* circum-  
 circa excitata, *procul omni dubio* produxerit has convulsiones,  
 cur fictitias asserere causas, quam manifestis inhærere malui-  
 sti? Sententia tanto debet statui probabilior, quanto magis  
 inconcussis, quanto simplicioribus innititur principiis. Quæ  
 ille post mortem in cadavere oculis lustravit, ea evincunt non  
 alia,



alia, quam quæ propofita funt, in vivo habuiffe locum. Unde arteriarum tumor? A repletionem. Unde color atro-purpureus? A repletionem. Unde inflammatio & phlogofis? A repletionem. Unde vafa difrupta? A repletionem. Repletio cum ingenti æftu, & expansione junctæ: Repletio à cordis crebra & præternaturali contractione excitata: Repletio cerebri mollem fubftantiam aggravans, & deprimens, omnium horum fymptomatum fuit caufa. Poffem hæc amplius confirmare ex iis quæ in thorace funt obfervata, è pulmone rubicundo, & velut cruore fuffufò, & fic porro, nifi ea, quæ hætenus adducta funt, abundè fententiæ meæ veritatem evincerent.

Hæc breviter dicta fufficiant, ut relatio quæ inter Epilepfias hæc, & Febres, illas producentes, innotefcat, cætera ad doctrinam de Febribus pertinent. Differentiæ funt, quod aliæ funt graviores, aliæ leviores: aliæ quæ Epilepfia nomen omnino merentur, aliæ quæ ad motuum convulfivorum naturam propius accedunt; eft enim hic quædam latitudo. Aliæ ftatim in principio accidentes, aliæ circa ftatum ingruentes, aliæ ordinariæ, uti dictum eft, aliæ extraordinariæ. Poffent aliæ ftatui differentiæ juxta fexum, ætatem &c. fed illæ funt minoris momenti. Majoris momenti eft, quod aliæ brevioribus repetant intervallis, aliæ rarius ingruant.

Signa per fe funt manifefta, ægri fubito in *ἀναισθησίαν* & vehementes membrorum contractiones incidunt, quæ poftquam per aliquot tempus tragædiam fuam exercuerunt, iterum definunt. Urina sæpe inflammatoria, præceffit fitis ingens, capitis dolor, Vertigo, Phrenitis, Coma vigil, aut Carus: quanto graviora ftatim ingruunt fymptomata, cerebrum & fpiritum animales valdè afficientia, tanto major metus eft ab Epilepfiis febrilibus. Signa in affectibus Epidemicis occurrentia, è particularibus relationibus, & diligenti obfervatione investiganda.

Prognofis ita habet. Omnis Epilepfia fymptomatica febrilis valdè eft periculofa, quandoquidem reliqua prava effecta aggravat. Quanto autem pluribus vexatur æger fymptomatibus, tanto citius succumbere folet. Leviores tamen Epilepfia, in principio contingentes, facilius expugnantur, quandoqui-



dem vires integræ sæpe remedio generosiori concedunt locum, quod non permittunt eadem exhaustæ. Quæ in febribus malignis accidunt convulsiones, cæteris paribus, magis sunt periculosæ, quam quæ in febribus vulgaribus contingunt. Hæ enim plerumque vel à repletionem, vel à corporis dispositione, sæpe non admodum malâ dependent, cum illæ à malignitate & contagio habeant ortum. Quanto brevioribus intervallis repetunt Epilepsiæ, tanto periculosiores. Quæ apud *Hippocratem* Aph. 20. & 21. f. III. de Epilepsiis vernalibus & autumnalibus dicuntur, quamvis ea pluribus speciebus applicari possint, tamen, meo quidem judicio, de Epilepsiis febrilibus non malè intelliguntur.

## Indicationes

Indicationes generales sunt, nimiam repletionem imminuere, spiritus recreare, æstum temperare, sanguinis motum ad cerebrum magis vergentem aliò derivare. Hæ sunt omnino genuinæ indicationes, necessario nexu cum explicatione, in superioribus propositâ, cohærentes, in praxi utilissimæ, votis medici, nec non saluti ægrotantium maximè accommodatæ. Hinc nascitur præjudicium non paulo veriora esse ea, quæ à me sunt disputata, quam ea, quæ è falsa hypothese sunt eruta.

Cura per  
V. S.

In curatione primum sibi locum vindicat V. S. in morbis convulsivis summi usus, quandoquidem hi à repletionem sæpe numero dependent. Ad repletionem autem tollendam præsentissimum remedium est V. S. Non est tamen ea promiscuè usurpanda. Convenit ea in Epilepsiâ ordinariâ, in principio febrium accidente, imprimis si *καρφαλα*, Cephalalgia, Vertigo, aut similia præcesserint symptomata. Convenit etiam in augmento morbi, si eum à statu aliquantulum adhuc videamus abesse, nec vires sint admodum fractæ. Non est instituenda in statu, aut viribus attritis, nisi summa id postularit necessitas, & consultius sit anceps experiri remedium quam nullum. Non est etiam instituenda in declinatione morbi, nisi circumstantiæ aliquæ eam omnino flagitent. Ex gr. Quando in augmento, aut statu morbi ea debuit omitti, ob symptomata ejus usum vetantia: aut quando pars caseosa sanguinis peccat. Quantumvis enim tum medicamentis purgan-



gantibus, sudoriferis &c. insistas, exhauries quidem serum & serosas partes sanguinis, caseosa autem & crassior ejusdem pars hærens, & replens vasorum arteriosorum minimas fibrillas, varia producet symptomata, & fortè tibi sub larva morbi hypochondriaci & scorbutici imponet, quem varia medicamentorum farragine vix, aut ne vix quidem, solâ V. S. facillimè & brevissimè, jugulabis. Verum hæc in transitu, quamvis ex intimâ praxeos medulla sint petita & maximi usus, uti forsàn alias latius explicabo. Dubitari posset, an in febribus malignis ea in usum sit vocanda nec ne? Verum difficilis est responsio quandoquidem febres malignæ & epidemicæ non omnes sunt unius generis. Sydenhamius laudat V. S. & quidem largam, Gabelchoverum eam commendare etiam in morbo castrensi, in superioribus vidimus. Idem Gabelchoverus de V. S. in peste instituenda disputat. Curat. 69. Cent. v. Willisius quoque V. S. in febre epidemica à se descripta laudat. Hic finem impono, totum hoc negotium discutere, non est hujus loci, cum id ad doctrinam de febribus pertineat. Videri potest Septalius in animadversionibus, & Mollenbroccius in Medullâ totius praxeos Medicæ aphoristicâ.

Nimia repletio imminuitur hoc in casu quoque purgantibus, verum ea prudentiam medici requirunt, ne intempestivè in usum vocata ægroto noceant. Conveniunt purgantia in initio morbi, ubi convulsiones sequuntur affectum soporosum, Carum mihi dictum. Quum enim vires consent, cumque Carus & Epilepsia purgationem suadeant, ea quamprimum est præscribenda. Ex. gr.

Purgationem.

℞. Elect. Panchymagog. nostr. ʒijss.  
Cremor. Tartar. ʒss.  
Aq. Meliss. q. s.  
M. F. Haustus.

Si forma mitior arrideat

℞. Fol. Senn. mund.  
Rhei elect.  
Tartar. Rhenan. alb. aa ʒij.  
Sem. fenic. d.  
anis. aa ʒss.



Bulliant leviter colat. ℥iv. Add.

Syr. Rosar. solat. c. senn. ℥ij.

F. Haustus.

Electuarium à Medicis Marpurgensibus præscriptum in febre epidemicâ apud *Sennertum* videri potest. *Willisus* laudat medicamenta cathartica, ac imprimis vomitoria, statim in morbi principio exhibita, cui ego facile assentior. Non quod succi nervosi superfluitates in viscera inferiora exprimantur; sed quod ventriculus & primæ viæ exhauriantur, saliva tenax, postmodum morbum aggravatura, nec non bilis, in pluribus nimia, educatur, & in universo corpore repletio imminuatur.

Non sunt facilè exhibenda purgantia erumpentibus, in metu Variolarum, aut Morbillorum, aliquando propinari possunt.

Non sunt exhibenda in Epilepsiâ circa statum, viribus attritis, ingruente.

Clysteres.

Ubi ergo circumstantiæ aliquæ purgationem vetant, repletionis aliqua imminutio sperari debet ab usu enematum, in hoc morbo magni usus. Conveniunt enemata in Epilepsiis, in quibus ægroto catharticum per os exhibere non possumus. Conveniunt enemata in Epilepsiis circa statum Morbi, & viribus fractis ingruentibus, ubi non est tutum exhibere purgationem per os. Conveniunt non tantum ad evacuationem aliquam procurandam, sed & æstum temperandum, spiritus recreandos, sanguinis motum ad cerebrum nimium vergentem, versus primam regionem blandè alliciendum. Formula talis potest præscribi:

℞. Rad. Lilior. alb. ℥j.

Fol. Malva m. ij.

Parietar.

Cichor. aa m. j.

Flor. Chamomill. p. j.

Sem. Carui. ℥jss.

Coq. f. a. ex aq. pura colat. ℥x. Add.

Elect. Cholagog. Sylv.

Mellis Mercurialis aa ℥j.

Sal. com. ℥j.

M. F. Enema.

Wil.



DE EPILEPSIIS FEBRILIBUS. CAP. XIV. 453

*Willisus* vult Enemata quolibet die injici. *Wierus* majori quantitate clysteres præscribit in Epilepsiâ :

℞. *Malva*, *Mercurialis*, *Beta*,  
*Betonica*, *Majorana*. ad m. j.  
*Furfurum tritici*. m. β.  
*Fl. Anethi*.  
*Centaur. min.* p. j.  
*Sem. carui*. ℥β.

Concidantur & in q. f. aqua decoquantur ad tertias, exprimantur, & colentur. colati juris accipe ℥xv. quibus admisce :

*Pulpa Cassia*. ℥j.  
*Hiera simpl.* ℥β.  
*Olei commun.* ℥iij.  
*Salis*. ℥j.  
 F. Enema.

Spiritus in hoc casu optimè recreantur acidis, *Aceto Bezoardico*, *Calend. Sambucino*, *Rutaceo*, *Scyllitico*, &c. five illarum naribus admoveantur, five etiam lateri candenti inspergantur, five etiam internè exhibeantur ad spiritus excitandos, & sudores blandè promovendos. Acida ambabus his gaudent facultatibus, ambo hæ in Epilepsiâ febrili optimè conveniunt. Ex. gr.

Spirituum  
recreatio  
per acida  
perficitur.

℞. *Aq. Meliss.*  
*Ruth.*  
*Betonic.*  
*Fl. Tilie.*  
*Acet. Bezoard.* aa ℥j.  
*Cremor. diaphoret.* ℥jβ.  
*Lapid. Bezoar. occid.* ℥β.  
*Syr. Acetos. Citri.* ℥β.  
 M.

Si cui forma haustus magis arrideat is utatur sequenti

℞. *Rasur. Ungul. Alcis.* ℥j.  
*Margarit. ppt.* ℥β.  
*Sal. Absinth.* gr. v.  
*Succi Limon. depurat.*



*Rob. Ribesior. aa ʒij.*

*Aq. Rosar. q. s.*

M. F. Haustus.

*Timæus* exemplum habet *Pestis Aceto theriacali curatæ L.*

VIII. cas. 32.

Æstus tem-  
perantia.

Æstus temperatur diluentibus & sudoriferis. Duluentia insignis sunt usus omni tempore, præcipuè ubi sitis intensa vexat, & morbus eundo tantas acquisivit vires, ut alia medicamenta in usum vocari non possint. Ea enim sanguinem temperantur, & magis fluidum reddendo, impediunt ne arteriarum carotidum ramificationes nimium repleat sanguis, vel magis fervens & dilatatus, vel etiam inflammatoriam dispositionem nactus. Ex. gr.

*Rx. Rad. Scorzonæ. ʒij.*

*Cichor. ʒj.*

*Fol. Acetos. m. ij.*

*Borrag.*

*Bugloss. aa m. j.*

*Coq. s. a. ex aq. pura colat. ℥ij. Add.*

*Rob. Ribesior. ʒjß.*

*Succi Limon. depurat. ʒß.*

M.

*Willisius* præscripsit hoc modo :

*Rx. Rad. Scorzonæ. Chærefol. Gramin.*

*Eryngii cond. aa ʒvj.*

*Pomum incisum.*

*Fol. Pimpinell. Ulmar. aa m. j.*

*Passular. ʒjß.*

*C. C. usti. ʒij.*

*Incis. & contus. Coquantur igne claro in aq. fontan. ℥iv. ad tertiæ partis consumptionem, colaturæ claræ ℥ij. Add.*

*Syr. Acetos. Citri, aut Violar. ʒij.*

*Sal. prunell. ʒjß.*

F. Apozema.

*Dos. ʒiv. ad vj. ter in die.*

*Sudorifera. De sudoriferis, quatenus ex acidis constant, jam egimus, sub-*  
*jici-*



jicienda sunt alia, in hoc symptomate itidem utilia. Nempe cum sudorifera sanguinem reddant magis fluidum, si non destituantur debito vehiculo, atque, facilem promovendo circulationem, impediunt quo minus in minimis arteriarum carotidum ramulis hæreat, repletionem nimiam ac convulsiones producat ea omnino sunt præscribenda. Eligenda autem sunt temperatiora, præcipuè si æstus, aut malignitas vexet. *Lapidem Bezoar* in Febribus malignis & petechialibus pluribus prædicat *Gabelchoverus* in Annot. ad obs. 3. Cent. v. cujus vires egregias testatur expertum esse *Jacobum Augustum Thuanum*. Vult autem illum exhiberi mediocri quantitate, nec aliis medicamentis misceri. Huic miscelæ se opponit his verbis: *At vero considerare debuissent LAPIDEM BEZOAR ita dici, quasi domitorem veneni; vel Regem venenorum, quod vi & efficacia sua, quædam venena superet. Quemadmodum enim Rex in suo regno confirmatus, socium concurrentem ferre non potest, eadem ratione LAPIS BEZOAR se cum aliis simplicibus misceri non patitur; vel minus laudabiles effectus præstat. &c.* Sunt & alia medicamenta sudorifera ac Alexipharmaca, in hoc casu insignis usus. Talia sunt C. C. Sp. ppt. Unicornu, Rasura Ungul. Alcis Margarit. ppt. Cremor diaphoreticus, Bezoardicum minerale, & Lunare Pharm. Bat. Calx Luna & Cinnab. Antimonii ejusdem. Huc refer & Decoctum adsitum ibidem præscriptum.

Ex his variæ possunt concinnari formulæ: ex. gr.

℞. Lapid. prunell. ʒß.

Margarit. ppt.

Cremor diaphoret. aa ʒj.

F. Pulvis. pro iij. dosibus.

*Walsmidius* in Febre Hungarica hoc modo præscripsit:

℞. Aq. C. C. Citrat.

Contra febrem malign.

Cerasor nigr. aa ʒij. Hoc morbo correpti facile fiunt epileptici.

Epilept. ʒij.

Confect. de Hyacinth. ʒj. vel ʒß.

Sp. destillat. g. xij.

Syr.



*Syr. Acetos. Citri.*

*liberantis aa ʒjß.*

*M.*

*Timai pulvis Epilepticus magistralis.*

*℞. Magist. Lunæ ʒiij.*

*Perlar. or.*

*Corall. rubr.*

*Oc. Cancri.*

*Succin. alb.*

*Matris perlar. aa ʒj.*

*Cran. human. ʒiv.*

*Corn. Alcis phil. cal. ʒiv.*

*C. absque ign. calc. ʒjß.*

*Facul. poeon. ʒv.*

*M. F. Pulvis. Affund.*

*Spir. Cerasor. nigr. q. s. ut fiat quasi pasta.*

*Teratur in marmore postea iterum exsic-*  
*cetur, laborem hunc ter repetendo ut*

*F. Pulvis subtilissimus.*

Quod si loco tantæ farriginis magisteriorum, simplicia vul-  
gari modo præparata, in usum essent vocata, pompæ minoris,  
non minoris tamen fuisset efficaciam potuisset concinnari pulvis.

Ad convulsiones epilepticas febriles hunc habet pulverem  
*Sennertus.*

*℞. Rad. Pentaphyll.*

*Tormentill. aa ʒß.*

*Ras. Ungul. Alcis. ʒj.*

*Crystall. ppt. ʒß.*

*Corall. rubr. ppt.*

*Margarit. ppt.*

*Oc. Cancri ppt. aa ʒj.*

*Smaragd. or. ppt. ʒß.*

*Rad. Poeon. masc. ʒj.*

*F. Pulvis*

Pro ditioribus addantur aliquot grana *Lapidis Bezoar.*

De medica-  
mentis opia-  
tis,

Non facio mentionem opii, vel medicamentorum opiato-  
rum, quamvis ea ad expellendos sudores & malignitatem su-  
peran-



perandam non mediocribus polleant viribus. Verum oportet considerare, nos versari in curatione Epilepsiæ febrilis, & quidem à repletionem ortæ, in qua arteriolæ carotides nimium sunt repletæ: non oportet itaque repletionem, & hanc consequentem depressionem cerebri augere. Sive enim Epilepsiam consideres in principio, sive etiam in augmento vexantem, suspecta sunt medicamenta opiata. Suspecta sunt in principio, quandoquidem insignis est repletio arteriarum carotidum, & aliquando non mediocris in somnum propensio. Quid? quod sanguinis ferocientis æstus medicamenta hæc aliquando planè respuat? Ubi autem morbus in progressu est, vel ad statum accedit, non est tutum ægroto adeo debili exhibere medicamenta hæc potentia. Oportet ut medicamenta semper viribus ægri respondeant. Hinc patet quam perversè quidam non tantum Agyrtæ, sed & medici, promiscuè Opio in satis magnâ utantur quantitate. Hæc tamen ita intellecta velim, quod ea quidem universaliter loquendo sint vera, sed tamen posse particularia supervenire symptomata, quæ medicum cogant ab ordinario tramite deflectere: nempe si singultus, dolor, vigiliæ pertinaces, aut etiam alvi fluxus superveniant. In hisce casibus non est tantus ab Opio metus, quandoquidem continua irritatio non finit ægrotum in nimis profundum, aut continuatum incidere somnum. Si autem quis metuat *Laudanum Opiatum*, vel *Cydoniatum*, ac similia medicamenta, is poterit uti vel Emulsionibus cum *Semine* aut *Syrupo Papaveris albi*, vel etiam *Diascordio Fracastorii*, quod insignibus laudibus ornat *Gabelchoverus* l. v. obs. 21. Verum cum compositionem hanc esse inconcinnam ob *admixtum Piper, Zingiber, Galbanum*, jam dudum sit observatum, non est necesse in eâdem formulâ semper hære, possumus concinnare hoc, vel simile *Diascordium* novum, in variis casibus utilissimum.

### DIASCORDIUM NOVUM.

℞. *Fol. Scordii siccatorum.*

*Boli Armen. ver. aa ʒjß.*

*Flor. Rosar. rubr.*

M m m

Di-



*Dictamni Cretici.**Sem. Acetosæ.**Rhei elect. aa ʒj.**Rasur. Ung. Alcis.**Opii depurat. aa ʒß.**Rad. Bistort.**Cinnamom. acut. aa ʒij.**Vini Canarin. q. s.**Mellis despumat. ʒxx.*

F. f. a. Electuarium.

Dosis à ʒß. ad ʒj. &amp; ultra.

Potest hoc exhiberi vel formâ Boli, vel potiunculæ, dissolutum cum aqua appropriata, possunt eidem alia admisceri sudorifera, ex. gr.

℞. *Diascord. novi.* ʒij.*Lapid. prunell.* ʒß.

F. Bolus.

℞. *Diascord. novi.* ʒß.*Cremor. diaphoret.**Lapid. prunell.**Sacchar. perlar. aa* ʒß.*Aq. Meliss. q. s.*

M. F. Haustus.

Quomodo  
motus fan-  
guinis alio  
derivetur?

Non est negligendus motus sanguinis, versus caput impetum præcipue exserens, quem dixi alio derivandum esse. Quamvis enim motum sanguinis immutare in nostrâ non sit potestate, videmus tamen eum versus alias partes quodammodo allici posse. Hunc in finem utiles esse possunt hirudines, ubi evacuatio blanda sanguinis requiritur, quandoquidem suctu eliciunt sanguinem. Utiles quoque esse possunt Cucurbitulæ cum, vel sine scarificatione, pro circumstantiarum varietate. Utiles quoque Clysteres, de quibus in superioribus est actum. Suppositoria non sunt ita commoda, tamen non omnino rejicienda. Non sunt etiam omnino negligenda vesicatoria, verum cautè, nec tendinibus musculorum applicanda, ne nimium dolorem excitando, non tam curemus quam iritemus

Epi-



Epilepsiam symptomaticam. Circa nucham & parotidas satis tutò in usum vocari possunt. Non sunt negligenda pediluvia, in hoc casu insignis utilitatis, quandoquidem non tantum aliò derivant motum sanguinis, sed & quoniam fluidiorem eundem reddere possunt. Ex. gr.

℞. *Fol. Ruth. m. iv.*

*Abrotan.*

*Malva*

*Bismalva.*

*Violar. aa m. ij.*

*Flor. Rosar. rubr.*

*Chamomill. aa p. j.*

Coq. s. a. ex aq. pura.

Pro pediluvio.

Supplantalia, sive è fermento acri, sive etiam piscibus variis, aut animalibus vivis concinnata, eximii quoque sunt usus. Brevis hęc tantum volui tangere, quandoquidem de iis in superioribus jam est actum, tum etiam, quandoquidem hic non est tractanda integra febrium doctrina, sed tantum quatenus Epilepsiæ febriles hæcæ tanquam symptomata excipiunt :

Subjungenda sunt paucis quædam Curam differentiarum Epilepsiæ febrilis spectantia. Circa Epilepsias graviores & leviores observandum, remedia debere esse proportionata magnitudini morbi, ne scilicet in leviori specie efficacissima remedia, in graviore minus potentia adhibeamus. Ideo graviore morbis sæpe succumbunt ægri quod medicamenta & auxilia quidem convenientia, non autem sufficientia in usum sint vocata.

Epilepsiæ in principio ingruentes cogunt ad potentiora remedia confugere. Nempe ubi vires sunt validæ, & corpus valdè repletum planè necessarium est, ut sanguis statim copiosè educatur, nec purgantia in majori dosi omittantur. Nisi enim illud fiat, intempestivè, ac sine fructu, ad diaphoretica confugimus. Ubi autem morbus eundo vires acquisivit, à potentioribus hisce remediis potius abstinendum est, nisi necessitas id planè postulet. Nempe vires jam non parum sunt fractæ, spiritus exhausti, morbus ad statum vergit; aliquan-



do crisis instat. Itaque vires non sunt magis infringendæ, nec natura crifim moliens, ab utili opere, avocanda est. Cum sanguis in hoc casu à naturali desciverit crasi, & serum sæpe in substantiam gelatinosam sit excoctum, oportet ut ejus fluiditati incumbamus potum exhibendo copiosiores, aut Apoze-mata, aut *Fulapia*, aut etiam acidulas: deinde ut sudor temperatis medicamentis promoveatur, non neglectis externis.

Quæ hætenus dicta sunt respiciunt Epilepsias febriles ordinarias, extraordinariarum & epidemicarum non eadem est ratio: hæ quippe iisdem regulis non comprehenduntur. Ut de his accuratum formetur judicium, oportet perspecta habere, quæ medici eximii hisce de febribus memoriæ prodiderunt. Videndus est *Hippocrates*, *Ballonius*, *Sydenhamius*, *Willisius* &c. Pro variâ aëris constitutione cura earum non parum differt, itaque tum diversæ circumstantiæ, mos, & motus morbi, nec non juvantia & nocentia diligenter sunt trutinanda, ut quispiam de hoc vel illo morbo epidemico formet judicium. Hæc breviter hic tantum tangenda fuerunt, quandoquidem fusior tractatio propriè ad doctrinam de Febribus pertinet.

Quod ad reliquas differentias attinet, desumptas à sexu, ætate, paroxysmis brevioribus, aut longioribus intervallis repetentibus, eæ prudentiam medici requirunt. Attendenda est hæc regula, medicamenta semper viribus & constitutioni ægroti, nec non magnitudini morbi debere esse proportionata.

Subjungenda est paucis diæta. Aër sit purus & obscurus, Diæta. æstate *aqua*, *aceto*, herbis ac floribus convenientibus, temperatus, hieme convenienti igne à frigore vindicatus. Cubiculum, in quo decumbit æger, sit spatiosum, atque tale, in quod liberior aër non incommode intromitti possit. Vitandus fumus carbonum, foetor, nimia amicorum salutantium turba.

Cibus parcissimè exhibeatur; sunt enim hæ febres plerumque acutæ, in quibus diæta tenuis omnino requiritur. Veteres in hac materiâ adeo fuerunt scrupulosi, ut etiam de usu *Ptisana* disputarent, uti ex *Hippocrate* de diæta in morbis acutis patet. *Idem* Aph. 65. VII. "Ἡν τις πυρέσσοντι τροφήν διδῶ, τῷ μὲν ὑγιαίνειντι ἰσχύς, τῷ δὲ κάμνοντι νῆσθαι. Po-



Potus sit tenuis, aquosus, atque abundans, faceſſat perverſus ſiti ægros enecandi mos. Nihil eſt quod metuamus ab ingeſto potu majorem putredinem. Nihil utilius quam æſtum reſtinguere, ſanguinem diluere, ſerum magis fluidum reddere, vehiculum ſudoribus erumpentibus ſuppeditare. Acida, ſi expetat æger, aut etiam acidulæ, promptè concedantur. *Ἀνὴρ δὲ διαίται πᾶσι τοῖσι πυρεταίνουσι συμφέρουσι.* &c. *Hipp. I. Aph. I. 6.*

Somnus & vigilia, quantum pote, debito modo ſeſe habeant, cum utriuſque exceſſus multum noceat, ſomni quidem, quoniam is, ſi ſit nimius ad Epilepſiam viam ſternit, vigiliarum autem nimium protractarum ſequela eſt ſpirituum diſſipatio nimia. Vid. *Hipp. Aph. I. ſ. II.*

De medicamentorum opiatorum, uſu & abuſu in ſuperioribus egi. Si ſomnolentia præceſſerit Epilepſiam, ſomnus admodum ſuſpectus eſt. Vigiliæ continuatæ peſſimæ.

Motum in pluribus caſibus impedit morbi magnitudo. Morbi magnitudo quoque lecto ægrotos affigit. Nolim tamen eos in eodem lecto diutius contineri, niſi aut ſudor copioſè erumpens, aut vires debiles id requirant. Præſtat ſæpe ut ægrotus, in ſedili collocatus, per aliquod tempus capite elevato ſedeat, quam ut ſemper lecto mancipetur. Ratio huius rei eſt in promptu: quia nempe decubitus diuturnus caput non parum replet. Difficilior eſt ejuſdem adſcenſus per arterias carotides perpendicularis, quam ſi æger capite tantum acclivi fere horozontaliter decumbat. Salutantium turba ut plurimum ægroto nocet, quoniam quieti moderatæ, cui omnino ſtudendum, contraria eſt. In ſomnolentiâ tamen nimia & clamor, & ſtrepitus, & vociferatio ſæpenumero requiruntur.

Excretiones pleræque in hac Epilepſiæ ſpecie utiliffimæ, quandoquidem oritur à repletionem. Alvinæ primas vias exhauriunt, quæ alias æſtum non parum augment. Quid? quod copioſior dejectio ſanguinem, ad cerebrum magis contendentem, aliquomodo avertat. Urinæ & ſudoris copioſior evacuatio non tantum arterias & venas aliquomodo exhaurit, ſed cauſa ac ſignum eſt, felicis eventus. Cauſa, quandoquidem nihil magis diſpoſitionem inflammatoriam, ac ſanguinis tenaciorem



emendat, quam sudoris, aut etiam urinæ, copiosior excretio. Signum, quandoquidem exinde colligitur humores reddi magis fluidos, id quod ad curationem non parvi est momenti. Quid? Quod non rarò hac viâ natura crisin moliatur? Quamvis autem sudor adeo sit necessarius, non est tamen is stragularum mole cogendus & veluti exprimendus. Sæpe ab hac ægrotos tractandi perversâ ratione, æstus vehementer intenditur, sanguinis expansio augetur, anxietates & circa præcordia, & circa pectus intenduntur. Ac circa præcordia quidem, ob insignem repletionem arteriarum, copiose ventriculorum perreptantium; circa pectus, ob distensionem vasorum pulmonalium, compressionem arteriæ asperæ, difficiliorem per arterias, è capacibus vasis in angustissimas diremptas fibrillas, transitum: Itaque hoc in casu memoriâ tenendum est, *esse modum in rebus; omne nimium naturæ inimicum*. Profunt quoque reliquæ evacuationes sanguinis sive per nares, sive per hæmorrhoides, sive etiam per menstrua, aut lochia in puerperis, contingant. Horum omnium ratio ex iis, quæ explicata sunt, facile elucescit. Itaque ut brevitati studeam horum ulteriori explicationi immorari desino.

Animi pathemata sint moderata. Metus imprimis nocet, quandoquidem orificca cordis, nec non vasa pulmonis multum constringit adeoque circulationem difficiliorem reddit. Animus quietus, sua sorte contentus, calamitates moderatè & patienter ferens, lætitia bonæ conscientiae, non tantum ad sanguinem fluidiorem reddendum, sed & crisin promovendam multum facit.

*Latus in præsens animus, quod ultra est  
Oderit curare, & amara lato  
Temperet usu. Nihil est ab omni  
Parte beatum.*



## CAPUT DECIMUM QUINTUM.

*De Epilepsiâ pedissequâ Dolorum, Purgationum,  
Vulnerum & Ulcerum.*

**H**As Epilepsiæ species omnes hoc capite tractare est animus, quandoquidem in eo conveniunt, quod dolor omnes comitetur. Videtur quidem prima fronte Epilepsia pedissequa Purgationum debere referri ad Epilepsias ex inanitione ortum ducentes, adeoque ad eas, quæ hæmorrhagiam sequuntur; verum re penitus perspectâ, dolor non minus quam inanitio, has producit convulsiones. Nempe in purgationibus nimis, primo quidem mucus intestinorum abraditur, postmodum non rarò sequitur sanguis merus; quilibet autem facile intelligit, tunicam intestinorum nerveam valde debere irritari & lædi, antequam sanguis merus è vasis arteriosis prorumpat. Itaque primum de dolore in genere, tum quomodo ille in omnibus hisce speciebus locum habeat, ostendendum.

Dolor est tristis sensatio orta à vi partibus nervosis & sensibilibus illata, vel è solutione continui earundem partium. Quomodo vis illata, licet solutionem continui non producat, dolorem satis molestum excitare possit, capite de Cephalalgia ostensum est. In hac doloris specie, motus sanguinis impetuosus, cum ejusdem expansione conjunctus, partes nerveas malè mulctans, & spiritus commovens, causa est tristis hujus sensationis. In alterâ doloris specie à læsione, seu solutione continui productâ, dolor ille excitat sanguinis ac spirituum motum inordinatum. Nempe ubi partes nervosæ & valde sensiles vulnerantur, spiritus animales tumultuosè versus medullam oblongatam, è qua nervi primam habent originem, deferuntur, unde tum sequitur eorundem spirituum copiosior & turbulentus versus cor, pulmonem, præcordia, influxus. Oritur hinc impetuosior, & frequentior cordis contractio, sanguinem per universum corpus vehementius adigens, eumque non rarò multum expandens, atque

Cur de hisce  
affectibus si-  
mul agam?

Dolor.



que æstus in universo corpore, cum sudoris eruptione, produ-  
cens. Sanguinis consistentia est quidem fluida, non tamen te-  
nuis, quippe V. S. eductus statim concreescens. Est ergo  
quidem proportionatus moderatæ pressioni, non autem adeo  
subitæ, & impetuosæ. Hinc sequitur eum facile pulmonis  
& cerebri vasa magis replere. Repletio hæc corpori mo-  
lesta, iterum difficilis circulationis sensum ope spirituum anima-  
lium ad cerebrum defert, unde spiritus magis agitantur, ver-  
sus viscera copiosius confluunt, adeoque circulationem &  
pressionem magis intendunt. Itaque arteriæ carotides magis  
replentur, cerebrum obnubilatur ac deprimitur, tandem ad  
Epilepsiam hanc symptomaticam, modo in superioribus expli-  
cato, cogitur. Vid. *Hipp. Aph.* 66. 67. f. IV.

Purgatio ni-  
mia.

Hiscæ de dolore in genere præmissis, non est difficilis appli-  
catio ad purgationes nimias. Intestina gaudent copiosis ner-  
vorum filamentis, quæ ubi læduntur, tristis sensatio ad cere-  
brum defertur, spiritus animales hinc commoventur, sangui-  
nem exagitant, adeoque convulsiones, vel graviores vel le-  
viores, producant. Hic desino, neque enim mihi propo-  
situm est, omnia quæ ad hypercatharsin spectant, hic produce-  
re. Sufficit ostendisse quæ relatio inter dolorem hypercathar-  
sin producentem, & convulsiones, seu Epilepsiam hanc interce-  
dat. Oportet tantum considerare, quædam medicamenta in-  
testinis esse valdè inimica, adeoque promptius convulsiones  
producere. Ita si Petum sive Nicotiana decocto clysteris ad-  
datur, non raro hinc sequuntur convulsiones, adeo ut ad re-  
ctæ curationis methodum non parum faciat perspectum habere,  
quod sit singulorum catharticonum ingenium. Ad dolorem,  
& ea, quæ spiritibus nostris inimica sunt, referri possunt quo-  
que convulsiones quæ à venenis variis, & morfu venenatorum  
animalium inferuntur, de quibus egit *Willisius*. Verum non  
est jam mihi otium de particularibus venenis, de morfu *Taran-  
tulæ*, de *Chorea s. Vite*, nec etiam de convulsionibus à venefi-  
cio agere. Rarius contingunt hi affectus, itaque eos hoc loco indi-  
gitasse sufficiet. Quotusquisque est qui symptomatum horum ocu-  
latus est testis? De venenis vomitum producentibus in sequentibus.

Vulnera.

Vulnera Epilepsias symptomaticas producentia sunt præ-  
cipuè



puè cerebri & capitis nervorum & tendinum. Vulnera capitis producere Epilepsias, ex observationibus practicorum, & *Boneti sepulchreto* manifestum est. Solent auctores uno & eodem capite de his Epilepsiis & de Morbo caduco agere: quam rectè illud factum sit, alii judicent. Ego saltem existimo cum hæc toto cœlo, uti ajunt, differant, etiam separatim debere tractari. Non raro oriuntur quoque Epilepsiæ symptomaticæ, à solâ contusione, disruptis vasis & sanguine intra calvariam effuso. Hæc autem species Epilepsiæ admodum confirmat meam, in superioribus propositam, sententiam, quia effusio sanguinis absque compressione cerebri intelligi non potest. Confirmat eandem observatio *Adr. Falcoburgii*, Epilepsiam deducens à compressione ventriculorum cerebri, quæ itidem adjunctam debuit habere compressionem substantiæ ejusdem. Vid. *Boneti Sepulchretum* l. I. sect. XII. obs. 24. Quod si accedant fragmenta cerebri membranas pungentia, tanto facilius subsequuntur convulsiones. Oportet autem in hisce casibus simul considerare & Febrim, & agitationem sanguinis, cum spirituum animalium motu turbulento conjunctam. Quamvis vulnera nervorum & tendinum simul tractari possint, non inutile tamen est; eorum differentiam animadvertisse. Conveniunt in eo vulnera nervorum & tendinum, quod utraque dolorem insignem, tumorem, inflammationem producant: differunt in eo, quod dolor puncturæ nervi sit magis exquisitus, citius gravia producat symptomata, ac inflammatio latius serpat. Dixi in superioribus febrem & agitationem sanguinis, nec non spirituum animalium in hisce casibus esse respiciendam, quæ hic tanquam explicata suppono, ne iterum modum generationis harum Epilepsiarum sit repetendus.

Non rarò quoque contingit Epilepsias sequi operationes chirurgicas graviores, sectionem calculi è vesicâ, sectionem herniæ, amputationem alicujus membri &c. Harum Epilepsiarum rationes & modi producendi facile intelliguntur, ex iis, quæ de dolore diximus.

Operatio-  
nes chirur-  
gicæ gravio-  
res.

Non est quoque necesse de ulceribus in specie agere, quandoquidem ulcera excipiunt vulnera, & iis, quæ de vulneribus dicta sunt, ritè perspectis, facile symptomata ulcerum intelliguntur.

Ulceræ.



Causa.

Accedendum jam est ad causas, quas, ex antecedentibus, facile intelligimus potissimum debere deduci ad repletionem. Non nego in dolore & nervorum vulneribus posse quoque considerari irritationem, verum ea non immediatè, sed interveniente agitatione tumultuosâ spirituum & sanguinis succedit, uti in superioribus vidimus. Repletio hæc potest esse universalis, quando sc. tales dolores, talia vulnera &c. incidunt in homines plethoricos: non est tamen necesse plethoram semper adesse, quandoquidem etiam in iis, quibus sanguis non admodum abundat, possunt arteriarum carotidum fibrillæ nimium repleri, à vehemente sanguinis agitatione, quod hic sufficit. Scriptores chirurgici hoc in casu considerant inflammationem & tumorem, verum repletio, Epilepsiam productura, ad cerebrum debet pertingere, nec est præter alia, eam, quam nos explicuimus. Epilepsiæ autem & convulsionum à nimia purgatione alia est ratio, quandoquidem in hoc casu facile lipothymia, ob nimiam evacuationem, potest succedere, adeoque Convulsio ab inanitione produci. Itaque Epilepsia pedissequa purgationum dolore convenit cum reliquis Epilepsiæ speciebus similiter à dolore, & solutione continui productis, differt tamen in eo, quod non semper evacuationem nimiam habeat comitem. Potest tamen contingere à dolore quoque excitari lypothymiam, potest dolori quoque jungi hæmorrhagia. Non incommode egissem forsitan peculiari capite de Epilepsia à purgatione; verum animadverto materiam tantam sub manu natam, & tractatum hunc in majorem molem excrescere, ut consultius duxerim de eâ conjunctim cum aliis speciebus dolorum agere. Si enim peculiari capite Epilepsiam hanc tractassem, fusius agendum fuisset de Hypercatharsi, quod, cum ante me præstitum sit, evitare malui.

De Helleboro.

Antequam tamen ad differentias accedam, non videtur inutile si *Hippocratis* Aphorismum 16. s. iv. examinemus, qui ita habet. Ἐλλέβορος ἐπικίνδυνος τοῖσι τὰς σάρκας ὑγείας ἔχουσι, σπασμὸν γὰρ ἐμποιεῖ. Unde videtur posse colligi irritationi, non autem inanitioni, debere adscribi convulsionem pedissequas purgationum. Verum si diligenter perpendamus tractationis ordinem, quem ego sum secutus, facile intelligemus quo



quo pacto hæc sint concilianda. Nempe dixi Epilepsias esse pedissequas febrium, dolorum, vulnerum, ulcerum, hæmorrhagiæ, affectus hysterici, hypochondriaci, &c. verum quemadmodum in partu & dolor, & hæmorrhagia considerari debent, ita etiam in purgationibus nimis, & inanitio, & dolor simul spectanda sunt, quando simul urgent. Quemadmodum in pluribus morbis contingit causas complicari, ita etiam idem hic locum habet. Qui autem novit symptomata ab unicâ causâ deducere, illi non erit difficile concipere, quomodo plures causæ simul agere possint. Interim observandum est Convulsiones ab *Helleboro* productas, non nisi tardius, & post alia succedere symptomata. Memini ego me duas filias tractasse, ab usu *Hellebori albi* in summum vitæ discrimen, absque manifestâ convulsione (quantum quidem jam succurrit) adductas. Præter vomitum & dejectiones, aderat summum extremorum frigus, quod difficillimè superabatur, postquam autem illud esset devictum, & ægrotæ sudare inciperent, maximum periculum & molestissima symptomata erant superata. Hoc ideo observandum est, ne quis putet qualemcumque irritationem producere convulsiones. Frigus illud extremitatum, & totius corporis, ostendit & sanguinem & spiritus pessimè affectos esse. Frigus illud ostendit Lypothymiam & spirituum deliquium, adeoque inanitionem, hic non esse negligendam. Non inutile quoque est considerasse, uti in superioribus quoque monuimus, quædam intestinis, adeoque spiritibus, hinc valde agitari solitis, valde inimica esse. Ita cantharides vesicæ sunt inimica, *Arsenicum* & *Mercurius sublimatus* corrosivus non tantum ventriculum moleste vellunt, sed & planè exedunt. Quantus autem dolor hinc producat, tum è naturâ horum venenorum, tum è querelis ægrotantium facile intelligimus. Non producerent autem hæc omnia convulsiones, nisi mutuum inter intestina, ventriculum & cerebrum intercederet commercium. Hæc est causa, quare, male affecta vesicâ, &c. non raro succedant convulsiones vel universales vel etiam particulares, de quibus in sequentibus videbimus.

Differentiæ ex iis, quæ jam explicata sunt, elucescunt, alia Differentiæ.



est à dolore à variis causis tum internis, tum externis, præcipue gravioribus Chirurgicis operationibus, veneno assumpto, Lumbricis &c. excitato. Alia est à vulnere punctura nervi, aut tendinum. Alia à dolore, nec non inanitione, in hypercatharsi excitato. Quod si aliæ adhuc species occurrant, quæ jam mihi scribenti non occurrunt, eæ quoque huc referendæ sunt. Occurrit & alia differentia non contemnenda, quod scilicet hæ causæ solæ, vel cum aliis conjunctim agant. Non respicio jam agitationem sanguinis & spirituum, sine qua dolor ne quidem concipi potest, sed præcipue hæmorrhagiam, quæ non rarò in gravioribus chirurgicis operationibus locum habet, quæque etiam in vulneribus aliis nervos aut tendines lædentibus simul produci potest. Potest produci, inquam, quoniam ea non est de essentia dolorum omnium, aut vulnerum. In hoc casu non tantum dolor, sed & inanitio, de qua in sequentibus agendum, considerata est. Tandem adhuc est differentia, quod aliæ convulsiones sint graviores, adeo ut aliquando omnino Epilepsiæ dicendæ sint, aliæ ad motus convulsivos propius accedant. Est hic quædam latitudo. Reliquas differentias à sexu, ætate, partibus vulneratis, viribus desumptas sicco pede transeo.

*Signa.* Signa in hisce affectibus sunt satis obvia; conqueritur æger de ingenti dolore, clamat, ejulat, postmodum succedunt convulsiones vel graviores, vel leviores. Signa puncturæ nervi, vel tendinis è scriptoribus Chirurgicis petenda, ego enim de his tantum ago, quatenus convulsiones exinde ortas respiciunt. In purgationibus nimis non tantum attendendum est ad ægroti querelas, sed & inspiciendæ dejectiones, ut de copiâ & qualitate exactius judicemus. Quanto minor sanguinis copia prodit, quanto ea magis excrementis est permixta, tanto minor adest læsio intestinorum. Diligenter quoque perpendendum, num principia inflammationis intestinorum adsint, quod satis frequens est. Non defungitur autem benè suo officio medicus, quando ad partium fluidarum vitium tantum attentus, vitia solidarum vel non animadvertit, vel negligit.

*Prognosis.* Prognosis ita instituat. Omnes Epilepsiæ sunt periculosa,



ſæ, quanto autem majorem ſenſuum abolitionem habent comitem, quanto brevioribus repetunt intervallis, quanto graves ſunt cauſæ eas producentes, in tanto majus discrimen ægrotantes conjiciunt. Punctura nervi puncturâ tendinis periculofior eſt. Quod ſi dolor hæmorrhagiam ingentem habeat comitem, tanto majus imminet periculum. Cauſarum ſimul agentium vis unita eſt fortior. Spasmodum à Veratro lethalem pronunciavit *Hippocrates* in *Aph.* Idem eventus ſolet ſubſequi venenum aſſumptum, niſi citò rejiciatur.

Indicationes generales ſunt dolorem lenire, nimiam evacuationem ſedare, Epilepſiæ venienti occurrere, eandem præſentem curare. Indicationes

Quando dixi dolorem eſſe leniendum, id intelligi debet, Cura  
in quantum illud fieri poteſt. Ex. gr. In operationibus chirurgicis gravioribus dolor evitari non poteſt. Reſpectus tamen ad dolorem eſt habendus, in quantum instrumenta adhibentur accommodata, acuta, Chirurgus eligitur dexter, operationum non imperitus, minime tremulus aut timidus; hæc enim ad operationem citius abſolvendam, & ſymptomata præcavenda non parum utilia. Quid? quod ad dolorem leniendum aliquando excitandus ſit dolor? Nempe ut punctura nervi curetur, non rarò vulnus novum infligendum, aut inflictum ampliandum eſt. Itaque dolor eſt leniendus pro ut natura vulneris, vel ſymptomatum illud requirit. Non oportet tamen crudelem eſſe Chirurgum, & abſque urgente neceſſitate ferro & igne uti.

Dolor leniendus eſt medicamentis externis & internis, pro cauſarum varietate variis. Externa medicamenta debent eſſe proportionata vulneribus & ulceribus, aut etiam doloribus internis. De medicamentis externis vulneribus, puncturis &c, adhibendis non ago, tractantur hæc à Scriptoribus Chirurgicis ex profeſſo. Medicamenta externa in purgationibus nimis non ſunt contemnendi uſus, ſive adhibeantur forma limimenti, emplaftri, fofus, cataplaſmatis &c. Ex. gr.

Rx. Unguent. Martiat.

Ol. Chamomill.

N n n 3

Ab-



*Ol. Absinth.*

*Anethini. aa ʒjß.*

M. F. Linimentum.

*R. Fol. Malva. m. iij.*

*Bismalva.*

*Absinth.*

*Ruta aa m. j.*

*Flor. Rosar. rubr.*

*Chamomill.*

*Melilot aa p. j.*

*Sem. Cumin. ʒß.*

Coq. s. a. è cerevisiâ dulci recentissima,  
pro Fomento.

Ufus est, immergere pannos laneos villosos in liquore,  
& expressos calide ventri imponere.

Huc possunt referri omnia actu calida, licet propriè medicamenta non possint dici, Lintea, asseres calefacti. Prædicantur insignes, in hoc negotio, vires *Lapidis Ophitis*, cujus laminæ etiam ita excavantur, ut commodè & æqualiter ventrem calefacere possint. De enematibus in sequentibus agam.

Quomodo  
cataplasinata  
dolorem le-  
niant?

Non sunt quidem cataplasmata, fomenta &c. propriè anodyna, verum anodynus longe præstantiora, quandoquidem morbo, ac ejus causis opposita sunt. Ex. gr. si in inflammatione cruris utamur cataplasmate appropriato, æstus lenietur, tumor discutietur, partes humectabuntur, sanguis reddetur magis fluidus, ac ita lenietur dolor: adeo ut non rarò somnus placidus obrepit.

Phellandrium.

Potest tamen contingere, ut medicamentis externis non incommodè admisceantur medicamenta propriè dicta anodyna, inter hæc non malè mihi videtur referri *Phellandrium*, medicamentum olim minus in usu, jam autem ob summam ejus efficaciam satis celebre. Refertur hoc ad *Cicuta* species, cujus virtutes sunt anodynæ.

Anodyna.

Quod si necessitas id postulet, & postulat non rarò, possunt medicamentis externis commodè jungi interna anodyna & opiata. Ita *Vegerius* in Chirurgia l. ii. c. 33. commendat *Theriacam* & *Mithridatium* in *Aqua vite* dissoluta. Possunt & alia



alia in usum vocari, verum prudenter, quandoquidem in Convulsionibus ea sunt suspecta, nec nisi præmissis universalibus, ubi ea requiruntur, usurpanda. Verum de hisce actum est in præcedentibus, & agetur adhuc in sequentibus.

Jam latus hic se aperiret campus de variis vulnerum speciebus agendi, verum non est mei instituti ea attingere, quandoquidem hæc chirurgiam propius spectant. Sufficiat hæc indigitasse, qui plura desiderat, is consulat scriptores chirurgicos. *Pareum, Tagaultium, Barbette &c.*

particularia  
omittuntur.

Nimiæ evacuationis curatio spectat Epilepsiam à nimiâ purgatione ortam. Ad evacuationes tales supprimendas præscribuntur ab Auctoribus adstringentia varia, & in fluxibus alvinis *Rhabarbarum*. Verum *Rheum* hic locum non habet, uti & pluribus aliis casibus. Adstringentia frustrantur expectationem ægroti & medici: Opiatorum insignis in hoc casu est efficacia, ab opiatis optimus solet observari successus. Quod si Opiata jungantur *Rheo*, vel *Rheum* debita proportionem jungatur opiatis, præparari potest medicamentum pluribus indicationibus satisfaciens. Talis est compositio *Diascordii novi* non uno nomine, in hisce & similibus casibus, summi usus.

Quomodo  
nimia eva-  
cuatio fede-  
tur.

Conveniunt itidem *Laudanum opiatum, Laudanum cydoniatum, Tinctura Opii, Athanasia, Pilula pacifica, Diascordium vulgare, Leonardiens.* &c.

Ex hisce & similibus variæ possunt concinnari formulæ.  
Ex. gr.

℞. *Laud. opiat. gr. iij.*

F. *Pilulæ. no. ij.*

Sumat æger per intervalla unam.

℞. *Diascord. novi. ʒj.*

C. C. *usti ʒß.*

M.

℞. *Athanas. nostr. ʒij.*

*Corall. rubr. ppt. ʒß.*

*Aq. Fœnic. q. s.*

M. F. *Hauftus.*

℞. *Diascord. incomplet. ʒjß.*

C. C. *usti.*



*Boli Armen. vera. aa ʒß.*

*Laud. opiat. gr. ij.*

*Syr. Diacod. ʒvj.*

*Aq. Plantag. ʒiij.*

*Cinnamom. ʒij.*

M.

Si fitis simul urgeat, quod frequentissimum est, præscribatur

Emulsio      *Rx. Amygdal. dulc. excort.*

*Sem. Papav. alb.*

*Cucum. aa ʒß.*

Cum decoct. Scorzoner & C. C. F. f. a.      Emulsio

ad ʒxx. Add.

*Syr. Diacod. ʒj.*

*Aq. Cinnamom. ʒiij.*

M.

Non sunt omittenda Enemata, quale est hoc *Sylvii*:

*Rx. Lactis Bubul. chalybeat. ʒviiij.*

*Terebinth. Venet. ovi vitello dissolut. ʒß.*

*Mellis Rosac. ʒj.*

M. F. Enema.

Quomodo  
Epilepsiæ  
venienti oc-  
curratur?  
V. S.

Epilepsiæ venienti occurritur imprimis V. S. Cum enim dolor, tumor, inflammatio, febris à sanguinis mole & impetu oriantur, si ejus moles & impetus imminuantur, non tantum symptomata, puncturam nervi & tendinum consequentia, infringuntur, sed & repletio vasorum cerebri, hancque consequens Epilepsia præcavetur. V. S. hæc repletioni, ætati, viribus ægri debet esse proportionata. Narratum mihi fuit à medico, qui Italiam peragraverat, ipsum observâsse Chirurgos sæpe & copiosè venam secare solitos, ubi ægroti è vulneribus, aut similibus casibus, decumberent. Cum autem interrogaret, quæ esset causa frequentium harum V. S? responsum tulit, nisi sanguis crebrò exhauriretur, pessima semper & repentina ægrotos infestare symptomata. Qui ad ea quæ in praxi occurrunt, non perfunctoriè erit attentus, is non difficulter observabit, etiam in hisce regionibus, ubi homines plerumque sunt famelici, ex omissâ V. S. non parum lædi ægros.

Epi-



PURGATIONUM, VULNERUM ET ULCER. CAP. XV. 473

Epilepsiæ quoque venienti occurritur, si alvus servetur libera, sive illud fiat blandis evacuantibus, per epicrasim sentinam corporis nostri, molesto onere sublevantibus, sive etiam enematibus. Per os ergo exhiberi potest tale Apozema, singulis matutinis temporibus propinando haustulum.

℞. Rad. Scorzoner.

Polypod. qu. aa ʒj.

Herb. Sonchi

Taraxaci. aa m. j.

Tartar. Rhenan. alb. ʒj.

Coq. f. a. ex aq. pura sub finem decoct. Add.

Fol. Senn. mund. ʒij.

Rhei elect. ʒj.

Sem. anis. ʒss.

Colat. ʒxx. Add.

Syr. de Cichor. cum Rheo. ʒj.

M.

Nempe ubi quis repente vulneratus lecto mancipari necesse habet, primâ regione admodum onustâ, non est mirum ipsum in varia incidere symptomata, nisi intestina aliquomodo exhauriatur. Quandoquidem illud autem ante inflictum vulnus fieri non potest, uti in casibus repentinis, postmodum illud negligendum non est. Clysteres egregii sunt usus ante extractionem calculi, quia simul partes vulnerandas foveant. Enematis hæc sit formula :

℞. Rad. Lilior. alb. ʒj.

Fol. Violar.

Parietar.

Malva.

Bismalva. aa m. j.

Flor. Chamomill. p. j.

Sem. Levistic. ʒij.

Coq. f. a. ex aq. pura colat. ʒx. Add.

Elect. Panchymagog.

Mellis mercurialis. aa ʒj.

Sal. com. ʒj.

M. F. Enema, calidè injiciendum.

O o o

Epi-



Quomodo  
Epilepsia  
curetur?

Epilepsia præsens curatur, si naribus admoveantur ea, quæ spiritus animales excitare, & depressionem cerebri tollere apta nata sunt: si internè Antepileptica exhibeantur temperatiora, si æstus, fitis, & hanc consequens sanguinis minor fluiditas, emendetur. Prioris generis sunt salia volatilia, imprimis *Sp. Salis Armon.* deinde & acida, *Acetum Sambucinum, Calendula, Bezoardicum.* Antepileptica hic debent esse temperatiora, quandoquidem febris ordinarie fatis gravis adest.

Ex. gr.

℞. *Rasur. Ungul. Alcis.* ʒj.

*Cremor. diaphoret.*

*Margarit. ppt.*

*Lapid. prunell.*

*Sacchar. perlar. aa* ʒj.

M. F. Pulvis dividendus in v. doses.

℞. *Aq. Fl. Tilia.*

*Ruta. aa* ʒjss.

*Acet. Bezoard.* ʒj.

*Cremor. diaphoret.*

*Margarit. ppt. aa* ʒj.

*Syr. Pœon.* ʒss.

M.

Cui simplicior placet pulvis, is exhibeat

℞. *Lapid. Bezoar. or.* ʒss.

F. Pulvis, pro ij dosibus.

Ad sitim temperandam, & sanguinem fluidum conservandum

℞. *Rad. Scorzonæ.*

*Acetos. aa* ʒj.

*Fol. Scabiosæ. m.* ij.

Coq. f. a ex aq. pura colat. ℥ij. Add.

*Rob. Ribesior. vel*

*Syr. Acetos. Citri.* ʒj.

*Sp. Vitrioli q. s. ad gratum acorem*

M.

Possset hic subjungi curatio, differentias in specie cernens, verum cum de curâ agere non potuerim, quin simul aliquas tangerem, non erit necesse hisce immorari.

Cura differentiarum.

Unico verbo tantum addam, ubi venenum vel vehemens purgans



## PURGATIONUM, VULNERUM ET ULCER. CAP. XV. 475

gans assumptum est, debere ægroto *Oleum Olivarum*, *Amygdalarum dulcium*, *cerevisiam tepidam cum butyro*, *lac tepidum* &c. copiose propinari. Imprimis non est negligendus calor externus ignis, foci luculenti, linteorum calidorum, lecti, qui internis etiam adjuvari potest, *Theriaca*, *Mithridatio*, *Athanasia*. *Aqua Theriacali simplici*.

R. *Aq. Meliss.* ℥ij.

*Fœnic.*

*Theriaca. s. aa* ℥j.

*Sal. Volat. ol. g.* xxv.

*Ol. Cort. Arant. g.* v.

*Laud. op. gr.* j.

*Syr. fœnic.* ℥j.

M.

Non ago de diætâ, quæ maximam partem convenit cum Diætâ. eâ, quæ in Epilepsia febrili proposita est: nisi quod frigus hic ut plurimum valde noceat. Hinc ad operationes Chirurgicas graviores etiam hiems non est accommodata. Noceat quoque vehemens æstus.

## CAPUT DECIMUM SEXTUM.

### *De Epilepsiâ Pedissequa Repletionis, & Hæmorrhagiæ.*

**V**etus est verbum: *contraria juxta se posita magis elucescunt.* Jungam ego hoc capite duo contraria, ut tanto facilius utriusque natura pernoscat. Contraria sunt sibi mutuo Epilepsia pedissequa Repletionis & Hæmorrhagiæ, non appellatione, ea enim nihil contrarietatis involvit, sed re ipsâ, quandoquidem in Epilepsiâ à repletionem, copia humorum, corpori & cerebro molesta, hoc symptoma parit, in Epilepsiâ ab Hæmorrhagiâ subita evacuatio & sanguinis defectus Epilepsiæ sunt causæ. Breviter has ambas perstringemus, quandoquidem ex iis, quæ in antecedentibus fusè explicata sunt, satis elucescunt; ordinis tamen ratio exigebat, ut de hisce peculiari capite agerem.

Contraria  
juxta se po-  
sita magis  
elucescunt.



Epilepsiæ à  
repletionem  
descriptio.

Epilepsia à repletionem est ea Epilepsiæ symptomaticæ species, quæ homines, Morbo caduco minimè obnoxios, è nimia humorum copia ex improvise infestat.

Historia.

Descriptio hæc mihi ita videtur manifesta, ut explicatione non indigeat, ejus loco subjungam historiam satis memorabilem. Vir amplissimus, Medicus & Practicus magni nominis, major natu, vitam cepit agere sedentariam, ingluviei & potui cerevisiæ Rotterodamensis largiori deditus, ut plurimum vini abstemius. Mira ejus in evacuandis patinis dexteritas, mirus evacuandi schyphos ardor. Non tulit impune malè sedulam diligentiam: quippe per intervalla Epilepsia corripiebatur vehementissimâ, à qua tamen sola V. S. extemplo liberabatur. Advocatus fui in tali paroxysmo non semel, adfui unâ cum Chirurgo satis diu, antequam convulsiones tam brevibus interpolarentur induciis, ut nobis integrum esset venam aperire. Largâ autem celebratâ V. S. statim levatus fuit æger, & brevi omnino restitutus. Tum iterum per aliquod tempus vivebat sanus & vegetus, donec à nimia repletionem in similem incideret paroxysmum. Huic autem vitæ generi adeo fuit deditus, ut nullis monitis sese obsequentem præbens, tandem è Convulsione in morbum, febrem nisi fallor, incidere; atque vitam cum morte commutaret. In *Cogitationibus meis* similem retuli casum in muliere gravidâ, mihi aliquando observatum. *Gabelchoverus* Curat. 58. habet exemplum Convulsionum epilepticarum ex nimia crapulâ. En Epilepsiam à repletionem.

Epilepsia ab  
Hæmorrhagiâ.

Accedendum jam est ad aliam Epilepsiæ speciem, quæ oritur à nimia hæmorrhagiâ. Quandoquidem autem hæc sæpe admodum gravis est, in præsentissimum vitæ periculum ægrotos conjiciens, aliquando satis levis & periculi omnino expers, hinc Hæmorrhagiæ, in tabulâ, duobus locis feci mentionem, quam tamen hic eodem loco tractabo. Nempe periculum, quod cum una specie conjungitur, in altera omnino abest, has Convulsiones à se mutuo distinguit, adeoque consultum videbatur monere, eandem causam, prout gravius aut levius affligit, diversas species Epilepsiæ posse producere, id quod in aliis speciebus nonnumquam locum habet. Itaque quod de hac



hac specie dico, generaliter pluribus applicari debet. Contingit non rarò, à repentina & largiori sanguinis evacuatione, ægrum in manifestum vitæ periculum, & gravem Epilepsiam conjici, non sine ingenti discrimine, sive illud ab arteria vulnerata, aut à gravi vulnere, aut etiam difficiliore operatione Chirurgica contingat, sive etiam à quacumque hæmorrhagiâ. Aliquando autem à V. S. non admodum copiosa, in convulsiones, cum sensuum omnium abolitione, incidunt & sani & ægri. Oportet autem considerare, hæmorrhagias, convulsiones producentes, debere esse repentinas, alias enim non rarò contingit, evacuationes quasdam fieri admodum copiosas, sensum ægros valde debilitantes, ex. gr. Lochiorum, mensium, hæmorrhoidum &c. nec tamen ægros incidere in Epilepsias.

Non opus est explicationi causarum multum immorari, Causæ. quandoquidem denominatio ipsa à causis petita est. Sufficiat observasse has causas non semper solas agere. Nempe in Epilepsia à repletionem, concurrunt non rarò sanguis tenacior, & ad promptè pertranseundum vasa capillaria minima non satis aptus. Supponamus enim, uti in allato exemplo patet, aliquem uti victu liberaliori, exercitium negligere, facile concipimus, salivam dissolutioni, ventriculum fermentationi & concoctioni, tantæ molis esculentorum fore imparem. Eadem est ratio ulterioris præparationis, quæ in intestinis contingit, quandoquidem nec bilis, nec succus pancreaticus proportionati, nec apti sunt ulteriori digestionem satis sufficienter absolvendæ. Itaque chylus est minus laudabilis, minus fluidus, unde non potest non ejusdem commatis generari sanguis. Quid? quod ventriculi tunicæ ipsæ sensim magis extendantur, adeo ut fibræ debito destituantur robore? Quæ de repletionem à ciborum copia dixi, applicari suo modo debent ebrietati. Contingit enim aliquando quosdam genio indulgentes in convulsiones incidere vehementes, cum facultatum omnium læsione. Quamvis enim hic non adsit necessario plethora, adest major sanguinis agitatio, expansio, cerebri depressio adeoque eadem symptomata quæ enumerata sunt. Hæc causa citissimè Epilepsiam hanc inducere potest, cum prior tardius in actum deducatur.



Consideran-  
dus quoque  
est dolor.

Circa Epilepsias, ab hæmorrhagia originem ducentes, oportet quoque observare, aliquando hanc solam imprimis esse considerandam, aliquando etiam dolorem exquisitum, non tantum comitem, sed & causam quodammodo hæmorrhagiæ. Nempe in gravioribus quæ manu exercentur operationibus, si necessum sit vulnus infligi amplum, si operatio non satis citò absolvatur, si vasa majora lædantur, effluit quidem copiosè sanguis, sed & dolor ipse spiritus, & sanguinem valdè agitat, adeo ut tanto facilius sequatur Epilepsia. In Epilepsia à partu difficili, & hæmorrhagia nimia hunc comitante, accidente, oportet itidem considerare dolorem parturientis fæminæ insignem, vires tum à dolore, & conatibus irritis, tum etiam ab hæmorrhagiâ valde attritas, inspirationem validam, cerebri dilatationem, adeoque sensuum obnubilationem, & ab hisce causis ortas convulsiones admodum periculosas. In Epilepsia à V. S. originem ducente, non oportet solum considerare evacuationem sanguinis, sed & ejusdem refrigerationem: quippe non rarò observare licet, effluente sanguine nulum sentire incommodum vel ægros, vel etiam sanos, ubi autem solvitur vinculum, & sanguini refrigerato liberior conceditur ad cor commeatus, tum demum in lypothymiam, & convulsiones solent incidere illi, quibus secta fuit vena.

Differentiæ.

In enumeratione differentiarum non est necesse meminisci Epilepsiæ à repletionem & hæmorrhagia, quandoquidem hæ sunt duæ distinctæ species, quas hoc uno capite complecti placuit, tum quia contraria sese mutuo illustrent, tum quod brevitatis studio plures Epilepsiarum symptomaticarum species simul oculis subicere non videbatur à ratione alienum. Quod si quis illis posthac singulis, singula tribuere velit capita is, meo judicio, non peccabit. Distinguendæ ergo sunt singulæ hæ species. Epilepsia à repletionem oritur, vel à sanguine magis vel minus laudabili, habet adjunctam ventriculi debilitatem, vel idem ille sic satis benè dispositus est. Differentias à sexu, ætate, vitæ genere enumerare longum esset, non sunt tamen omnino negligendæ. Differt quoque hæc Epilepsia, quod homines plethoricos, & prædispositos, ut ita dicam, adoriatur, vel quod à causa externâ abusu ingenti vini vel spiritus vini infestet.

Epi-



Epilepsia ab hæmorrhagiâ vel adjunctum habet dolorem ingentem, vel eo ferè caret. Idem oritur vel à graviore vulnere arteriarum majorum, vel vulnera exigua, aut nulla externa subsequitur. Non est enim necesse, ut vulnus sit ingens, ad hæmorrhagiam gravem excitandam, si arteria non abscissa, sed tantum vulnerata sit, potest aliquando & copiosa & repentina subsequi hæmorrhagia. Absque vulnere externo contingit hæmorrhagia in partu, lochiorum effluxu nimio.

Signa è modo dictis fatis facile eruuntur. Si Medicus vitæ genus ignoret, ægroti, oportet illud ab adstantibus expiscari. Dein ipsa repletio ex ingenti oppressione & similibus signis evadit manifesta. An ventriculi debilitas jungatur, è propriis signis elucescit. Signa

Hæmorrhagiæ vel oculis sunt manifestæ, vel etiam ab adstantibus narrari solent. Idem narrabunt, an manus operam exigente affectu laboraverit æger, & quomodo operatio successerit? Copiosæ hæmorrhagiæ, in partu contingentis, monebitur medicus ab obstetrice, vel assistentibus mulierculis. An secundina vi fuerit avulsa, itidem diligenter expiscabitur.

Prognosis ita institui potest. Epilepsia à repletionem tanto est periculosior, quanto repletio major, quanto graviores & crebriores sunt insultus. Difficilior quoque est Epilepsia, si sanguinis major adsit dyscrasia. Quæ ab ebrietate contingit, minus adfert periculum, nisi spiritus vini copiosior ingurgitatio eam produxerit, ita enim aliquando contingit subito extinguere ægrum. Quod si ætas aut imbecillior, aut decrepita patientis concurrat, periculosior est affectus. Prognosis

Epilepsia ab Hæmorrhagiâ tanto periculosior est, quanto majori copiâ & magis repente sanguis fuit exhaustus. Si accedat læsio vasorum majorum, aut membranarum exquisiti sensus, graviora subsequi solent symptomata, in majori versantur discrimine ægri. Epilepsia à moderata tantum V. S. contingens, omnino caret periculo.

Indicationes sunt, repletionem nimiam tollere: hæmorrhagiam compescere: causas tollere & ægrotum excitare. Indicationes

Repletionis non aliud magis præsentaneum est remedium, Cura V. S. quam



quam V. S. larga, absque morâ instituta; ita enim & vasa exhauriuntur, & expansio & æstus imminuuntur, imò non rarò affectus ipse statim jugulatur. Habet ea locum non tantum in iis, quorum sanguis est laudabilis, sed etiam iis, in quibus sanguis copiosior debitam perfectionem non est adeptus. Quod si quis existimet, in posteriori hoc casu sanguinem tantum esse corrigendum, is longè fallitur; etenim periculum est in mora, & nisi tempestivè occurratur, facile pessundabit ægrotum repletio nimia. Deinde majus imminet periculum à copia, quam à dyscrasia, quocirca ea omnino postulat, ut evacuatio instituatur. Imminutio hæc aliis evacuationum generibus non ita facile obtinetur, quippe ubi pars sanguinis caseosa nimium cepit incrementum, aut etiam vitiata est, ea nec purgationibus, nec sudoriferis, nec diureticis exhauriri potest, sola V. S. id præstat, emendatio autem post celebratam V. S. longè felicius absolvitur.

Emeticis.

Ubi non tantum sanguinis copia adest, sed simul ventriculus, ab ingestorum copia, gravatus, tum imprimis eò cura est dirigenda. Indicatur quidem aliquando vomitus in aliis quoque capitis affectibus, verum circumstantiæ nonnumquam impediunt ejus usum, quoniam non semper æque tuto usurpari potest, in hoc autem casu, & plenitudo nimia & ventriculus onustus, & faciliior ventriculi repleti evacuatio, facilem & commodum vomitum spondent. Operæ pretium est ea, quæ Galenus memoriæ prodidit, hic adscribere. Locus est in libro 5. de locis affectis p. m. 302. l. 49. ἐθεασάμην, δὲ καὶ ἄλλους ἀπὸ τοῦ σώματος τοῦ κοιλίας ἐπιληπτικῶς σπασμένους, ὅποτε σφοδρῶς ἠπέπτησαν, ἢ οἷον πλέον τοῦ ἀκρατεσέρος πίνοιεν, ἢ ἀφροδισίοις ἀκαιρότερον χρῆσιντο. τινὰς δ' ἐν πυρετοῖς ἐθεασάμην σπασθέντας ἐξαίφνης ἔδενι προηγησαμένῳ σημείῳ τῷ προδηλάντων σπασμόν. οἷς ἐπιγενομένην χολώδην ἐμέτην, παραχρῆμα ξυνέβη πάντων ἀπαλλαγῆναι τῷ ὀχληρῶν. ἐνιοὶ δὲ τῷ ἔτῳ παθόντων ἤμεσαν φαίαν, καὶ τινες ὅμοια πράσιν χυλῶν. τινὲς δ' ὑπὸ πλήθους ἐδεσμάτων μοχθηρῶν βαρυνόμενοι, καρῶδεις ἐγένοντο, μέχρι τοῦ τὰ θλίβοντα τὸ σῶμα τῇ κοιλίας ἐξεμέσαι πάντα. Est hoc insigne testimonium, usum emeticorum non parum confirmans. Vomitu non tantum ventriculus evacuatur, sed & humores lenti & tenaces, una cum saliva viscida,



da, egregiè exhauriuntur. *Lazarus Riverius* historiam refert pueri trimuli ab Epilepsiâ liberati fumo tabaci, unde vomitus illi fuerat concitatus. Vid. obs. 60. Cent. 11.

Ad repletionem nimiam tollendam utilia sunt imprimis & purgantia, quæ hoc in casu debent esse validiora. Formulæ in capite de Morbo caduco exstant. Sunt quidem alii adhuc evacuationis modi, verum minus potentes hoc in casu: curationis Epilepsiæ cardo versatur in medicamentis potenti-  
Purgantibus

Hæmorrhagia compescitur variis modis, pro variarum circumstantiarum ratione, comprimendo vas vulneratum, *Aqua stiptica*, *Lapide infernali*, *Vitriolo albo*, *canterio actuali*, de quibus videndi sunt scriptores chirurgici. Hæmorrhagia compescencia.

Quod si in partu contingat hæmorrhagia copiosa, non sunt temerè in usum vocanda medicamenta partum adjuvantia potentiora, quandoquidem hæc effluxum sanguinis copiosum, à quo maximum impendet periculum, facile concitare possunt. Si cardiaca in usum sint vocanda, eligenda sunt temperatiora, quippe si vires constent, & obstetrix debite suo defungatur munere, felix potest sperari eventus. Cardiaca temperatiora sunt *Confect. Hyacinth.* *Alkermes*, *Diascordion*, &c. è quibus varii generis medicamenta concinnari possunt. Ex. gr.

℞. *Aq. Meliss.* ℥iij.  
*Cinnamom.*

*Confect. Hyacinth.*

*Diascord. incomplet.* aa ʒj.

*Lapid. Bezoar. occident.*

*Margarit. ppt.* aa ʒß.

*Syr. Cydoneor.* ʒß.

M.

Sumat subinde duo cochlearia.

Causæ tolluntur in repletionem, si nimia ingurgitatio vitetur, si sanguinis tenacitas corrigatur, si nimia expansio tollatur. Sanguinis tenacitas corrigitur incidentibus, attenuantibus, antiscorbuticis, salibus volatilibus. Expansio tollitur aliquando largiori aquæ frigidaë haustu, si febris conjungatur, prout ejus natura illud exposcit, cura est instituenda. Imprimis ven-  
P p p tri-  
Quomodo  
causæ tol-  
luntur?



triculi habenda est ratio, ne is cibos malè digerendo cruditatibus materiam subministret, vel fermento acriori appetitum nimium acuat.

Causæ hæmorrhagiæ sunt admodum variæ: Foetus mortuus, secundinæ vi avulsæ, obstetricis imprudentia, arteriæ vulneratæ, durior tractatio Chirurgi; vel etiam sanguis nimium aquosus, aut febris pressionem sanguinis intendens. Omnes hæ causæ sunt respiciendæ in curatione, ne à scopo aberret medicus. De quibus omnibus in specie tractare, non est hujus loci.

De excitatione ægroti

Ultimum locum dedi excitationi ægroti. Non quod ea negligenda, aut differenda sit, sed quod nisi causæ tollantur nempe plenitudo, & hæmorrhagia, frustra incumbat Medicus excitationi ægroti. Simulac autem plenitudo aliquomodo superata est, statim excitatur æger. Imo ea ipsa quæ adversus plenitudinem præscripta sunt, potentissimè excitant ægrotum, V. S. Emetica, Purgantia. Quod si medicus in hisce levioribus solum occupetur, loquor jam de excitantibus ordinariis, potentioribus omissis, is salutem ægri negligit. In hæmorrhagiâ similiter, si ea cohibeatur, statim ad se redit ægrotus. Debent ergo & excitantia ægrum, & ea, quæ superius præscripta sunt utraque pro circumstantiarum varietate prudenter usurpari. Excitantia sunt ea, quæ odore acri & penetrante nares feriunt: *Salia Volatilia*, *Sp. Sal. Armon.* &c. de quibus in præcedentibus est actum. Si à V. S. in Epilepsiam incidat aliquis, statim removeatur fedile, reponatur humi æger, vel etiam decumbat, si frigeat admoveatur igni, naribus admoveantur spirituosæ. Si lipothymia sit pertinacior, aut majori, quam necessum erat, copia eductus à sanguis, exhibeatur cardiacum:

℞. *Aq. Meliss.* ℥iij.

*Balsam. Embryon.* ℥j.

*Tinctur. Croci.* ℥j.

*Sal. Volat. ol. g.* xxv.

*Syr. fl. Tunica.* ℥ss.

M.

Solebant veteres commendare V. S. ad animi deliquium, qui mos jam merito exolevit. Quamvis non rarò contingat  
fatis



fatis largam debere exhauriri sanguinis quantitatem, malumus tamen ægrum non corripere lipothymia, si eam evitare liceat. Quod si ea contingat invitis, tum ei occurritur uti dictum est. Alias, si morbus tantas concedat inducias, malumus bis secare venam, & immunes esse à gravioribus symptomatibus.

Quandoquidem ea quæ ad diætam spectant, varias exigent cautelas, juxta multiplicem numerum affectuum, qui hoc capite breviter tangendi fuerunt, malo hic pedem figere, subjiciendo tantum auream & elegantem sententiam *Seneca* quæ nos à plurimis poterit vindicare morbis. Quando nempe edendi erit bibendique finis, desideria natura restringere, non implere alvum & inanire. *Seneca de Vita beatâ c. 20.*

Diætâ.

## CAPUT DECIMUM SEPTIMUM.

*De Epilepsiâ Hystericâ.*

**N**ON fuit in principio ea mihi mens, ut de affectu hystericâ hoc loco agerem, verum postquam perspicacem *Wilisium* hunc ad morbos convulsivos retulisse vidi, postquam itidem in Spasmodum tabula, superius propositâ, Epilepsiæ hujus fuit facienda mentio, non inutilem me sumpturum operam ratus sum, si etiam hoc loco de Suffocatione hystericâ agerem, quatenus id ad convulsionum, eam non raro comitantium, naturam intelligendam requiritur.

Cur de Epilepsiâ hystericâ hic agam?

Fateor de hac affectione ordinariè agi inter symptomata, quæ utero adscribuntur à practicis, atque hinc nomen esse derivatum; verum si rem ipsam spectemus, affectio hæc non ab essentia, sed à causâ antecedente est de nominata. Nempe quia obstructionem menstruorum sæpenumero hic affectus excipit, ideo ab utero nomen sortitus est. Quandoquidem autem appellatio ab utero derivata est, etiam eò tractatio fuit translata. Itaque in hoc symptomate describendo planè aliud accidit, quam in reliquis. Symptomata reliqua tractantur, post morbos partis affectæ, dyspnæa post morbos pulmonum, fames canina post morbos ventriculi, convulsio post morbos

De affectione hystericâ ordinariè agitur inter affectus infimi ventris.



cerebri. Quamvis autem Epilepsiæ, & motus convulsivi in passionibus hystericeis satis frequenter occurrant, earum tamen minor habita est ratio, quasi illi alius essent generis; nisi quod forte obiter inter Epilepsias per consensum eorum facta fuerit mentio; verum tum ita tractati fuerunt hi affectus, quasi distincti essent à suffocatione hysterica, id quod mihi videtur obscuritatem & confusionem peperisse. Itaque non inutilis mihi videtur labos, si hoc capite specialiter & de suffocatione & de Epilepsia hysterica agerem. Quemadmodum ergo de Cephalalgia agitur inter cerebri symptomata, quamvis sæpe ventriculus ejus sit causa: quemadmodum de vigiliis, comate, caro, vertigine agitur inter affectiones capitis, quamvis sæpe sint symptomata febrium, ita mihi liceat hoc loco de affectione hysterica agere, quamvis ea non raro ab obstructione mensium producat. Quoniam autem Epilepsia hysterica intelligi non potest, quin affectus ipse cognitus sit, breviter prius de hoc agendum erit.

Convenientia affectuum variis nominibus designatorum.

In antecessum autem monendum est Suffocationem & affectionem hysterica, Epilepsiam per consensum uteri, & Epilepsiam à *Montalto* & me dictam hysterica, non esse diversos affectus, sed eundem gradibus differentem, & pro vario considerandi, ac afficiendi modo alio nomine donatum. Dicitur suffocatio hysterica à passim obvio suffocationis sensu, affectio hysterica, quia ab utero sæpe ortum suum ducit. Epilepsia per consensum, quandoquidem intererat hanc distingui à Morbo caduco. Epilepsia autem à me dicitur hysterica, quandoquidem convulsionem graviter ægrotas afficientes, cum mentis majori vel minori obnubilatione à suffocatione hysterica pendent, & eam consequuntur. Hæc observasse in praxi non est minoris momenti, quam in Botanica, de qua optinè meritis est *Caspar Bauhinus* in Pinace, ejusdem herbæ varias variorum Auctorum denominationes simul oculis subjiciens.

Descriptio suffocationis hysterice.

Est itaque Suffocatio hysterica *molestus suffocationis à globo veluti versus fauces adscendentis sensus, cum anxietatibus circa præcordia, & convulsione intestinorum atque artuum.*

De globo veluti ad fauces adscendente.

A suffocationis hoc sensu Græcis dicitur hæc affectio *πνιξ* *ὑσερικη*. Et quidem *πνιξ* sive suffocatio, quandoquidem ægrotæ conqueruntur globum ad faucem adscendere, easdemque velu-



veluti obstruere, unde suffocationis illis incutitur metus. Hic globus diu existimatus fuit uterus, qui credebatur loco suo dimoveri, & instar animalis cujusdam ad fauces adscendere, veluti foras prorupturus, aut æsophagum ac asperam arteriam occlusurus, hinc suffocationis uterinæ fluxit denominatio. Confirmatum fuit hoc præjudicium quandoquidem in abdomine sæpe sentitur impetus, tanquam globi se validè commoventis, quem itidem putarunt esse uterum. Deinde cum mulieres magis, vel saltem gravius infestaret, hæc affectio, quumque sæpe præcessisset mensium obstructio & appellatio & præjudicium obtinuit. Hunc molestum suffocationis sensum existimavi ego in descriptione statuendum esse tanquam genus, quoniam hic ordinarie adest, atque hinc petita est denominatio. Revera fauces videntur præcludi, respiratio redditur difficilis, & ægræ in maximas conjiciuntur angustias, adeo quidem ut venter & pectus, extraordinaria dilatatione & contractione, difficultati illi succurrere satagant. Cum autem plures sint morbi, in quibus ægrotis veluti suffocatio imminet, ut Angina, Inflammatio tonsillarum, Asthma, Orthopnæa &c. hoc symptoma à reliquis distinguitur ex eo, quod nulla in faucibus adsit inflammatio, vel si ea adsit est levior & parvi momenti, quod respiratio non nisi ab hoc affectu lædatur, denique quod globus à partibus inferioribus videatur adscendere. Quæ autem hujus sit ratio. inferius explicabitur.

Ad sunt anxietates circa præcordia, quæ plerumque oriuntur, vel à flatibus, vel à repletionem arteriolarum ventriculi. Et flatus quidem in hoc casu molesti, denominationem Affectus flatulenti pepererunt, qua ipsum donarunt *Diocles & Galenus*. Vid. *Galen.* de locis affectis l. iiii. p. m. 277. & 278. Revera autem has anxietates à flatibus oriri, ex eo manifestum est, quod ægræ, si flatus excernere possint, ex templo multum leventur, imo aliquando à paroxysmo liberentur. Repletionem quoque adesse arteriarum ventriculi, tum à causa, mensium obstructione, tum ex eo manifestum est, quod licet flatus prorumpant, symptoma tamen hoc non omnino superetur. Quid? Quod febris, & quidem vehemens aliquando jungatur affectioni hystericae? Quod hæc

De anxietatibus circa præcordia.



febres ingruentes non rarò excipiat, præcipuè in assuetis? Hoc autem in casu motum & expansionem sanguinis, repletionem producere & anxietates hæcæ per se perspicuum est.

Convulsio  
intestino-  
rum.

A convulsione intestinorum oritur veluti globi sese in ventre non tantum moventis, sed & pulsantis sensus. Globum illum mulierculæ & imperitum vulgus existimat esse uterum, quem putant omni ope retinendum esse, ne ad fauces adscendat ibidemque suffocationem excitet. Itaque manibus pedibusque obluçantur, ventrem comprimunt, mulieres medias cingunt, sinistro hypochondrio nodum, aliquando genu, imponunt, uterum, ut sibi videntur deprimunt, & si paroxysmus remittat, sibi tanquam de re bene gesta gratulantur. Et ut verum fatear, talia prudenter & mediocriter in usum vocata, multum juvant; è contrario vehementius & imprudenter adhibita non parum nocent. Intestina autem posse convelli ex eo liquet, quod nervorum plexibus sint ditata, quod copiosis gaudeant vasis sanguineis, quod flatibus distendantur, quod sint exquisiti sensus. Locum autem affectum & partes subjectas considerantes, facile perspicimus nullis aliis partibus nisi intestinis posse hunc motum adscribi.

Transitio.

Restat in descriptione explicanda convulsio actuum; verum cum hujus respectu ab Antiquis actum sit de Epilepsia per consensum, à *Willisio* de hac ipsa affectione inter affectus spasmodicos, subjungenda est primum descriptio Epilepsiæ hystericæ, quæ hujus capitis constituit titulum. Rectè quidem, uti vidimus, cum adverteret Vir curiosus convulsiones sæpe gravissimas hunc affectum comitari, tractationem illius, in Pathologiâ cerebri, non esse omittendam statuit, in explicatione autem sese ab erroribus vindicare non potuit. Quod si æque felix fuisset in detegendâ hujus symptomatis natura, quam prudens in præjudiciõrum discutienda caligine, potuissim à fusiori hujus affectus explicatione supersedere.

Descriptio  
Epilepsiæ  
hystericæ.

Est ergo Epilepsia Hysterica *infimi ventris & artuum convulsio vehemens, cum majori, vel minori mentis obnubilationes ab affectu hysterico ortum ducens.*

Ea explicatur.

Ex hac descriptione patet Epilepsiam hystericam non esse alium affectum quam Suffocationem hystericam, sed tantum ejus in-



intensio-rem gradum. Nempe censetur Suffocatio adesse hysterica, ubi ægræ conqueruntur de globo ad fauces adscendente, licet convulsiones artuum minimè copulentur leviori speciei. Tum demum insigniri potest nomine Epilepsiæ ubi convulsiones hæ vehementes copulantur. A convulsionibus hisce fluxit denominatio Epilepsiæ per consensum, verum ostendendum fuerat, quis esset nexus Epilepsiæ hujus cum Suffocatione hysterica. Denominatio à me imposita, differentia & relatio, quæ è tabulâ superius proposita peti possunt, statim distinctiorem convulsionum conceptum menti nostræ ingerunt. Convulsiones hæ sæpe adeo sunt vehementes, ut hi paroxysmi Morbum caducum mentiantur, atque ab eodem non nisi difficulter distinguantur, nempe ex insigni rubore faciei, uti & ex eo, quod convulsiones hæc præcesserit molestus à globo veluti adscendente suffocationis sensus, denique ex eo, quod ægræ non morbo caduco, sed suffocationi hystericae sint obnoxia. Hisce addi potest, quod à paroxysmis morbi caduci citius restitui soleant Lunatici, tardius hystericae.

Causa harum convulsionum non est deducenda ex humoribus vitiosis, spiritibus animalibus, nervorum principia occupantibus, permixtis, nec copulæ heterogeneæ & explosivæ. Primum enim ex iis, quæ supra capite de Paralyfi disputavi, patet cerebri ope nihil secerni nisi spiritus animales, nihil in nervorum exiguos tubulos descendere, præter eosdem spiritus animales. Deinde motus musculorum non dependet ab aliqua explosione, vel in statu naturali, vel præternaturali. Denique succus nerveus nunquam regurgitat versus principia, quia ejus transitus à tumore, aut scirroso aut cancroso, præcluditur. Neque hoc probatur ex instantiâ puellæ XII. annos natæ, quæ herniam contraxerat, quæque è fasciâ malè adaptatâ dolorem, postea vertiginem, paroxysmos hystericos, & scrophulas erat passa. Etenim in hoc casu ex ingenti dolore, forsan etiam leviori inflammatione, febris est excitata, quæ insignem pressionem & dilatationem sanguinis habens comitem, ut & spirituum animalium inordinatum motum, omnia illa produxit symptomata. Nec opus est in hoc & similibus casibus recurrere ad humorum commixtionem fictitiam, cum sola

Causa convulsionum



sola sanguinis & spirituum commotio, sola animi pathemata, hæc phænomena facile producere possint. Hæc non ignoravit quoque *Willisus*, sed præjudiciis suis excæcatus, non animadvertit, se suppositiones advocasse falsas, nec talibus opus esse defensoribus, nec tali auxilio ad veritatem explicandam & tuendam.

Motus voluntarius & convulsivus.

Ut itaque de hoc affectu ex rei veritate agamus, repetendum memoria est, voluntarium motum dependere à moderato influxu spirituum, versus fibras tendinum muscularium, easdem tendente, & sanguinis motum progressivum aliquomodo sufflaminante: convulsivum autem, à tumultuario influxu spirituum, absque voluntatis imperio. Hæc in superioribus fufius explicata sunt.

Sanguinis vitium aliquando spiritus excitat.

Jam addo: quemadmodum à spirituum influxu turbulento plures muscoli successivè sæpe vehementer contrahuntur, licet in illis musculis vitium lateat nullum, ita non raro contingit, sanguinem vel copia, vel lentore peccantem, nimium replere has vel illas arteriarum ramificationes, atque molestâ illa repletionem spirituum motum tumultuarium versus has vel illas partes allicere. Causa adjuvans sæpe est, peculiaris vasorum dispositio, & reptatus.

Vasorum dispositio nativa.

Peculiaris illa vasorum dispositio aliquando est nativa, aliquando adscititia. Nativa non rarò in cadaveribus post mortem conspicitur; nempe vasa non semper eodem loco oriuntur, aliquando majora, aliquando minora sunt, dexter ramus sinistro aliquando major est, & vice versa. Talia solent dici lusus naturæ; verum si magis exactè nobis cognita fuissent omnia illa, quæ æger in se observavit, procul dubio ab hac diversitate plura potuissent deduci. Non solemus ad hæc esse satis attenti, cum tamen parva immutatio, parvum discrimen respectu latitudinis, & longitudinis, respectu lineæ magis vel minus directæ magnam diversitatem operationum pariat. Solent hæc practici sicco transmittere pede, hinc sæpe falsæ explicationes oriuntur. Quotusquisque est, qui in descriptione affectus hysterici, vasorum dispositionis fecit mentionem? Et tamen hinc dependet ratio multorum symptomatum in foeminis familiarum. Quæ est ratio quare foeminæ affectu hysterico,



rico, quem eundem esse docebimus cum hypochondriaco, gravius infestentur? Quæ est ratio, quare foeminæ, instantibus mensibus, de dolore lumborum pulsatorio conquerantur? Quæ est ratio, quare venter ex obstructione mensium magis intumescat, quam illud vasorum dilatatio requirere videtur? Non alia, quam peculiaris vasorum & organorum dispositio. Vasa generationi in mulieribus inservientia omnia intus in abdomine reconduntur, in viris aliquæ foras propendent. Vasa præparantia in foeminis, quam in viris, longe sunt breviora. Vasa præparantia in mulieribus ad ovaria, in viris ad testes, non ova, sed semen conficiunt, contendunt. Vasa, ad uterum distributa, copiosa, unde ipsius calor sese partibus circumjacentibus communicat. Itaque ubi uteri vasa refrigerata, non sunt apta deponere, atque exonerare tributum menstruum, ubi sanguis huc affluens copiosè, obstaculum offendit evacuationem impediens, non est mirum, si arteriarum percipiatur molesta pulsatio, si molestia illa delata ad cerebrum, versus imum ventrem spiritus animales copiosius distribuat, unde sanguinis affluxus iterum major: hinc calor, inflationes, nec non convulsiones viscerum facile excitantur. Ubi enim nervi intercostalis ramificationes malè afficiuntur, facile etiam per vagum in consensum trahitur, adeoque spiritus non tantum in cor & præcordia, sed & fauces cum impetu confluunt, ab influxu illo fibræ tenduntur, sanguis cohibetur, adeoque & tumor, & angustia & suffocationis producitur sensus. Globus ille ab inferioribus partibus videtur adscendere, quandoquidem intestina flatibus primum sunt repleta, ac diaphragmatis explicationem aliquomodo impediunt: deinde quod intestina & ventriculus vasis arteriosis gaudeant admodum tumidis: denique quod forte æsophagi vasa etiam incipiant repleri, antequam angustia illa faucium observetur.

Vidimus dispositionem nativam vasorum, vidimus etiam Adscititia. eam alicujus esse momenti, ad distinctiorem symptomatum hystericorum explicationem. Quod si mihi occasio sese offerat accuratius adhuc discrimen, inter dispositiorem vasorum utriusque sexus, investigandi, forsan plura detegam. Transeundum jam est ad dispositionem vasorum adscititiam: hæc consistit in eo, quod



sanguis & spiritus sæpe eadem viâ in has vel illas partes irruentes, magis magisque eam semitam disponant ad faciliorem, & repetitum influxum. Hujus rei in statu sano exemplum est obvium in illis, qui organum musicum pulsant, vel qui fidibus, aut voce canunt. Non sufficit ut quis ingenio valeat, non sufficit ut manus habeat agiles, oportet ut exercitatione continua affluescat digitos, pedes, linguam ad artificiosum & celerem hunc motum. Continua illa exercitatione nervi, spiritus animales, fibræ, muscoli disponuntur aliter, musicis, quam rusticis, qui

*Paterna rura bobus exercent suis.*

In statu p. n. sanguis & spiritus sæpius in partes aliquas irrumpentes impetuosè, vias sibi aperiunt ad faciliorem influxum, vel reptatum vasorum & fibrarum aliter disponunt. Hujus rei exemplum memorabile exstat apud *Valleriolam*. *Johannes Berclai*, resolutione multos annos laborans, quum incendii metu se à domo præcipitem dedisset saltu, domo & lecto propè incensis, incolumis & probè incedens derepentè factus est. Vid. *Valleriolam* l. 11. obs. 4. Quod si hæc applicare velimus affectui, de quo nunc agimus, facile intelligemus, si sanguis aliquoties impetum faciat in vasa versus uterum distributa, si illic inveniat exitum, ad utilem evacuationem, expeditum, illum data occasione eò se copiosius recepturum. Quod si autem uterus refrigeratus exitum non concedat, si intestina inflentur, si à repentino animi affectu vasa paulo aliter disponantur, si spiritus versus infimum ventrem tumultuosè, si versus præcordia, si versus fauces affluescant confluere, si agitationem infimi ventris soleat excipere angustia faucium, foemina prima sentiens rudimenta instantis paroxysmi, & metuens graviora, ex animi affectu & metu sese dabit præcipitem in novum paroxysmum. Quod si animi affectus ipsam primâ vice conjecerit in talem paroxysmum, facile idem exacerbabitur, quotiescunque novus animi affectus spiritus & sanguinem tumultuosè exagitaverit.

Gestatio &  
partus.

Ad faciliorem sanguinis & spirituum in uterum ac viscera  
imi



imi ventris influxum, non parum facit gestatio & partus. In gestatione enim foetus, necessum est, sanguinem tanta deferri copia versus uterum, ut & placenta uterina, & embryo, & uterus ipse, non tantum nutrimentum nanciscantur debitum, sed & in majorem excrescant molem. Nutritur infans non per os, sed solo sanguine materno. Vasa funiculi umbilicalis satis magna, à sanguine materno continuò replentur. Necessum ergo est, sanguinem eò satis copiosè confluere, unde vasa illa ventris infimi aliquomodo extenduntur, & ad majorem sanguinis receptionem disponuntur. In partu dolores, qui foeminis incumbunt, per intervalla ingruunt. Ingruunt autem tantâ vehementiâ, ut illos cohibere in mulierum non sit potestate. Hi conatus ergo & motus naturæ, non malè possunt dici convulsivi, quandoquidem absque voluntatis imperio, cum insigni vehementiâ contingunt. Non eo inficias, parturientes non parum motum naturæ adjuvare inspiratione validâ, cohibita expiratione, explicatione diaphragmatis, contractione musculorum abdominis, nisi autem per intervalla repeterent dolores hi parturientium, vanus & irritus esset ad exclusionem foetus omnis labos. Dolores hi universum corpus, etiam arcus & caput, longo satis intervallo remota, malè mulcunt, imprimis autem viscera & vasa abdominis afficiunt. Tunc temporis versus uterum, ac proinde infimum ventrem, copiosior observatur sanguinis & spirituum affluxus: hinc vasa dilatantur, & ad majori copia sanguinem recipiendum disponuntur, si modo occasio suppeditetur. Nervi itidem spiritus magna vi transmittentes, ad faciliorem influxum eorundem præparantur. Quid? quod ipsa evacuatio in partu, & post partum lochiorum, nec non impetus sanguinis versus uterum, etiam vasa patentia requirant?

In affectibus mulierum, & uterinis, spirituum & sanguinis motus impetuosus, ita arctè copulantur, ut nonnumquam difficile judicatu sit, an spiritibus, an verò sanguini primas tribuere oporteat? Sunt tamen casus nonnulli, in quibus à spiritibus prius agentibus, alii in quibus à sanguine prius agente, effectus commodè deducere possumus. Exemplis res fiet manifestior. In conatu parturientium embryo calcitrans, mem-

Spirituum  
& sanguinis  
motus.



branæ foetum involvèntes, aqueo humore repletæ, foras prurumpentes, & uteri cervicem dilatantes, uteri osculum sese diducens, spiritus copiosè eò alliciunt; spiritus influentes, & fibras tendentes, sanguinis motum progressivum aliquomodo sufflaminant, hinc sequuntur conamina naturæ, ventris onus expellere gestientis. In Epilepsiâ à turbulento influxu spirituum, cor validè agitur, sanguinis impetus in diversis musculis cohibetur, muscoli sese violenter contrahunt absque voluntatis imperio, imo cessante sensuum internorum operatione. Hinc oriuntur contorsiones membrorum, strabismus & similia. In his casibus impetus spirituum animalium sanguinem in consensum trahit, unde fibrillæ motrices breviores redduntur, contrahuntur, aut aliter disponuntur. Verum in suffocatione hysterica sæpe res aliter habet, sanguis copiosior & viscidior, atque facilitatem nactus influendi copiosius in arterias infimi ventris ac faucium, earum ramificationes solito magis replet & extendit, unde sensatio molesta angustiae defertur ad sensorium commune, hinc spiritus animales turbulentè agitantur, in præcordia influunt: cor magis agitur, sanguis vehementius propellitur, spiritus ad partem affectam copiosius confluunt, ibidemque tensionem majorem fibrillarum, nec non contractionem convulsivam efficiunt. Ægrota sæpius hisce paroxysmis obnoxia (supponimus enim fœminam hoc malo non semel vexatam) simulac sentit hæc angustias, metuit ne idem recurrat. Ab animi hoc pathemate spiritus magis commoventur, in cor & præcordia tumultuosè influunt, cor & pulmonem agitant, iterum spiritus ab hac commotione agitantur, angustia faucium intenditur, cerebri arteriolæ quoque replentur, atque ita excitantur convulsiones hystricæ vehementissimæ. Quomodo illud fiat, capite de Morbo caduco explicatum est. Illud solummodo monendum restat, paroxysmos Morbi caduci & Epilepsiam hystricam in eo præcipuè differre, quod in Affectibus hystricis secundariò tantum afficiatur cerebrum, in Morbo caduco primario. In Suffocatione & Epilepsia hystricâ, nervus intercostalis molestam sensationem ad cerebrum defert, unde spiritus in hoc par, ut & nervos paris vagi influunt: in Morbo caduco, arteriæ carotides.



des primum replentur, sensus interni abolentur, tum demum sequuntur convulsiones universi corporis. Postquam autem in Epilepsiâ hystericâ sanguis est commotus, non possunt non arteriæ carotides aliquomodo repleri, mens quodammodo obnubilari, & convulsiones artuum sequi. Adeo ut affectio hystERICA gravior, meritò possit dici Epilepsia per consensum, sed diligenter tenendum est, Epilepsiam hanc non esse aliam, quam eam, quæ paroxysmum hystericum sequitur, uti ego in descriptione innui.

Hinc patet quare dixerim, Epilepsiam hystericam sequi suffocationem hystericam, quare dixerim, in Epilepsiâ hystericâ adesse majorem, vel minorem mentis obnubilationem. Verum antequam de nexu, qui inter Suffocationem hystericam & Epilepsiam intercedit, agam, prius videndum est de mentis obnubilatione majore, vel minore. Nempe in Morbo caduco ob primariò affectum cerebrum, & denegatum liberum per arterias carotides transitum cerebrum deprimitur, nervi comprimuntur, adeoque necessariò mentis functiones omnino abolentur ad tempus. In Epilepsiâ hystericâ, cum cerebrum non nisi per consensum afficiatur, ægræ non rarò omnes omnium adstantium colloquia intelligunt, quamvis, ob turbulentum sanguinis & spirituum motum, animi sui sensus perspicuâ oratione explicare non possint. Potest tamen contingere in casibus gravioribus, præcipuè ubi sanguis copiosior & viscidior non satis promptè transit arterias carotides, earumque ramificationes, cerebrum & medullam oblongatam validè premi, adeoque sensus etiam internos aboleri.

Dixi convulsiones infimi ventris, & artuum sequi suffocationem hystericam, ut ostenderem nexum inter Epilepsiam & Suffocationem hystericam. Nempe ubi auctores agunt de Suffocatione hystericâ, non satis explicant convulsiones, quæ paroxysmos graviores comitantur, ubi verò agunt de Epilepsia per consensum uteri, causam ejus quidem statuunt mensium obstructionem, verum neglexerunt meminisci, tum demum dici Epilepsiam per consensum, ubi Suffocatio hystERICA gravior, convulsiones artuum producit. Ita entia multiplicantur absque necessitate, & lectorum ac practitorum juniorum judicium

De mentis  
obnubila-  
tione.

Epilepsia  
hystERICA est  
sequela  
Suffocatio-  
nis ejusdem  
nominis.



confunditur. Iterum repeto : Epilepsia Hysterica, non differt à Suffocatione ejusdem nominis, nisi tantum convulsione. Epilepsia hysterica eadem est cum Epilepsia per consensum uteri. Mutua est inter hæc symptomata affinitas.

De convul-  
sionibus  
viscerum.

Non est necesse multis explicare, quare convulsiones viscerum infimi ventris sese prodant in Epilepsiâ hystericâ. Illud satis apertum est ex iis, quæ de vasorum dispositione nativa & adscititia, nec non de gestatione foetus & partu dicta sunt. Nulli debet mirum videri convulsiones oriri in illis visceribus, versus quæ spiritus & sanguis & in statu naturali, & præternaturali copiosius confluunt : hi enim ipsi liquores, & motus voluntarii, & convulsivi, auctores existunt. Satiùs reor si ad confirmationem eorum, quæ in præcedentibus explicata sunt, historiam narrem insignem, hoc ipso tempore, quo hæc in chartam conjeci, observatam, evincentem gravissimis ventris affectibus mulieres frequentius corripì quam viros, nec non stupendam & brevissimam curationem morbi Ileii. Puerpera statim à partu gravissimis ventris doloribus & febre divexata meum poposcit auxilium, brevi Deo benedicente liberatur. Post quinque hebdomadas circiter, iterum recidivam passa est, liberatur à me iterum feliciter. Undecimo circiter à partu hebdomade templum frequentat, Deo actura gratias pro feliciter recuperata sanitate. Non longè post incidit iterum in dolorem ventris vehementissimum, qui brevi ita invaluit, ut post injectum enema & alia à pharmacopœo in usum vocata medicamenta, Ileus sese prodoret morbus. En difficilia symptomata ex infimo ventre concitata in puerpera ! Causa fuit primum lochiorum penuria, cui V. S. opem tulit. Dein menstrua cessantia, quamvis enim infans non longè à partu esset mortuus, tamen post tres circiter menses evacuatio solita adhuc erat suppressa. Manè advocatum præscribo mixturam & Enema : Enema rejectum fuit statim, mixtura dolores vehementissimos & vomitum continuum facum alvinarum cum maximo dolore compescere non potuit. Adfuerat Minister salutis animæ curam gesturus, aderant amici ægrotæ, quam non diu superfuturam credebant, cum vesperi iterum accederem.



rem. In hoc rerum articulo præscribo *Electuarium Panchymagogum meum* additis appropriatis, uti forsan in Observationibus docebo, nec non mixturam: assumpto haustu statim dolor cessavit, vomitus cohibitus, subsequutæ dejectiones alvi commodæ atque ægra liberata. Ægrota hæc uxor fuit *Abrahami Steenbex*, qui non minus, quam reliqui adstantes, hujus curationis oculati testes, eventum felicissimum miris encomiis celebrarunt.

De Convulsionibus artuum, post viscerum spasmos, sæpe occurrentium, non est necesse pluribus dicere, cum hæc ex antecédentibus satis elucescant.

De Convul-  
sionibus ar-  
tuum.

Explicui hætenus Epilepsiam hystericae constructione partium, nec non motu humorum & spirituum. Nullas ad explicationem adhibui falsas hypothèses. Jam ego obtestor, omnes verè Medicos, & ad ea quæ in praxi occurrunt attentos, ut hæc sedulo perpendant, & cum usu quotidiano conferant. Invenient me absque ambagibus explicuisse veritatem usus summi, & faciem præferentem ad facilem intelligentiam aliorum symptomatum ex. gr. palpitationis cordis & similibus. Quemadmodum enim fluvii è fontibus rapidissimè decurrentes, nunc versus dextram nunc versus sinistram ripam vehementius feruntur, hic aggerem adjacentem abradunt, illic limum copiosius aggerunt, alibi alveum profundius excavant, aut eundem vix navigabilem reddunt præ siccitate, ita etiam in corpore nostro res sese habet. A sanguinis impetu expansiones vasculorum quarundam, aliarum verò compressiones: hic laxa fibrarum textura, membranarum, pororum, alibi constipatio, contractio, angustia, & hinc innumera oritur diversitas ratione temperamenti, roboris, digestionum, secretionum, morborum, symptomatum. Hæc itaque accurate considerasse ad praxin feliciter exercendam, & ad causas symptomatum detegendas, plurimum juvabit, ne fortuito & casu, sed providè & ex artis præscripto remedia seligamus, ac in usum vocemus. Illustrationis gratia & hanc libet adhibere comparisonem. Quemadmodum in Philosophia naturali materia & motus rectè statuuntur rerum naturalium principia, quemadmodum in materiam à motu magna introducitur varietas, ita etiam in corpore nostro sanguis & spiritus sunt primum movens, à sanguine

Conclusio.



guine & spiritibus animalibus, eorumque motu vario partium solidarum varia textura, nec non omnes operationes in statu sano & ægro dependent. Agunt autem hi liquores variè, pro ratione meatuum, quos pertransire necesse habent. Ut ergo prava diathesis in sanguinem introducatur, sufficit ut ejus motus ordinarius immutetur. Hoc immutato, sanguinis crasis non tantum pervertitur, sed & partes solidæ & vasa sanguifera ipsa multum immutantur, unde plurimi oriuntur non tantum morbi, sed & ipsa mors.

*Causæ.* Explicui hætenus veram essentiam affectus & Epilepsiæ hystericæ, restant explicandæ causæ. Causæ sunt, sanguinis copia, visciditas, seu minor vigor, obstructio mensium, sanguinis evacuatio nimia, ventriculi debilitas, flatuum copiosus proventus, denique animi pathemata.

*Sanguinis copia.* Sanguis si abundet, vasa corporis nostri in universum magis replentur, unde arteriæ faucium magis distentæ, angustiae sensum facile producunt. Non tantum hinc deducendus est angustiae sensus, sed & intumescencia eorundem, oculis admodum manifesta. Eadem illa repletio animi commotionibus vehementibus majus suppeditat pabulum. Denique eadem illa repletio, à passione turbulenta excitata, ac versus cerebrum impetum faciens, arterias carotides replet, sensus abolet, convulsiones producit.

*Visciditas.* Conjunxi visciditatem & minorem vigorem, quandoquidem hæ duæ causæ, licet considerandi modo differant, tamen plerumque copulantur, & ferè coincidunt. Visciditas enim sanguinis tenacitatem, minor vigor pressionis debilitatem, & spirituum designat penuriam. Jam autem, ubi sanguis est tenacior, particulæ minus subtiles, spiritibus non subministrant pabulum, nec satis copiosum, nec satis conveniens: hinc eorundem dependet minor vigor. Utraque causa oritur à minori motu & expansione sanguinis, ejusque immunità pressione. A pressione enim comminutio, calor, vis elastica sanguinis, spirituum animalium generatio & motus deducendus est. Quemadmodum autem sanguis spirituum motus, ita vicissim spirituum motus agitationis sanguinis, ejusdemque variæ immutationis causa est. Mutuo nexu hæ duæ causæ cohærent. Sunt tutem ambæ hæ, causæ affectus hystericæ.



quandoquidem à visciditate dependet, sanguinem non satis promptè permeare vasa faucium, unde molestus sensus, & spirituum oritur turbulentus motus. A spirituum minori vigore ortum ducit debilior sanguinis pressio, & comminutio, unde iterum sanguis non satis alacriter permeat vasa faucium.

Obstructio mensium etiam causa est Epilepsiæ hystericæ, tum quod originem det nimiae sanguinis accumulationi: tum quod oriatur à lentore & minori vigore sanguinis, ac spirituum animalium: tum quod sanguinem viscidiorē, & spiritus torpidiores efficiat. Torpor autem spirituum, in hoc casu, à nimia flacciditate ac cerebri depreffione dependet, unde tum facile affectus spasmodici graviores oriuntur. Ex eo, quod mensium obstructio ansam præbeat huic affectioni, orta est sententia: ab utero oriri omnia hæc symptomata. Verum obstructio ea, non causæ conjunctæ, sed procatarcticæ rationem habet.

Obstructio  
mensium.

Nimia sanguinis evacuatio itidem potest producere Epilepsiam hystericam. Si mulier lochiorum, aut mensium fluxu nimio corripitur, facile hæc eadem excitabuntur symptomata. Nempe à nimia sanguinis evacuatione spiritus animales patiuntur deliquium, cerebrum collabitur, medulla oblongata comprimitur: à p. n. & subitaneo hoc collapsu, spiritus, cerebri & medullæ oblongatæ incolæ, quaquaversum inordinatè, & absque voluntatis imperio, propelluntur. Spiritus igitur cor agitantes, propellendo sanguinem in arterias majores & minores pulsu iterato, atque retinendo in fibris muscularibus, efficiunt motus convulsivos. Si foemina solita sit hoc affectu torqueri, dicitur Epilepsia hystERICA, quamvis revera hæc affectio & hi spasmi ejusdem sint naturæ cum Epilepsia ab hæmorrhagia, de qua antea disputavimus. Itaque Epilepsia hystERICA, non minus quam reliquæ, potest meritò dici & à repletionē, & ab inanitionē ortum ducere.

Sanguinis  
evacuatio  
nimia.

Ventriculi debilitas sequitur constitutionem, de qua in superioribus egimus. Eadem illa debilitas visciditati sanguinis, minori spirituum vigori, atque obstructioni mensium ansam præbet. Sanguis quippe ordinariè chylo est proportionatus:

Ventriculi  
debilitas.



si chylus sit tenacior, sanguis ejusdem generatur naturæ: si chylus sit minus fermentatus, si minus comminutus, sanguis evadet viscidior.

Flatus.

Flatus has foeminas plurimum divexare, superius annotatum est. Sequuntur hi sanguinis minorem motum & agitationem, nec non chylum & salivam viscidiorum. Quippe observandum est, non tantum chylum esse glutinosiorem, ob diminutum calorem, & minorem spirituum vigorem, verum omnes humores à sanguine secretos itidem esse tenaciores: tenaciores sunt bilis, succus pancreaticus: humores à glandulis intestinalibus secreti sequuntur naturam sanguinis, cui ortum suum debent. Jam autem intestina flatibus distenta, ad contractiones spasmodicas disponunt. Molesta quippe tunicarum intestinalium expansio, spiritus animales eò copiosius allicit, spiritus animales copiosius influentes in intestina, vasis arteriosis copiosè ditata, non possunt non contractionem fibrarum molestam producere. Hinc in casibus gravioribus eadem velut in globum contrahuntur, atque ita convelluntur, ut motus eorum etiam externè tactu percipiatur. Decipiuntur qui putant eam molem esse uterum, cum uterus è sua sede evelli non possit. Sentitur hic globus ordinariè in sinistro hypochondrio, quò uterum adscendere nemo anatomiae gnarus facile admiserit. Quid? Quod in gravidis etiam affectus hysterici satis vehementes occurrant? An in his uterus cum foetu tantà vi convelleretur, nullo subsequente abortu? Non est igitur uterus, qui sentitur, ortum est hoc præjudicium, tum è vulgari appellatione, tum è vulgi imperitiâ, quod uterum ordinariè in foeminis culpare solet. Sunt intestina in orbem conglobata, neque enim eò loci aliæ partes reperiuntur, quibus hoc symptoma adscribi potest. Prope adjacet quidem lien, renes, ventriculus, verum nemo facile hæc viscera ita validè convelli dixerit. Vidimus quomodo flatus ordinariè generentur, contingit tamen & aliam esse flatuum originem. Nempe non raro febris excitat Epilepsiam hystericam, in quò casu non tantum visciditas ordinaria, sed & exsiccatio, & æstus considerari debet.

Animi pathemata.

Addidi denique animi pathemata esse causas Epilepsiæ hystericæ.



stericæ. Non sunt hæc confundenda, cum iis quæ in antecedentibus de passionibus dixi. Tum consideravi affectiones animi tanquam causas conjunctas paroxysmi hysterici, nunc easdem considero tanquam causas procatacéticas. Hisce adscribenda sunt ea, quæ vulgò sanguini menstruo & semini corruptis perversissimè adscribi solent. Nolim hic immorari spurcis & fœdis narratiunculis, quæ ab Auctoribus de virulentiâ feminis, contra veritatem (modo absit contagium) in chartam conjecta sunt. Nec explicationes, nec curatio à quibusdam præscripta, sunt digna σεμνότητι Medici, multo minus Christiani. Itaque & sanguinis menstrui, & feminis noxa in eo consistit, vel quod copiâ gravent, vel quod passionem excitent. Peccat sanguis copiâ universaliter, quemadmodum in superioribus explicatum est. A copiâ hac aliquando oritur major visciditas, unde segnities, & ad tristitiam dispositio. Copia etiam in specie considerari potest, respectu vasorum & receptaculorum nimium distentorum. Hæc molestia ad cerebrum delata, spiritus animales eò copiosius allicit: à spirituum copiosiori influxu sanguis commovetur, incommoda in partibus excitatur pulsatio, atque ita varia pathemata. Et quandoquidem viduarum, in hoc negotio, fit mentio, videamus quæ illas commoveant animi affectiones? Hæ mariti chari mortem lugent, ad loci, ubi commorari erat solitus, ad vestitum conspectum &c. tristem viri refricant memoriam: viudas sese frigido lecto jacere ægrè ferunt, ardent aliquando in alium, nec voti fiunt compotes, insomnes transmittunt noctes, æstuant. Ita doloris, amoris, desiderii curæ illas noctes diesque exagitant, nec requiescere sinunt. Animum non regunt, non paret hic, sed imperat, donec tandem spiritus & sanguis exagitati, expansionem nimiam intestinorum compressionem molestant faucium, denique paroxysmum producant hystericum. Hic si aliquoties recurrat, adeo pronæ evadunt in hosce affectus, ut ad omnem vehementiorem commotionem, iterum in similes incidant insultus, uti in superioribus explicatum est. Quod si causæ plures concurrant, quas hic repetere non est necesse, eo facilius hæc habent locum. Hæc sunt vera & praxi convenientissima, quippe non



rarò medici intelligunt, ægrotam toto vitæ tempore ab hoc morbo fuisse immunem, verum hac vel illâ occasione huic affectui evasisse obnoxiam, eumque sæpe recruidisse. Quæ de virulentiâ dicuntur sunt fictitia & falsa. Neque enim sanguis menstruus est virulentus, uti suo loco erit explicandum, eadem est reliquorum ratio, nisi accesserit lues venerea.

Differentiæ.

Accedimus ad differentias. Epilepsia hysterica, quamvis omnis sit symptomatologica, uti è superiori constat tabulâ, tamen certo respectu potest dici, Idiopathica vel Sympathica: hoc est, inflationes illæ intestinorum, anxietates, convulsiones, aliquando excitantur à causis ordinariis, quarum sufficienter est facta mentio, aliquando affectio & Epilepsia hysterica est symptoma alius morbi ex. gr. febris. Et hæc distinctio utilissima est in praxi. Hic enim non tantum considerata est repletio ordinaria, verum & extraordinaria, ab orgasmo febrili producta, si velis distinctum formare hujus affectionis conceptum. Non etiam insistendum vulgaribus medicamentis hystericis, quæ constant particulis aromaticis, incidentibus & attenuantibus, illud esset oleum camino affundere. In affectu hysterico febrili, pressio & dilatatio sanguinis inflationem præcordiorum, & intestinorum producit. Itaque non tantum affectus hystericus, sed imprimis æstus febrilis respiciendus, uti in sequentibus explicabitur.

Deinde Epilepsia hysterica est vel gravior, cum sensuum internorum abolitione, vel levior, nec mentis emotionem comitem habens. Est vel recens, vel inveterata, vel gravidas, vel parturientes, vel uterum non ferentes affligit. Non succurrunt jam differentiæ aliæ, nisi minoris momenti.

Signa.

Signa ex explicatione satis sunt obvia. Convelluntur ægrotæ, in hypochondrio sentitur globus sese commovens. Conquestæ sunt ægrotæ de anxietatibus circa præcordia, de globo velut ad fauces adscendente, sæpe, vel saltem aliquoties, hoc insultu fuerunt correptæ. Hoc signum non est necessarium; potest enim medicus primâ vice advocari, quando paroxysmus ingruit, verum si ægrotæ sæpius huic malo sit obnoxia, verisimile est exacerbationem esse symptomatis ordinarii. Præcessit aliquando obstructio mensium, fluor albus, nimia mensium



sium evacuatio, vita sedentaria, vel etiam insignia animi pathemata. Distinguitur à Morbo caduco, quod in illo cerebrum & arteriæ carotides afficiantur, in hoc affectu nervus intercostalis, & par vagum, molestam sensationem ad cerebrum deferunt. Videri possunt ea quæ de Morbi caduci signis disputavi. Non sunt negligenda alia signa duo passim obvia, quorum alterum est, faciem ordinariè hystericorum rubere, imo tum magis floridam esse, cum illæ pejus habent. Alterum est, quod urinam reddant aqueam & limpidam. Prioris ratio petenda est è sanguinis motu & tenacitate, unde pulmonis vasa nimium replentur, repletionem autem pulmonis sequitur faciei color rubicundus. Posterioris itidem è debiliore concoctione cibi, salivâ & succo pancreatico viscidioribus, & aliquando acidis, quibus accedit bilis tenacior & iners.

Interim in paroxysmis gravioribus, ubi ægrotæ videntur animam efflasse, diligenter attendendum est, an vita sit superstes nec ne? Tangendus est diligenter pulsus, manus sinistro lateri imponenda, speculum ori admovendum, quandoquidem plura sunt exempla talium, quæ vivæ sepulturæ vel destinatæ, vel etiam illatæ sunt. Vide *Bierlingii Thesaurum* p. 245. §. 6.

Prognosis ita habet. Quemadmodum affectio hysterica levior, nullis comitata convulsionibus, periculi solet esse expers, ita eadem affectio, Epilepsiam habens comitem, non est flocci faciendâ. Tanto autem majus periculum imminet, quanto spasmi sunt vehementiores. Si Epilepsia hysterica infestet, ubi vires à febre fractæ sunt, majus imminet periculum. Recens facilius, inveterata difficillimè vel nunquam superatur. Si uterum ferentes validè affligat, abortus, si parturientes, mortis non rarò est prænuncia. Epilepsia hysterica febrilis sequitur naturam febris, quæ illam produxit.

Indicationes in hoc symptomate sunt variæ. Quemadmodum enim Epilepsia hæc, sine Affectiois hystericæ cognitione distinctè perspici non potest, ita etiam non nisi hac curatâ, curari nequit. Sanguinis ergo copia nimia imminuenda est, visciditas emendanda, menses promovendi, ventriculus roborandus, flatus discutiendi, animi pathemata sedanda. Hæ veræ sunt indicationes. Sublatâ causâ tollitur effectus. Si



enim præcipuè ad medicamenta antispasmodica respiciamus, illud, quod in curatione primas obtinet, non nisi obiter considerari solet. Quandoquidem autem pluribus hisce indicationibus satisfieri nequit, quin prius tollatur paroxysmus, si sit gravior, huic negotio omnino incumbendum est.

Cura in pa-  
roxysmo.

Excitationi hyssericarum etiam mulierculæ incumbunt, fumum acrem & foetidum admovendo naribus. Quandoquidem tænia coerulea ubivis ad manum est, ea accenditur & naribus admovetur, non sine successu, odore enim illo ægrotæ aliquando excitantur. Admovetur aliquando *acetum* naribus, verum illud non rarò obesse solet, nisi ubi aer halitibus, aut nidore carbonum, inquinatus, ansam dedit paroxysmo. *Spiritus Salis Armoniaci* maximè efficax est, si naribus subjiçiat, verum illum prudenter in usum vocare oportet, ne nimia efficacia ægrotæ noceat. Eadem est ratio *Sal. Volat. C. C. Fuliginis* &c. Non est enim sicco pede transeundum, sæpius contingere hyssericos paroxysmos quasi exacerbari, si naribus admoveantur medicamenta admodum efficacia; in quo casu utendum est temperatioribus. Hujus rei duplicem observacionem. Prior est, quod ægrotæ sint plethoricæ, unde sequitur, à nimia spirituum agitatione sanguinem magis agitari & expandi: hinc oritur arteriolarum minimarum repletio & tumor, in hoc affectu admodum molestus. Posterior causa est, quod spiritus ab inflatione viscerum infimi ventris irritati, sponte satis in nervum intercostalem & par vagum influant, in medio ventre cordis agitationem vehementiorem, in infimo spasmos excitaturi; si autem spiritibus hisce nimium ferocientibus major subdatur stimulus, non est mirum, si ægrotæ pejus habeant. Quod si obstructio mensium, vel eorundem subita suppressio paroxysmum induxerit, nec is levioribus cedat remediis, omnino secanda est vena: ita insultus promptissimè superatur. Hujus rei facilis est explicatio è superioribus; cum enim sanguis per minimas faucium arteriolas, ut & pulmonem, difficilius circuletur, cumque is, à spiritibus animalibus copiosius & turbulente influentibus, in motu suo progressivo inhibeatur: cumque convulsiones sanguinem vehementer exagitent & expandant; denique cum ar-

te-



teriarum carotidum nimia repletio, sensuum internorum abolitionem ad tempus producat, sanguinis V. S. evacuatio omnibus hisce causis convulsionum promptissimè succurrit, adeo ut V. S. possit dici, si veritatem ipsam spectemus, potentissimum remedium antispasmodicum, ubi nempe repletio nimia, causa est horum symptomatum. Eant nunc blaterones medici, in V. S. stylum acuunt, contra V. S. debacchantur, numquam sanè id efficient, ut adversus remedium excellentissimum, felicissimo rerum usu expertum, cruda opinio, & malè digestum obtineat præjudicium. Quamvis enim quidam abutantur V. S. illorum error dignitati præstantissimi remedii nihil detrahit, aut usum evertit. Abusus noxius, usum salutarem nequaquam tollit. Longè falluntur ii, qui in omnibus morbis & ægrotis venam pertundunt. Longè falluntur, imo prima praxeos rudimenta ignorant ii, qui nunquam esse pertundendam venam autumant. Medio tutissimus ibis.

Interim observandum est, non esse tutum foeminas in paroxysmo ipso discingere, si sint vestitæ, discinctæ hystericæ pejus habere solent: unde etiam mulierculis, nec quidem malè, in more positum est, hypochondria, & medias mulieres cingere vinculo aliquo lato & commodo. Vinculo aliquo lato & commodo, inquam, ne nodus asper, ex præjudicio sinistro hypochondrio injectus, intestina lædat. Id quod dixi de vinculo injiciendo præcipuè locum habet in puerperis, affectu hystérico correptis; etenim oportet ut peritoneum, & muscoli relaxati ac extensi, sensim iterum sese contrahant & restituant. Itaque venter & intestina, magno foetus onere subito levata, fulcimento egent, ne nimia expansione flatus intestinis molestiam creent.

Ubi ægrota ab insultu excitata est, nec necesse fuit ita repente in usum vocare V. S. diligenter perpendendum est, qua ratione optimè repletioni nimiae occurratur? Examinandum est, num menses sint obstructi? Num parcius fluant? Illud quod de mensibus dixi, puerperarum lochiis omnino applicandum est. Examinandum, an ægrota sit plethorica? Num aliquando hæmorrhagiam narium patiatur? Num capitis dolori, num vertigini frequenter sit obnoxia? Num sentiat pectoris oppres-

Extra paroxysmum.  
Quibus vena secanda?



sionem? Num palpitationibus cordis infestetur? Inspiciendi sunt oculi, & attendendum an arteriolæ sint tumidæ? Ubi hæc & similia redundantis sanguinis sese produnt indicia, omninò est secanda vena. Si ægrota sit debilis, si faciem aut pedes occupet tumor ædematonis, si menstrua aut lochia præcesserint copiosa, à V. S. abstinendum est.

Quæ vena?

Secanda est vena imprimis poplitis, ut vasa, ad uterum & intestina distributa, molesto onere subleventur, ut natura ad solitum pensum absolvendum sese iterum accingat.

Qua quantitate.

Quantitatem educendi sanguinis determinabit medicus, prudenter attendendo ad repletionem, vires, ætatem ægrotae. Et quoniam ætatis est facta mentio, oportet meminisci fœminis circa quinquagesimum annum solere menses subsistere, unde non rarò evadunt valetudinariæ. In hoc ætatis flexu V. S. solet requiri vel annua, vel etiam magis repetita, si mulieres sint plethoricæ, si menses fluere copiosius sint solitæ, si sint robustæ, si vitam agant sedentariam. Si fœmina affectibus hystericis obnoxia in febrem incidat, majori quantitate educendus est sanguis, vel V. S. iteranda, uti postea dicemus.

Quomodo nimia sanguinis tenacitas emendetur?

Nimia sanguinis tenacitas emendatur, vel subtrahendo pabulum, vel vigorem ejus restituendo: cum autem posterior hæc materia in sequentibus tractanda sit, sufficiet hoc loco demonstrasse, quomodo tenacitati subtrahatur pabulum. Fit hoc vel Emeticis, vel Purgantibus.

Emeticis.

Emetica potissimum locum habent, ubi anxietates circa præcordia vexant, vel ubi post assumptionem ciborum dolores vehementissimi vexant. Ita ego tractavi ancillam Pharmacopœi, diu molestissimis stomachi doloribus divexatam. Diversis medicamentis, consilio medici senioris aliquamdiu erat usa; verum absque insigni emolumento. Consulor ego, præscribo Emeticum tanto cum successu, ut unicum hoc medicamentum plus profuerit, quam per mensem unum atque alterum varia incassum adhibita. In tali casu emetica purgantibus omnino præferenda sunt.

Educunt quidem purgantia viscidos humores, sed crebro usurpata ventriculi digestionem ac robur, pervertunt & everunt. Hoc probe animadvertendum est, quoniam hinc patet  
me



me non frustra conjunxisse visciditatem, cum minori vigore sanguinis. *Hippocrates* vomitum & *Helleborum* commendat de Nat. Mul. x. 10. ἢν μὲν ἐν ἀπὸ τῆς κοιλίας ἦ, ἐμείτω ἀπὸ τῆς φακίς. ἔπειτα ἐλλεβόρω καθήραι. Ad vomitum in hoc morbo *Platerus* commendat *Agarici* ziss. cum *Oxymelite*. *River*. *Oxycratum*. obs. 6. & 10. c. iv.

Quod si tamen purgantia sint in usum vocanda, ea debent Purgantibus esse potentiora & amaricantia, ut sunt *Aloetica*, *Mercurialia*, aut etiam è *Colocynthide* constantia, interposita aliquâ morâ. *Willisus* has præscribit Pilulas:

℞. *Pilul. Fœtid. maj.* ʒjß.  
*Resin. Jalapp. gr.* xij.  
*Tartar. Vitriol.*  
*Castor. aa* ʒj.  
*Ammoniac. solut. in Aq. Hyster. q. f.*  
 F. Pilulæ xij pro iij dosibus.

*Rolfincius* hunc habet pulverem:

℞. *Gialapii nigri resinos. pulv.* ʒj.  
*Scammon. per fimum sulph. correct. gr.* iv.  
*Eleosacchar. Artemis. Succin. aa gr.* vj.  
 M. F. Pulvis.

qui efficacior potest reddi addito grano uno atque altero *Trochisc. Alhand.*

Sanguinis tenacitas emendatur quoque Antispasmodicis dictis Antispas-  
modicis &c. medicamentis, & Antiscorbuticis, ut & aromaticis & amaricantibus. Antispasmodicas has præscripsit pilulas *Willisus*.

℞. *Fæcul. Bryon. Assæ fœtid.*  
*Castor. aa* ʒj.  
*Sal. Corall. Succin. Jovis aa* ʒß.  
*Galban. solut. in aq. Hyster. q. f.*

M. F. Massa Dos. ʒß ad ʒj mane & vesperi superbibendo dosin Liquoris appropriati.

En formam pulveris.

℞. *Rad. Serpentar. Virg.*  
*Contraieru. aa* ʒjß.  
*Corall. ppt. Margarit.*  
*Succin. alb. aa* ʒj.  
 M. F. Pulvis.  
 Dos. a ʒj ad ʒß.

Scf Nul-



Chalybeatis.

Nulla autem ad tenacitatem emendandam commodior est via, quam si in usum vocentur medicamenta chalybeata. Chalybeata hic cæteris palmam præripiunt. Utilis est *pulvis Cachecticus Quercetani*, cujus hæc est descriptio:

℞. *Limatur Chalyb.* in tenuissimum alcohol, per simplicem aquam redactæ, vel cum *Sulph. calcin.* ut artis est. ʒj.

*Fæcul. Rad. Aron.* ʒiʒ.

*Ambra grysea.* ʒiʒ. Malim multo minorem quantitatem, vel omissionem, substituendo

*Rad. Angelic.* ʒiʒ.

*Essent. Corall.*

*Margarit. aa* ʒij.

*Succin. ppt.*

*Cinnamom. aa* ʒiv.

*Sacchar. q. s.* ut F. Pulvis, gustui gratus.

Verum non est necesse, sese huic adstringere formulæ, dummodo medicamenti basis sit *Chalybs* reliqua, circumstantiarum habitâ ratione, immutari possunt.

℞. *Chalyb. cum Sulph. ppt.* ʒj.

*Sem. Apii.* ʒiʒ.

*Flaved. Cort. Arant.*

*Rad. Calam. aromat. aa* ʒj.

*Macis* ʒʒ.

F. Pulvis. Dos. à ʒʒ ad ʒj & ultra.

Quomodo  
ventriculus  
roborandus?

Quomodo ventriculus sit roborandus non est hujus loci fusè explicare, sufficit monuisse, illud quoque peragi medicamentis vel chalybeatis vel aromaticis, qualis est pulvis itidem à *Quercetano* præscriptus:

℞. *Rad. Aron. ppt. ut docebitur.* ʒij.

*Pulv. rad. Acori*

*Pimpinella aa* ʒi.

*Ocul. Cancr.* ʒʒ.

*Cinnamom.* ʒiij.

*Sal. Absinth.*

*Junip. aa* ʒi.

*Sacchar. q. s.* ut. F. Pulvis. gustui gratus.

Quan-



Quandoquidem morbus hic est flatulentus, discussioni eorundem omninò incumbendum est, quod quidem variis modis fieri potest: Enematibus, Carminativis, Opiatis. Profunt Enemata è carminativis, & intestina ad excretionem stimulantibus composita: habent locum ubi alvus est adstricta, aut fæces alvinæ induratae. Ita non tantum saburra, in crassioribus hærens intestinis, exhauritur sine ventriculi perturbatione, sed & intestina tenuia foventur, imo hoc pacto flatus una cum excrementis alliciuntur. Sequens formula est *Timæi à Guldenthe.*

Flatus discutiendi.  
Enematibus

℞. *Herb. Artemis. Puleg. Ruta*

*Majoran. Betonic. aa m. ℞.*

*Flor. Chamam. Tilia, Lavend. aa p. ij.*

*Rad. Lilior. alb. Ireos. Pœon. aa ℥℞.*

*Sem. Ruta, Dauci, Anisi, Carni. aa ℥j.*

Incis. & conquassata Coq. ex f. q. aq. simpl.

℞. Colat. ℥x. Elect. Diacarthar.

*Benedict. laxativ. aa ℥℞.*

*Spec. Hiera f. ℥i℞.*

*Sal. Gemm. ℥j.*

M. F. Enema.

Clysteres habent quoque *Feineus* in praxi, & alii. *Riverius* in observationibus refert mulierem 20 annos natam, injecto clystere ex *Oxyrato* statim fuisse liberatam, adeo ut aliis medicamentis non indiguerit. l. i. i. obs. 82. Vide quoque obs. 22. c. iii.

Carminativa, cum flatus discutiendi facultate polleant, hic non sunt negligenda. Non est necesse horum contexere catalogum, cum tales plures existent. Formulas aliquas tantum subjiciam. Sequentem mixturam *Fr. Dekkers* sese sæpius cum optimo successu usurpasse testatur.

Carminativis.

℞. *Aq. Antihyster. nostr. ℥ij.*

(Ex *Fol. Puleg. Menth. Ruta aa m. ij.*

*Flor. Lavend. p. ij.*

*Sem. Levist. Baccar. Lauri. aa ℥℞.*

*Myrrha ℥ij. Nucis Moscat. ℥j.*

*Vini Gallic. p. iij.*

M.

Sff 2

Post



Post brevem in calore infusionem destillantur per *Balneum Mariae*.)

*Cort. Citri.* ℥j.  
*Theriacal. s.* ʒvj.  
*Sp. Sal. Armon.* ℥j.  
*Tinctur. Castor.* ʒj.  
*Ol. Succin. g.* iv.  
*Syr. Artemis.* ʒvj.  
 M.

Huic mixturæ non admodum dissimilis est sequens *Willisii*:

℞. *Aq. Artemis. Puleg.* aa ℥ss.  
*Hyster.* ʒiv.  
*Tinctur. Castor.* ʒss.  
*Syr. à Coralliis* ʒjss.  
 M.

Interim quemadmodum superius monui de medicamentis naribus admovendis, ea non debere esse nimis efficacia, ita etiam sæpe contingit ægram non ferre assumptionem medicamentorum nimis potentium: vel si exhibeantur, pejus habere. Ita ego aliquando vocatus fui ad virginem xx circiter annorum, quam amici nesciebant, an paroxysmis hystericis an Epilepticis esset divexata? Cum autem ego & constitutionem ægrotæ, & medicamenti formulam, quam ab alio medico præscriptam, in promptu habebant, examinarem, vidi simul juncta esse quidem medicamenta selecta, & eximia, verum non satis proportionata temperamento ægrotæ, id quod Pharmacopœus quoque observaverat; indico igitur, medicamentum esse nimis potens, si utatur temperatioribus eam facile recuperaturam pristinam sanitatem. Talia præscripsi ego, & res ex voto successit. Id quod hic circa affectus hystericos moneo, in pluribus affectibus tum convulsivis, tum aliis locum habet.

Flatibus discutiendis possunt quoque inservire pilulæ à *Petro Paschequo* optimo cum successu præscriptæ. Vid. *River. Append. obs. x.*

℞. *Assæ fœtid.* ʒij.  
*Castor. Facul. Bryon.* aa ʒj.  
*Sem. Ruta* ℥j.

*Cro-*



Croc. ʒß.

Laudan. Paracels. gr. viij.

Cum Syr. Artemis. F. Massa, de qua capiat ʒj.

Ad Flatuum discussionem inserviunt quoque Opiata, hic ex-  
mii usus. Habet hoc affectus hystericus, quod ab Opiatis  
non lædatur, sed potius juvamen aliquod percipiat, cum ea-  
dem in quibusdam Convulsionibus non parum noceant. Hu-  
jus rei plures sunt rationes. Opiata molestam distensionem  
intestinatorum, hujus affectus vel causam vel comitem sedant: opiata  
somnia blandum alliciunt, qui hic tanto majoris est usus,  
quoniam à vigiliis ægrotæ plurimum lædi solent. Opiata ani-  
mi passiones sedant. Opiata sudores promovent. Quid? quod  
hic prava cerebri dispositio absit, quæ in Morbo caduco ad-  
esse solet? Ego testari possum me ab usu *Mithridatii Damocr.*  
nec non *Philon. Rom.* &c. vidisse ægrotos meos non parum adjutos  
esse. Profunt ergo *Laudanum Opiatum*, *Opiata ordinaria*, *Athana-*  
*sia*, *Orvietanum*, *Diascordium novum* &c. de quibus in præceden-  
tibus est actum. Vide *Riverium Obs. II. Cent. II. & 85. IV.*

℞. Aq. Puleg. Meliss. aa ʒij.

Theriacal. min. ʒj.

Athanas. nostr. ʒj.

Sal. Volat. ol. g. xx.

M.

Externè potest usurpari Emplastrum hystericum, à *Nic. Che-*  
*neau* præscriptum.

℞. Galb. in vino albo dissolut. ʒß.

Ass. foetid. ʒij.

Fæcul. Bryon. ʒß.

Ol. Gagat. ʒj.

Ruta. ʒij.

Ceræ q. s. ut F. Emplastrum. De Carne Lupi vide  
*Riverium Obs. 31. I. II.*

Animi pathemata quomodo sedanda sint, non semel in an-  
tecedentibus explicatum est. Jungenda sunt, in hoc casu, me-  
dicamenta antihysterica, opiatum blandioribus, vel parva quan-  
titate usurpatis.

Diximus in superioribus Epilepsiam hystericam esse Idio-  
Sff 3 pa-  
Cura differe-  
rentiarum.



pathicam & sympathicam. Quæ hætenus dicta sunt potissimum spectant Idiopathicam, quamvis ea quæ monui de medicamentis valdè efficacibus vitandis, in utraque specie obtineant. Accedendum jam est ad Epilepsiam sympathicam, & quidem eam præcipuè, quæ à febribus habet originem. Nempe si foemina, muniis suis quotidianis fungens, Epilepsiâ hystericâ non semel infestetur, non est mirum si ea, in febrem incidens, frequentioribus, gravioribus & periculosioribus torqueatur paroxysmis. Est hæc Epilepsiæ species etiam à repletione potissimum deducenda. Si autem repletio obtineat ubi febris abest, ubi circulatio moderatè peragitur, ea necessariò multo erit major, ubi febrilis orgasmus, cum pressione majori conjunctus, vasa universa nimium distenderit. Si flatus infimi ventris viscera multum expanderint, ubi agitatio febrilis aberat, quanto magis hi infestabunt, ubi liquores glandularum præ æstu reddit magis viscosi, ab eodem magis expanduntur? Si spirituum agitatio nimia, molestam cordis commotionem, ventris spasmos, faucium angustiam produxerit in statu sano, quanto magis ea difficiliora producet symptomata, ubi sanguis agitated est, & ab ordinaria crasi defecit? Itaque hic V. S. adhuc magis est necessaria, quam si febris absit: major etiam, cæteris paribus, requiritur sanguinis evacuatio. Deinde purgatio, aut vomitus hic itidem requiritur, uti in reliquis febribus. Quemadmodum autem, ubi febris abest, medicamenta amaricantia & calidiora, benè audiunt, ita in febre requiruntur temperatiora, haustus formâ potius, quam pilularum præscripta. Non malè etiam aliquando laxantibus & purgantibus miscentur anodyna, vel opiata, ut scilicet distensiones molestæ aliquomodo cohibeantur.

Ex. gr.

℞. *Elect. Panchymagog.* ʒijss.

*Sal. Absinth.* ʒss.

*Laud. op.* gr. j.

*Aq. Puleg.* q. s.

M. F. Haustus. Opiata purgantibus quoque addidit.

*Claudinus Emp. rat. l. iii. c. 7.*  
Visciditas hic quoque emendanda, sed medicamentis temperatis & sanguinem diluentibus ex. gr. *Cichoraceis, Soncho, Agri-*



DE EPILEPSIA HYPOCHONDRIACA. CAP. XVIII. 511

*Agrimonia* &c. *Amaricantia* in hoc casu dulcibus & gratis longè sunt potiora. Convenit *Succus Taraxaci* expressus, ut & decocta varia.

℞. *Rad. Lapathi acuti.* ℥j.

*Fol. Taraxaci cum toto.* m. ij.

*Agrimon.* m. j.

Coq. s. a. ex aq. pura ad ℔ij. Add.

*Liquor. Tartar.* ℥ss.

M.

Si menses sint promovendi, oportet ut illud quoque fiat temperationibus, etenim magis efficacia in usum vocando, non tam promoventur quam impediuntur menses. Conveniunt *Borax Veneta*, *Oculi Cancræ* &c.

Id quod de mensibus dixi, etiam locum habet circa discussionem flatuum; etenim humorum visciditas hic ab exsiccatione, & minori secretionem liquorum è glandulis prodeuntium ortum habet. Si ægra sit debilis, Enemata profunt.

Animi pathemata sedantur anodynis & opiatibus. Ea non tantum purgantibus, sed & alterantibus commodissimè admiscuntur. Opiata hic ideo optimè conveniunt, quod sudores promoveant, quorum eruptio hic utilissima. Cætera ex iis quæ de Epilepsia febrili dicta sunt, peti possunt.

CAPUT DECIMUM OCTAVUM.

*De Epilepsiâ Hypochondriacâ.*

**A**Nsam huic tractationi quoque suppeditavit *Willisus*, & quam in antecedentibus proposui, tabula. *Willisus* post passionem hystericas, inter affectus spasmodicos agit de Affectione hypochondriaca, & fusè in lienis usum inquit. Ego in parvâ tabellâ omnes convulsionum species oculis subicere conatus, non potui non meminisci Epilepsiæ hypochondriacæ.

Ante omnia tenendum est, affectionem hysterica & hypochondriacam non differre essentiâ, sed plane eundem esse affectum. Differunt inter se nomenclaturâ, subjecto, gradibus.

Tractationis  
hujus occasio.

Affectionis  
hystericæ &  
hypochondriacæ  
convenientia.

No-



Nomenclatura alia ab utero, alia ab hypochondriis derivata est utriusque tamen symptomata sunt, distensiones hypochondriorum molestæ, anxietates circa præcordia, faucium angustia.

Subjectum affectionis hystericae propriè sunt fœminæ, quandoquidem utero mares destituuntur, hypochondriis uterque gaudet sexus, verum non solet dici affectus hypochondriacus, quando fœminas affligit, sed uterinus: è contrario quando mares infestat, non potest dici uterinus, sed tantum hypochondriacus. Differunt gradibus, quandoquidem ea structura partium in fœminis occurrit, quæ majorem sanguinis & spirituum impetum versus infimum ventrem allicit, unde etiam harum symptomata solent esse graviora, quam quæ in maribus observantur. Quemadmodum autem vertigo, Lethargus, Coma, Phrenitis, Apoplexia, Catalepsis, non sunt alii affectus, quando mares & quando fœminas afficiunt, ita etiam idem de affectione hysterica, & hypochondriaca statuendum est, quamvis hæ diversis gaudeant appellationibus. Cum autem utriusque affectus eadem sint causæ, eadem symptomata, eadem curandi Methodus, uti videbimus, utilissimum est, eundem utriusque formare conceptum generalem, non neglecto discrimine quod respectu sexus & graduum intercedit. Quemadmodum enim oportet, distinctos affectus accuratè distinguere, ita non minus necessarium est, ostendere convenientiam, quæ intercedit inter symptomata, diversis appellationibus insignita. Diversa nomenclatura scriptores in errorem deduxit.

Eadem res  
pluribus ap-  
pellatur no-  
minibus.

Itaque hic in memoriam revocandum est id, quod, in materiâ de sensorio communi, fusius disputavi: non rarò contingere eandem rem pluribus appellari nominibus, pro diversa relatione, quæ menti repræsentari potest, pro diverso considerandi modo. Leo potest dici ζῶον, θηρίον, θῆρ, λέων, τετράπῃς. Manifestum est has appellationes diversa gaudere significatione, diversa etymologiâ, vel à vita, vel à currendo, vel ab erumpendo, aut celeriter irruendo, ut *Hesychio* placet, aut quod visu valeat, aut quod quatuor sit instructus pedibus. Non aliam quoque dico feram, quando eum regem appello animalium. Verum quisque caveat oportet, ne diversa eum seducat denominatio. Ad legitimam enim interpretationem  
& ju-



& iudicium formandum pertinet hæc regula utilissima, *ne quis se vocabulorum multitudine, aut ambiguitate, in errorem deduci patiatur.* Hisce jam non immoror. Sufficit observasse, eandem esse rationem Affectionis hystericae, & hypochondriacæ. Ne autem frustra hæc dixisse videar, evincam eundem esse morbum, eadem utriusque symptomata, eadem signa, eandem curandi methodum. Gradu differunt, non differunt specie.

Dixi hystericam affectionem & hypochondriacam eundem esse morbum. Hoc ex eo evincitur, quod varii Auctores affectionis hypochondriacæ nullam fecerint mentionem. Exempli loco sit *Forestus*, qui in Observationibus nullum affert Affectionis hypochondriacæ exemplum: unde concludo, ipsum tales ægrotorum historias ad alium morbum retulisse, atque adeo iudicasse, hoc nomine morbum ab aliis distinctum non dari. *Riverius* etiam nullam Affectionis hypochondriacæ proponit descriptionem, sed tantum Melancholiæ hypochondriacæ. Superiori seculo imprimis increbuit tractatio de hac affectione: sive quod *Willisus* de ea fusè egerit, sive quod *Franciscus de le Boe Sylvius* & ejus sequaces, pluribus huic tractationi incubuerint. Et *Sylvio* hoc symptoma quidem arrisisse non est mirum, cum imprimis videretur facere ad confirmationem suæ hypotheseos. Nempe cum à succi pancreatici, variis modis vitiiati, atque ab hujus cum bile effervescentiâ, non tantum infimi, sed & medii, & supremi ventris deduceret morbos, speciosum erat, affectionis, cujus symptomata erant molesta hypochondriorum distensio & flatus, non perfunctoriè meminisci. Quandoquidem enim symptomata eò loci sese exferrent, ubi commodior causa non reperiretur alia, quam vitiosa hæc effervescentia, hinc poterat peti argumentum confirmans humorum triumviratum. Verum ea ipsa tractatio evincit illud quod statim proposui, non aliam esse affectionem hystericam quam hypochondriacam. Expendamus accuratè, quæ Vir ingeniosus tradidit, & evadet manifestum, eum tam amplam hujus morbi proposuisse symptomatum sylvam, ut sub hoc nomine non tantum affectio hysterica & hypochondriaca comprehendatur, sed & scorbutus; pleraque enim, quæ Scorbutum comitantur phænomena recenset. Itaque

Probatur affectionem  
hystericam  
& hypochondriacam  
esse eandem



non alia est utraque affectio, juxta *Sylvium*, sed eadem: hypochondriaca affectio est appellatio generalis, complectitur suo ambitu & affectionem hysterica, & hypochondriacam in specie. Eodem modo *Philippus Hochstetterus* videtur usus vocabulo Hypochondriacæ affectionis, quandoquidem Hypochondriacam vocat Virginem, quam postea dicit interdum quidpiam sensisse hysterici. Decad. v. Cas. 3. inscripsit hoc modo: *Hypochondriaca flatuosa cum macie corporis*. Vid. pag. 570, 573. &c. Si Virgo quæ aliquid sensit hysterici, quæ affectu flatuoso fuit vexata, dicenda fuit hypochondriaca, juxta *Hochstetterum*, quam alii fortè appellâssent hysterica, non alius est affectus hypochondriacus quam hysterica; sunt hæc vocabula duo, synonyma.

Ambæ istæ  
dem sunt  
stipata symptomatibus.

Evici, nisi fallor, eandem esse affectionem, evincendum porro est, eadem esse utriusque symptomata. Id apparet tum è *Sylvio*, tum etiam *Willisio*. In utraque specie ventris inferioris viscera afficiuntur, flatuum copia, rugitus, vomendi conatus, hypochondriorum distensio & murmur, respiratio difficilis, in thorace magna constrictio, vertigo, spasmi vexant. In hoc præcipuè videtur consistere differentia, quod globi cujusdam veluti adscendentis sensus proponatur in hysterica affectione, cum in hypochondriaca tantum statuatur flatuum proventus ingens, in thorace constrictio magna, cum angustia. Verum non multum differunt hæc inter se, & originem habent è vulgi præjudicio, adscendentis scilicet uteri, cujus vestigia passim in medicorum scriptis exstant. Adeo difficile est præjudicatam & inveteratam opinionem deponere, ac plane exuere. In eo tamen laudandus *Willisius*, quod rectissimè animadverterit, affectionem hysterica etiam viros infestare, cujus rei exemplum proposuit. Idem ego & alii observarunt practici. *Philippus Hochstetterus* Decad. iv. cas. 4. hunc fecit titulum. Aphonia cum convulsivis motibus in adolescente. p. 389. refert nono die vocem rediisse, ægrum affirmasse è faucibus aliquid decidisse ad inferiora. p. 391. meminit gesticulationum, quæ hysterica vitia saperent. p. 397. dicit hysterics technis similia accidere, tuasisse usum Theriaca. In sequentibus adhuc testimonium *Zacuti Lusitani* adducam. Non quod utero in viris possit adscribi angustia faucium, sed quod eadem illa angustia, quæ in mulieribus



bus observatur, etiam in viris non desit. Potestne ergo illustrior requiri confirmatio sententiæ, à me propositæ, non alia esse symptomata hypochondriaca, quam hysterica?

Eadem quoque esse signa utriusque affectus hoc modo evincitur. Morbus ex effectis cognoscitur. Eadem illa, quæ respectu morbi sunt symptomata, in sensus incurrentia, etiam sunt signa, quandoquidem ex illis latens morbus dignoscitur. Symptomata & signa considerandi modo tantum differunt. Itaque ubi eadem occurrunt symptomata, eadem etiam sunt signa.

Iisdem gaudent signis.

Curatio quoque est eadem. Quamvis enim menses moventia in maribus locum non habeant, tamen illa ipsa, quæ huic negotio inserviunt, nempe chalybeata, hic primas quoque obtinent. Eadem præscribuntur, eadem proponuntur, verum sub aliâ relatione, alio nomine. Chalybeata in maribus non sunt menses moventia, sed sanguinis vigorem, ventriculi robur restituentia. Chalybeata lentorem sanguinis, aciditatem succi pancreatici emendant. Chalybeata etiam additis appropriatis flatus egregiè discutunt. Eadem est quoque reliquorum medicamentorum & remediorum ratio.

Curatione.

Dixi me è *Zacuto Lusitano* confirmaturum meam sententiam, id quod paucis absolvam, non libet enim spurcis narratiunculis immorari. Is diversas proponit relationes è *Galeno*, & *Histor. 9. l. III. de M. P. H.* hunc fecit titulum. *Uteri strangulatio, & alia seivissima symptomata in viris ex veneris abstinencia sequuntur.* Hinc concludo, quoniam affectio hypochondriaca & hysterica in eo tantum differunt, quod affectio hysterica proprie viris ob uteri defectum, tribui non possit, si tamen eadem symptomata medicos, præjudiciis occæcatos, impulerint, ut etiam symptomata uterina viris tribuerint, ob manifestam convenientiam, non alius est affectus hystericus, quam hypochondriacus.

Zacuti Lusitani testimonium.

Non opus est jam multis explicare unde ortum fuerit hos duos affectus distinguendi præjudicium, cum hætenus tractare has affectiones non potuerimus, quin simul præjudicium illud tangeremus. Antiquorum oculi in explicanda affectione hysterica præcipue uterum respexerunt, hunc sexum foemineum imprimis exagitare sibi persuaserunt, ita tamen ut symptomatum

Præjudicii origo.



evidentia eos coegerit etiam viris eandem tribuere affectionem: Recentiores observarunt nomenclaturam ab utero esse desumptam, cum tamen uterus non adscenderet, nec suffocationis esset causa: Viros itidem similibus infestari symptomatibus. Alia ergo excogitanda fuit denominatio. Nomenclatura affectionis hypochondriacæ arrisit. Haftenus bene! Monendum erat distinctè, has affectiones inter se convenire. Non sunt multiplicanda entia absque necessitate. Ut autem sententia mea facilius assensum extorqueat, non inutile erit egregia *Walsmidii* adscribere verba: *Hic affectus nomen sortitur ab urgentiori symptomate: quia metus suffocationis seu strangulationis deprehenditur. E. vocatur uteri suffocatio, vel passio hysterica, quia putant uterum potissimum pati. A recentioribus vocatur passio hypochondriaca, cum eadem symptomata occurrere soleant, quæ in hypochondriaca affectione. p. 708.*

Gradibus  
differunt.

Non est tamen negligendum, id quod antea monui, gradibus differre has affectiones quando juxta sexum distinguuntur. Nempe è structurâ partium, & majori versus infimum ventrem spirituum influxu in fœminis, è fluxu menstruorum, è laboribus partus in graviora incidunt fœminæ symptomata, quam viri. Quod si fœmina in Epilepsiam incidat symptomaticam ea dicetur vel per consensum uteri, vel hysterica. In maribus hæ distensiones intestinorum non solent esse adeo graves, sive ob structuram partium, sive ob vitæ genus exercitatione majori gaudere solitum, sive etiam ob sexum robustiorem. Deinde si vir Epilepsiâ corripiatur symptomaticâ, ea non ita facile hypochondriaca suffocatio, sed potius dicetur Epilepsia per consensum ventriculi, lienis, vel etiam Epilepsia à repletione.

Varia Epilepsiae hypochondriacæ nomina.

Quemadmodum ergo monui de affectione hypochondriacâ & hystericâ, eas convenire, ita itidem monendum est Epilepsiam hypochondriacam variis posse donari nominibus, quamvis revera sit eadem Epilepsiae species. Potest dici Epilepsia per consensum ventriculi, per consensum lienis, è repletionem &c. Et quidem Epilepsia per consensum ventriculi, quando quidem ventriculus in hoc casu officio suo non satis defungitur. Deinde quoniam ejus inflatio non tantum cum inflatione hypochondriorum conjungitur, sed & non ita facile distinguitur, ob loci viciniam. Quid? Quod.



Quod *Higminus* præcipuam affectionis hypochondriacæ causam in vitiosam ventriculi constitutionem retulerit? *Willisus* eatenus huic auctori consentit, ut ventriculum sæpe graviter laborare concedat. Per consensum lienis, quandoquidem hypochondriacæ affectiones lienis sunt tributæ, uti è *Willisio* patet, de qua opinione in sequentibus. Denique è repletionem, quandoquidem in repletionem ventriculus magis oneratur, deinde, quandoquidem ingluvies causa est distensionis intestinorum, & copiosioris flatuum proventus. Quid? Quod ingluviem non raro excipiat affectio hypochondriaca? In genere, omnis Epilepsia à repletionem cum molestâ distensione hypochondriorum, & symptomatibus hystericorum æmulis, rectè potest dici hypochondriaca. Dubitationi adhuc relinquitur locus, an Epilepsia hypochondriaca possit oriri ab inanitionem, quemadmodum illud in Hystericâ non est infrequens? Responsio non est difficilis: nempe evacuationes tam subitanæ, per vasa arteriæ magnæ descendentes, maribus non sunt solennes, per hæmorrhoides non sunt ita repentinæ, ut exinde in Epilepsiam incidat æger. Epilepsiæ igitur hæ non sunt aliæ, quam eæ de quibus in superioribus disputavimus, nempe ab hæmorrhagiâ ortum ducentes. Mutant itaque nomen hi insultus, quamvis non malè possint statui ad hanc etiam speciem pertinere, quando nempe hypochondriacus nimiam corripitur hæmorrhagia, atque ante insultum Epilepticum apparent symptomata eadem, quæ in hypochondriacis observari solent. Posset etiam Epilepsia hypochondriaca aliquomodo statui ab inanitionem originem habere, quando in debilibus ab affectu hypochondriaco oritur lypothymia, & quando lypothymiam sequitur Epilepsia symptomatica. Potest huc quoque referri Epilepsia pedissequa purgationum de qua in differentiis. Hæc comparatio Epilepsiarum, earumque distributio in suas classes, ad feliciter & judiciosè praxin exercendam, alicujus mihi videtur momenti.

Dicat fortasse aliquis: facis tu quidem mentionem Epilepsiæ per consensum lienis, cujus ne quidem *Sennertus* aut *Fonstons*, qui fere se instar indicum habent, meminerunt. Respondeo; quamvis hi Auctores neglexisse videantur hanc Epilepsiæ per consensum speciem, meminerunt tamen ejus alii, adeoque ni-

Objectionis  
solutio.



hil hic suppono, quam id quod apud practicos etiam annotatum invenio. *Godefridus Stegheus* in *Artis medicæ* l. vii. c. 3. p. m. 320. affirmat: *frequenter ex jecore, liene, ventriculo, partibus inferioribus, quando aut proprio vitio, aut per ciborum pravitate, noxios humores collegerunt excitari Epilepsiam.* En Epilepsias è jecore, liene, & ventriculo simul traditas! En omnes Epilepsias à repletionem, quia dicuntur hæ partes *noxium humorem collegisse!* Eadem pagina dicit: *Epilepsiam à liene esse satis frequentem à succo melancholico &c.* p. 323. commendat evacuationem per alvum & vicina: *quando ex ventre, pancreate, mesenterio, locisque contiguis, ubi multa plerumque humorum excrementitiorum est congeries, originem habet Epilepsia.* En auctorem ante detectum pancreatis usum, tamen ejus facientem mentionem! En iterum Epilepsiam à repletionem, ex humorum excrementitiorum congeries. *Lazarus Riverius* ea proponit signa, quæ satis superque evincunt, Epilepsiam ab hepate & liene per consensum; non esse aliam, quam eam quæ jam sub nomine Epilepsiæ hypochondriacæ descripta est. Hæc sunt ejus verba: l. i. c. 7. *Ab hepate, vel liene malum oriri, significant flatuum frequens & copiosa excretio, ventris inflatio, rugitus, borborygmi, ructus acidus, precordiorum molesta coarctatio, eorumque dolor ad dorsum usque interdum procedens. Quibus addere licet vitia peculiarem ventris inferioris partem obsidentia.* Viden' me rectè, & convenientur antiquorum loquendi modis, Epilepsiam hypochondriacam dixisse Epilepsiam per consensum lienis? Viden' eam quoque posse dici per consensum pancreatis, hepatis & mesenterii? Viden' eadem signa horum affectuum, quæ in Affectione hypochondriacâ quoque obtinent? Viden' illos per nebulam vidisse à repletionem esse deducendas omnes has Epilepsiæ species? In eo fuerunt decepti, quod humores, versus intestina secretos, putarent excrementitios. Quod lienem focum statuerent succi melancholici. Quod vapores considerarent hinc versus cerebrum elevatos. Quod commotionis sanguinis, quod nervorum intercostalium, diaphragmatis, aut octavi paris non meminerint. Quod motum sanguinis, quod repletionem arteriarum carotidum non consideraverint. Revera copiâ peccant humores à sanguine secreti, quando sanguis abundat, quia secretio humorum ordinarie



narie sanguinis copiae & crassi est proportionata. Peccant non raro etiam vel visciditate, vel acrimonia, verum Epilepsia tum demum producit, quando spiritus animales, quando sanguis, quando cerebrum in consensum trahitur, eo quo explicatum est modo.

Ut autem appareat Epilepsiam hysterica & hypochondriacam eundem esse affectum, oportet considerare convulsiones in hoc casu non habere originem à partibus solidis, sed à fluidis, à repletionem, à flatibus, à vitiatis versus intestina confluentibus humoribus, à nimia repletionem arteriarum carotidum, à spirituum animalium turbulento motu. Quandoquidem autem de hisce in superioribus est actum sufficienter, hic tantum monendum est, utrum non transmittere vapores ad cerebrum, nec nervis suppeditare particulas spasmodicas ad cerebrum deferendas, sed, vel defectu evacuationum ordinariarum, sanguinis copiam nimium augere, tenaciorem reddere, atque debilitare: vel nimia excretionem universum corpus exhaustire, & vires frangere. Hypochondria itidem, quatenus tensionem nimia sanguinis motui officiunt, atque dolores, anxietatesque producant, sanguinis & spirituum motum ordinarium pervertunt. Possem eodem modo respectu ventriculi, pancreatis, hepatis demonstrare, partes non tam solidas quam fluidas debere considerari, respectu Epilepsiarum, hinc ortum ducentium, nisi res videretur manifesta. Quod si tamen vitium partium solidarum conjungatur, id quod fieri potest, tanto facilius succedet Epilepsia, praecipue si dolor exquisitus accesserit.

Placuit *Willisio* in tractatione de Affectione hypochondriaca copiose agere de liene, illiusque vasis, & usu. Ego paucis hæc absolvam. *Willisus* agit de hisce affectibus, tanquam à partibus solidis originem ducentibus, atque longo intervallo à se mutuo remotis, cum ego putem me evicisse in superioribus, nomina & gradus differre, affectus ipsos convenire. Lien in hoc casu non magis est culpandus, quam ventriculus, hepar aut pancreas. Neque etiam particulæ atrabiliaræ in liene turgescunt sponte, vel à causa evidenti commoventur, nec nervos subeunt, aut spiritus animales, ibi scaturientes in explosiones adigunt &c. Pullulant hi errores è duplici fonte, altero quidem è præjudicio veterum, lienem focum melancholiæ &

Ulterior  
confirmatio

*Willisii* sententia.



& atræ bilis statuentium, altero proprio *Willisii*, ab explosione spirituum animalium motum convulsivum deducunt. Utriusque hujus opinionis error, ex iis quæ dicta sunt, & quæ adhuc dicenda restant, apparet, atque ulterius apparebit. Mirum sanè Virum curiosum non vidisse, falsis & non demonstratis principiis totum hoc innixum ædificium, levi impulsu ruinam minari. Ipsa refert se in dissectione cadaveris lienem & alia viscera sine culpâ invenisse. p. m. 182.

Lienis Usus.

Longè nobilior est lienis usus, qui non è præjudicio, sed è vasis, & structura erui debet. Caret lien vase excretorio, gaudet arteriis conspicuis, sanguinem ab arteriis receptum iterum in venæ portæ ramificationes effundit, ad truncum, atque ita porro ad hepar deferendum. Usus ergo ejus est, instar vasis chymici circulatorii sanguinem exaltare, ejusdem motum intestinum intendere, fortè etiam fluidorem reddere, ut facilius versus hepar propelli, minimos ejus tubulos promptè pertransire, ac, cum miscellâ ab intestinis, ventriculo &c. reflua, bilis secretioni inservire possit. Observarunt jamdudum Practici lienem sæpe immeritò culpâ, verum non libet testimoniis corradendis bonum otium contere. Producam tantum testimonium ejus, quem antea laudavi, *Philippi Hochstetteri*, idque eo libentius, quandoquidem vixit illo sæculo, in quo præjudicium de liene, foco melancholiæ, adhuc obtinebat. In Decad. v. Cas. 1. hunc in modum locutus est. *Focum cause morbida in hypochondriis latere audax pronunciavi; non quidem ex nobili lienis viscere, tot arteriis aurâ vitali prægnantibus dotato, ut quidem imperitarum muliercularum garritus susurrat, & nonnulli somniant Medici; hinc fabula illa narratur toti notissima terra, peccata hypochondrii innocui lieni adfricari. Non potest hoc nobile viscus, pluribus beatum arteriis, tenuissimis condecoratum vasis, vitali multum calore gaudens, non eam infamiae subterfugere notam, ut non audiret fœculenta saburra, & flatuum nocentium, distendentium rugientiumque hospitium esse. & quæ sequuntur plura, lectu dignissima.*

Quare separatim de affectu hysterico, & hypochondriaco agendum

Quamvis autem huc usque docuerim hystericam & hypochondriacam affectionem esse eandem; quamvis ostenderim tractationem uberiores de liene hic esse minus necessariam, quandoquidem hoc viscus sæpe immerito culpatur, non credidi



di tamen inutile si distinctis capitibus de utroque agerem affectu. Conscribitur praxis potissimum in gratiam juniorum, & ægrotantium utilitatem: itaque si occurrat æger, quem minus expertus credit esse, vel hystericâ passione, vel hypochondriaca affectum, statim quæret caput hunc præferens titulum, si non inveniatur, putabit auctorem nihil de eo conscripsisse affectu, nec ulterius investigabit: itaque præstat bis eadem scribere & proximo prodesse, quam sciendi & ægrotis opem ferendi cupidum destituere. Deinde cum jam invaluerit mos de hisce affectibus separatim agendi, ita ambo tractentur, ut appareat eundem esse affectum. Non tractetur in altero de spirituum dyscrasia, in altero de liene, & sanguinis vitio. Sunt plures morbi qui cognatione quadam inter se conjunguntur, Apoplexia & Carus, Phrenitis & Coma vigil, Coma somnolentum & Lethargus, nemo tamen facile dixerit inutile esse de hisce singulatim agere. Quinimo oportet, non obiter, sed pluribus ostendere, eundem debere formari conceptum generalem.

Est ergo Affectio hypochondrica *molesta hypochondriorum distensio, cum anxietatibus circa præcordia, aliquando faucium insigni angustia, & convulsionibus intestinorum atque artuum.*

Descriptio  
affectio-  
nis  
hypochon-  
driacæ.

Vides descriptionem planè similem descriptioni passionis hystericæ, nisi quod hic primo meminerim distensionis hypochondriorum, quod à me factum est, partim ut denominationis rationem explicarem, partim ut ostenderem angustiam faucium non semper esse æque gravem. Deinde ubi plura sunt enumeranda symptomata satis molesta, diversus ordo non mutat affectum. Est hic aliqua libertas, & latitudo, pro diverso concipiendi modo. Feci tamen mentionem angustiae faucium, nec non convulsionum, uti illud etiam in Affectu hystérico actum est. Non expressi subjectum hujus affectionis, quandoquidem affectio hypochondriaca considerata tanquam levior species hystericæ, potest etiam foeminis tribui. Si quis tamen velit ad distinctionem utriusque affectus, hujus subjectum debere statui mares, prioris foeminas, atque utriusque esse aliquam latitudinem, ei non repugnabo.

Ea explica-  
tur.

Epilepsia hypochondriaca *est artuum vehemens convulsio symptomatologica, cum infimi ventris viscerum inflatione, & majori vel mi-*

Descriptio  
Epilepsiae  
hypochon-  
driacæ.



*nori mentis obnubilatione, ab affectu hypochondrico ortum ducens, vel saltem cum illo copulata.*

Ea explicatur.

Vides descriptionem Epilepsiæ hypochondriacæ, re ipsâ convenientem cum descriptione Epilepsiæ hysteriæ, adeo ut explicatio ex iis, quæ præcedenti capite disputavi, satis fiat manifesta. Reddenda tantum est ratio, quare in fine addiderim, Epilepsiam hanc cum Affectu hypochondriaco esse copulatam. Id ideo factum est, ut ostenderem Epilepsias, quæ alio insigniuntur nomine, quamvis ad hanc speciem pertineant, ex eo cognosci huc spectare, quod cadant in homines symptomatibus hypochondriacis vexatos, quemadmodum non rarò apud auctores practicos videre est, iudicium fieri de affectu lienoso, ex eo quod æger sit taciturnus, & ad mæstitiam pronus. Epilepsia post colicam, cum multis gravibus symptomatibus, cuius meminit *Gabelchoverus* Curat. 95. Cent. 1. potest non incommode referri ad Epilepsiam hypochondriacam, nisi malis eam ad Epilepsiam pedissequam doloris reducere, vel febrilem, vel per consensum ventriculi, vel e repletione. Victus errores, & varia symptomata, nomenclaturam reddunt ambiguam.

Causæ.

Causæ sunt eædem quæ hysteriæ, sanguinis copia, visciditas, seu minor vigor, consuetarum hæmorrhagiarum suppressio, nimia sanguinis evacuatio, flatuum copiosus proventus, denique animi pathemata.

De suppressione hæmorrhagiæ consuetæ, & fluxus hæmorrhoidum.

Quandoquidem de hisce omnibus superiori capite pluribus est actum, sufficiet observâsse, me loco suppressionis menstruum hic substituisse suppressionem consuetarum hæmorrhagiarum. Nempe si affectus hystericus foeminis, hypochondriacus maribus tribuatur, in hoc, loco suppressionis menstruum, debent substitui hæmorrhagiæ ordinaria suppressæ. Nempe ad evacuationem nimiam repletionis naturæ sæpissimè exitum p. n. invenit. Ita non rarò excitatur, vel hæmorrhagia narium, vel fluxus hæmorrhoidum copiosus. Ubi hæ evacuationes solitæ supprimuntur, mares non minus e repletionem laborare possunt, quam foeminæ ubi menses, vel lochia cessant. Hæmorrhagia narium si deficiat, corpus in universum repletur, unde sanguinis visciditas nimia ortum ducit.

Ea-



Eadem est ratio fluxus hæmorrhoidum suppressi, producentis itidem majorem copiam & visciditatem sanguinis. Non quod hac viâ excernatur sanguis fœculentus, sed quod copia nimia corpus gravet, & visciditatis causa sit. Præjudicium illud Veterum originem habuit ab ignoratione circulationis sanguinis, & quod venæ hæmorrhoidales propè lienem (quem credebant melancholiæ focum) originem fumerent. Post detectam autem circulationem sanguinis, notissimum est, hæc venas non convehere sanguinem versus intestinum rectum, sed eundem, per arterias advectum, revehere versus venam portæ. Quod si autem non vehant sanguinem à liene versus intestinum rectum, lien hac via sese à suis fœculentiis exonerare non poterit. Visciditas, quæ sequitur defectum excretionis oritur à copia, ob defectum sufficientis expansionis, quemadmodum idem illud in mensium defectu locum habet.

Quæ dixi de sanguinis evacuatione nimia, intelligi debent de ea quæ repente fit, alias enim dispositio quidem ad Epilepsiam hanc, non autem ipsa producet. Si verò evacuatio sit repentina, producentur quidem Epilepsiæ, sed mutant nomen. Nempe si vir è copiosiori jactura sanguinis conjiciatur in Epilepsiam, ille non facile dicetur corripitur Epilepsiâ hypochondriaca, sed Epilepsia ab inanitione, sive ab hæmorrhagia. Verum cum de hac Epilepsiæ specie in superioribus sit actum, non est necesse explicationi ulterius immorari. Sufficiet observasse, si symptomata hypochondriaca sint familiaria illi qui Epilepsia symptomata corripitur, suspicari fas esse hanc Epilepsiam rectè dici hypochondriacam. Verum de nomine non est de certandum, quando de re constat.

Cum autem hic & superiori capite explicuerim, quomodo idem affectus à causis contrariis originem ducat, apparet, quam attentè Medicus officio suo defungi, quam sedulo praxi incumbere debeat, ne in causa determinanda, & remediis administrandis, malè calculum ponat. Id facile posse contingere, mihi aliquando, cum duobus aliis medicis praxim exercenti, videre contigit. Matrona, alias satis vegeta, laborabat è nimio mensium fluxu, & diarrhæa copiosiore, uti postmodum repentinus obitus docuit. Institutus fuit sermo, non

De sanguinis  
evacuatione  
nimia.

Prudentia  
medici.



diu ante obitum, de V. S. instituenda, quæ tamen omiſſa eſt, cum ego Collegam monerem, atque in memoriam revocarem, fluxum menſtruum præceſſiſſe copioſum & continuatum. Ex eventu funeſto colligere licuit V. S. non potuiſſe non interitum accelerare.

Differentiæ.

Differentia eadem hic habet locum, cujus in ſuperiori capite memini. Alia ſc. eſt Idiopathica, alia, Sympathica. Si æger munia ſua quotidiana obeat, & tamen frequenter corripiatur Epilepſiis, cum inſigni inflatione ſiniſtri hypochondrii, & anxietatibus circa præcordia, ille non malè dicetur, laborare Epilepſiâ hypochondriacâ Idiopathicâ. Si vero quis in Febrem incidat, & è febre in convulſiones, ille poteſt dici correptus eſſe Epilepſiâ vel febrili, vel hypochondriacâ. Vel ſi cui hæ appellationes non arrideant, quandoquidem Epilepſia hypochondriaca propriè loquendo omnis eſt ſymptomatica, uti è tabulâ conſtat, is poterit dicere, Epilepſiam hypochondriacam vel ſolam, vel una cum febre infeſtare. Deinde alia eſt à repletionem, alia ab inanitione. Utraque poteſt donari variis appellationibus. De nominibus variis Epilepſiæ hypochondriacæ à repletionem vidimus. De Epilepſia ab inanitione ob hæmorrhagiam quoque vidimus. Verum ad Epilepſiam hypochondriacam ab inanitione non malè quoque poſſet referri Epilepſia pediffequa purgationis; in hoc enim caſu non tantum venter & inteſtina, adeoque hypochondria dolent, verum etiam à flatibus peſſimè mulctantur. Saltem ſi hæc ſymptomata hypochondriacum afficiant, nullum eſt dubium, quin poſſit optimo jure ad hanc ſpeciem referri.

Affectio ipſa hypochondriaca vel gravior eſt, vel levior. Quando gravior eſt, mutat nomen, uti vidimus, & dicitur vel Epilepſia vel Convulſio, quando levior eſt, vel tantum motibus convulſivis ſtipata, ſimpliciter dicitur affectio hypochondriaca, vel in fœminis hyſterica. Non debet hoc mirum videri, cum ſint morbi congeneres, cumque ſuperius è *Paulo Barbette* oſtenſum ſit, eundem affectum, diverſorum ſymptomatum reſpectu, diverſis poſſe inſigniri nominibus. Alia adhuc eſt differentia, quod ſit vel recens, vel inveterata. Alia, quod ſymptomata aliquando circa ventriculum, aliquando



do in intestinis, sint obvia. Alia anhelatione & respirationis difficultate, alia globo in faucibus, alia obnubilatione mentis atque convulsionibus, vel motibus convulsivis sese potissimum exerit.

Signorum in superioribus è *Riverio* est facta mentio. Libet ea porro è *Cardalucio* proponere: *Ab hepate verò vel liene primordium sagittari portendunt multi ructus acidi, flatuumque copia, borborygmi, ruptus & murmura HYPOCHONDRIORUM, præcordiorum tensio & coarctans molestia, concurrente simul respiratione difficili, & spiritus angustia non perenni, sed per vices exorbitante, aliaque, &c.*

Prognosis ita habet: omnis Epilepsia hypochondriaca est periculosa, quandoquidem est symptoma, morbum, à quo dependet, aggravans: Deinde quandoquidem functiones animales vel obnubilat, vel ad tempus tollit. Si differentia affectionis hystericae & hypochondriacae in eo statuatur consistere, quod hæc sit illius minor gradus, manifestum est, minorem gradum etiam minus inferre periculum. De Epilepsia hypochondriaca sola affligente, iudicium debet fieri, pro ratione causarum unde illa dependet: de ea specie quæ à febre ortum ducit, juxta naturam febris, quæ hanc produxit. Huc pertinet *Hipp. Aph. 73. l. IV. 'Οκόσοισιν ὑποχόνδρια μετέωρα διαβορβορίζοντα. ὁσφύος ἀλγύματ' ἐπιγενομένα, αἱ κοιλίαι τρεῖς καδυγραινόνται, ἢν μὴ φύσαι καταρράγέωσιν, ἢ ἔρξ πληθ' ἐπέλθῃ. ἐν πυρετοῖσι ἢ ταῦτα. item 26. II. Πυρετὸν ἐπὶ σπασμῶ βέλτιον γενέσθαι, ἢ σπασμὸν ἐπὶ πυρετῶ nec non 66. IV. ἐν τοῖσι πυρετοῖσι τοῖσιν ἐξέσιν οἱ σπασμοὶ ἢ οἱ περὶ τὰ σπλάγνα πόνοι ἰσχυροί, κακόν.* Quando Epilepsia hypochondrica nomen mutat, iudicium fieri debet secundum ea quæ antea de hisce fusius disputavimus. Non inutile est considerare ea quæ *Hippocrates* habet. *L. VII. Pop. s. VIII. §. 95. Spectant enim ad hanc Epilepsiæ, speciem. Οἱ μελαγχολικοὶ ἢ ἐπιληπτικοὶ εἰώθασιν γίνεσθαι ὡς ἐπιτοπολύ. ἢ οἱ ἐπίληπτοι, μελαγχολικοί. τῶν ἢ ἐκάτερον μᾶλλον γίνεται, ἐφ' ὁποῖα ἀνέψῃ τὸ αἷμα. ἢν μὲν ἐς τὸ αἷμα ἐπίληπτοι. εἰ ἢ ἐπὶ τὴν διαίνοιαν μελαγχολικοί.* Ad Epilepsiam ex inanitione spectant duo Aphorismi sequentes *3. V. 'Αἱματ' πολλὰ ρυέντ'. σπασμὸς ἢ λυγ-*

Prognosis.



μὸς ἐπιγενόμενῳ, κακὸν 4. v. Ἐπὶ ὑπερχαθάρσει σπασμὸς ἢ λυχνία  
 μὸς ἐπιγενόμενῳ, κακόν. *Hochstetterus* habet observationem,  
 quæ docet in variolis &c. sanguinis ἀνω & κατὰ eruptionem  
 esse lethalem; in exemplo autem quod adfert, Epileptici ali-  
 quot insultus filium Senatoris malè mulctârant. *Vid. ejus Cas.*  
*8. & 9. Decad. 1.*

## Indicationes

Indicationes sunt eædem, quas capite præcedente vidimus,  
 nisi quod menses in maribus non possint, hæmorrhoides, aut  
 hæmorrhagia non debeant promoveri. Si sanguinis evacuatio  
 sit necessaria, ad manum sunt instrumenta huic usui dicata.  
 Licet autem menses moventia in maribus non convenient,  
 conveniunt tamen eadẽm, quæ ad menses movendos non mi-  
 nimæ sunt efficacix. Chalybeata in Affectione & Epilepsiâ  
 hypochondriacâ viros affligente, non minus habent locum,  
 quam in affectu hysterico, ab obstructione mensium ducente  
 ortum. Vidit id optimè *Willisus*, qui in tractatione de Af-  
 fectione hypochondriacâ fuse de *Chalybeatis* agit medicamentis.  
 Idem illud in nomenclaturâ medicamentorum habet locum,  
 quod circa appellationes morborum in superioribus monuimus.  
 Idem medicamentum, diversarum partium respectu, dicitur ali-  
 quando Cephalicum, aliquando cardiacum, aliquando stomachi-  
 cum, hepaticum, spleneticum &c. Respectu operationum  
 Menses movens, urinas ciens, sudores promovens &c.

Cura.  
V.S.

Curatio eodem peragitur modo, quo in superioribus vidi-  
 mus curationem affectus hysterici peragendam esse. V. S. eodem  
 modo convenit, quemadmodum præcedenti capite explica-  
 tum est: videlicet si sanguis peccet copiâ, aut si solitæ evacua-  
 tiones sint suppressæ. Imo quandoquidem hic nullæ evacua-  
 tiones possunt tutò promoveri V. S. in hoc casu aliquanto magis  
 necessaria est. Non est tutum hæmorrhoidum fluxum aloë-  
 ticis, aut similibus promovere: præterquam enim quod ante  
 fluxum inflammatio cum sævissimo cruciatu soleat dies noctes-  
 que valdè torquere: si corpus tali evacuationi assuescat, ea vi-  
 res non parum atterere potest. Adde quod ubi arteriolæ illæ  
 nimium sunt apertæ, non facile nec commode fluxus ille com-  
 pescatur. Quid? Quod ani affectibus & inflammationibus  
 non rarò superveniat fistula, affectus molestus & fatis frequens?

Hoc



Hoc ideo monendum est, quandoquidem quidam prima hujus fluxus rudimenta negligunt, persuasi insigne inde ad illos redundare emolumentum. Non est etiam tutum hæmorrhagiarum excitare, quandoquidem non semper in manu est medici eandem pro libitu suppressere. Dein hæc evacuatio etiam prima specie læta, progressu est dura, eventu tristis; fatigat enim & enervat ægrum. V. S. ergo in Epilepsiâ hypochondriacâ convenit, quandoquidem symptoma hoc plerumque oritur à repletionem. V. S. convenit, quandoquidem suppressioni hæmorrhagiæ narium, ac hæmorrhoidum melius succurri non potest. Confirmatio peti potest è Casu 4. Dec. iv. Observationum medicinalium *Hochstetteri*, cui hunc inscripsit titulum: *Aphonia cum convulsivis motibus in adolescente*. Non male posset & hæc præfigi inscriptio. *Epilepsia hypochondriaca in adolescente xxi. annorum*. In hac historiâ illud memoratu dignum, quod cum per quinque dies varia in usum essent vocata medicamenta, absque insigni successu, sexta die pertusa fuerit vena, cum maximâ εὐφορίᾳ. *A vena secta paroxysmus nullus; mens sana* &c. Ejusdem decadis cas. i. habet hanc observationem & inscriptionem. *Aphonia convulsa à Phlebotomiâ recipit loquelam*. *Rivierus* refert obs. 45. Cent. i. Matronam colica ventriculi correptam (malim ego dicere hypochondriaco affectu, dolores enim vehementissimi ventriculi & lienis regionem occupabant) quæ neque formentis, neque purgatione sedari poterat, phlebotomia celebrata è brachio sinistro, statim à doloribus fuisse liberatam. Non opus est plura congerere. Vicariæ V. S. possunt esse cucurbitulæ scarificatæ, & hirudines.

Emeticis.

Emetica hic etiam conveniunt, cum ventriculi suburram nimiam exhauriant, & in hoc symptomate ventriculi vitium imprimis considerandum esse monuerit *Hichmorus*. Rectè *Walsenidius*. Vomitoria juvant Hypochondriacos citius, quam purgantia. &c. p. m. 72. *Gabelchoverus* cuidam, è nimio farciminum esu variis symptomatibus vexato, præscripsit cum successu hoc vomitorium.

℞. Oxim. sim. ℥ij.

Aque Rhaphan. destill. ℥ss.

Sacchar. rubr. ℥ij.

Commisce cum quartali, vel ℔j. aq. hordei non ex corticati, & tepidum bibat. Vid. *Curat.* 18. Cent. i.

A



Purgantibus

A purgantibus in hoc casu etiam planè abstinere non licet, quamvis ea non tam benè audiant, quam vomitoria. Quare autem purgantia iterata non ita commode exhibentur? Non tantum, quia humores acidi difficilius evacuantur, uti illi existimant, qui à succi pancreatici nimio acore plures deducunt morbos; sed imprimis, quod frequenti illa commotione, sanguinis & partium vigor debilitetur, ac ægroti nimium purgationibus adsuescant, adeo ut alvus frequentissime remaneat pigra, nisi medicamenti cathartici stimulo irritetur. Præstat igitur validius medicamentum exhibere semel atque iterum, quam crebro iteratis medicamentis fatigare ægròtum, nisi circumstantiæ non exigui momenti aliud suadeant. Evacuantium necessitas ex eo elucescit, quod symptoma hoc oritur è repletionem. Confirmatur ex eo, quod ante purgantium usum antepileptica &c. noceant, postea prosint, uti illud perquam bene observavit *Hochstetterus* in historia superius laudata, p.m. 400. vide quoque pag. seq.

Sanguinis  
vigorem re-  
stituentia.

Sanguinis defectui subveniunt cibi εὐχυμοί, & concoctu faciles: concoctioni, & spirituum inertiae, exercitium moderatum, & somnus. Eleganter *Hippocrates*. Popul. vi. v. 16. Πένϑ' τοῖσι ἀρθροῖσι ἢ σαρκὶ σῖτ' ὅ' ὕπν' ἢ σπλάγχνοις. Ita enim sanguis magis comminuitur, dilatatur, propellitur, artus, ventriculus, roborantur, secretiones & excretiones rectius peraguntur, adeo ut exercitium moderatum hic utramque absolvat paginam. Verum oportet ut somnus placidus exercitium excipiat, ne spiritus nimium dissipentur.

Chalybeata.

Chalybeata hic usus sunt summi, quandoquidem pluribus satisfaciunt indicationibus. Chalybeata sanguinis vigorem instaurant. Chalybeata ventriculum confortant, ejusque cruditatem acidam, huic affectui aliquando copulatam, emendant. Chalybeata chylicationem in ventriculo, chyli secretionem in intestinis, nec non fæcum alvinarum expulsionem adjuvant. Chalybeata, si jungantur carminativis, pituitam incidunt, flatus discutiunt, eorundemque proventum copiosiores & molestos impediunt. Chalybeata ab omnibus prædicantur in talibus affectibus. Restat ut aliquas subjungamus formulas, præter eas quarum in superioribus est fa-



facta mentio. Claudinus refert se hoc Electuario uti familiariter :

℞. *Limatur. Chalyb. præp.* ℥iij.

*Cinnamom.*

*Nucis musch. aa* ℥jß.

*Rhabarb. el. subt. pulv.* ℥j.

*Spec. Aromat. ros.* ℥iij.

*Sacchar.*

*Mellis aa* ℥vij.

M. & F. Electuarium s. a. cujus

Dosis erit ℥ß.

Vinum chalybeatum ejusdem:

℞. *Limatur Chalyb. ppt.* ℥j.

*Vini optim. & generos* ℥vij vel viij.

*Pulv. Caryophyll.* ℥vj.

M. & ponantur in vase vitreo bene obturato, quod per dies continuos in stupha fornacea contineatur, & quotidie agitetur, postea quotidie exhibeatur ab ℥iij sensim ad ℥v adscendendo per XL dies.

Plures ejusdem formulæ possunt videri Cap. de Scirrho Lienis &c.

### PILULÆ CHALYBEATÆ.

℞. *Limatur. Chalyb. puriss.* ℥ß.

*Gumm. Ammon. acet. dissolut.* ℥ij.

*Croci Britannic.* ℥j.

*Ol. Succin.* ℥ß.

F. Massa. è cujus ℥j. possunt formari pilulæ. xij.

Dos. à ℥ß. ad ℥j. & ultra.

Si quis has voluerit reddere purgantes, id poterit fieri, addendo *Trochiscos Alhand. Aloën, Diagrydium, Resinam Jalapp. &c.*

Non est necesse hic fuisse docere, quomodo reliquis indicationibus sit satisfaciendum, cum id è capite superiori sit petendum. Idem est affectus, eadem curatio.



Verum cum hic sit morbus flatulentus, non inutile erit subjicere *Spiritum cephalicum*, in hoc morbo non exigui usus, quandoquidem simul flatus egregie discutit.

*SPIRITUS CEPHALICUS.*

℞. Rad. Calami aromat. ℥j.  
           Angelica. ℥ss.  
       Fol. Sabin. m. iij.  
           Puleg. m. j.  
           Majoran. nob.  
           Thymi.  
           Serpill.  
           Hyssop. aa m. ss.  
       Flor. Lavend.  
           Lilior. convall. aa p. ij.  
       Sem. Apii ℥ss.  
           Levistic.  
           Petrosel.  
           Carni. aa ℥ij.  
       Succin. alb.  
       Baccar. junip. aa ℥ij.  
       Cort. Arant. }  
                   Citri. } ext. aa ℥ss.  
       Garryphylor.  
       Nucis muscat. aa ℥ij.  
           M.

Stent in infusione per octiduum in *Sp. Vini Gallici* ℥cxx. tum destilla in arena ad medias, liquorem destillatum serva in Lagena vitrea probè obturata. Dosis est ab. ℥ss. ad ℥j. & ultra, cum vehiculo appropriato. ex. gr.

℞. Aq. Ruth.  
           Puleg. aa ℥jss.  
       Spir. Cephalic. ℥x.  
           Cochlear. ℥ss.  
       Sal. Volat. ol. g. xv.  
           M.

Diæ.



Diætæ loco sit hoc aureum *Hippocratis* monitum. Pop. VI. 6. §. 6.

Πόντοι, σιτία, ποτά, ἐπὶ πένθος, ἀφροδίσια, μέτρια.

Non ago de Epilepsia Scorbatica, quandoquidem hæc, absque Scorbuti ipsius tractatione, intelligi nequit, hujus autem disquisitio majoris est indaginis.

## CAPUT DECIMUM NONUM.

*De Subsultibus, & Convulsionibus in somno.*

**N**ON solent Medici de hisce affectibus agere, quandoquidem sanis accidunt, & fere pravæ sequelæ expertes sunt. Posset itaque videri minus necessarius labor, hanc materiam, de qua nunquam aut rarissime consuliter medicus, in specie pertractare. Cum autem revera sint convulsiones, nec hæ in tabula spasmodum negligendæ fuerunt. Non est inutile etiam de illis speciatim agere, cum practici munus sit omnia quæ tum sanis, tum ægris contingunt, quam accuratissime perspecta habere, ut tanto felicius in tractatione ægrotum versetur. Hinc ego cum summa voluptate legi *Sydenhamii* lucubrationes, quod diligenter minimas circumstantias annotârit, quæ ab aliis negligi solebant. Observamus etiam in ægrorum curatione, quotidie specialia quædam occurrere, quæ sæpe perverse explicantur, non potest autem non practicus à curationis rectæ tramite aberrare, si symptomata, ægrotos male mulctantia, è falsis explicet principiis. Itaque tantum abest, ut hæc materia intacta sit relinquenda, ut magis sit necessarium eam exactius rimari. Quemadmodum in anatomia minimi vasorum ductus, in osteologia processus, appendices, figura, articulationes ossium, oculos & mentem curiosorum ad se convertunt, ita in praxi nihil est negligendum, quod ad accuratam cognitionem morborum, & felicem curationem eorundem facit.

Tractationis  
utilitas.

Contingit non rarò sanis, ut, postquam cubitum iverunt, & prima quies defagationem diurnam abstergere incepit, subito manus, pedes, totumque corpus cum impetu ita contrahant, ut repente excitentur, tanquam si è loco sublimi prosterne-

Subsultus in  
somno.



rentur: hæc convulsioni species mihi non male videtur posse appellari, subsultus in somno.

Descriptio  
eorundem.

Sunt Subsultus in somno, *contractiones membrorum omnium convulsivæ, sanis dormientibus contingentes, & somnum excutientes, quasi è loco alto caderent.* Sunt contractiones membrorum omnium, quod nulli potest esse ignotum, qui illis vel semel fuit obnoxius. Sunt convulsivæ, quandoquidem membra vehementius, subito, & absque voluntatis imperio contrahuntur. Dixi contractiones hæc accidere sanis, vocabulo usus in lata significatione. Ut aliquis habeatur sanus, sufficit ut actiones suas absque molestiæ perficiat, ut nulla imbecillitatis signa fiant conspicua. Deinde potest contingere. tales subsultus alicui vel semel tantum, vel rarissime accidere, postmodum non redire, nec adjunctas habere alias molestias. Oportet tamen ut hi subsultus referantur ad Convulsiones, quoniam sunt contractiones membrorum & musculorum violentæ & involuntariæ, quæ ad alias affectiones referri non possunt. Non est tremor, quandoquidem hic nulla motus est vicissitudo, non est horror, quandoquidem nullum observatur frigus, nec tam diu perseverat. Accidit dormientibus, cujus rei rationem postea investigabimus.

Excutiunt hi subsultus somnum, quamvis ordinarie satis profunde dormiant ægroti, ob vehementem membrorum contractionem, atque hinc incussum terrorem. Videntur sibi è loco alto decidere, quia scilicet corpus & cerebrum gravatum ac depressum, in somno menti repræsentat tales imaginationes, quæ cum dispositione illa conveniunt, uti postmodum capite de Incubo videbimus.

Convulsiones  
sive motus convulsi  
vi in somno.

Non paucis etiam sanis solenne est, ut singulis noctibus sæpius membra contrahant, nec tamen expergiscantur, mane iterum ad munia solita redeant, prorsus ignaris sibi tale quid accidisse, nisi ab alio ejus moneantur. Dixi hoc symptoma Convulsiones, sive motus convulsivos in somno.

Descriptio.

Hi hoc modo possunt describi, *quod sint contractiones membrorum convulsivæ, de nocte aliquoties sanis contingentes, nec somnum excutientes.* Appellavi has Convulsiones vel motus convulsivos,

quandoquidem sunt velut intermedii, inter utrosque. Con-



Convulsionum enim est ingens latitudo, adeo ut Convulsiones vehementissimæ quales in Morbo caduco, & Epilepsiis symptomaticis contingunt, à motibus convulsivis longissimo intervallo distent, sunt etiam convulsiones aliquando ita leves, ut ad motus convulsivos, quorum itidem quædam est latitudo, quam proxime accedant. Tales sunt Convulsiones de quibus nunc agimus, qui possunt tales dici, si consideremus membra subito contrahi cum aliqua vehementia: motus convulsivi quandoquidem non sunt admodum graves, & interpolatis vicibus iterum, & iterum repetunt. Non agam multis de hisce affectibus hoc capite, quandoquidem tum explicanda esset motuum convulsivorum natura, verum cum de hâc materiâ in sequentibus sit disputandum, ne crambe bis cocta sit apponenda, ea solum afferam, quæ ad horum intelligentiam omninò requiruntur. Non potui etiam præmittere tractationem motuum convulsivorum huic capiti, quamvis videatur naturæ ordine præcedere, quoniam à methodo in tabula propositâ non discedere malui. Ad pleniorum intellectum hujus capitis pertinebit, si quis ea, quæ de motibus convulsivis postmodum disputabo, percurrat, antequam ad hæc legenda se accingat. Sunt contractiones membrorum convulsivæ, quæ tamen possunt esse vehementiores, vel minus vehementes, & juxta diætæ errores aliquomodo immutari. Contingunt sanis eodem modo uti subsultus in somno: in hoc consistit differentia, quod somnum non excutiant. Ratio est, quandoquidem sunt multò leviores, nec ita universales contractiones, & quod cerebrum in hisce magis solito deprimatur, unde profundus oritur somnus, è quo non ita facile excitantur. Nesciunt sibi talia esse familiaria, nisi quispiam iis hoc indicet.

Causa utriusque affectus, quantum ego hæcenus observavi, est repletio, quandoquidem agimus tantum de hisce affectibus, quatenus periculo manifesto carent, & sanis contingunt, imo hominibus satis robustis, in quibus inanitio non videtur, habere locum. Deinde quantum ad subsultus in somno, ii ordinariè contingunt, postquam æger non ita diu decubuit, adeoque ubi recens ad sanguinem advectus chylus, ejusdem majorem expansionem cum pulsu frequentiori efficit, ubi autem hi

Causa est repletio.



conjunguntur arteriæ carotides nimium distenduntur, & convulsio excitatur, eo quo explicuimus modo. Accedit decubitus, sanguini faciliorem ad cerebrum adscensum præbens, ac stragulorum & plumarum lecti calor, ejusdem expansionem non parum promovens. Convulsiones & convulsivos motus in somno itidem à repletionem oriri rectissimè colligimus, quandoquidem post vini usum, aut potius abusum, post exercitium, sanguinem & spiritus agitans ex. gr. venerem, hi multo sunt graviores, & cum stridore dentium nonnumquam vexant. In talibus casibus major sanguinis adest & calor, & expansio, nec non spirituum vehementior & turbulentus motus, decubitus promovet repletionem arteriarum carotidum. *Sennertus* causam subsultus in somnis putat vapores acres à ventre inferiore adscendentes, & principium nervorum vellicantes L. I. P. II. c. 28. verum fallitur. Nos opinionem vaporum adscendentium non semel refutavimus.

Modus productionis.

Modum productionis facile intelligemus, & quidem subsultuum in somno, si in memoriam revocemus insomnia temperamento & constitutioni corporis nostri omninò convenire, uti illud ante me quoque observatum est. Itaque corpus alimento, cerebrum repletionem nimia onustum, facile insomnia in mente excitat oneris, difficultatis, periculi, fugæ; ubi autem spiritus animales propelli incipiunt versus membra, cerebrum gravatum mole suâ impetum illum adjuvat, adeo ut influxus spirituum sequatur vehementior, musculorum contractio subitanea, adeoque subsultus. Quod ad Convulsiones in somno, quandoquidem eæ ad motus convulsivos propius accedunt, explicatio earum petenda est ex iis, quæ in sequentibus dicentur.

Differentiæ.

Quoniam hisce immorari non fert animus paucis tantum differentias & reliqua subjungemus. Differentiæ sunt, quod hæ Convulsionis levioris species, vel crebrius, vel rarissimè infestent. Quod diversæ ætatis hominibus accidant &c.

Signa.

Signa è descriptione elucescunt.

Prognosis.

Prognosis est, quod hi affectus ut plurimum periculo vacent, quoniam fanis accidunt, nec aliquâ pravâ sequelâ excipiuntur. Si tamen hi affectus ingravescant ante morbum ingruentem,  
fi



## DE SPASMO FLATULENTO DICTO. CAP. XIX. 535

si medicus moneatur de talibus symptomatibus, is facile iudicabit cerebri graviores affectus, & convulsiones peiores expectandas esse, nisi tempestivè venienti occurrat morbo.

Indicationes sunt repletionem vitare, & spirituum excitantia blanda atque antiscorbutica in usum vocare. Indicationes

Cura potissimum est diætetica, in qua aëris puri, & ciborum facilis concoctionis habenda est ratio. Vitetur ingluvies & crapula, imprimis veneris abusus. Cæna, sit parcior aut nulla. Cibi condiantur aromaticis, *Vinum Salviatum* & *Ennatum* utilia. Exercitium moderatum de meliori notâ commendo. Vitetur somnus meridianus & protractior. Vitentur animi pathemata. Cura.

Ad spirituum excitationem usurpentur *Sal. Volat. C. C. oleosum. Sp. Salis Armoniaci, Tinctura Succini, Sp. Cochlearia.*

Quod si febris aut similis morbus ingruat, V. S. liberalior celebretur.

De stridore dentium sanis contingente non ago, quandoquidem est convulsio particularis & vacat periculo. Observavi eum aliquando satis vehementem in viro *spiritu vini* abuti solito. Explicatio est facilis.

## CAPUT VIGESIMUM.

*De Spasmo Flatulento dicto, vulgo de Kramp.*

**P**Lacuit Auctoribus huic affectui imponere nomen Spasmi flatulenti, quamvis ego existimem, nullum dari, ejusmodi nomine donandum, symptoma. Cum omnis convulsio ab iisdem causis dependeat, à quibus motus voluntarius, quando sc. illæ sese præternaturaliter habent, in motu autem voluntario nullus flatus, nulla explosio habeant locum, manifestum est, nullum quoque dari spasmus flatulentum, hoc est, à flatu productum. An flatus illi continentur nervis, an arteriis, an musculis? Non nervis, quandoquidem ii à solo spirituum tenduntur influxu. Non arteriis, quandoquidem ii non spiritus & flatum, sed sanguinem vehunt: qui licet subtili aëre, ut *Hippocrates* loquitur, non destituatur, non possunt tamen in illo flatus ita copiosi statui, ut ab hisce inflatio musculorum sit deducenda. Non continentur quoque flatus muscu- Spasmus flatulentus.



musculis, quandoquidem hi sunt partes corporis solidæ: non vacuæ, sed repletæ, cavitatibus majoribus omnino carentes. Fateor musculos aliquando refrigerari, & ita ad motum reddi ineptiores, atque tum dici aliquem à flatu, hoc est, aëre frigidiori, malè affectum esse, inde tamen deprompta consequentia non valet, revera in tali refrigeratione flatus musculos distendere. Opinio hæc inde videtur originem sumpsisse, quod cum observarent Medici hanc spasmi speciem periculo vacare, non existimarint causam ejus esse ingens partium continentium, aut contentarum vitium, ideoque flatulentum eum appellandum, & à flatibus originem esse arcessendam putaverint.

Ejus descriptio.

Est autem Spasmus flatulentus *repentina musculi hujus, aut illius cum dolore intumescencia involuntaria, sanis vigilantibus accidens, atque iterum desinens, in assuetis sæpius cum molestiâ recurrens.*

Quæ explicatur.

Est intumescencia musculi; alias enim musculus contrahi non posset; ab intumescenciâ musculi cauda ad caput accedit, ab intumescenciâ actio ejus in statu naturali & p. n. pendet. Est autem intumescencia hujus aut illius musculi, quandoquidem non universum corpus, nec membrum universum afficitur, sed tantum musculus particularis, quamvis non rarò antagonistæ se illi actioni præternaturali opponant, & contrario nisu citius molestiam superent. Adest dolor, non tantum quia subito, sed & quod cum majori solito impetu, violentè, sine voluntatis nutu contingit, hinc etiam ad convulsiones referri debet. Non debet tamen hæc intumescencia musculi hujus, vel illius, ad convulsiones particulares, de quibus in sequentibus, ablegari, quia quidem hunc vel illum in specie invadit musculus, non semper tamen eundem: aliquando dextri cruris, aliquando sinistri musculus, aliquando brachium infestat, cum convulsiones, particulares dictæ, semper eandem occupent partem. Accidit sanis, nempe sanitatis vocabulo in latiori significatione accepto, pro eo statu in quo homines de nulla insigni conqueruntur molestiâ, & ad actiones obeundas sic satis sunt apti. Si sanitatis vox in maximè emphaticâ sumatur significatione, pauci perfectâ gaudent, multi ab optimo illo statu non parum desciverunt. Requiritur  
ad



ad sanitatem particularum omnium fluidarum iusta proportio, solidarum omnino exacta conformatio, motus omnium, tum universaliter loquendo, tum particulariter, exquisitè naturalis. Addidi illum vigilantibus accidere, ut à subsultibus & motibus convulsivis in somno distinguerem. Quod si cui decumbenti, vel dormienti accidat, is evigilat, quandoquidem dolor est exquisitus, qui in reliquis est nullus, ob statim deficientem contractionem.

Non solet admodum diu continuari hæc musculorum intumescencia, longe diutius tamen quam præcedentes, quæ in momento desinunt. Ubi muscoli antagonistæ sese contractioni opposuerunt, iterum cessat. Sunt tamen quidam huic malo frequenter obnoxii, adeo ut & sedentes, & decumbentes in hosce insultus incidant.

Investigandæ jam sunt causæ. Causa continens jam explicata est; verum inquirendum est, quid sit illud, quod intumescenciam illam involuntariam & convulsivam per intervalla excitet? Hæc, in huic malo rarius obnoxiiis, est aliquando incommodus membri situs, quem facile intelligimus posse impedire promptum sanguinis per membra motum progressivum. Ubi autem motus progressivus sufflaminatur, necessario musculus intumescit, seu sanguine impletur, & contrahitur. Aliquando est ipsa sanguinis dispositio, & ad motum per minimas, & sensim graciliores redditas, articularum propagines ineptitudo. Hæc frequenter in hisce regionibus est dispositio scorbutica. Dispositio scorbutica in aliquamdiu sedentibus, imprimis circa vesperam, producit formicationis sensum in cruribus. Eadem dispositio sanguinem tardiolem, & ad motum ineptiorem reddens, musculos facile replet, repletionem malè afficit, malè afficiens spiritus animales ad musculum cum aliquo impetu allicit, atque ita Spasmm producit flatulentum dictum.

*Sennertus* dicit hoc malum affligere cacochymicos, flatulentos, poculis & crapulæ deditos, modum non explicat, quo Spasmus hic concipi possit infestare. Modum ego putem me explicuisse, quod ad reliqua attinet non tantum poculis &



crapulæ deditos vexat, verum etiam illos, quorum vivendi modus fuit satis laudabilis. Non est ramen inficias eundum, commestrationes & crapulam ad hanc affectionem & scorbutum viam sternere. Flatulentiam ad musculos non pertingere vidimus, flatus in intestinis familiares sunt scorbuticis, verum propriè loquendo nullo affinitatis vinculo cum hoc affectu copulantur. Cacochymix vox admodum est generalis. Inter causas externas rectè enumerat frigus susceptum, quod sententiam meam confirmat; hoc modo enim sanguis difficiliter progrediens ad inflationem musculi hanc p. n. disponitur. Posset non incommodè addi, hunc affectum esse symptoma ætatis ingravescentis, quia in senibus sanguis ad motum ineptior, spiritus languidi evadunt.

**Differentiæ.** Differentiæ in hoc morbo à circumstantiis petuntur. Alius est gravior Spasmus, alius levior, alius frequentius, alius rarius invadit: alius viros, mulieres alius infestat. &c.

**Signa.** Signa è descriptione patent.

**Prognosis.** Prognosis est, quod plerumque paroxysmus citò desinat, & periculo vacet. Senes invadens, & sæpius vexans, difficillimè curatur, quia scilicet senectus ipsa est morbus, & sanguis effectus ac scorbuticus difficillimè corrigitur. Quid? Quod viscerum calor languidus, spiritus minus mobiles, humores glutinosi, continuum huic malo præbeant pabulum.

**Indicationes** Indicationes sunt paroxysmum superare, dein dispositionem sanguinis scorbuticam tollere, non neglectis omnino externis.

**Cura.** Curatio paroxysmi ordinariè peragitur extensione solâ membri, si enim musculorum fraternorum (uti ex *Hippocrate* loquitur *Fallopins* p. m. 586.) alter contrahatur, utriusque æqualis extensio, contractionem violentam alterius corrigit. Quod si spasmus sit magis pertinax, jungi potest frictio, vel etiam inunctio, de qua in sequentibus: non inutile quoque est exhibere sal aliquod volatile internè. *Sal. Volat. C. C. Fuliginis, Sp. sal. Armon. Ol. Succin.*

Si extensione in contrarium non tollatur Spasmus, Clysterem flatus discutientem injici vult *Sennertus*. *Prax. l. i. P. ii. c. 28.*



Dispositio sanguinis scorbutica quomodo tollatur, propriè debet explicari in capite de Scorbuto. Cum hæc materia admodum sit ampla, sufficiet hic monuisse salia volatilia, & antiscorbutica medicamenta, respectu habito ad constitutionem ægri, hic summi esse usus. De hisce consuli possunt auctores, qui de Scorbuto ex professo scripserunt.

Quomodo  
dispositio  
tollatur.

*Willisius* commendat tanquam remedia antispasmodica *Pul. Rad. Petasin.* ut & *Conservam* ex fol. *Arbor. Vitæ*, cum æquali portione *Sacchari.* ut & sequentem pulverem:

℞. *Pulver. Milleped.* ppt. ℥iij.

*Sem. Ameos.* ℥j.

F. Pulvis, dividatur in 10 partes. Sumatur dosis bis in die. &c.

Adjiciam adhuc descriptionem *Spiritus Galbani compositi* in hoc affectu non contemnendi usus.

### SPIRITUS GALBANI COMPOSITUS.

℞. *Gumm. Galb. puriss.* ℥iv.

*Sal. Tartar.* ℥j.

*Armon.* ℥ss.

*Sp. Vini opt.* ℥xxx.

Contundatur *Sal. Tartar.* & *Armoniac.* seorsim, tum omnia conjiciantur in Cucurbitam vitream, ac s. a. destillantur in arenâ ad siccitatem. Prodit primum spiritus, tum *Sal. Volat.* non tantum Alembico, sed & recipienti, si ignem urgeas, adhærens radiatum.

Tum iterum:

℞. *Gumm. Galb. puriss.*

*Flor. Lavend. siccæ.* aa ℥j.

*Sal. Tartar.* ℥ss.

Hisce affunde Liquorem destillatum, & vasis optimè clausis destilla lento igne ad medias, & habebis spiritum penetrantem *Sal. Volat.* inprægnatum, qui est

*Spiritus Galbani compositus.*

Ubi removeris recipiens aliud appone, & continua



destillationem ad ficcitatem. Primum prodibit spiritus satis penetrans, tum phlegma oleosum, non ingratum, nec inutile ad usum externos, vel temperandum liquorem priorem.

Liquorem destillatum serva in Lagenâ vitreâ optime clausâ. Dosis ejus à ʒß ad ʒj. & ultra, in liquore appropriato.

Inter externa convenit ligatura parti, spasmo flatulento affici solitæ, circumjecta. Prodest quoque inunctio cum *Spiritu Galbani* composito. *Rondeletius Aquam ex hirundinibus & Castoreo* paratam, & interne & externe prædicat. Vide ejusdem *method. curand. morb. l. i. c. 36.*

Quidam Ungulam Alcis pulvinari subjectam laudant, potest eadem in sacco gestari: vel *nux muscata mas.* quamvis externa hæc videantur parvi momenti, ego tamen novi ea non semper omni carere effectû: saltem tutò & absque incommodo possunt in usum vocari.

In diæta non tantum aëris puri debet haberi ratio, & victus moderati, sed imprimis exercitii, quod in hoc casu omnino requiritur. Observamus Scorbuticos non rarò circa vesperam, ubi diu sederunt, infestare fornicationis sensum, qui inter deambulandum vel non sentitur, vel etiam evanescit, unde colligimus exercitium ad progressivum sanguinis motum adjuvandum non parum facere.

De Spasmis levioribus, hæmorrhagias excipientibus, actum est in superioribus.

## CAPUT VIGESIMUM PRIMUM.

*De Convulsionibus particularibus, ac in specie de Vomitu, & Convulsione maxillæ inferioris.*

Convulsiones particulares satis numerosæ.

CUM primum tabulam in superioribus propositam, in chartam coniecissem, non erat mihi mens de Convulsionibus particularibus in specie tractare, uti quoque innui. Itaque non admodum sollicitus fui de accuratâ enumeratione, sufficere



cere ratus, si quasdam enumerarem species, ad quas reliquæ facile possent reduci. Convulsiones particulares sunt satis multæ, quas omnes recensere, aut etiam explicare non erat necesse. Quantum ad strabismum, sternutationem, singultum, de iis solet suo loco agi. De Tussi convulsivâ egit *Willisius*. Catharrus & Tussis epidemia maligna, cujus meminit *Sennerius* L. IV. c. 17. fortè non malè ad Peripneumoniam, quam *Vincentius Baronius* libris duobus descripsit, referri potest, vel, si fuerit convulsiva, ad convulsiones febriles pertinet. Particularia omnia enumerare & describere, opus esset multi laboris & tædii. Ne tamen omnes convulsiones particulares sicco transmittam pede, utile fore judicavi, si, speciminis loco, de uno atque altero affectu agerem. Agam itaque hoc capite de Vomitu convulsivo, quò etiam pertinet, vel saltem quicum cognatione jungitur, inversus motus intestinorum peristalticus, nec non de Convulsione maxillæ inferioris, quam nostro idiomate vocamus *de kilem in de mond*. Hisce affectibus absolutis, reliquæ convulsionis particularis species, quæ plures sunt, elucescent.

Potest quidem omnis vomitus dici convulsivus, quandoquidem in vomitu & ventriculus, & diaphragma, & plures muscoli, magnâ vi, & absque voluntatis imperio contrahuntur. Sunt tamen species vomitus quædam, quæ peculiari ratione debent dici convulsivæ, quandoquidem non tantum sunt involuntarii, sed absque ventriculi dispositione pravâ contingunt, & non rarò mortis, instar aliarum convulsionum, sunt prænunciæ. Quidam adeo facile vomunt, ut post ingluviem, & pocula, comprimendo hypochondrium, vomitum sibi possint concitare, absque insigni molestia, adeo ut hic vomitus videri ferè possit voluntarius. Quidam navigantes in mari, absque prævia ventriculi imbecillitate in nauseam & vomitum incidunt. Non ago de hisce vomitus speciebus, respicio vomitum qui sequitur operationes chirurgicas graviores ex. gr. sectionem calculi, herniæ &c. aut etiam vulnera capitis graviora, assumptum venenum, vel lente restitutam herniam. Hæ vomitus species huc proprie videntur spectare, cum in superioribus convulsiones universales ab iisdem deduxerimus causis.

De quo vomitu hic agendum?



Quomodo  
vomitum  
convulsivum  
excitetur?

Nempe non raro observamus, ubi ægroto extractus fuit calculus, ut videtur, satis feliciter, tamen non longè post succedere vomitum, vel magis vel minus violentum. Videndum est, quomodo hic sit explicandus? In genere dico: à læsione partium exquisiti sensus, non possunt non spiritus animales, & sanguis valdè commoveri, unde oritur dispositio ad convulsiones, uti in superioribus vidimus. Verum cum hic sensus interni non sint aboliti, explicandus est hic vomitus è mechanicâ constructione cerebri, medullæ oblongatæ, ac nervorum. Ad vesicas distribuuntur nervi à nervo intercostali, ut & nervis lumbaribus. Nervi intercostalis radices à ramis quinti & sexti paris, à protuberantiâ annulari oriundis, derivantur. Ad nervos intercostales accedunt ramuli è Spinali medullâ. Nervi lumbares ab eâdem spinali oriuntur medullâ. Ubi ergo spirituum motus vehemens, ope nervi intercostalis ab, anteriori parte ad protuberantiam annularem pertingit, spiritus huius incolæ admodum percelluntur, atque ita versus par vagum & ramos versus ventriculum distributos vehementius influunt. Nempe occurrit huic motui, alius à medullâ spinali versus anteriora delatus, qui in se mutuo impingentes eo loci, ubi post protuberantiam annularem medulla oblongata crassior est, atque magis protuberans, necessariò versus latera, adeoque nervos paris vagi, versus ventriculum distributos, vehementius influunt.

Quæ de extractione calculi dixi, facile possunt applicari sectioni herniæ, de qua adhuc in sequentibus.

Post vulnera capitis non rarò sequitur vomitus, qui vulnus vel contusionem, aut etiam commotionem cerebri non esse neglegendam satis indicat. Notum hoc est Chirurgis, qui ad hæc attendere consueverunt. Explicatio harum convulsionum petenda est è læsione cerebri, & compressione medullæ oblongatæ.

De Vomitu  
post vene-  
num assum-  
ptum.

Ad vomitum convulsivum possumus quoque referre vomitum illum, qui ab assumpto veneno originem habet. Hic in eo convenit cum superiori, quod & spiritus & sanguis, eo quo dictum est modo agitentur, differt in eo, quod ventriculus ipse hic non tantum malè afficiatur, sed & ab acrimoniâ erodatur



datur, unde necessum est, ventriculum convulsivè contrahi.

Inversus motus peristalticus intestinorum imprimis locum habet in Ileo morbo, & inflammatione intestinorum. De Ileo morbo non est hic dicendi locus. De inflammatione intestinorum, illud tenendum est: non rarò contingere, ubi Hernia intestinalis non satis citò reposita est, aut ubi magna intestinis est illata vis, tum illa inflammarì & vomitum produci difficilem ac periculosissimum. Ita ego tractavi foeminam, quæ Herniâ laborans à Chirurgo imperito erat neglecta; nempe non reposuerat is intestina prolapsa, imposuerat tantum emplastrum tuberculo in inguine. Postmodum quidem accersitus fuit Chirurgus magis expertus, qui etiam dextrè & cito reposuit, sed ob diuturniorem moram & refrigerationem intestina procul dubiò erant inflammata, iterum febricitabat, vomebat assiduè, foetidissima, & fæces alvinas, adeo ut doloribus & symptomatibus fracta succumberet tandem. Eodem tempore cor, adeoque sanguis validè commoventur, unde tum, è tensione fibrillarum, versus ventriculum distributarum, sanguis aliquomodo in motu suo progressivo impeditur, hinc contractio fibrarum musculosarum, atque vomitus. In extraordinario hoc spirituum & sanguinis motu, pulsus frequentiore efficiente, consistit essentia febris, vomitus & omnia symptomata graviora efficiens.

Inversus  
motus peri-  
stalticus in-  
testinorum.

Convulsio maxillæ inferioris, est valida musculorum temporalium, tum etiam aliorum, maxillam inferiorem claudentium pertina-  
nax contractio, in casibus difficilioribus contingens, plerumque mor-  
tis prænuncia.

Descriptio  
convulsio-  
nis  
maxillæ in-  
ferioris.

Non est hæc Epilepsia symptomatica, quandoquidem sensus interni non sunt necessariò aboliti: mens potest constare. Non est convulsio universalis, sed particularis. Non possunt ægri maxillam inferiorem à superiori diducere, quia muscoli temporales, & reliqui, pertinaciter contracti sunt. Oritur illa contractio musculorum à vehementiori spirituum animalium in fibras eorum influxu: unde sanguis cohibetur, atque muscoli venter intumescit. Putem ego imprimis musculus temporalem affici, qui nervos à pari quinto accipit, quamquam sit admodum verisimile, alios quoque in consensum trahi. Casus diffi-

Ea explica-  
tur.



difficiliores quorum memini, sunt præter læsionem ipsius musculi, operationes Chirurgicæ difficiliores ex. gr. extractio calculi, sectio herniæ cum ablatione testiculi, quibus accedunt febres vehementes. Læsus temporalis musculus varia producit symptomata, quorum *Vesalius* & alii meminerunt anatomici, verum non est necesse Convulsionem maxillæ inferioris sequi, quamvis & sopor, & convulsiones universales, Epilepsiæ vulnerum pedissequæ à me dictæ, & febris, non rarò subsequantur. Verum operationes chirurgicas graviores aliquando excipiunt hæ convulsiones. Exemplum occurrit apud *Hippocratem* Popul. v. vii. in *Scamandro*, qui sectus sectione magna ad os usque, nec non ustus, duodecimâ post sectionem die cepit convelli, postmodum maxillæ compactæ riguerunt.

Quomodo  
ea produca-  
tur?

Convulsio maxillæ inferioris itidem & à dolore, & à sanguinis febrili agitatione originem ducit. Non rarò sequitur operationes chirurgicas difficiliores, uti monuimus, ex. gr. sectiones herniæ intestinalis, cum ablatione testiculi. Dolor ingens excitatur in hac operatione, non minus quam in extractione calculi, sed habet aliquid peculiare. Nempe vasa præparantia constringuntur & amputantur. Itaque cum sanguis agitato circum suum modo ordinario absolvere non possit, & tamen magna vi, atque repetitis ictibus, propellatur quaquaversum, vasis hisce amputatis, & nervis exquisiti sensus infertur vis manifesta. Hinc minimæ arteriolarum propagines extenduntur, partes circum circa & dolent, & intumescunt. Agitatio spirituum versus medullam oblongatam delata, non tantum sensum doloris, qui ad mentem pertinet, sed & agitationem ingentem in medulla oblongata producit. Si hic impetus adeo sit vehemens, ut spiritus versus nervos inferioris maxillæ musculis, præcipuè temporali infertos pertingat, & sanguinis motum progressivum vehementius removetur, clauditur & convellitur maxilla inferior, atque producitur convulsio particularis admodum periculosa. Minus frequens fortè est hoc symptoma, quandoquidem nervi quinti paris, è quo nervi versus musculus temporalem, & reliquos, ad maxillam inferiorem pertingentes, derivantur, è superiori parte protuberantiæ annularis oriuntur,



untur unde sequitur convulsiones universales & reciprocas facilius produci, ubi cerebrum simul comprimitur, ubi autem mens constat, debere esse vim sufficientem, quæ spiritus versus hos ramusculos nerveos propellit quando cerebrum à superiori parte non ita grave incumbit. Oportet ut ab inferiore parte impulsus spiritus, versus superiora, cum vehementi impetu feratur. Ubi autem in hos influxerunt musculos spiritus animales, & convulsionem maxillæ inferioris prodixerunt, non est mirum, si ea diutius continuetur, tum ob dolorem, seu molestiam in illa parte excitatam, tum etiam quandoquidem nervi quinti paris, sub durâ matre demersi, prono situ aliquomodo ad continuationem illius determinationis faciunt. Eodem modo res habet, quemadmodum videmus Oenopolas tubo retorto vinum ex uno vase in aliud infundere. Oportet ut suctu primum vinum alliciatur, ubi autem semel incepit fluere, continuatur satis diu ille motus, uti notum est. Verum ut hæc omnia rectè percipiantur, non est negligendus motus spirituum varius, & diversorum impulsuum varii effectus. Ex. gr. è conspectu rei gratæ appetitus, è conspectu rei foedæ, &c. excitatur nausea. Idem est organum externum, iidem spiritus animales, diversus tantum motus. Hic desino, quoniam hæc brevibus explicari non possunt.

Non est quod in causarum explicatione multum hæreamus, cum convulsiones hæc ob oculos poni non potuerint, quin simul causas externas, vulnera, commotionem, venena explicare fuerit necesse. Explicatæ sunt simul internæ, vehemens agitatio spirituum animalium, motus sanguinis turbulentus, & febrilis. Ut rem in pauca contraham, causæ duæ sunt generales, dolor, & repletio, nisi simul jungatur hæmorrhagia, aut lypothymia. De quibus cum in superioribus sit actum, hoc caput paucis absolvere poterimus.

Causæ.

Progrediendum jam est ad differentias. Verum & hæc magnam partem in superioribus explicatæ sunt. Nempe vomitus hi convulsivi sequuntur, vel vulnera aut læsiones capitis, vel læsiones & vulnera à Ghirurgis in operationibus gravioribus, inflicta, vel etiam assumpta venena, aut inflammationes intestinorum. In convulsione maxillæ inferioris alia pars est affecta, & impetus spirituum versus alias nervorum propa-

Differentiæ.



nes irruens. Quamvis autem hæc symptomata longo intervallo à se mutuo distent, potest tamen contingere ea in eodem concurrere ægro, vomitus potest præcedere, subsequi convulsio inferioris maxillæ, imo vomitus præcedens convulsione sequuturæ, vel universalis, vel particularis metum incutit.

Signa.

Signa per se sunt manifesta: in vomitu ventriculo contenta ejiciuntur, in convulsione maxillæ inferioris, dentes à se mutuo divelli, nec os operiri potest. An operatio gravior præcesserit, adstantes, vel ipse æger refert. Vulnere capitis visu & tactu explorat medicus. Ubi venenum est assumptum, citissime post assumptionem diris torquetur æger cruciatibus. Inflammationibus intestinorum junguntur vehementes dolores, & inflatio ventris.

Prognosis.

Prognosis in his affectibus mala; plerumque enim hæc convulsione particularis species, sunt signa mortis prænuncia. Recte *Hippocrates* Σπασμοὶ ἐπὶ τρώματι, θανάσιμον. Coac. l. i. c. 14. & Aph. 2. S. v. Vomitus qui leviolem cerebri commotionem comitatur, minus est periculosus. Qui vulnera capitis graviora sequitur, de eo idem, quod de vulneribus, debet fieri judicium. Vomitus post assumptum venenum bonus est, si simul omne ejiciatur, antequam ventriculus sit læsus. Si ventriculus exesus sit, necessariò succumbit æger. Vomitus, non longè post extractionem calculi contingens, malus, post septimum diem contingens, aliquando caret periculo, aliquando pessimus. Bonus, quando causa ejus est nimia emulsionum, imprimis spissiorum, assumptio, & quando à vomitu appetitus non prostermitur, quando appetitus est prostratus & febris ingravescit, pessimum est signum. Inflammatio levior intestinorum non rarò superatur, gravior difficillimè. Huc spectat *Hippocrat.* Aph. 10. S. vii. Ἐπὶ εἰλεῶ ἔμετθ, ἢ λῦξ, ἢ σπασμός, ἢ παραφρεσύνη, κακόν. Pessimum signum si excrementa per os rejiciantur. Convulsio inferioris maxillæ tardius solet succedere, & plerumque est mortalis.

Indicationes

Indicationes sunt, vomitum, & convulsiones compescere, causas tollere, non neglecta febris.

Cura.

Compescitur vomitus medicamentis internis & externis. Interna talia debent esse, quæ ventriculum roborant, *Sal. Absinth. Card.*



*Card. bened. Confectio Hyacinth. Alkermes, Diascordium, Athanasia, Orvietanum. Sp. Sal. Nitri. Succus Limonum &c.* Si dolor conjungatur, is non est negligendus.

Externa sunt Emplastra, Cataplasmata, Unguenta, Lini-  
menta. *Emplastrum de crusta panis Montagnana, de Baccis Lauri, Stomachium, Diaphenicum calidum & frigidum Mesue. Ceratum stomachale Galeni. Olea Absinth. Mastichin. Nucis Muscat. Rosarum. Mithridatium, Theriaca, spir. vini dissoluta & cataplasmati-* bus addita.

Causæ vomitus si sint vulnera vesicæ, capitis &c. eo modo curari debent, uti illud à Scriptoribus, qui de his materiis ex professo egerunt, docetur. Si causa sit inflammatio intestino-  
rum, & motus peristalticus inversus, eò cura est dirigenda. Injicienda sunt Enemata inflammationi & Gangrænæ contraria.  
Ex. gr.

Quomodo  
causa tol-  
lantur.

*Rx. Fol. Ruth. Scordii.*

*Manubii.*

*Malva.*

*Bismalva. aa m. j.*

*Flor. Rosar. p. j.*

*Coq. f. a ex aq. pura colat. ℥x. Add.*

*Mellis. Rosat. laxativ. ℥ij.*

*Sal. com. ℥ß.*

*M. F. Enema.*

Quod si Enemata careant successu, purgans exhibitum ali-  
quando mira præstat. Profunt quoque fomenta, cataplasmata,  
inunctiones ventri externè applicata. Ex. gr.

*Rx. Unguent. de Alth. simpl.*

*Anodyn.*

*Ol. Rosar.*

*Chamomill. aa ℥ij.*

*M.*

Si causa vomitus sit venenum assumptum, illud quamprimum  
est evacuandum: itaque statim exhibeatur *Oleum Olivarum, Ra-*  
*parum, Amygdalarum dulc.* Exhibeatur *cerevisia tepida cum bu-*  
*tyro copioso.* Deducatur æger in conclave calidum. Ubi eje-  
ctum est venenum, exhibeantur cardiaca & dolorem sedantia.



Utilia sunt medicamenta Opiata dicta, *Orvietanum*, *Athanasia*, *Diascordium*.

℞. *Aq. Meliss.* ℥iij.  
*Cinnamom.* ℥j.

*Athanasia.*

*Diascord. novi.* aa ℥j.

*Margarit. ppt.* ℥j.

*Falapp. Rosac.* ℥j.

M. Assumat subinde cochleare  
 unum aut alterum.

Si quis haustum malit, is utatur sequenti, aut simili:

℞. *Diascord. novi.* ℥j.

*Lapid. Bezoar. occidental.* ℥ss.

*Syr. Acetos. Citri.* ℥ij.

Cum decoct. *Scorzoner & C. C.*

F. Haustus.

Si causa sit copiosior ingurgitatio Emulsionum, vomitus non est statim compescendus, sed potius aqua tepidâ, vel simili remedio, blandè promovendus, vel exhibendum est medicamentum blandè laxans: ex. gr. *Extractum Rhei*, *Infusio Rhei* vel simile quid. Ex. gr.

℞. *Rhei elect.* ℥jss.

*Sal. Tartar.* ℥j.

*Cort. Arant. exter.* ℥ss.

Bulliant leviter colat. ℥ij. Add.

*Syr. Rosar. solutiv. cum Senna.* ℥ij.

M. F. Haustus.

Si non videatur consultum exhibere per os medicamentum laxativum, injici potest Enema.

℞. *Fol. Malvæ. Mercurialis.*

*Parietar. Agrimon. aa m. j.*

*Flor. Chamomill. Melilot. aa p. j.*

*Sem. Anis. Fœnic. Carui. aa ℥ss.*

Coq. f. a. ex aq. pura in colat. ℥x. dissolv.

*Elect. Diacathol.* ℥ij.

*Sal. com.* ℥j.

M. F. Enema.



Inunctiones ventris quoque non sunt inutiles.

Quomodo febris tollatur in hisce casibus, facile intelligemus, si in mentem revocemus ea, quæ in superioribus explicata sunt. Nempe symptomata hæc vel vehementem agitationem febrilem habent comitem, vel accidunt viribus vehementer attritis. In utroque casu prudenter agendum. Cavendum à medicamentis *Febrifugis* dictis potentioribus, quandoquidem hic major commotio sanguinis & spirituum non tam excitanda, quam omnibus modis compescenda est. Ab agitatione enim, seu, quod idem est, à febris vehementiâ, maximum imminet periculum. Ubi indicia sese produnt, quæ difficilium horum symptomatum metum incutiunt, hæmorrhagia copiosa præcessit, consultum est secare venam in robustis & plethoricis. Alvus libera servetur, vel blandis laxantibus, vel, quod sæpe præstat, enematibus. Sanguinis fluiditas conservetur. Somnus placidus concilietur, quandoquidem hoc pacto & dolor lenitur, & spirituum dissipatio præcavetur. Quod si inflammatio sit causa febris, illi omnino obviam eundum est. In genere conveniunt ea quæ in superioribus, de Epilepsiis febrilibus disputata sunt.

Febris quomodo tollatur?

Quandoquidem vomitus convulsivus, & convulsio inferioris maxillæ, sunt convulsiones particulares distinctæ, absoluto vomitu, jam agendum est de cura Convulsionis maxillæ inferioris. Convulsio itaque, quantum pote, tollenda, causæ amoliendæ, & Febris expugnanda est.

Cura Convulsionis maxillæ inferioris.

Quandoquidem autem hoc symptoma solet infestare viribus admodum fractis, Cephalica & Cardiaca temperatiora, vel etiam modicè refrigerantia, hic locum habent: quæ plura hoc loco possent afferri, ea spectant ad Febrem, de qua in sequentibus. Cephalica & Cardiaca in hoc casu sunt *Confectio Alkermes, Hyacinthorum. Unicorn. ppt. Rasur. Ungul. Alcis. Lapis Bezoar. Or. & Occid. Cremor diaphoreticus Bezoard. minerale. Gelatina C.C. &c.* Non negligenda quoque sanguinem diluentia, & æstum temperantia, quibus commode possunt admisceri acida, *Spir. Vitrioli, Aceta varia.* De *Sp. Vitrioli* utilitate exstat observatio apud *Riverium*.

Externa in hoc affectu omittenda non sunt, fomenta, unguenta,



guenta, lenimenta, olea, quandoquidem hæc apta nata sunt rigiditatem & tensionem aliquomodo corrigere & tollere. Eligenda autem & hic medicamenta temperatiora, quandoquidem æstus ingens vel produxit, vel saltem fovet hanc convulsionis speciem. Ex. gr.

R. Unguent. Popul.

Ol. Rosar.

Trifol. odorat. aa ʒij.

M.

*Hippocrates* usus est tepefactoriis, & fomentis *Levi*. Popul. v. vii. 9.

*Sennertus* præcipit ut externè pars foveatur, decocto *Flor. Chamamel. Melilot, Ruta, Salviæ, Fl. Lauri*. Ad inunctionem commendat *Ol. Costin. de Castor. de Spica & similia*. Addit utilem esse *Sp. Vini*, præcipuè in quo *Fl. Chamamel. & Laverd.* macerata fuerunt. Deinde *Aqua aliq. Apoplectica & Epileptica* jubet inungi partem affectam. *Laz. Riverius* ait, parti affectæ adhiberi *pulmones Verveminos calentes, pullos columbinos, catulos, gallos &c.* Ego sententiam *Riverii* præfero.

Quomodo  
causæ tol-  
lantur?

Causæ, si sint vulnera, tolluntur, quantum in Medici est potestate, si illa curentur, si symptomata methodicè tollantur, de quibus videndi scriptores chirurgici.

De Febre  
tollenda.

Febri obviam eundum, uti in superioribus explicuimus. Si malignitas jungatur nec ea negligenda. Locum habent sudorifera & Alexipharmaca. Quandoquidem autem Maxillæ inferioris convulsio rarius accidit, nisi postquam vires valdè attritæ sunt, cavendum est ne imprudenter in usum vocentur remedia generosiora, nisi summâ exigente necessitate. Ubi enim spes decolavit, cur multa moliendo, nihil promovendo, ægrotum frustra fatiges, aut vires languentes citius exhaurias? *Hippocrates* judicavit *Scamandrum* citius sublatum esse ob medicamentum catharticum validius exhibitum. Utile tamen existimo cucurbitulas vel ficas, vel scarificatas humeris apponere, vel etiam vesicatorium nuchæ. Si simul Aphthæ affligant ab acidis abstinendum, in locum substituenda lenientia & diluentia. Si alvus movenda, injiciantur enemata.



## CAPUT VIGESIMUM SECUNDUM.

*De Motibus convulsivis.*

**A**ccedimus jam ad divisionis nostræ generalis partem alteram, quæ complectitur Motus convulsivos. Separavimus motus hosce à Convulsionibus propriè dictis, tum quod hi sunt minus vehementes, tum quod in hisce mens constat, saltem non semper aboletur. Si rem ipsam spectemus, quanto intervallo à se mutuò disjunguntur Emprostotonus aut Tetanus à motibus convulsivis? Quantum Morbus caducus, aut Epilepsia symptomatica, ab iisdem Motibus? Motus hi maximam convenientiam nacti sunt cum Convulsionibus, sive Motibus convulsivis in somno. Ita solet in simili materia, non omnia æque à se mutuo distant, ut supra monuimus. Utile tamen imprimis esse hanc distinctionem non neglexisse, docuit *Fallopins* in lib. *Hippocr. de Vuln. cap. 49.* Discrimen quod inter Convulsionem & Motus convulsivos proposuit *Sennertus*, nec verum, nec ullius est momenti. Vid. L. I. P. II. c. 28. *Sennerti* tamen vestigiis insistere videtur *Laz. Riverius.* Pr. l. i. c. 6. An Epilepsia dicenda est Motus Convulsivus? An *σπασμώτρομος* *Hippocratis*, *παλμός*, *σπασμῶδες πάθος*, *σπασμῶδης σφυγμός*. non differunt ab Epilepsia, & spasmò propriè dicto? *Hippocrates* mihi videtur hosce distinctis appellasse nominibus. Lib. II. Coac. c. 14. 1, 2. &c.

Motus convulsivi à Convulsionibus distant

Agemus ergo hoc capite de motibus convulsivis, qui statim distinguì possunt, quod sint graviores vel leviores. Nempe aliquando nomen merentur motuum convulsivorum, aliquando sunt tantum subsultus tendinum. Motus convulsivi graviores etiam adstantibus sunt manifesti, subsultus tendinum non nisi attendendo animadvertuntur. Utrique vel Febriles, vel Hysterici sive Hypochondriaci, &c.

Distributio

Nempe non rarò contingit ægrotos, in principio febrium, dormientes subito convelli, atque velut exsilire, postmodum iterum in somnum relabi, iterum convulsivis hisce motibus torqueri. Sunt hi motus convulsivi admodum familiares in fe-

Motus convulsivi febriles.



febris malignis, ante Variolarum aut Morbillorum eruptionem. Motus hos solent præcedere ordinariè dolor capitis, cum pulsatione molesta, vel saltem comitari, cum somno profundiori, vel saltem propensione in somnum. Contingit etiam non rarò, ingravescente morbo, eosdem motus convulsivos postea supervenire.

Motus convulsivi hypochondriaci & hysterici.

Conjungimus jam Affectus hypochondriacos & hystericos, quandoquidem in superioribus demonstratum est, esse eundem affectum, duplici nomine gaudentem. In hisce affectibus non semper observatur Epilepsia, sed sæpius motus convulsivi. Aliquando hæc symptomata sibi mutuo succedunt, ubi graviores insultus concedunt aliquas inducias, motus convulsivi vexant, postea iterum succedunt graviora symptomata.

Quomodo motus convulsivi producantur?

Ut motuum convulsivorum natura facilius intelligatur, oportet considerare in statu sano non rarò leviores motus convulsivos observari, ubi quis ab animi pathemate vehementius est agitato, aut ubi quis brachia, aut universum corpus vehementius exercuit. Non solemus ad hæc attendere, cum inde nullum immineat periculum; verum si quis dubitet, is faciat periculum,umat gravem malleum, adigat magnâ vi cuneum, sese exerceat ad sudorem, & tum pennam in manusumat, conetur nitidas exarare literas, is experietur me vera dixisse. Memini me adfuisse ludimagistro, in arte scribendi exercitatissimo: hic solebat vetare discipulis, ne sese fatigarent, quia compertum habebat manus reddi tremulas. Et revera detur mihi maximus scribendi artifex, magnâ vi per aliquod tempus, instar *Cyclopi*, tollat brachia, & feriat, is experietur se non posse pingere more solito literas, nisi sufficienti interpositâ quiete. Quæ est hujus tremoris, aliquomodo convulsivi, ratio? Res est manifesta: quandoquidem spiritus in fibras musculares vehementius irruunt, & sanguinem in musculis detinent: quandoquidem sanguis ipse, iteratis pulsibus, ad brachia propellitur, atque musculos vehementius extendit: quandoquidem universum corpus magis incalescit: denique quandoquidem malleus, in incudem incidens, re-percussionem quandam versus brachium excitat, qui ope spi-



spirituum deferatur ad cerebrum, necessario talis motus, musculis, sanguini, spiritibus agitationem violentiorem imprimit, qui motum tremulum per aliquod tempus post se relinquit. Quid? Quod sanguis, vehementius è corde propulsus, singulis ictibus cerebrum concutiat, atque adeo spiritus veluti palpitatione quadam propellat? Non est in nostra potestate illud impedire, requiritur tempus quietis sufficiens, ut motus spirituum & sanguinis reducatur placidus. Quantum ad somnum, is influxum spirituum versus musculos intercipit. Interim non cessat, jugi secretionem, separatio spirituum. Hi ergo sensim replent tubulos cerebri medullares, & in procinctu stant, qua data porta, ruere versus partes capiti subjectas. Non mirum ergo, si sanguis, pulsibus iteratis & majoribus medullam oblongatam concutiens, per intervalla spiritus aliquos propellat versus medullam spinalem, qui in musculos subito, absque voluntatis imperio, irruentes, & sanguinis motum progressivum in illo musculo sufflamantes, eum replent, atque ita necessario subitaneos illos motus convulsivos efficiunt, quos nos nostro idiomate *schklingen* & *trekkingen* nominamus. Hi sunt vehementiores pro violentiori motu sanguinis & spirituum proportionaliter.

Dependent itaque motus convulsivi in febribus, à nimia vasorum repletionem, à nimia sanguinis agitatione atque expansione, à sanguinis dispositione inflammatoria, à spirituum animalium turbulento motu, & involuntario in musculos influxu. Non libet hisce ulterius immorari, referam tantum observationem nuperam. Puerpera è pariori lochiorum evacuatione inciderat in febrem, inquieta erat, vigilabat, si quando in somnum incideret, à convulsivis motibus vehementibus excitabatur. Laborabat è repletionem, convulsivi motus non aliam agnoscebant causam, uti è symptomatibus & causis elucebat. Curatio idem confirmavit, etenim post sectam venam, & iterum erumpentia lochia, non tantum febris ac motus convulsivi, sed & reliqua desinebant symptomata. Hæc observatio ideo magis considerari debet, quandoquidem Custos non dubitabat affirmare lochia sufficienter evacuata esse: quod tamen à veritate fuisse alienum, ostendit successus in-

In Febribus.



gens V. S. & evacuationis lochiorum iteratæ.

Quare periculum præ-  
sagiant?

Hæc est vera motuum convulsivorum in febribus explicatio. Hinc apparet, quare tales motus convulsivi argumentum præbeant, & medicum certiores reddant, de morbi magnitudine, & periculo. Si enim tanta sit sanguinis copia, si tanta expansio, ut cerebrum vehementius deprimatur, si tanta arteriarum cerebri sit pulsatio, ut non tantum cephalalgia sequatur gravis cum inquietudine, sed & turbulentus spirituum animalium motus, non est mirum, si ægrotus in maximum incurrat discrimen. Scilicet quando pressio, & agitatio sanguinis major præcedit, sanguis ipse autem, ad motum progressivum, est ineptior, cerebrum ejusque vasa replentur nimium, & oriuntur motus convulsivi. Quanto autem major est sanguinis ineptitudo ad circulationem, quanto itidem pressio major, tanto majus impendet periculum. Pressio sanguinis continuata, vitæ impedita, mortis est causa.

In Affectibus  
hypo-  
chondriacis.

In Affectibus hystericis &c. considerari debet sanguinis major tenacitas, & ad motum ineptitudo, nec non spirituum agitatio ab animi affectibus, uti in superioribus est explicatum.

Subsultus  
tendinum.

Videor mihi breviter explicasse, quomodo producantur motus convulsivi, explicandi sunt subsultus tendinum.

In Febribus.

Hos in Febribus solemus observare quando vires atteruntur, quando sanguis à naturali statu multum descivit, post dolorem capitis, Phrenitidem, & similes affectus. Nempe quando medicus carpo digitos admovet, ut exploret pulsum, tum sentit à tendinum hoc motu digitos affici, non minus quam à pulsu arteriæ. Videtur mihi *Fallopins* 586. optima ratione dixisse, hos convulsivos motus fieri *palpitatione & concussione principiorum nervorum*. Quæ autem est causa palpitationis & concussionis medullæ oblongatæ? Nulla alia, quam sanguis iteratis pulsibus per universum corpus propulsus. Videtur hoc mutuum esse ex *Hippocrate*, qui non semel *παλμῶν* meminit. Ex gr. In *Thaso Philini* uxor, non tantum convulsionibus febrilibus, sed & viribus attritis *παλμοῖς* fuit divexata ante mortem. *Hipp. Popul.* l. f. lll. ægr. 4. Causa est motus cordis, qui quando solito magis evadit manifestus, non motus, sed Palpitatio solet dici. Nempe quando sanguis dispositionem inflammatoriam,



riam, vel saltem ineptitudinem, ad promptè pertranseundum minimas arteriolarum propagines, acquisivit, is, qui è corde erumpit, pulsando irruit vehementer, ut obstaculum illud superet, unde molesta in partibus, capite, cerebro, oritur pulsatio. Pulsatio illa spiritus animales levi propulsione versus musculos propellit, unde sanguis proportionaliter, hoc est, aliquo modo, inhibetur, unde oritur momentaneus & repetitus tendinum subsultus.

Non tantum in febribus solent observari hi subsultus, sed & in affectu hypochondriaco, præcipuè ubi dolores intestinorum, aut capitis aliquamdiu vexarunt. Non semper illi locum habent, ubi vires attritæ sunt, sed aliquando ubi vires satis constant, ubi solitæ evacuationes fuerunt suppressæ. Repletio nimia est causa hujus symptomatis. A repletionem sanguis arterias carotides extendens, & pulsu impetum faciens in medullam oblongatam, spiritus propellit, atque ita subsultus tendinum efficit.

In Affectu  
hypochon-  
driaco.

Causæ utriusque hujus motus convulsivi sunt, sanguinis copia, ejusdem expansio, æstus, motus turbulentus, dispositio inflammatoria, major tenacitas, spirituum itidem agitatio nimia, & turbulentus versus musculos influxus. Hæc in superioribus satis fuerunt explicata. Confirmatur mea sententia ex eo, quem non semel refutavi, *Willisio*. Habet is c. 9. historiam satis memorabilem convulsivorum motuum, quæ meretur lectionem. In cadavere lien à quavis culpâ immunis apparuit, *ventriculus, intestina, pancreas, mesenterium* satis rectè habuerunt. In utroque autem cordis ventriculo sanguis in substantiam solidam, albidam, & carnis coctæ emulam concreverat, quæ juxta cordis & vasorum cavitates effigiata, serpentis cum caudâ multiplici & divisâ figuram nonnihil referebat. Addit *Aucler*. **QUO QUIDEM IN MULTIS POST LONGAM INVALETUDINEM DEFUNCTIS, NIHIL USITATIUS OCCURRIT.** En sanguinis dispositionem talem, qualem non uno in loco descripsi! Quod si in majoribus vasis ita concreverit post mortem, non potuit non mininas arteriolarum fibrillas cum summâ pertransire difficultate. Hinc repletio vasorum nimia, depressio cerebri, palpitatio, motus convulsivi.

Causæ.



Differentiæ.

Differentiæ hic occurrunt non contemnendæ. Nempe motus convulsivi sunt vel Febriles, vel Hysterici seu Hypochondriaci. Febriles iterum, vel statim in initio apparent, vel postmodum succedunt. Hysterici sunt vehementiores vel minus vehementes, vel usum loquelæ tollunt, vel eandem liberam relinquunt. Item, vel statim in principio, cum Epilepsiâ hystericâ vel hypochondriacâ, invadunt, vel postmodum succedunt. Hysterici iterum habent adjunctam febrem graviolem aut leviolem, vel à febre ferè sunt immunes.

Quamvis autem has species motuum convulsivorum mihi hic imprimis explicandas sumpserim, tanquam magis familiares, oportet tamen meminisci motus convulsivos non rarò esse præcursores graviorum convulsionum, vel etiam Epilepsiarum symptomaticarum: adeoque longè plures posse recenseri differentiæ. Ex. gr. Laborat aliquis puncturâ nervi, leviores motus convulsivi solent præcedere graviores: verum ea quæ de hisce Epilepsiis dicta sunt, facile applicari possunt motibus convulsivis levioribus. Qui novit qua ratione possit Epilepsiæ graviori medicinam facere, is non ignorabit, qua ratione motibus convulsivis occurret. Gravitati morbi semper proportionata debent esse remedia.

In memoriam quoque est revocandum, Affectum hystericum & Hypochondriacum aliquando dependere à partibus fluidis, aliquando à partibus solidis: sive, ut me melius explicem, hos affectus aliquando in sanguinis & spirituum vitio consistere, aliquando insuper foveri à partibus solidis malè dispositis. Ex. gr. Vexatur quis affectu hypochondriaco, postmodum incidit in diabetem, ulcus renum, vel alium aliquem affectum, symptomata affectus hypochondriaci sese exferent magis magisque. In hoc tamen casu non tantum attendendum est ad vitia partium fluidarum, sed & ad vitia partium solidarum, quandoquidem, sine harum curatione, frustra affectui hypochondriaco insudabit medicus. Non est hujus loci omnium horum vitiorum in specie meminisci, illud è propriis locis peti debet. Sufficiet monuisse hæc vitia partium solidarum vel ideo nocere, quandoquidem sanguinis crasin immutare apta nata sunt: vel etiam quatenus impedimentum & remoram injiciendo



do sanguinis circulationi, febres lentas, motum sanguinis inordinatum, pulsationem arteriarum molestant, æstum majorem, & similia producere possunt phænomena, unde symptomata hypochondriaca, quibus supponimus antea ægrotum divexatum esse, magis exacerbantur, aut etiam citius recurrunt.

Signa è descriptione satis sunt manifesta. Interim operæ pretium est monere, me aliquando observasse, in affectu hysterico, non tantum summam circa fauces infestare anxietatem, sed & tussiculam siccam convulsivam. Observavi etiam pollices utriusque manus palmis includi, licet mens constaret, quemadmodum illud in Epilepsiâ quoque habet locum. Signa aliquando variant, pro temperamento ægri, pro morbi magnitudine, & symptomatum complicatione. Si Peripneumonia, affectus in his regionibus frequentior quam vulgò creditur, jungatur, anxietates multo sunt majores, motus magis violenti. Transitus sanguinis per pulmonem difficultas, difficilia & admodum molesta producit symptomata. An vitium partium solidarum jungatur dyscrasiæ fluidarum, è signis, unicuique affectui propriis, petendum est.

Signa.

Omnes motus convulsivi sunt suspecti, tum quia gravem commotionem sanguinis & spirituum significant, tum quod sæpe præcedant graviores Epilepsias, illarumque velut initium sint. Si enim inter Vertiginem & Epilepsiam tanta sit convenientia, ut Vertigo diminuta dicatur Epilepsia, (Vid. *Montaltum* de Epilepsiâ c. 9.) quanto major erit nexus inter Convulsivos motus, & Convulsiones ipsas graviores? Hi affectus rectè dici possunt *fraterni*. Vid. *Fallopium* p. m. 586. Quod si specialius ea, quæ hæcenus explicata sunt, examinemus, Motus convulsivi in principio febrium accidentes, significant morbi vel magnitudinem, vel malignitatem, convulsivi motus ergo mali. *Hippocr.* Aph. 67. IV. ἐν τοῖσι πυρετοῖσιν οἱ ἐκ τῶν ὕπνων φόβοι ἢ σπασμοί, κακόν. & περὶ κρίσιων. VIII. 15. οἱ παλμοὶ ἐν τῇσι χερσὶ πολυχρονίᾳ πυρετῶ σημεῖον, ἢ κρίσις ξυντόμος ἐπὶ τὸ κακίον. &c. In progressu sanguinis ingentem dyscrasiam, dispositionem inflammatoriam, motum vehementem, nec non spirituum dissipationem & vires attritas: sunt

Prognosis.



ergo mali ominis. Huc spectat pronuntiatio *Hippocratis* Coac. I. II. c. XIV. §. I. 'Οι παλμῶδες δι' ὅλα. ἄρα καὶ ἀφῶνοι τελευτῶσι. Vid. quoque sequentem, ut & II. 31. κεφαλαλγὴ καὶ ῥῶδης μετὰ βάρους, ποιεῖ τι σπασμῶδες. Motus convulsivi hysterici aliquando minus periculosi, si modo medicus rectè manum operi admoveat. Ubi vires attritæ sunt, malæ. Huc spectat *Hippocratis* effatum. Prædict. I. xx. §. 15. 'Οι κατὰ κοιλίην παλμοί, ὑποχονδρίῃ ἐντάσει ὑπομάκρῳ ὀγκόδει, αἱμορραγικοί. Si vitia partium solidarum jungantur, tanto periculosior est morbus, quanto gravius partes principes sunt affectæ.

## Indicationes

Indicationes sunt plures, repletionem tollere, febrem expugnare, dispositionem sanguinis inflammatoriam, aut glutinosam corrigere, evacuationes suppressas promovere, dolores lenire, flatus discutere, motibus convulsivis mederi. Non agam de hisce omnibus ex professō, cum pleraque in superioribus sint explicata, sed tantum determinabo, qua ratione hæc sint in usum vocanda.

## Cura.

Repletio tollitur V. S. Cucurbitulis, Hirudinibus &c. V. S. habet locum ubi morbus est in principio, & vires integræ. In morbis malignis prudenter usurpanda. Olim si quis secassæt venam in metu variolarum, is creditus fuisset hominem occidisse, jam metus ille magnam partem evanuit, dummodo non fiat in principio eruptionis. In Motibus convulsivis à suppressione menstruorum &c. V. S. planè est necessaria. Si enim juxta *Hippocratem*, uti vidimus, hæ palpitantes hæmorrhagiam significant, significant etiam nimiam repletionem.

Emetica & purgationes conveniunt in principio, ubi vires constant, viribus attritis circa statum potius est quiescendum.

Quomodo febris debeat expugnari, non semel explicatum est, videri possunt quæ de Epilepsia febrili disputata sunt: eadem est ratio dispositionis sanguinis inflammatoriæ, & glutinosæ. Interim non inutile erit hic monuisse Mercurialia & *Mercurium dulcem* purgantibus additum, insignis esse usus ad humores tenaces evacuandos. Ad emendandos autem glutinosos humores non infimum locum obtinet *Rasura Ligni Guaiaci* simpliciter cum *Passulis exacınatis*, vel *Liqueritia* decocta.

Evacuationes suppressæ promovendæ sunt menses & lochia  
reli-



reliquis medentur eadem, quæ ad repletionem tollendam præscripta sunt. Dolores omnino leniendi, imprimis in affectibus hystericis aut hypochondriacis ubi vigiliæ vexant. Vigiliæ continuatæ summopere nocent, *Diascordium novum* & *Athanasia* superius præscripta, summi sunt usus.

Quomodo flatus sint discutiendi capite de Epilepsiâ hystericâ explicui. Motibus convulsivis medentur medicamenta Antispasmodica dicta, verum maximè efficacia non semper sunt ex usu: præstant temperatiora præcipuè in febribus, imo & aliquando in affectibus hystericis. Laudatur à Chymicis *Cinnabaris Antimonii*. *Ungula Alcis*, & *pulvis lumbricorum terrestrium* non contemnendi sunt usus. Ex. gr.

℞. *Ungul. Alcis.* ℥j.

*Pulv. Lumbric. terrest.* ℥ij.

F. Pulvis.

pro iij. dosibus.

Quod si affectus partium solidarum conjungatur, omnino is respiciendus est. Ita ego memini me tractâsse juvenculam, affectu hypochondriaco divexatam, quæ simul è renibus, & mictu laborabat sanguineo, huic ego cum successu præscripsi *Aquam Lactis Nephriticam Pharmacopææ Bateanæ*, ad hunc fere modum correctam:

℞. *Fol. Hederae terrest.*

*Aparines*

*Cherophyll. aa m. j.*

*Rad. Petrosel. ℥ij.*

*Fœnic. ʒvj.*

*Sem. Apii. ʒj.*

*Lactis recent. ℔ij.*

Destillantur. s. a. ad ℔ij.

Diata à præcedentibus peti potest.

## CAPUT VIGESIMUM TERTIUM.

### De Incubo.

**I**ncubus dicitur *motus potissimum respirationis & vocis interceptio, cum falso rei gravis thoraci incumbentis & suffocantis in somnio*, Descriptio  
Incubi vul-  
garis.



*ob impeditam liberam spirituum, viis obstructis, ad nervos penetrationem.*

Ejus naevi.

Quemadmodum multa fabulosa de Incubo & Succubo, & horum auctore Dæmone, apud Scriptores exstant, ita etiam hæc definitio, vel descriptio suis non caret nævis. Non intercipitur respiratio, sed difficulter & laboriosè peragitur. Quantum ad vocem, ordinariè dormientes tacent, hoc extraordinarium est, quod cum aliquando hi homines videantur sibi velle clamare, vox ipsis deficiat. Nervos in hoc casu esse obstructos, falsissimum est, spiritus per nervos penetrant, nisi enim oppressionis sensus deferretur ad cerebrum, non deluderentur talibus falsis imaginationibus ægroti. Itaque commodiorem descriptionem substituamus.

Descriptio  
magis con-  
cinna.

*Incubus est sopor gravis cum respiratione laboriosa & difficili, ob sanguinem pulmonum vasa nimium replentem, unde oritur perversa rei gravis incumbentis imaginatio.*

Ea explicatur.

Consentiunt omnes in somno vexare hoc symptoma ægrotos, magis videntur tamen attenti fuisse ad respirationem, cum tamen de hoc morbo agerent inter affectus cerebri. Dico ergo: si est affectus cerebri, quare genus in descriptione respirationis interceptio? si respirationis est symptoma, ejus tractatio pertinet ad affectus medii ventris, seu pectoris. Convicti nempe fuerunt practici, Incubum pertinere ad cerebri affectiones, in descriptione autem hoc illis excidit, adeoque genus statuerunt, quod tacite hunc morbum ad respirationis vitia ablegat. Quomodo autem respiratio potest intercipi vita illæsa? Si brevi tantum tempore intercludatur respiratio, strangulatio & suffocatio sequitur, uti aliquando in plorantibus observatum fuit, repentè extinctis. Postquam vitali hac aura infantes semel sunt usi, circulatio sanguinis per pulmones peragi non potest, nisi inspiratione atque expiratione aëris adjuvetur. Itaque cum hoc symptoma dormientes infestet, cum admodum profundè dormiant, cum anxietates illæ ingentes somnum non excutiant, uti vulgo illud obtinet, genus hujus symptomatis est sopor gravis. Somnus contingit sanis, sopor gravis morbidus est. Sopor gravis conjunctas habet cerebri depressionem majorem, uti in superioribus explicatum est. Hinc est quod videantur velle clamare, sed non pos-



possint, soporem excutere nequeunt; si enim clamarent, statim expergiscerentur.

In somno non cessat libera spirituum penetratio: motus enim cordis, respiratio, concoctio ventriculi, imo excretio lotii, & fæcum alvinarum in infantibus non cessant; sed ea quæ nobis incommodè accidunt, non tam vividè, nec distinctè percipiuntur, quandoquidem in somno est aliqualis cerebri depressio, non quidem obstruens nervos, id quod omnino esset præternaturale, sed aliquo modo comprimens medullam oblongatam, unde nervi originem ducunt. Hinc dolorem in somno non adeo molestè percipimus, nec in diarrhæâ & dysenteria irritationes intestinorum, unde hæ excretiones ad tempus cessare solent. Rogo autem, unde oritur insomnium rei gravis thoraci incumbentis, & suffocantis? Oritur proculdubio ex eo, quod sentiant ægroti difficilius peragi respirationem, quod sentiant à sanguinis mole auctâ, vel ad circulandum ineptitudine, pulmonem nimium repleti, denique, quod ab expansione majori sanguinis sentiant arteriam asperam aliquomodo comprimi. Hinc manifestum fit, anxietatis sensum ad cerebrum deferri, & repletionis sensum causam esse, cur Incubus vexet, adeoque nervos non esse obstructos.

Unde oritur oneris incumbentis sensus?

Sopor autem in hoc casu est gravis, quandoquidem cerebrum magis deprimitur, quam ordinariè in sanis assolet. Non oritur hic sopor à vapore crasso, posteriora cerebri obstruente; neque enim huc vapores penetrant, uti antea vidimus; verum eadem hic occurrit causa quæ somni naturalis, sed gravior: nempe major cerebri depressio. Depressio hæc oritur, non à vaporibus, sed à sanguine deprimente, uti alias fufius docuimus.

Causa soporis gravis.

Oritur hæc laboriosa respiratio à sanguine pulmonis vasa repleta: hæc enim potissima est causa, quamvis & aliæ accedant, uti in causarum explicatione manifestum fiet.

Et laboriosa respiratio.

Accedit imaginatio perversa rei gravis corpori & pectori incumbentis. Nempe ea quæ in somno nobis imaginamur, aliquando excitantur à vestigiis cerebro impressis, aliquando autem à partium ipsarum dispositione, sui sensum ad cerebrum in somno deferente. Cum enim spiritus animales in perenni

Imaginatio perversa.



sint motu, non mirum, si cessantibus ad tempus sensuum exter-  
norum muniis, spiritus animales, in vestigia illa incidentes  
imaginationes forment rerum præteritarum, illasque menti  
repræsentent tanquam præsentēs. Verum sæpe contingit, par-  
tium, & viscerum præcipuè, dispositiones, sui sensum ad cere-  
brum etiam in somno deferre, unde tum oriuntur imaginatio-  
nes & somnia, quæ dispositioni nostræ sunt proportionata. Ita  
infantes & pueri aliquando sentiunt stimulum ad reddendum  
lotium, imaginantur sese ludere in platea, ibidemque reddere  
lotium, atque ita lectum commingunt. Solent autem homines  
in somno sæpe multa absurda sibi repræsentare, quandoqui-  
dem à cerebro compresso, ordo ille vestigiorum cerebro inscul-  
ptorum aliquomodo immutatur, unde tum divisa conjungimus,  
conjuncta dividimus, effectus ab aliis deducimus causas, cau-  
sis aliquibus effecta tribuimus absurda. Ita hic sese res habet:  
sentiunt dormientes difficilem respirationem, imaginantur illam  
oriri ab incumbente gravi onere: hoc excutere conantur, non  
possunt autem, quandoquidem non ab externâ, sed ab interna  
causa oritur hoc malum. Imaginantur sibi se velle clamare,  
non possunt tamen, quandoquidem gravi sopore oppressi ja-  
cent, qui illos expergefieri non sinit.

Causæ  
Incubi.

Pergendum jam est ad explicationem causarum Incubi, hæ sunt  
hæ quatuor, sanguinis nimia copia, expansio ejusdem, hy-  
pochondriaca constitutio, & spirituum languor.

Sanguinis  
copia.

Sanguis nimiam copiam peccans, arterias carotides, earum-  
que innumeras ramificationes replens, cerebri corticalem sub-  
stantiam admodum premit, unde medullaris substantiæ, imò  
medullæ oblongatæ, sequitur major depressio, nervorum ad  
sensuum externorum organa disperforum major compressio, a-  
deoque somnus profundus.

Eadem illa sanguinis copia laboriosam efficit respirationem,  
& anxietates non contemnendas. Cum enim pressio sanguinis  
per pulmonem, sanguinem è majoribus vasis citissime ad capil-  
lares propellat, facile concipimus, vasa sanguinea hoc pacto re-  
pleta, iisdem ramificationes arteriæ asperæ proximè vasis accum-  
bentes, magis premere, unde necessario difficilis oritur re-  
spiratio.

Quod



Quod si ad copiam nimiam accedat expansio, jam facile concipimus, & cerebri, & pulmonis vasa magis debere repleri, & turgida evadere: unde somnus oritur profundior, atque respiratio difficilior. Hic autem expansionem sanguinis insignem concurrere, omnes circumstantiæ evincunt. Expansio. Decumbit æger in lecto plumis animalium referto, stragulis, aliquando nimis, est tectus, hinc universum incalescit corpus, & sanguis admodum dilatatur. Hinc fit, quod illi, qui è sanguinis copia interdum nullam percipiunt noxam, à nimia illa dilatatione sanguinis nocte incubo infestentur.

Accedit & alia ratio, quare nocte hoc malum infestet, quia scilicet decubitus somnum promovet: etenim situs corporis est fere horizontalis, adeo ut sanguis facilius ad cerebrum propellatur. Non necesse habet perpendiculariter adscendere, uti illud vigilantibus accidit. Quod si æger supinus dormiat, magis laborat, præcipue si caput sit declivi loco situm. Cum enim cerebrum humanum sit peramplum, & viscus molle figuræ ovalis, si quispiam supinus decumbat, partes cerebri sibi mutuo magis incumbunt, cerebellum & spinalis medulla magis comprimuntur. Non tantum figura ovalis hic consideranda, sed & medullæ oblongatæ, post protuberantiam annularem vertebrae colli subituræ, incurvatio, & flexus. Post protuberantiam annularem autem nervi paris vagi oriuntur.

Decubitum etiam respirationem difficiliorem reddere, apparet ex Astmate & Orthopnæa; etenim hi ægroti suffocarentur, nisi corpore essent elevato. Decubitus.

Dixi etiam Hypochondriacam constitutionem esse causam Incubi. Hypochondriacam affectionem veteres considerarunt tanquam affectionem flatulentem, & merito; tales enim ægroti, vel hoc temperamento præditi solent habere intestina à flatibus expansa, potissimum nocte, ubi constrictio corporis abest. Ab hac intumescentiâ intestinorum à flatibus, diaphragmatis explicatio impeditur, adeoque inspiratio est minor, pulmones non ita libere sese expandunt, adeoque oppressionis oritur sensus. Hypochondriaca constitutio.

Solet quoque hypochondriacorum sanguis ad circulationem minus esse aptus, quippe glutinosior, hinc hi homines solent



esse anhelosi. In hoc casu itaque, talis sanguis à lecti calore & onere stragulorum expansus, atque minus aptus progressivo motui per minimas pulmonis arteriolas absolvendo, pulmonem replet, anxietates, excitat, quarum sensus ad cerebrum in somno delatus falsam imaginationem efficit ponderis incumben-  
tis, adeoque Incubum producit.

Spirituum  
languor.

Accedit & spirituum languor, multis hominibus, præcipuè Hypochondriacis familiaris: est enim inter sanguinem & spiritus animales quædam veluti harmonia. Hic spirituum languor etiam soporis profundi est causa, quia hi spiritus depressioni cerebri minus resistunt, & ratio, quare, hoc malo affecti, ab anxietatibus non evigilent. Sentiunt quippe oppressionem, illi jungunt perversam imaginationem rei ponderosæ incumben-  
tis, conantur illam excutere, conantur clamare; verum cum cerebrum ordinarie magis sit depressum, cum spirituum adsit languor, non facile evigilant, luctantur cum hac imaginatione.

Differentiæ.

Differentiæ hujus morbi a circumstantiis petuntur, est enim hic morbus vel recens vel inveteratus, mares vel fœminas affligens, gravior vel levior.

Signa.

Signis in hoc morbo non est opus, cognoscitur enim è relatione ægtoti: nec putem alia ratione innotescere posse. Novi insomnia turbulenta adstanti, vel adjacenti posse fieri manifesta, in tali enim casu turbulentus somnus, & respiratio concitata, nec æqualis, uti in somno naturali solet, observantur; verum an talem dormientem insomnium grave, an incubus infestet, difficile judicatu est: nisi forsan quis gnarus aliquem incubo laborare, & observans illum diu torqueri difficili respiratione, & veluti laborare in somno, exinde conjecturam capiat illum iterum vexare incubo. Ita ego non ita pridem tractavi ægrotum Incubo laborantem, quem uxor anxia, ejus lateri accumbens non semel excitaverat, cum animadverteret maritum in somno valdè laborare. Sanguinis autem copię, expansionis, hypochondriacę constitutionis signa aliunde peti debent. Spirituum languor è functionum animalium hebetudine, loquela tarda, motu languido, somnolentia, & somno profundiori facile cognoscitur.

Prognosis.

Prognosis ita institui potest. Affectus non est admodum  
pe-



periculosus si sit recens, aut levior species : verum si sit gravior, si ingens adsit spirituum languor, Apoplexiæ, vel Lethargi, aut alius affectus soporosi potest esse prænuncius. Quæ autem sit connexio inter omnes hosce affectus, è meâ demum explicatione putem manifestissimè intelligi. Itaque illi tempestivè occurrendum.

Indicationes sunt sanguinis copiam imminuere, nimiam expansionem corrigere, morbum hypochondriacum expugnare, spiritus animales tardiores excitare. Indicationes

De Cura sanguinis nimix copix sæpius agimus, quam hic expetere nec libet, nec necessarium. Cura.

Expansioni sanguinis quomodo in febribus obviam eatur, alibi explicatur. Expansio à sanguinis lentore ortum habens, imprimis incidentibus & attenuantibus emendanda est. Conveniunt itaque in hoc casu, medicamenta tenuium partium imprimis olea stillatitia & salia volatilia : *Balsamis Sulphuris succinatus, juniperinus. Elixir proprietatis. Ex. gr.*

℞. *Balsam. Sulphur. juniperin.* ʒij.

Sumat æger mane jejuno stomacho, & circa vesperam, coctione absolutâ, octo vel decem guttulas.

Conveniunt quoque in hoc casu medicamenta antiscorbutica, *Spir. Cochlearia, ejusdem ut & Nasturtii aquatici succus* : ut & *amaricantia* & ventriculum corroborantia, *Trifolium Aquaticum, Carduus benedictus, summitates Centaurii minoris, Absinthii.* Possunt ex his parari vina medicata, extracta, cerevisiæ medicatæ &c.

Dixi huic expansioni incidentibus & attenuantibus esse occurrendum, quandoquidem huic morbo in paroxysmo ipso non opus est fieri medicinam, si enim excitatur æger, paroxysmus est superatus, itaque causæ expansionis imprimis respiciendæ. Aliter sese res habet in febribus.

Quod si ventriculi repletio accedat is ab illo onere erit liberandus.

Interim causæ externæ malum hoc augentes sunt removendæ, decubitus supinus, nimia stragulorum injectio, cœna liberalior.



*Ut sis nocte levis, sit tibi cæna brevis.*

Hypochondriacæ affectionis cura in præcedentibus tradita est. In hoc plurimum peccari existimo, quod infantes nimium supini collocentur. Verum ea cura rarò matres rarius nutrices sollicitat, cum tamen non sit susque deque habendus decubitus.

Spirituum excitatio quomodo fieri debeat è superioribus patatur.

In diæta, ingluvies & crapula vitari debet. Cæna aliquando omittenda. Exercitium amplectendum.

## CAPUT VIGESIMUM QUARTUM.

### *De Catalepsi.*

De Catalepsi diversæ opiniones.

**H***ercules Saxonia* Catalepsin vocat affectum rarissimum & cognitu difficillimum Prælect. Pract. p. 1. c. 12. & addit Græcos & Latinos antiquos hujus naturam non cognovisse: subjungit *Celium Aurelianum* & *Aetium* loco Catalepsios descripsisse Coma vigil vel soporiferum. *Henricus ab Heers* consentit, & rectè observat apud plerosque practicos esse altum silentium catalepticorum quos ipsi viderunt. *Petrus Salins* diversus, *Donatum ab Altomari* carpit, quod ex *Aetio* symptomata transcribat, cum tamen *Aetius* cum *Galeno* non concordet in essentia hujus morbi. Inter recentiores *Fernelius* duo habet exempla Catalepsios, quorum primum veræ Catochem exemplum existimat *Hercules Saxonia*, alterum autem Comatis soporiferi non Catalepsios. Vid. eund. Prælect. Pract. p. 1. c. 12. Recentiores, descriptionem ab antiquis mutuati, suo more de causa disputant. Vid. *Dolei* Encyclopædiam.

Disputant etiam de nomine, an Catoche & Catalepsis idem sit affectus? deinde latinè affectum vocant Congelationem: unde *Forestus* eos, qui ab intensissimo frigore extincti fuerunt, tanquam Catalepticos recenset.

Hæc ideo in antecessum præmittere volui, ut constet, inter practicos non convenire de naturâ hujus affectus; cumque re-



reliqui non dubitaverint suas sententias proponere, nemini mirum videri debet, si & ego libere meam opinionem depromam.

Equidem semper ejus fui opinionis, ea, quæ diuturnus usus, tum circa morborum cognitionem, tum in praxi, certa & utilia esse docuit, non esse convellenda: verum cum diligentior attentio, & observatio minimè dubia ostenderit, ex præjudicio auctores quædam memoriæ prodidisse, unicuique liberum est, ad experientiæ trutinam, ea quæ tradita sunt expendere: Secundæ curæ hoc pacto plerumque meliores esse solent.

Non est temerè recedendum ab iis, quæ usus docuit.

In morbis ordinariis, ex iis quæ etiamnum fiunt, judicium ferre possumus eorum, quæ antea observata sunt, & à scriptoribus memoriæ prodita. Quemadmodum homines non in arbores, nec cruor in florem mutatur, ita non exuunt morbi pristinum ingenium.

Constitutio anni, varietas climatum, morbi epidemii aliquando aliquid habent singulare; verum ubi agitur de morbis ordinariis, observationes quæ hodie etiamnum in praxi occurrunt, debent convenire cum iis, quæ in medicorum scriptis reperiuntur, alias evadunt admodum suspectæ. Si quis mihi narret se tali vel tali remedio, brevi temporis spatio, morbum curâsse, ego autem idem in usum vocem, nec effectum eundem, etiam repetitis vicibus experiar, licet mihi dubitare, an bonâ fide suas observationes in chartam conjecerit Auctor. Quæ enim alia est praxeos evidentia, nisi quæ ab usu & experientia depromitur? Admiratio in affectibus rarius occurrentibus etiam aliquando efficit, ut scriptor à se visa amplifcet, & verbis extollat. Homines mira & stupenda narrare gestiunt: quia scilicet existimant sese magnam estimationem consequuturos, si portentosa narrent. Non semper à vulgari hoc vitio immunes sunt medici, præcipuè ubi symptoma occurrit stupendum, de quo è lectione Auctorum magnam animo conceperunt opinionem.

Non est ergo necessarium adhærere aliorum opinionibus & placitis, quando clarissimè constat, ex præjudicio quædam posteris esse relicta, quæ à recto veritatis tramite declinant.

Vidi ego & accurate observavi Catalepticum, cujus Historiam

Cataleptici  
Historia.



riam descripsi in *Cogitationibus meis de Instauratione medicinae* p. 303. Verum, fatebor enim liberè, diu ipse nescivi hunc affectum fuisse Catalepsin, præjudiciis auctorum occæcatus, adeoque nec affectui tum temporis imposui nomen, à vehementi animi pathemate eundem ortum duxisse fideliter narrans. præjudicium autem quod me veritatem cernere vetebat, erat descriptio apud auctores passim obvia, scilicet, ægrotos in eodem situ, in quo erant rigere, neque sese movere, hæc autem in hoc ægroto secus habebant; si enim illum quispiam voluisset erigere, concidisset.

Quæ ad Catalepsios explicationem requirantur?

Ut ergo Catalepsios clariorem formemus conceptum ante omnia determinandum est, in quo essentia hujus sive morbi sive symptomatis consistat? postmodum quæ huic morbo sunt accidentalia scrutandum erit?

In quo consistat ejus essentia?

Dico ergo, essentia hujus morbi consistit in sensuum omnium præhensione, ut cum *Fonstano* loquar. Evinco illud ex omnium fere practicorum descriptionibus. *Sennertus* vocat sensuum internorum & externorum cessationum: *Jac. Sylvius* ait, cum Apoplexia Catalepsin habere communem sensus & motus privationem. *Rondeletius* affirmat, esse omnium sensuum comprehensionem, nec multum à Caro & Lethargo distare, putatque eum similem & simili modo fieri quo Apoplexia.

Non lubet, nec est necessarium, plurium auctorum descriptiones adducere, sufficit sensuum præhensionem observari ordinariè. Illud nomen ipsum *καταλήψεως* & *κατοχῆς* sive *κατόχης* indicat. Concinunt Latini, quando dixerunt *detensionem*, *deprehensionem*, *occupationem*. *Hippocrates* vocabulo *ἐκστάσεως* utitur, quod apprimè huic morbo mihi convenire videtur. Vide *Sennertum* qui & *Scaligerum* citat. Fortè etiam *Hippocrati* dicitur *ἐκπληξις*.

Cum itaque Practicorum consensus, cum comparatio hujus morbi cum Lethargo, Caro, Apoplexia, cum ipsa nominis Etymologia, sensuum subitanæ privationem huic morbo tribuant, in hoc essentiam hujus morbi consistere merito statuimus.

Objectioni solutio.

Neque obstat quod *Galenus* referat historiam juvenis, qui cum absque sensu & motu jaceret, postmodum tamen narrabat



ea quæ essent acta. Non fuit ea vera Catalepsis, vel ad minimum levior ejus species. Ego memini me tractasse matronam eodem modo, quo *Galenus* narrat, affectam, quam ego, & reliqui omnes sensu destitutam judicabamus. Hæc tamen omnium, quæ contigerant in paroxysmo, erat memor, quamvis nulla posset sensus indicia proferre: erat autem hic affectus, suffocatio hysterica. Ita facile potest decipi medicus, si aliter judicet de affectu quam oportebat, potest alios decipere, si affectui aliud imponat nomen, quam id quod essentia ejus convenit.

Inquirendum ulterius est, an in hoc morbo motus privatio sit æque de essentia morbi, atque privatio sensus? Dico ego, motus non potest propriè dici abolitus, ubi corpus manet erectum, ubi muscoli sunt tensi. Quemadmodum in Tetano motus non dicitur abolitus, ita juxta eorum sententiam, qui dicunt ægrum catalepsi correptum remanere in eodem situ, revera motus non potest dici abolitus, quoniam tensio musculorum non cessat. Deinde potest dari Catalepsis, in quo motus non abest, quemadmodum ex exemplo à me viso clarissimè patet. Laborabat revera juvenis ille Catalepsi, & quidem vehementi, omnium sensuum exercitio privatus; idem autem mihi usu venit, quod *Henrico ab Heers*, dubius & anxius hærebam in principio, quippe alium formaveram Catalepsios conceptum, ex iis quæ apud Auctores repereram.

An privatio  
motus quo-  
que sit de  
essentia hu-  
jus affectus?

Tandem inquirendum est, an illud omnino sit de essentia Morbi, stare, vel remanere in eodem statu, quo quis fuit correptus, & retinere illum statum membrorum, quem accedenti placuit dare, prout Auctores referunt? Nego illud omnino esse de essentia morbi. Antequam autem probem meam sententiam, & causam erroris detegam, explicabo quid velim. Non nego aliquem Catalepsi correptum in principio posse obstupescere, & immotum perstare, verum si malum perseveret, si ingravescat, nego illum diu posse ita erectum manere, multo minus posse retinere eundem situm: manus ex. gr. elevetur, vel extendatur, non remanebit in eo situ, quem placuit adstanti, pro libitu, ipsi tribuere.

An remane-  
re in eodem  
statu sit de  
essentiâ hu-  
jus morbi?

Probo meam sententiam hoc argumento. Quodcumque est

Cccc

de



de essentia alicujus morbi illud semper & necessario adest, atqui talis rigiditas & situs pro lubitu adstantis non semper adest. ERGO. Quandoquidem major negari non potest, probanda est minor. Minor probatur ex exemplo, quod mihi videre contigit, is enim ægrotus decumbebat, musculos minimè habebat tensos, & si quis illum voluisset in pedes erigere, statim in terram fuisset delapsus. Probatur idem ex exemplo *Rondeletii*, nova illa nupta quotiescumque maritus occurreret, & paroxysmum metueret, non manebat erecta, sed amabat sedere, proculdubio quia casum metuebat. Sufficere possunt hæc duo exempla probationi, una enim instantia in contrarium producta efficit, ut propositio non possit censerì universaliter vera. Juvat tamen hanc rem ulterius evincere, ut morbus hic, explicatu difficillimus habitus, luce meridianâ clarius innotescat. Dico ergo, Auctores comparant hunc morbum cum Apoplexia, Caro & Lethargo, eo ipso non obscurè fatentes membra jace-re resoluta. Quod si tensionem musculorum ad hujus morbi essentiam constituendam necessariam judicassent, potius debuissent eum cum Spasmo comparare, hic enim Morbus solus & unicus est inter morbos cerebri, rigiditatem musculorum habens comitem: quamquam ne sic quidem explicari posset, quomodo membra obsequerentur motui, quem adstant imprimere vellet. Quando dico unicum esse inter morbos cerebri, intelligo morbos in quibus motus voluntarius perit, novi enim in Maniâ, Melancholia, Phrenitide motum voluntarium esse superstitem. In hoc morbo sensus perit, motus voluntarius cessat, juxta horum auctorum sententiam, & tamen musculos volunt robur suum retinere, non voluntati, sed impressioni externæ obsequentes, quod mihi quidem videtur à veritate longe remotum.

An experi-  
entia non  
sit habenda  
fides?

Dicet aliquis, an ergo experientia refragaris? an relationibus auctorum non habes fidem? Respondeo me experientia minimè refragari, verum ab experientia melius edoctum, cœpisse rem accuratius examinare. Nolo etiam relationibus auctorum denegare fidem, ubi observationes sunt fidæ, & multiplices, & sibi mutuo omnes consentientes, verum ubi manifestum evadit homines præjudico imbutos sibi mutuo contradicere, &

hy-



hypothesi convenientia in chartam coniecisse, tum licet cum grano salis eorum effata & dogmata recipere.

Ut ergo hæc res fiat planior, explicanda sunt præjudicia, & relationum mirarum fontes, è quibus hæ narratiunculæ profluxerunt. Errorum fontes.

1. Est ignorantia, quæ efficit, ut quoties aliquid mirandum oculis hominum objicitur, solent semper spectatores rem mirum in modum augere. Non est necesse illud multis probare, quicumque in vitâ communi attendere solitus est ad relationes passim obvias, in scit me hic verissimum narrare. Expressit illud eleganter *Erasmus* in colloquiis.

2. Est nomenclatura, dicitur hic morbus *Congelatio*, *Catalepsis*, *Detensio*, itaque ne observationes ab appellatione morbi convenirent discreparent, historiæ ægrotorum ita fuerunt explicandæ, ut cum naturâ & Etymologiâ vocis exactè convenirent.

3. Est Veneratio *Galen*i, quem citare passim soliti fuerunt medici, cum cujus placitis convenire imprimis judicarunt egregium, cum ille itaque talem narrasset hujus morbi historiam, enitendum erat, ut observationes observationibus exactè quadrarent.

4. Est præjudicium à causa morbi petatum, quam statuerunt plerique congelationem spirituum animalium, rem fingentes quæ & veritati & naturæ spirituum animalium planè repugnat. An sol potest carere lumine? An calor motu intestino? An liquores possunt remanere liquores, & fluiditatem amittere? An aër potest congelari? Æque absurdam rem statuit, qui existimat spiritus animales posse congelari. Huic ergo falsissimo præjudicio præoccupati, hypothesi convenientia symptomata enarrare auctoribus fuit volupe.

5. Est Philautia, quæ hominibus persuadet, pulchrum esse omnium morborum exempla eorum oculis subjecta, eorum curæ esse demandata. Itaque cum tales observationes, quales narrantur à quibusdam ipsis, nunquam occurrissent, ab aliis tradita, tanquam sua, memoriæ prodiderunt. Ita invaluit error; eadem de Catalepsi narrantur à pluribus; mutatis nominibus eadem agitur fabula. Deinde sibi imaginantur multi, se magni fieri, si mira & stupenda se vidisse narrent: itaque



quilibet gestit amplificare rem, verba sonora, & circumstantias adjicere, ut lector miretur scriptorem. Hic perversus sui ipsius amor oppidò est familiaris, & errorum causa non contemnenda, uti statim in principio etiam monui.

6. Accedit & alia causa, nempe vestigia similium fabularum cerebro, à prima juventute, impressa, inter quæ non minimum locum obtinent ea, quæ de *Medusæ* capite referunt *Poetae*. Itaque cum hic Morbus attonitum redderet ægrotum, quæ apud *Poetas* legerant etiam huic morbo accommodarunt. Cum ego cogitationes meas de hoc morbo ante aliquot annos in chartas conjicerem, hunc errorem detexi, hoc exemplum adduxi. Jam mea ad incudem revocans, & cum dogmatibus aliorum practicatorum conferens, invenio *Forestum* & *Sennertum* idem hoc exemplum, eandem adducere fabulam, ad explicationem hujus morbi, id quod me admodum in mea sententia confirmavit. Quamvis enim illi seriò, & explicationis gratia, adduxerint, ego autem refellendi causa, tamen manifestum est, quando tales fabulæ menti obversantur, aliquid ex illis fabulis facile in Medicinam derivari potuisse.

Hisce fabulis innutriebantur gentiles: harum frequens apud ipsos mentio. Pueri & juvenes portentosa, fabulas, historias fabulosas, audire & legere gestiunt. *Ovidii* *Metamorphosis* etiamnum prælegitur discipulis, memoriæ mandatur: Placent circumscriptiones stuporis:

*Non aliter stupui quam qui Jovis ignibus ictus  
Vivit, & est vitæ nescius ipse suæ.*

Has autem fabulas satis profunda sui vestigia relinquere, cui libet est manifestum.

Jam autem novimus testam. servare diu odorem, quo semel est recens imbuta.

Fabulæ var.  
cia.

Si quis autem putet à medicis nihil nisi vera & solida posteritati esse tradita, si quis fabulis in Medicina non esse relictum locum existimet, is meo judicio longe fallitur. Omitto enim fabulas de sexaginta quinque infantibus uno partu editis, cujus etiamnum multæ circumstantiæ narrantur, & pelves in quibus fuerunt baptizati (nisi fallor) ostenduntur. Omitto fabu-  
bus



las de Sternutatione, aliquando Epidemicâ & lethali, cujus alio loco feci mentionem. Quotusquique est quem fugiat narratiunculæ de *molis* viventibus, currentibus, volantibus, evadentibus, aut sese abscondentibus? Nonne etiamnum creditur, si quis galeatus in lucem prodeat, eum futura posse prædicere? Quid? quod talis possessor galeæ ab ictu sclopetorum statuatur esse tutus?

Explicui, uti mihi videtur, clarissimè qua ratione contigerit, ut in Medicorum relationibus de Catalepsi quæpiam irrepperint, non satis cum veritate, observationibus hodiernis & ratione convenientia. Hæc tanto magis assensum extorquebunt, si quis diligenter perpenderit, non unam, aut alteram harum causarum, sed plures, imo omnes habuisse apud aliquos scriptores locum. Omnes, quos mihi saltem videre contigit, circa hunc morbum cæcutiunt: nomenclatura hujus morbi vulgaris est: veneratio *Galen*i diu obtinuit: plerique spirituum congelationem, vel aliquid analogum, aut æque absurdum statuunt: omnes magis vel minus Philautiâ sunt præoccupati: omnium mentes fabulis sunt imbuti. Itaque causis hisce concurrentibus, non debet videri mirum, si medici detentionem in illo statu, in quo æger erat, ubi morbo hoc corriperebatur, ubique & ultra veritatem narraverint.

Causarum complicatio

Hæc est ratio, quare Medici levioris Catalepseos speciem non animadverterint, graviores causas non intellexerint, ideoque res hæc à me aliquanto latius fuit deducenda, ut hujus affectus natura imposteriorum melius intelligatur.

Pergo ad naturam Catalepsios explicandam hac descriptione: Catalepsis seu Catochus vulgaris, sive Extasis, est subita *sensuum omnium privatio seu stupor repentinus, ex animi commotione, vel ejusdem intensione vehementi, absque præviâ spirituum, sanguinis, aut cerebri prava dispositione, aut respiratione difficili hominem invadens.*

Descriptio Catalepsios.

Catalepsin & Catochum eundem facio morbum, communem opinionem secutus, ut inutilem de nomine disputationem evitarem. Dixi etiam eundem morbum esse Extasin, probè gnarus hoc nomine illam mentis alienationem designari, quæ Divinitus contigit, verum naturalis *ἐκστάσις*, seu Catalepsis

Catalepsis & Catochus



eadem ratio. Quemadmodum *Propheta* aut *Apostoli* immediatè à Deo extra sese rapti fuerunt, ut Deus illis aliquid extraordinario modo significaret, ita hi à causis naturalibus sensuum omnium exercitio privantur, specimen exhibitori humanæ fragilitatis. Verum quandoquidem unum nomen huic morbo sufficere sum arbitratus, in superioribus explicui, cui affectui *Catochi* & ἐκτάσεως nomen in specie possit tribui. Hic tamen explicanda erat vulgaris nomenclatura.

Est subita  
omnium  
sensuum  
privatio.

Dixi subitam esse privationem omnium sensuum, quandoquidem non minus in hoc morbo quam in *Apoplexia*, *Caro* &c. omnium sensuum exercitio privantur, non vident, non audiunt, ad interrogata minime respondent ægroti. Quando nempe gravissima affligit species, alias in levioribus insultibus, postea describendis, privatio hæc est minor, nec ita manifesta.

Sensuum privatio in hoc casu contingit, non ab aliquo vicio in sensibus exterioribus; verum quia mens aliis cogitationibus est intenta, vel à passionibus, corpus vehementer commotionibus, è suâ sede & statu, ut ita dicam, dimota.

Stupor re-  
pentinus.

Explicationis gratiâ addidi, posse genus statui stuporem repentinum, quandoquidem revera *Cataleptici* à subitanè illa menti oblata agitatione attoniti stupent. Expresserunt illud sæpius poëtæ uti superius vidimus. Stuporis repentini nomen merentur leviores *Catalepsios* species, in quibus omnium sensuum privatio non est ita manifesta. Quandoquidem ego existimo *Catalepseos* gradum non unum dari, videbatur conveniens duplex genus expressisse, vulgari opinioni magis accommodatum, & meæ opinioni conveniens.

Ex animi  
commo-  
tione.

Dixi hunc affectum oriri ex animi commotione, vel intensione vehemente, duplex enim est causa *Catalepsios*, vel animi commotio, vel intensio: duplex etiam gradus *Catalepsios*, vel enim ægri ita stupent, ut nullis clamoribus, vel licitationibus ad sese redeant, vel etiam, ut ab illa mentis alienatione possint revocari. Quibus fortè non incommode posset jungi medius quidam gradus, quod videantur quidem respondere ad interrogata, & loqui, adeo tamen mens est alienata, ut postero die nihil meminerint eorum, quæ gesta sunt: id quod mihi contigit aliquando videre in foemina vehemente animi pathemate



mate affectâ, ad quam cum vesperi essem advocatus, respondit quidem ad interrogata, postero die autem ad sese rediens, prorsus erat ignara me ipsi adfuisse, ignara etiam eorum quæ circa sese erant acta.

Probè hoc est tenendum, non unam dari Catalepsios speciem, ita enim determinari potest illa quæstio, cujus in superioribus feci mentionem, num scilicet manere in eodem situ, in quo æger fuit ante tubitam præhensionem, sit de essentia hujus morbi? Dixi non esse de essentiâ hujus morbi, etenim in levioribus speciebus, non habet locum. In principio potest aliquis immotus permanere, verum ubi affectus est gravior, & diutius perseverat, cogetur Catalepticus decumbere, uti in exemplo, à me allato, luculentissime patet.

Intensio animi leviolem producit Catalepsin, quandoquidem Intensio animi. passiones sanguinem validè commoventes non conjunguntur. Levioris Catalepsios species mihi videtur fuisse *Archimedis*, qui ita speculationibus Mathematicis erat intentus, ut urbem *Syracusas ab hostibus* esse captam non senserit, neque tum quidem intensio animi discussa fuerit, cum milites in eam irruerent. Quamvis enim ad Catalepsin hæc non referatur historia, revera tamen levior fuit Catalepsis. Verum ita ordinariè res agitur, leviores species sicco pede transire solemus, ubi gradus est intensior, tum stupemus, & miramur. Ego autem hoc exemplum consulto adduxi ut pateat, quid possit vehemens animi intensio. Illud etiam quilibet novit, qui vel speculationibus Mathematicis, vel supputationibus difficilibus, aut tandem meditationibus profundis fuit immersus, magnum aliquando excitari strepitum, clamores per plateas, sonitum campanarum, & similia, quorum omnium nihil animadvertat ille, qui ad rem aliquam seriam animum habet admodum attentum. Ex levioribus enim principiis, & exemplis intensiõis animi obviis, de gravioribus speciebus faciendum est judicium. Ne autem hoc aliter interpretetur quispiam atque ego sentio, non dico animi hanc intensiõem esse Catalepsin, juxta opinionem vulgarem, aut hoc nomine appellari; verum quandoquidem intensio mentis potest ita nos impeditos tenere, ut multa contingant, quorum sensus nos minimè afficit, Catalepsios nomen in latiori signifi-



ficatione huic stupori etiam posse tribui statuo. Si quis aliud esse excogitandum vocabulum magis conveniens judicet, is suo fruatur arbitrio. Saltem affectum, quo correptus fuit *Johannes Scotus*, bis mortuus, uti ajunt, semel sepultus, appellandum esse Catalepsi, non Apoplexiam mihi videtur manifestissimum. Si causæ graviores cum stupore jungantur, excitabitur Catalepsis gravior.

Gravior  
species.

Gravior Catalepsios species non contingit, nisi animi Pathema insigne accedat. Attentio quidem mentem à sensuum exteriorum exercitiis revocat, non autem ita spiritus animales agitat, aut sanguinem commovet, ut in extasi rapiat. Si vehemens animi commotio jungatur, tum nec clamor, nec vellicatio, nec quicquam aliud præhensos revocare valet.

Homines  
invadit.

Quæ porro in descriptione adduntur ad causarum explicationem pertinent, nisi quod in fine additum sit, hominem hunc affectum invadere, idque duplici de causâ: tum ut constet, me de morbis hominum, non brutorum agere, tum etiam ut innuerem, hoc symptoma non nisi hominem posse invadere, quandoquidem oritur ex arctissima mentis cum corpore unione. Vidit hoc *Regius* in sua praxi, qui convenientissimè suæ hypothese statuit, glandulam pinealem esse affectam. Revera hic affectus oritur ex eo, quod mens ab objecto insolito, admirationem insignem, & passionem excitante, quasi è sua sede & statu dimoveatur. Verum in superioribus vidimus, quid de sensorio communi sit sentiendum, adeoque patet quam necessarium fuerit errorem ferè universalem corrigere, quamvis propriè id possit videri Philosophicum. Cerebrum non est malè, hoc est, morbosè affectum, uti in Apoplexia, Caro, Epilepsia &c. solet. Alias non potest etiam cerebrum bene dispositum dici, ubi quis Catalepsi corripitur. Respiratio quoque minimè est laboriosa, nullæ adsunt sequelæ, quæ affectus graviores comitari solent. Ideo facile medicus se impeditum sentit, ubi primâ vice ad talem vocatur ægrum.

Provocatio  
ad experi-  
entiam.

Hæc ita revera sese habere experientiâ constat. Provoco ad hanc, & obtestor omnes qui hæc mea legent, ut absque præjudicio hæc meditentur, & ad animum revocent. Inspiciatur *Galenus*, *Fernelius*, *Montanius*, apparebit exempla Cataleptico-  
rum



rum ex intensione animi insigni habuisse ortum : conferantur cum iis quæ de *Archimede* dixi, & apparebit, intensiorem animi mentem à sensibus abducentem, esse causam Catalepsios. Cum autem stupendum affectum cernrent, nec intensiorem animi aut passionis naturam, nec conjunctionem mentis cum corpore intelligerent, putarunt etiam causas stupendas, & à veritate omnino alienas excogitandas, & effingendas esse; nempe spirituum congelationem, & similia. Cumque stuporis ea sit natura, ut homines instar stipitis, aut statuæ, immotos reddat, putarunt in hac rigiditate essentiam hujus pathematis consistere. Rigiditas in convulsionibus, & in aliis affectibus aliquando contingit, verum tum membra flecti non possunt: in hoc casu rigiditatem rigiditate carentem statuerunt. In Catalepsi manere in eodem statu per aliquod tempus, est consequens attonitæ mentis, nec affectus hic aliquomodo ad convulsiones potest referri. Stuporis autem attoniti contemplatio fecit, ut quædam de situ & rigiditate miranda Auctores, ut solet, præter veritatem affingerent.

Ex iis, quæ hætenus disputata, sunt luce meridiana clarius apparet, nullam præcessisse pravam dispositionem cerebri sanguinis, spirituum; si enim hæc concurrerent, aut Apoplexia, aut affectus comatosus, aut convulsivus, aut quippiam simile fuisset exortum; verum Catalepsis sanos subito præhendit, & hæc est ratio, quare expresse voluerim illud monere. Neque putem efficacius aliquid posse excogitari, ad præjudicia, quæ è lectione practitorum alicujus animum dudum præoccupaverunt, prorsus evellenda, quam si attentè consideret exempla Catalepticorum referri non de morbofis, sed de sanis subito correptis. Addendum est, Catalepticos, simulac mentis illæ tenebræ sunt discussæ, statim iterum restitui, id quod ex exemplo à me viso constat, ille enim juvenis V.S. excitatus, statim omnia narravit, atque ad munia ordinaria reversus est. *Johannes Scotus*, sepulturæ mandatus, postea à Catalepsi sponte est restitutus, uti ex indiciis apparuit. Iterum dico, nulla præcessit hic prava cerebri dispositio, nulla spirituum congelatio. Alia est ratio Catalepsios spuria, de qua in differentiis.

Nulla præcessit prava cerebri dispositio.

Objiciet fortasse aliquis: juxta tuam sententiam affectus hic

D d d d

Objectionis solutio.  
tan-



tantum esset affectus mentis, non corporis: atque corporis sensoria officio suo non funguntur, nec etiam membra, adeoque hæc sententia admitti non potest. Est hæc objectio magni momenti, adeoque accuratè examinanda.

Dixi ergo, etiamnum accuratè defendo, nullam prægressam esse pravam cerebri dispositionem, sanguinis, spirituum: verum concedo in ipsâ illâ præhensione, & insultu adest dispositionem præternaturalem harum partium. Quando de sensu agimus, agimus de corporis in mentem actione, & de perceptione, quæ in mente à motu corporeo excitatur. In eo enim mentis cum corpore conjunctio consistit, ut mens affici non possit, quin corpus simul afficiatur, nec corpus quin simul afficiatur mens. Aliud intelligimus quando de cogitatione loquimur, aliud quando de sensu. Cogitatio est de essentiâ mentis, sentire unionem mentis cum corpore involvit: Itaque explicandum restat, quæ sit illa corporea dispositio Catalepsin producat?

Hic autem opus est magna animi intensione, revocanda sunt in memoriam quæ de somno, vigilia, Epilepsia &c. passim disputavi, ut hæc intelligatur: ego dabo operam, ut clare me explicem. Ut mens sit præsens, vigilans, judicans, ratiocinatione exacta utens, necessum est, ut spiritus animales sint satis mobiles, expandentes medullam oblongatam & nervos per corpus distributos, ita enim motus sensuum omnium afficiunt mentem, mens percipit, intelligit, ratiocinatur. Non debet cerebrum nimis deprimi, ita enim homo fit somnolentus, vel in somnum præternaturalem labitur æger: non debet opprimi cerebrum, ne oriatur Apoplexia, non debent arteriæ carotides nimium repleri, & nervos opticos, oculi motores &c. comprimere, ne sensus exteriores intercipientur, & oriatur aut Vertigo, aut Epilepsia. Non debent etiam spiritus nimium agitari, ne oriantur vigiliæ, spirituum defatigatio, dissipatio, Phrenitis, Mania &c. tum enim spirituum agitatio est tanta, ut dispositio illa ad somnum non possit sedare agitationem illam spirituum, adeoque blandam cerebri compressionem producere, quæ in nobis somnum efficit. In Catalepsi alia est ratio: nempe admiratio & attentio efficit, ut pauci spiritus versus



organa sensuum exteriorum distribuuntur, spiritus igitur distendunt & expandunt medullarem cerebri substantiam, medullam oblongatam, ejusque partes, & agitationem satis magnam habent, non tamen sese diffundentem extra cerebrum, nisi in quantum illud in principio requiritur, ad commotionem animi excitandam. Eodem tempore sanguis copiosius versus cerebrum premitur, ibidemque arterias carotides & vertebrales, eorumque propagines insigniter replet, unde major compressio nervorum ad sensuum organa sese diffundentium, adeoque *αναισθησία* in Catalepsi obvia. Hinc jam oritur mutua quasi lucta, spiritus medullam oblongatam extendentes premunt vasa sanguinea nimium repleta ab animi admiratione sanguinem versus cerebrum propellente: sanguis iterum premit sensuum externorum organa, & cerebri corticalem substantiam, non tamen potest somnum, aut stertorem, aut Epilepsias producere, quandoquidem agitationis spirituum & explicationis medullæ oblongatæ vis est tanta, ut depressioni cerebri efficacissime resistat. In hac autem mutuâ luctâ, & resistentiâ, consistit essentia Catalepsios, quæ fieri non posset, nisi homo esset mediocriter sanus. Si enim fervor accederet spirituum, inflammatio membranarum cerebri oriretur Mania, Phrenitri aut similis affectus: si accederet sanguinis copia, aut cacochymia, aut flacciditas cerebri oriretur Apoplexia, lethargus aut similis affectus: si accederet convulsio membranarum cerebri oriretur Epilepsia.

Hæc sunt verissima & certissima, nec possunt esse practico incognita, dummodo præjudicia deponat. Verum oscitantia, & veræ œconomiae humanæ ignoratio, fecit, ut miras larvas loco veritatis amplexi fuerint Medici. Hæc ab experienciâ mirum in modum confirmantur: vides enim ab animi pathemate nonnullos in Apoplexiam, Paralyfin, Epilepsiam &c. incidere, rarius autem in Catalepsin, quia ut plurimum accedit prava cerebri, sanguinis, spirituum dispositio, raro contingit exactum esse adeo æquilibrium, ut Catalepsis oriatur, saltem vehemens, leviores Catalepsios species Medici non animadvertunt, quandoquidem rigiditatem illam, miram illam in omnes formas dispositionem, & permanentiam in eodem statu sibi repræsentabant.



Causa Catalepticos.

In Explicatione hujus morbi nihil fingo, nihil suppono, nisi quod sit evidentissimum. Nullas excogitavi causas, quæ ab aliquo in dubium possint vocari. Manifestum est, sanguinem aliquando vasa magis aliquando minus replere: manifestissimum est, à pressione nervorum intercipi sensuum externorum functiones: manifestissimum est, spiritus aliquando ad organa sensuum exteriorum posse amandari, aliquando etiam ad interiora revocari, & tantum vestigia cerebro ante impressa speculari. Manifestissimum est, hinc vel magis vel minus sensuum externorum ministerio uti, vel etiam carere homines. Quemadmodum enim attentio & oculus immotus necessarii sunt, ut distinctè videamus, ita etiam attentio requiritur ut audiamus, olfaciamus, de gustu judicemus. Attentio illa respectu mentis dependet à voluntate, respectu corporis à determinatione spirituum animalium versus organa sensuum. Ab influxu illo spirituum, nervi illorumque fibrillæ tenduntur, tympanum expanditur, officula auditus facile afficiuntur ab impulsu aëris, quod si ille influxus cesset, vel aliò derivetur, sensus non vigent. Ita experimur nos posse arrigere aures, hoc est, attendere ad ea quæ submissa voce dicuntur, eaque facile intelligere, quæ alias auditum nostrum minime affecissent. E contrario, confabulantur duo, alteri inter confabulandum aliquid incidit, quod imaginationem magis feriat, præsens absens est, nihil omnino percipit eorum quæ ab alio narrantur. Causa ergo Catalepticos est attentio, & intensio animi nimia.

Si attentio vel ejus defectus, si spirituum ordinaria determinatio tantas inducat differentias, in obeundis functionibus sensuum externorum: si admiratio nos extra nos rapiat, graviores orientur mentis distractiones, si accedant animi pathemata. Scimus quid passionibus animi possint, scimus quam gravia symptomata à passionibus animi excitentur, absque præviâ dispositione, aliquando vix, aut ne vix quidem arte medicâ expugnanda. Adeo ut hæc innitantur principiis talibus, quorum nullus potest esse prorsus ignarus, quæque animum veritatis avidum convincunt; qui autem chimæris sese deludi expectit, is chimæris vanis & falsis deludatur.

Explicatio à contrario.

Possent hæc videri satis explicata; verum quandoquidem

novi



novi quam difficulter antiqua evellantur præjudicia, quam difficulter assentiamur veritati nullo figmentorum fuco contaminatæ, juvat hanc rem à contrario illustrare, ut passionum efficacia à Medicis hætenus non satis animadversa, luce meridiana clarius appareat. Observamus itaque, in omni animi passione cor extraordinariè commoveri, unde plures vel pauciores generantur spiritus, pro ratione expansionis vel contractionis cordis. Spiritus hi proportionaliter ad motum cordis & pulmonum agitantur etiam magis vel minus turbulente, ad has vel illas partes, ad varios musculos varie determinantur. Nec mihi videtur à ratione & experienciâ alienum, sanguinis motum, à spirituum in arteriarum, majorum imprimis, tunicas influxu, varie determinari, magis versùs hanc quam illam partem premi. Ita ex. gr. metus & fugæ amor à repentinâ consternatione spiritus animales versùs musculos pedis cursui inservientes determinat, sanguis fortè eodem tempore eo magis propellitur, adeoque expansio & contractio musculorum reciproca promptè succedit. Spiritus animales concitati & veluti fugaces in cerebro nec attentionem, nec ratiocinationem nec judicium formant, sed tumultuariè tantum versùs cor, pulmonem musculos artuum & pedum feruntur. Quippe fugimus quandoque cum potius standum & permanendum esset; *Scyllam* evitantes in *Charybdim* incidimus. Videmus itaque spirituum & sanguinis motum, atque determinationem in passionibus multum immutari.

In Catalepsi alio planè modo sese res habet. Spiritus ab admiratione, à perceptione & imaginatione passionem excitante, ita sese applicant illi objecto, ut in illius contemplatione planè obstupecant: mens corporis, & motuum corporeorum, ac determinationis spirituum versùs partes inferiores oblita, in illo objecto contemplando attonita hæret, atqui omnes spiritus in expansione cerebri, & contemplatione objecti prorsus impendit. Interim sanguis quoque copiosius rapitur versùs cerebrum, replet arterias carotides, harumque ramificationes, premit nervos ad sensoria externa distributos, adeoque illorum exercitium planè suspendit. Non succedit somnus, aut somnolentia, quoniam spiritus nimium sunt agitati, interrumpitur

Applicatio  
ad Cata-  
lepsi.



pitur tamen sensuum omnium exercitium, quandoquidem nervi magis quam in somno naturali comprimuntur. Interim imaginatio à novorum objectorum appulsu minimè impedita, tanto est vividior, quemadmodum illud etiam in somno sæpe animadvertimus. Ita vel attoniti hærent & obstupefcunt, vel à Pathematis vi exagitati, effutiunt quicquid in buccas venerit, nec rationis dictamini sunt obsequentes: non attendunt ad ea quæ leniendo affectui possent esse utilia, non regunt animum, quinimo nec quæ loquantur, nec quid alii suggisserint percipiunt.

Historia  
memorabi-  
lis.

Nulli animi pathematum vis in concitandis morbis, aliquando medicam manum planè respicientibus, omnino incognita est, non inutile tamen judicavi referre historiam imprimis memorandam, cujus ego ipse fui oculatus testis. Vidi virginem, miratus sum & dolui casum omnino deplorandum; quam enim sanam, vegetam, hilarem & ingenii satis vividi conspexeram, postmodum amentem & fatuam vidi. Virginem hanc, multis ingenii dotibus conspicuam, nec deformem, ambiebat juvenis honestus; verum parenti minus gratus, seu propter vitæ genus, seu quod esset in re minus lauta. Quanto minus parenti, tanto magis virgini arridebat adolescens, illumque sibi unice maritum exposcebat misera. Opposuit sese huic matrimonio pater, neque votis illorum annuit. Illa obediens parenti fuit, cum interim soror natu minor, spreto parentis imperio, illi nubere non dubitaverit. Cruciavit hic casus mirè sororem natu majorem, adeo quidem, ut variis animi pathematibus agitata, tandem omnino reddita sit fatua. Vidi ego eam omnino mente captam, vestitus erat squalidus, perierat omnis ornatus cura mulieribus nimium familiaris, loquebatur, verum incondita & prorsus ἀπροσδιόνυστα. Aderat ancilla senior, quæ ipsi velut infanti cuncta ministrabat: vestes exuebat hæc, atque iterum induebat, lecto imponebat, è lecto eximebat, neque enim vestium, aut tegendi corporis ulla cura. Interim erat satis sana & obesa, mentem non sanam in corpore satis benè disposito habebat infelix. Si mens, si ratiocinatio in perpetuum à passionibus aboleatur, quid mirum si à casu repentino sensus pereat, homo obstupefcat?

Ne-



Neque iis quæ hæcenus dicta sunt obstat *Sylvii* observatio qui refert, sibi & aliis pluribus medicis *Amsteladami* visum esse Catalepticum videntem, audientem, & cæteris sensibus utentem, verum stupidius & torpidius. Non fuit enim ea verè Catalepsis, verum ad Catalepsin retulit vir ingeniosus casum planè alium, ne scilicet ipsi Cataleptici deesset observatio. Quis unquam fando audivit Catalepsin per annos quatuor vel quinque affixisse? id tamen de hoc ægroto narrat *Sylvius*? Quis autem sanæ mentis negabit senes aliquando fieri tardos & languidos? Quis negabit post exantlatos, forsan graves labores, & senium minus felix, aliquem esse animo abjecto & fracto? Quis neget constitutionem scorbuticam, si negligatur exercitium, membra minus apta reddere ad motum? Talia symptomata in praxi aliquoties contingunt; verum aliud est, aliquem sanum & vegetum repentè corripì Catalepsi, manere in eodem situ immobilem sensibus omnibus privatum, uti auctores referunt. Rectè *Sylvius* observavit diversos esse Catalepsios gradus. In eo fallitur, quod statuatur Catalepsin esse symptoma motus animalis, cum antea ostensum sit, esse symptoma sensus communis, ad tempus vel aboliti, vel etiam imminuti cui rigiditas major vel minor jungi potest: verum rigiditas illa ex eo ortum habet, quod sensus perierit, non autem sensus perit, quia membra sunt rigida.

Ea quæ hæcenus dicta sunt, si quis cum aliorum opinionibus conferre voluerit, is facile intelliget quæ circa hunc Morbum hucusque tradita sunt, magnam partem præconceptæ opinionis, vel fictitiis hypothefibus innixa esse, me autem veritatem ipsam, nullo adulterino fūco incrustatam, candidè proposuisse.

Differentiæ hujus affectus sunt, quod alius sit simplex, alius aliis comitatus morbis vel animi pathematibus. Simplex vel ab animi intensione, vel ab affectu habet ortum. Simplicis minor gradus ab animi intensione non judicatur esse morbosus, & est tantum sequela spirituum in contemplatione alicujus rei attentissimè defixorum: quamvis enim plura possint contingere quæ illos non afficiant, quando tamen aliquis tales serio compellat, statim illa animi intensio frangitur,



tur, & ad munia ordinaria vitæ communis fit transitus. Revera tamen ab animi intensione, & expansione illa exquisita cerebri, & cerebro & spiritibus animalibus aliqua infertur, si gradus major accedat. Exempla eorum sunt obvia, qui hoc pacto redditi sunt fatui. Si quis ergo hos gradus voluerit distinguere, per me id licet; verum hæc distinctio ab arbitrio alicujus mihi pendere videtur.

Catalepsis ab animi passione vehementior est, & sensus omnino occupat, adeo ut attoniti stupeant hoc modo affecti. Affectio hæc animi ad admirationem potissimum referri debet; verum cum raro admiratio sit ita vehemens, hinc rarò observatur Catalepsis. Hinc auctores casus ex aliis descripserunt, vel ad aliorum imitationem effinxerunt, uti illud ex eorum scriptis est perspicuum. Quod si aliæ passiones jungantur imprimis amor, dolor, indignatio facilius quis in Catalepsin incidet.

Catalepsis complicata est, quando aliis morbis jungitur stupor. ex. gr. quando in febribus stupor observatur, & tum signa Catalepsios non adeo sunt manifesta. Nimirum ubi spiritus valdè agitantur, ubi sanguis vehementius premitur, dispositio cerebri talis oritur, qualem descripsimus. Verum hujus speciei descriptio ab Auctoribus negligi solet. Ut verum fatear, est hæc Catalepsis spuria, quandoquidem in eam non quadrat descriptio superius proposita, non fuit tamen à me negligenda, quoniam mentis consternationes propriè ad hunc affectum pertinent. Quamvis hic denominatione *Plateri* utar, non extendo tamen ita latè *mentis consternationem*, uti ille fecit.

Revera autem Catalepsin sese aliis illis morbis miscuisse, ex eo mihi videtur manifestissimum, quod ægroti sermones & consilia sanorum contemnant, vel quod compellati stupeant, quodque eorum quæ gesta sunt, saltem plerorumque, sint immemores. Hæc autem non sunt de natura morbi vel Febrium, propriè loquendo, verum de natura Catalepsios. Ne tamen omni auctoritate destitutus finxisse hanc Catalepsios differentiam videar, juvat in partes vocare *Bonetum*, qui in *Mercurio compitalitio* h. t. exemplum adfert Catochi, post febrem & somnum affligentis.



Si vero quispiam aliter, & accuratius Catalepsios species distinguere velit, vel possit, per me id licebit; quæro enim veritatem, eamque, si erravero, ab aliis etiam addiscere desidero. Si quis Catalepsios vocabulum non nisi exquisitæ tribuere velit, id ipsi est integrum.

Signa Catalepsios sunt, quod aliquis subito ab animi intensione, vel commotione, omnium sensuum exercitio magis vel minus privetur, motu interim voluntario itidem magis vel minus abolito, absque resolutione tamen, aut spasmo musculorum. Distinguitur ab Apoplexia & Caro, quod signa manifesta morbi desint, quod pulsus non multum sit immutatus, nec respiratio ullo modo laboriosa. Adeo ut Catalepsis non minus possit dici Morbus attonitus, ac Apoplexia, quam hoc nomine descripsit *Cortinumminus*. Sanus subito fit exstaticus, sensuum exercitio privatur, nec signa alius affectus cerebri, Apoplexiæ, Lethargi, Febris cum Caro, aut Paralyseos adsunt, pulsus faciæ lineamenta, &, sic porro se habent instar sanorum. Aliis morbis sese junxisse Catalepsin spuriam, ex eo manifestum est, quod ægroti stupeant magis, quam illud tali morbo est solemne.

Signa.

In Prognosi ab aliis medicis non parum dissentio, non enim est periculosus affectus, nec difficulter expugnabilis; omne hoc periculum est imaginarium, à falsa opinione spirituum congelatorum, vel coagulatorum, vel intemperiei frigidæ & siccæ ortum. Catalepsis enim est affectus repentinus, nec diu perseverare potest, imo ægri sibi relictæ à somno tandem obrepente, moderatione spontanea passionis, inedia &c. sponte restituntur. Id ex exemplo *Scoti*, superius adducto, patet. Periculum in eo consistit, quod affectus vehementes aliquando labem aliquam partibus imprimant, unde in posterum languentes vitam incommodam, trahant. Hoc tamen à sola Catalepsi rarò ortum habere existimo, nisi alii, & vehementiores affectus, sese jungant admirationi & stupori. Amentix maximum impendere mihi videtur periculum, non vitæ. Ubi Catalepsis spuria sese junxit aliis morbis, non tantum periculum intenditur, ob plura symptomata, sed ille ipse stupor signum præbet magnitudinis morbi, & periculi.

Prognosis.



Indicationes

Indicationes sunt, spiritus animales à nimia illa attentione revocare, & repletionem arteriarum carotidum, sensuum exteriorum organa comprimentem, adeoque sensus abolentem, imminuere. In Catalepsi spuria, respiciendus morbus quicum copulatur hic affectus, illiusque curationi incumbendum.

Cura.  
V. S.

Utrique huic indicationi priori, adeoque Curationi, satisfacit sola V. S. Cum enim vociferationes, clamores, strepitus, vellicationes, & similia plura minus efficacia reperiantur, oportet invenire remedium potens. V. S. spirituum copiosiorum generationem ad tempus imminuens, à nimia illa attentione, & intensione animum revocat. Quando enim interruptur distensio illa cerebri nimia, affectus tollitur, & ad se redeunt Cataleptici. V. S. sanguinem imminuens eumque impeditum aliò alliciens, sc. ad vasa inanita, repletionem illam arteriarum carotidum nimiam tollit, adeoque sensuum exteriorum usuram sufflaminatam restituit. Usus V. S. in Catalepsi confirmatur & colligitur ex historiâ *Aetii*, qui scribit, Catalepsin à sanguinis multitudine caput confertim occupante, ipsumque implente, sublatam esse quartâ die largâ sanguinis eruptione per nares factâ. Vid. *Montanum*. Tract. xiv. c. 3.

Hoc remedium non imaginationi, sed experientiæ innixum est. V. S. vehemens illa Catalepsis, cujus feci mentionem, statum sublata est: tum enim ad sese rediens æger omnia quæ erant acta, & affectus stupendi causas ipse detexit. Adeo ut hæc experientia admodum confirmet tum causas, tum etiam indicationes à me propositas.

Naribus ad-  
movenda.

Interim utile est naribus admoveere spiritus excitantia salia volatilia, &c. quorum in Epilepsiæ curatione facta est mentio.

Enemata.

Possunt quidem injici enemata, verum in inferiori ventrè causa mali non latet, nec in hoc cardo rei versatur, caput curationis consistit in V. S.

Ægrotus ali-  
quando fru-  
stra torque-  
tur.

Hinc patet, frustra à medicis sæpenumero torqueri ægrotos: raditur cerebelli regio, foveatur una cum tota spina decocto *Lavendulae*, *Lauri* &c. postmodum inungitur, parti unctæ supponitur Emplastrum. Ægroto exhibetur conditum ex conservis *Acori*, *Stachadis*. Frustra præscribitur *Laconicum*, frustra exstruitur stupha, in qua per biennium retinetur miser, tantas

non



non meritis à Medico pœnas, nec tam diu carceri mancipandus. Frustra à *Mercato* præscribitur Fontanella, aut Setaceum in occipitio. Alia longe Cari, alia Catalepsios est ratio.

Si Catalepsi superatâ vigiliæ vexent, somnus moderatè provocandus, simul exhibendo ea, quæ spiritus blandè refocillent. Convenit *Diascordium novum* egregium medicamentum, *Athanasia*, *Aqua Theriacalis minor*. Si quis mixturam amet, potest illi gratificari medicus, & præscribere. ex gr.

R. Aq. Ruth. Cerasor. nigr.

Betonic.

Meliss. aa ʒj.

Theriacal. min. ʒvj.

Tinctura Croci. ʒß.

Land. op. gr. j.

Syr. Stachad. ʒß.

M.

Sumat subinde duo, vel tria cochlearia.

Quicumque autem nimix mentis intensiori se imparem sentit, is à nimiâ, & diutius protracta attentione caveat, is studiis relaxationem animi interponat. Venienti occurrendum morbo. Si quæ alia debilitas, vel incommoditas vexet, post sublatam Catalepsin, ejus curatio è propriis locis petenda.

Ubi Catalepsis spuria sese junxit aliis morbis, non tam Catalepsios, quam ipsius morbi est habenda ratio. Ex. gr. in febribus, febris ipsa expugnanda, prout illud ejus natura requirit. Interim cavendum, ne stupor per Opiata perperam usurpata augeatur, sudorifera in usum vocentur acida, nisi quicquam obstiterit, *Acetum Bezoardicum* &c. usurpentur sanguinem diluentia; crebro injiciantur enemata: pedibus subjiciantur animalia viva dissecta &c.

Diæta, ex iis quæ dicta sunt, non difficulter colligitur. Vitandæ omnino molestæ animi passionēs. Hilaritati studendum, vitandum otium, exercitium minimè negligendum.

Relaxatio  
animi.

De Catalepsi  
spuria.

Diæta.



## CAPUT VIGESIMUM QUINTUM.

*De Apoplexia.*Apoplexia  
periculosa.

**P**ervenimus tandem ad periculosum, & plures subito jugulantem capitis affectum, Apoplexiam: cui ultimum locum dedimus, aliorum Auctorum more, tum etiam quod affectus sit acutissimus, & curatu difficillimus, quam *Greg. Horstius veram inconstantia & calamitatis humane notam* dixit. Studebimus autem brevitati, tum quod *Wepferus* in describendo hoc morbo diligenter sit versatus, tum quod plures *Montaltus, Willisius, Sennertus, Bernardus Verzacha, Guernerus Nymmanus, Justus Cortnummius* &c. de eo satis fusè egerint, denique quod nos quoque cerebri constitutionis naturalis & præternaturalis non semel meminerimus.

Nomina.

Non est necesse de variis Apoplexiæ appellationibus disputare, quandoquidem plures eas persecuti sunt, imprimis *Justus Cortnummius* in libro de *Morbo attonito*. c. 2, 3, 4, 5, 7.

Cortnummius definiti.

Variae exstant hujus morbi descriptiones, quarum quasdam examinandas suscepit is, quem statim laudavi, *Cortnummius* Rejectis autem vulgaribus, existimat brevem debere, genere & differentia specificâ constantem, proponi definitionem, quæ juxta ejus mentem, hæc est. *Morbus attonitus est hæmostasia in cerebro.* Itaque quod ipsi in discutiendis aliorum descriptionibus licuit, licere etiam mihi arbitratus sum, in examinandâ ipsius.

Examinatur.

*Morbus attonitus, inquit, est hæmostasia in cerebro.* Primum velim animadverti definitiones succinctas, genere & differentia specificâ constantes, rarius in praxi habere locum: quoniam, nisi pluribus verbis describatur affectus, non poterit is à congeneribus exactè distingui, unde non potest non ingens oriri confusio. Quemadmodum enim si quis in Botanicis unicam tantum requireret notam plantæ characteristicam, & contenderet plures non debere proponi, necessario in manifestos incideret errores, ita etiam non potest non aberrare, qui definitionis brevitati nimium studet. Qui ita laborat esse brevis, facile fit obscurus. Descriptiones commodæ definitionibus nimium



mium concisis longè præferendæ. Deinde nomenclatura ipsa hæmostasiæ in Medicina est satis insolens, & in hoc casu à veritate longè remota. Est insolens, quandoquidem scriptores Græci, quod ego quidem sciam, nec etiam practici ordinarii, hæmostasiæ faciant mentionem. Nec refert, quod *Hippocrates* *σάσις* vocabulo fuerit usus: non enim tantum apud nos valere debet ejus auctoritas, ut omnes ejus explicationes, omnia vocabula tanquam inconcussas veritates recipiendas existimemus. Deinde jam in superioribus monuimus, non rarò *ἀκίνησιον* sanguinis culpari, ubi revera sanguis satis validè propellitur. In hoc autem affectu sanguis non stat, sed validè propellitur versus cerebrum, in cerebro ipso non stat, sed vasa nimium replet & extendit, aut extra vasa effunditur, uti videbimus, neutra autem harum affectionum hæmostasiæ vocabulo non satis commode exprimuntur. Hæc ideo monenda fuerunt, quandoquidem Medici aliquando nimis avidè nova suscipiunt vocabula, existimantes se morbum vel rectius percepisse, vel accuratius explicasse, quando novum excogitarunt, vel adhibuerunt terminum, seu nomenclaturam. Additur hæmostasiam hanc in cerebro habere locum. Ego existimo simulac sanguis in cerebro supponitur subsistere, non morbum, sed mortem extemplo occupare. Videmus in quantas angustias homo conjiciatur, si quando in parte principe sanguinis motus videatur ad quietem contendere: putabimusne sanguinem in cerebro posse subsistere vitâ superstitè? Id mihi quidem minimè videtur verisimile. Quærimus autem hic de Morbo, vel symptomate, non de Morte: debet ergo talis proponi definitio, quæ non nisi in affectum hominis viventis quadret. Concedamus autem, dari talem hæmostasiam in cerebro, definitio tamen non erit omnibus numeris absoluta, quandoquidem illa etiam deberet tribui aliis affectibus congeneribus Caro, Comati, Morbo caduco, Epilepsiis variis, quandoquidem etiam in hisce repletio arteriarum cerebri nimia habet locum.

Cum ergo hæc definitio multis prematur difficultatibus, substituiamus commodiorem. Apoplexia est *sensuum omnium, cum ἀφωλία & resolutione, nec non difficili respiratione, subita privatio, à sanguine cerebrum ejusque vasa inundante, aut nimium re-*

Apoplexiæ  
descriptio.



*plente ortum ducens.* Si quis brevitatem amet, ei fortè non malè placebit *Montalti* descriptio, qui Apoplexiam *subitaneam* penè *omnis animalis functionis privationem* dixit.

Ea explica-  
tur.

Dixi sensuum omnium privationem esse Apoplexiam, quandoquidem nihil vident, nihil audiunt, nihil sentiunt, quantumvis vellicentur, quantumvis excitetur dolor, nullas perceptionis distinctæ notas conspiciēs. Sunt autem hic quidam gradus, adeo ut sensus in omnibus non sint æqualiter aboliti. Quandoquidem tamen in morbo caduco, & variis Epilepsiæ speciebus etiam sensuum subita adest privatio, distinguenda fuit hæc affectio à reliquis, quod factum est adjiciendo hanc sensuum privationem contingere cum ἀφωρία & resolutione. In morbis convulsivis, nec etiam Catalepsi adest ἀφωρία, nec etiam membrorum resolutio. Vocem edunt hi, aliquando clamant, licet vocabula non semper proferant articulata. Imo tantum abest, ut membra sint resoluta, ut etiam vehementer convellantur. Adest quoque difficilis respiratio, unde etiam ab Auctoribus solet desumi signum gravitatis morbi. Non facio mentionem stertoris, quandoquidem ea & abesse & adesse potest: deinde quandoquidem stertor pluribus affectibus soporosis est communis.

Causæ.

Causam hujus affectus statuo sanguinem cerebrum ejusque vasa inundantem. Est hæc causa Apoplexiæ conjuncta, adeo ut si quis Apoplexiam tanquam morbum describere velit, is poterit hoc modo descriptionem formare. Apoplexia est *lcebri ejusque vasorum à sanguine nimia repletio & inundatio, subitam sensuum internorum privationem cum ἀφωρία, difficili respiratione, & membrorum resolutione inducens.*

Sanguis in hoc casu considerari debet, vel tanquam vasa replens, vel tanquam cerebrum inundans. Prior casus locum habet ubi sanguis peccat copia, vel ubi ad motum est ineptus. Posterior ubi vasa cerebri disrupta sunt, vel ab interna, vel externâ causa. Tango hæc tantum quandoquidem de hisce in superioribus est actum. Possunt causæ aliæ concurrere, cerebri flacciditas, serosorum humorum copia &c. Exempla occurrunt in *Boneti Sepulchreto* l. I. Sect. II. obs. 28, 40. &c.

Causæ re-  
motiores,

Causæ remotiores sunt Vulnere capitis, commotio cerebri, casus



casus ab alto, sanguinis copia, ingluvies, crapula, vita sedentaria, *Opium*, venus, somnus protractior, ætas ingravescens, animi pathemata.

Differentiæ variæ ab Auctoribus proponuntur, quæ tamen Differentiæ. ita intelligendæ sunt, ut ne species ita leves designent, ut eæ potius ad alios affectus ablegari debeant. Non pauci sequuntur in enumeratione differentias à Galeno memoratas. Distinctio in Hemiplegiam & Paraplegiam à *Cortnummio* proposita, mihi minime arridet. Distinctio Apoplexiæ in sanguineam & pituitosam Auctores in varias coniecit difficultates. Apoplexia vel sola vexat, vel simul Febris, Pleuritis &c. ingruunt.

Signa Apoplexiæ ex iis, quæ adducta sunt, fiunt manifesta, Signa.

Sensuum abolitio, ἀφωλία difficilis respiratio, membra resoluta. Male mihi calculum videtur posuisse *Iustus Cortnummius*, qui stertore infomni hunc morbum ab aliis distinguere existimat, uti è superioribus patet. Stertor infomnis, vel potius somni infomnis imago, in Catalepsi, magis quam in Apoplexia est conspicua. Pulsus frequentior & major, æstus, jactatio febrilis paroxysmi, tussis, Pleuritidis subsequens indicium præbet. Imminentis Apoplexiæ signa sunt, Capitis dolor vehemens cum κακηβαρία, arteriarum carotidum molesta pulsatio, Vertigo, Incubus gravior, Tremor corporis totius, Convulsiones in somno ingravescentes, stridor dentium.

Prognosis juxta *Hippocratem* hoc pacto instituitur. Aph. 42. f. Prognosis.

II. λυεῖν ἀποπληξίην ἰσχυρὴν μὲν ἀδύνατον, ἀσθενέα δὲ ἡ ῥῆτιδιον.

Item Aph. 51. f. VI. ὁπόσοισιν ὑγιαίνουσιν ὀδύναι γίνονται ἐξαίφνης ἐν τῇ κεφαλῇ, ἢ παραχρῆμα ἀφωνοὶ γίνονται, ἢ ῥέγχεσιν ἀπόλλυνται ἐν ἑπτὰ ἡμέρησιν, ἢν μὴ πυρετὸς ἐπιλάβῃ. De Apoplexiâ vulneribus capitis superveniente, judicium fieri debet juxta naturam vulneris quod eam produxit. In senibus est periculosior, quam in juvenili ætate, cæteris paribus. Apoplexia morbus est acutissimus, adeoque in ejus curatione nihil eorum omittendum, quæ ad promptam curationem requiruntur. Si convulsiones, seu epilepsiæ symptomaticæ jungantur, intenditur periculum. Spuma circa os, admodum mala. Febris ingruens non semper emolumentum affert.

Indicationes sunt, sanguinem cerebrum deprimentem prom- Indicationes  
ptis-



ptiffimè imminuere, spiritus torpidos excitare, respirationem reddere faciliorem, sanguinem ad motum per minimas arteriolas reddere magis aptum.

Cura  
V. S.

Sanguinis imminutio optime peragitur V. S. Ea in hoc casu institui debet non parcâ manu, est enim morbus acutissimus Apoplexia, periculum est in morâ. Nullum est dubium quin plures succumbant ægri, quia morbo gravi non æquè potens opponitur remedium. Quanta hujus sit necessitas, è causis evadit manifestum. Si enim vasa nimium turgeant, si metus sit ne cerebrum inundetur, & comprimatur, qua ratione promptius succurras, qua ratione avertas imminens periculum, nisi exhauriendo sanguinis molem, antequam ægrotum obruat? Si commotio cerebri, si vulnera cranii, magnum incutiant metum symptomatum periculosissimorum, qua ratione ea avertas, nisi statim ad V. S. recurrendo. Quanto major adest plethora, quanto vires ægroti sunt validiores, tanto largius evacuare sanguinem convenit. In Anglia Medicos esse ajunt, qui etiam Apoplecticis senibus sanguinem ad  $\frac{3}{4}$  LX. simul & semel extrahunt cum εὐφορίᾳ. Ego existimo longè plures succumbere ob neglectam, vel parcâ manu celebratam V. S. quam à sanguine nimium exhausto. Rectè *Montaltus* contra *Aurelianum* contendit, non esse expectandum remissionis tempus, quia periculosum est auxilium differre in periculo præcipiti. Malè jubet ventriculi & intestinorum impuritatem ante V. S. extrahere. V. S. in paroxysmo Apoplecticum excitat, extra paroxysmum ab imminente præservat, nec non contra insultus epilepticos munit. Libet adducere hic *Theophili Boneti* verba, qui, ad quæstionem, an in Apoplexia à pituitâ ortâ, (ita solebant loqui Auctores) V. S. institui commodè queat, & si queat, cur instituatur? hæc habet. *Aliud profectò est, si in ullo casu Medico, certè in hoc, Practicè decidere difficultatem, aliud Theoreticè: Theoreticè dico, à MEDICO SECUNDUM THEORIAM MEDICAM, qualis ex Institutionibus vulgo petitur. Practicè vero, secundum ea quæ in Praxi, EXTRA ET ULTRA THEORIAM, quotidie occurrunt OBSERVANDA circa ægros, de quibus Theoretici ne γγὲ quidem: unde omnino arbitror PRACTICE considerari & decidi debere hanc Quæstionem, in Me-*  
di-



dicina, Apoplecticis ritè facienda maximi momenti. Arbitror omnino ex Arte, licet plerisque forsan veram ejus causam & rationem ignorantibus, atque in hac re Empiricis duntaxat institui V. S. ex qua sponte effluente sanguine, via aliqua & locus paratur, in quem recipi queat sanguis in cordis ventriculis eorumque vicinia collectus, & internum ignem, vitæ vinculum, exstinguens. Quapropter judico prudenter, & ex arte POSSE, imo DEBERI in OMNI Apoplexiâ institui V. S. & pro agrorum constitutione, sanguinisque copia in vasis existente, SATIS LARGAM sanguinis evacuationem: sic enim diutius durabit ager, & facilius superabitur ipsa Apoplexia uti hoc confirmat experientia, sine qua nescio an quis consocius peccare metuens facile sit concessurus in senibus & pene decrepitis V. S. &c. Digna profectò prudenti Medico verba! Vide ejus Mercurium compitalitium. h. t.

Quod ille ingenuè fatetur, plerosque Medicos ignorare, illud, nisi me fallit animus, è meâ explicatione evadit manifestissimum. Ideo V. S. prodest, quandoquidem vasa meningum & cerebri à sanguinis copiâ ita replentur, ut nobilissimum & flaccidum viscus non tantum nimium comprimatur, sed velut inundetur. Quid igitur, in præcipiti hoc periculo, convenientius, quas exhaurire humorem, utilissimum quidem, sed copiâ suâ & impetu citissimè jugulaturum ægrotantem? Rectè Theodorus Majerne: Ægris pessimè agitur, dum suspensâ manu Medici minus valida medicamenta importuno metu perculsi exhibeant, cum extrema remedia adhibere expediat.

Eligantur venæ majores, ut promptior fiat evacuatio, jugularium sectionem ego reliquis postpono.

Spiritus torpidiores excitantur Salibus volatilibus, & spirituo-

Spiritus torpidiores excitantia.

sus, de quibus non semel est actum.  
Dolens commendat hanc mixturam:

℞. Aq. Epilept. Langii. ℥j.

Cerasor. nigr.

Fl. Tiliæ. aa ℥ij.

Sp. Lilior. convul. ℥j.

Syr. Fl. Tunica. ℥ss.

M. D.

Emeticis, quæ conveniunt ubi Opium est assumptum, ubi  
Ffff  
ven-



triculi repletio adest : suspecta sunt in metu vasorum disruptorum, omittenda in vulneribus capitis; tum enim vidimus vomitum convulsivum sponte vexare : nunquam in usum vocanda in hoc morbo, ante institutam V. S.

*Majerne vult sequens Emeticum exhiberi.*

℞. *Aq. Ceras. nigr.* ℥iij.

*Syr. Fl. Pœon.* ℥ij.

*Gilla Theophrast.* ℥j vel ℥iv.

F. Potio.

Addit. Si hæc mitior æquo videatur, *optimum in Apoplexia vomitorium Oleum Antimonii, cujus guttæ x. vel xij. dentur ex optimo Vini spiritu. Mercurium vita commendat Hartmannus. Dolens his verbis commendat emetica: Vomitoria experientiâ teste, quicquid reclamet Sylvius, divinam afferunt opem. In hunc finem se commendant, Tartarus emeticus, oxyfaccharum emeticum à D. Ludovici correctum, aqua Rulandi, vitriolum album &c. Vel*

℞. *Syr. emet.* ℥vj.

*Aq. Cinnamom.* ℥j.

M. pro una vice.

Purgantibus; quæ in hoc casu debent esse potentiora, & parvæ molis, ut æger assumere possit. Ex. gr. *Trochisc. Alhandal. Elaterium &c.*

Excitantur quoque spiritus cucurbitulis, frictionibus, cauteriis, vesicatoriis, &c de quibus omnibus in specie nunc non ago. Laudatur ferrum candens, reliquis non juvantibus, occipiti, aut vertici admotum. Laudantur quoque vesicatoria nuchæ applicata. Dolor omnis spiritus animales excitat, & fibras ad sui contractionem irritat.

Quomodo  
respiratio  
reddatur fa-  
cilior.

Respiratio redditur faciliior iisdem quæ ad copiam nimiam humorum præscripta sunt : V. S. & similibus : oportet autem considerare tanto respirationem reddi difficiliorem, quanto diaphragmatis explicatio à tumore & repletionem ventriculi, intestinorum &c. magis impeditur. Conveniunt ergo hic Enemata, præcipuè ubi morbi magnitudo, vires debiles, respiratio oppressa, & sic porro, exiguam sanitatis recuperandæ spem, non exiguum autem infelicitis successus metum incutiunt :

*Hart-*



Hartmannus habet hoc Enema :

℞. Rad. Cyclam.

Colocynth. aa ʒjß.

Asari. ʒj.

Hellebor. nigr. ppt.

Sem. Cartham. aa ʒj.

Centaur. min. ʒß.

Coq. in f. q. aq. ad ℥j. colat. add.

Mellis anthosat. ʒij. & si æger robustus sit.

Sal. Gemm. ʒj.

F. Clyster.

Sanguinis ad motum per minimas arteriolas redditur magis aptus, imprimis per decocta è *Lignis Guajaci, Sassafras, &c.* eadem illa decocta utilia sunt in colluvie serosa copiosius aggesta, & cerebri flacciditate. Formulæ in superioribus sunt positæ.

Quomodo  
sanguis red-  
datur fluidior?

Quandoquidem in diætâ præscribenda nulla occurrit difficultas, ea è superioribus, tum ex iis, quæ ab Auctoribus tradita sunt, petatur. Interim non possum non monere, ridiculum esse in morbi acutissimi curatione statim in principio meminisci diætæ, & præscribere *melicratum*, aut *jus pullorum columba* aromatibus conditum &c. uti fecit *Montaltus*. Qui vel semel Apoplectico adfuit, is non ignorat ægros ita oppressos stertere, ut medicamentum exiguâ quantitate præscriptum vix possit exhiberi. Quomodo ergo assumet juscula? Quid? Quod morbus acutissimus, è repletione origines habens, mitigatione nequaquam. evacuatione omnino indigeat? Qui praxin proficetur, practicè scribat oportet.

Diætâ.

F I N I S.



# I N D E X

## RERUM ET VERBORUM,

Quæ in *Idea Praxeos Medicæ novæ* tractantur.

### A.



- A**bolitio sensuum interiorum in quo consistat? p. 389.
- Acetum Bezoardicum* describitur. 205.
- Acida an omnino vitanda? p. 41. Eorum vis. 42. 71. 237. 453. Usus. 42. 71
- Aciditas & acredo humorum in Melancholicis unde? 138
- Actiones mentis quæ? 378. Brutorum quales? 396. Unde dependeant? *Ibid.* Humanæ unde? *Ibid.* Naturales & vitales cum hominibus conveniunt. 397. Animales longissimè differunt. *Ibid.*
- Adversarii V. S. refelluntur. 503
- Aeris consideratio generalis in Cephalalg. p. 39. Specialis. *Ibid.*
- Æginetæ de soporosis affectibus sententia. p. 190. Convellitur. *Ibid.* Ejusdem de Paralyfi opinio. 297
- Ægri sanos vigilando superant, ratio quæ? 53
- Ægyptii firma habent capita, ratio quæ? 41
- Æstus febrilis sentitur in extremitatibus corporis. p. 200. Ratio quæ? *Ibid.* Quibus temperetur remediis. 303. 454
- Affectio hysterica unde denominetur? 484
- Græcis dicitur *πυξ ὑσπερικη*. *Ibid.*
- Convenit cum affectione hypochondriaca. 511. 513
- Ambæ iisdem gaudent symptomatibus. 514. Iisdem signis. 515. Eadem Curatione. *Ibid.* Confirmatur. *Ibid.*
- Gradibus tantum differunt. 516
- Hypochondriaca unde suum sortiatur nomen? 516
- Variis donatur nominibus. *Ibid.* &
- Ejus Causa juxta *Willisium* & *Higmo-*  
*rum*. 517
- Ejus origo. *Ibid.*
- Descriptio. 521. Explicatur. *Ibid.*
- Affectorum morbo caduco descriptio. 406
- Affectus universales qui? p. 54. Particulares qui? 55
- Affectuum catharroforum causa. 14
- Affectuum cerebri naturalium & præternaturalium affinitas. 400. Differentia. *Ibid.*
- Affinitas inter Maniam & Melancholiam quæ? p. 176
- Inter Morbum Caducum & Epilepsiam hystericam. 363
- Inter affectus cerebri naturales & præternat. *Ibid.*
- Inter Lethargum, Coma somnolentum & Carum. *Ibid.*
- Affluxus Spirituum & sanguinis causa quæ? p. 19
- Agitationis Spirituum animalium causa. 109
200. Origo. *Ibid.* Signa. *Ibid.*
- Ἀισθητικὴ αἰσθησις*. p. 372
- Ἀισθητικόν*. 368
- Alacritatis à potu *Thee* ratio, quæ? 47
- Alkalium fixorum virtus quæ? 387
- Ἀναυδία* qualis affectus? p. 228. 231
- Ejus Origo. 228. Est ferè incurabilis. *Ibid.*
- Angeli carent Sensorio communi. 379
- Anima brutorum in quo consistat? 225
- Animæ locus ubi? 387
- Animalia an cognoscant differentias inter variorum sensuum objecta propria? 375
- Animi pathematibus in genere quæ cura conveniat? 69. In Specie quæ? *Ibid.*
- Animipathemata Melancholiam produciunt. 169

— Sunc



# I N D E X.

— Sunt Maniæ causa.	174
— Sunt causa Epilepsiæ hystericæ.	498
— Quomodo sedanda?	509
Animus meticulosus in senibus unde?	298
Antidotorum differentia tres.	273
Antiquorum decretum.	148
— Errores circa Sensorium commune.	373. 374. 375
Antispasmodica medicamenta.	356
— unde sic dicta?	<i>Ibid.</i>
— à quo primum inventa?	<i>Ibid.</i>
— Eorum Virtus.	357
— Usus. <i>Ibid.</i>	505
Antonini dictum de constitutione hominis.	391
Anxietates circa præcordia unde oriuntur?	485
<i>Aquaria.</i> 221. Hippocrati quid sit?	<i>Ibid.</i>
— Ejus origo.	224
Apoplectici qui?	246
Apoplexia periculosa.	386
— Ejus definitio apud <i>Cortnummum</i>	586. Examinatur. <i>Ibid.</i>
Ejus Descriptio. 587. Non est hæmostasia	in cerebro. <i>Ibid.</i> Explicatur. 588
— Origo.	3. 588. 589
— Causæ remotiores.	588. 589
— Differentiæ.	589
— Signa.	<i>Ibid.</i>
— Prognosis.	<i>Ibid.</i>
— Indicationes.	589. 590
Apophlegmatismorum usus in Lethargo.	257
Appetitus languens quomodo excitandus?	71
Aqua hypnotica <i>Dorncrellii</i> laudatur.	61
— <i>Stygia</i> cerebro contenta non datur.	171
<i>Aqua stygia</i> similis spirituum natura refelli-	tur. 171
Arteriæ carotides unde deriventur?	195
Arteriarum tumor; unde?	449
Arteriotomiæ in temporalibus usus.	37. 93. 94
<i>Athanasia</i> est efficax contra vigilias nimias	remedium. 65. Ejus virtus. <i>Ibid.</i>
Audacia Maniacorum unde?	173

## B.

<i>Baglivi</i> effatum de passionibus animi.	136
Bilis est causa iræ. 131. Atra in cerebro non	datur. 133. 137

— describitur.	132
— Non est excrementitia.	<i>Ibid.</i>
— Est utilis humor.	<i>Ibid.</i>
— est Epilepsiæ causa.	416
<i>Beadumphia.</i>	45
Bruta carent Sensorio communi.	393. 396
— actiones eorum quæ?	396
— Unde dependeant?	<i>Ibid.</i>
— Naturales eorum cum hominibus con-	veniunt. 397
— animales longissime differunt.	<i>Ibid.</i>

## C.

Cacochymicorum urinæ quales?	20
Cacochymici qui?	142
Caloris fons. p. 2. 292. Caloris præternatu-	ralis causa, pressio major. 265
Canes præ cæteris bestiis corripuntur Hy-	drophobia, ratio quæ. 262
Capitis refrigeratio provocat dolorem capi-	tis. 14
Cari descriptio. 193. Ejusdem ab Apoplexia	distinctio. 230
Caries ossium producit dolorem capitis. 15.	Locum habet aliquando post vulnus. <i>Ibid.</i>
Cartesii de Sensu communi opinio. 375. 390.	391. 395
Carus cum Comate somnolento confunditur.	193. Est symptoma febris. 193. 225. Arabi-
bus dicitur. <i>Subeth.</i> 193. <i>Foresto</i> Sopor gravis.	22
— Ejus natura.	198
— triplex species. <i>Ibid.</i> & 199. 223. 224	
— Descriptio.	221. 222
— Causæ.	223. 225
— Cura.	227. 232. 239
— Differentiæ.	229
— Essentia in quo consistat?	230
— Signa.	230
— Prognosis.	231
— Indicationes.	232
— Cura.	232
— Diæta.	239
Castorei virtus quæ?	258. 437
Catalepseos descriptio. 573. 574. 575. Ejus	natura. 575. 576. Origo. <i>Ibid.</i> Ejus causæ
Ffff 3	
314	



# I N D E X.

Differentiæ.	314. 575. 576. 577. 580	— Opistotoni.	354
Signa.	583. 584	— Emprostotoni.	355
Prognosis.	585	— Lumbaginis.	360
Indicationes.	<i>Ibid.</i>	— Ignorantiæ & errorum circa sensorium commune.	376. 377. 378. 379. 380
Cura.	586	— Epilepsiæ.	405. 406. 407. 408. 409
Diæta.	587	Causæ antecedentes.	415. 416. pro-
Catochus qualis affectus?	227	catartica.	417. 418. 419. 420. 421
Causa solutionis continui.	3	— Febris & Lethargi est eadem.	245
— Morbi virginei.	11	— Morbi caduci.	442
— doloris capitis in virginibus pallidi co-	12	— Febrium.	444
loris.	12	— Epilepsiæ febrilis.	445. 446. Per Con-
— affectuum catharroforum.	14	sensum.	405. pedissequæ dolorum. &c.
— Coryzæ.	14	466. 467. pedissequæ Repletionis.	477.
— doloris capitis generalis 6. 15. — minus	<i>Ibid.</i>	478. Hystericæ.	496-499. Hypochon-
frequens.	<i>Ibid.</i>	driacæ.	517. Affectionis ejusdem. <i>Ibid.</i>
— Cephalæ.	18	— Suffocationis Hystericæ.	485. 486
— Hemicranie.	18	— Convulsionum hystericarum.	487. 488
— majoris affluxus spirituum. 19. — San-	<i>Ibid.</i>	589. 490. 491. 494. Hypochondriaca-	
guinis.	<i>Ibid.</i>	rum.	534
— pressionis sanguinis.	23	— Subsultuum in somno.	531
— Vigiliarum in sanis.	45. 49	— Vomitus convulsivi.	542
— vigiliarum præternaturalium.	50. 51	— Convulsionis maxillæ inferioris.	544
— Spirituum motus nimii.	51. 172	— Spasmi flatulenti.	537
— Respirationis difficilis.	68	— Inflammationis intestinorum.	543
— Imperus sanguinis.	69	— Motuum convulsivorum.	555
— Vertiginis.	79. 80	— Incubi.	562-564. Soporis gravis.
— Vertiginis morbosæ.	81. 82. 83. 84. 85	Laboriosæ respirationis.	561
— Compressionis ordinariæ.	83. Extra-	— Catalepsios.	314. 575. 576. 580
ordinariæ.	<i>Ibid.</i>	— Apoplexiæ.	588. 589
— Melancholiæ.	131. 134. 135. 136. 137.	Cautelæ circa V. S.	26. 37. 39. 40. 41. 42. 43
	142. 143. 144	circa Hypnotica.	77. 220. 428
— Plethoræ.	142. 143. 144	circa Opium.	29
— Maniæ.	172. 174. 176	Celsi de Cucurbitularum usu opinio.	22
— Inflammationis.	108	Cauteria quando in usum vocanda?	15. 181
— Somni morborum.	<i>Ibid.</i>		441. 442
— Phrenitidis proxima.	108. Magis re-	Cephalææ origo.	18
mota.	109	Natura.	21. 35
— Agitationis spirituum.	109	Signa.	38
— Iræ.	131	Cephalalgia descriptio.	2. 3. 15
— Comatis vigilis.	200. Somnolenti.	Causæ.	3. 5. 6. 8. 9. 10. 11. 12. 13. 14. seqq.
— Cari.	223. 225	Differentiæ.	13. 17
— Lethargi.	243. 244. 245. 246	Signa.	20. — Causarum ejus. <i>Ibid.</i>
— Hydrophobiæ.	262	Differentiarum ejus.	<i>Ibid.</i>
— Paralyseos.	281. 282. 297. 299. 306.	Prognosis.	20
	311. 313	Indicationes generales.	21
— Convulsionis.	342	Cura	
— Tetani.	354		



# I N D E X.

Cura.	21. 22. 23. <i>seqq.</i>	- Prognosis.	202
Diæta.	39. 40. 41. 42. 43	- Indicationes.	202
Cerebri ventriculus quartus non est Sensorium commune. 366. Nec partes ejus posteriores. <i>Ibid.</i> Nec anteriores. <i>Ibid.</i>		- Cura.	202. 212
Cerebri descriptio.	24. 46. 171. 280. 391	- Diæta.	213
- Ejus vitia quomodo corrigenda?	28	Coma somnolentum in quo differat à Caro?	
- Ejus dispositio duplex in Melancholia.	140	196. A Lethargo in quo?	198
- partium ejus solidarum mala dispositio, unde cognoscatur?	55	- Ejus natura.	198
- Ejus fabrica.	400	- Descriptio.	313
- motus convulsivus. <i>Ibid.</i>		- Causæ.	213
Cerebellum non est Sensorium commune. 367		- Differentiæ.	214. 215
Cerebrum quomodo afficiatur in melancholia.	140.	- Signa	216
Cerebrum non est Sensorium commune. 367		- Prognosis.	216
- est in senibus flaccidum. 297. Ratio quæ?	<i>Ibid.</i>	- Cura.	216. 222
- propriè non producit paralyfin. 311. probatur. <i>Ibid.</i>		- Indicationes.	216
- flaccidum, est curatu difficile. 335. Ratio quæ?	<i>Ibid.</i>	- Diæta.	221
Chalybeatorum usus.	100. 150. 160. 528.	Comitiales morbos despuere quid?	340
- Virtus.	100. 528	Comparatio iræ cum Mania.	170
χαλὶ quid significet.	131	- Paralyseos cum Uredine.	312
Circumgyrationis sensus quomodo excitetur?	80. 81	- Morbi caduci cum Epilepsia Hysterica.	426
Circulatio sanguinis describitur.	94	Compressio nervorum est causa paralyseos.	311
Quomodo per cerebrum peragatur?	107	- Medullæ oblongatæ unde dependeat?	425
Quomodo in febribus. <i>Ibid.</i>		- Protuberantiæ annularis unde?	425
Clavus unde oriatur.	17. 19	Conformatio partium causa est doloris capitis.	14
Ejus causa.	<i>Ibid.</i>	Connexio inter Vertiginem & Apoplexiam.	83
Natura.	21	Continui solutio est vulnus. 2. Probatur. <i>Ibid.</i>	
Clysterum usus in Caro. 233. In Epilepsia febr.	452. 358	Non adest in omni Cephalalgia.	3.
Coagulatio humorum non datur.	2	Contractio membranarum unde dependeat?	406
Cogitatio soli menti tribui debet.	381	- Musculorum unde proveniat?	543
- incipit, ubi motum spirituum desinit. <i>Ibid.</i>		Convenientia Spasmi cum motu voluntario in quo consistat?	34
Color atro-purpureus in homine unde.	449	- Vulnerum, nervorum & tendinum.	465
Coma vigil quomodo differat à somnolento?		- Epilepsiæ pedissequæ dolbrum cum aliis Epilep. speciebus.	466.
196. A vigiliis protractis quomodo? <i>Ibid.</i> A Phrenitide quomodo? <i>Ibid.</i> Cum phrenitide & vigiliis protractis habet affinitatem. <i>Ibid.</i>		- affectuum Epilepticorum.	484
- Ejus natura.	196	- affectionis hystericæ & hypochondriacæ.	511
- Descriptio.	200	Convulsiones particulares quæ? 349. Minus frequentes.	352
- Causæ.	200. 207	Convulsionis ab Inanitione signa.	343
- Differentiæ.	200. 201	- Descriptio apud <i>Herc. Saxon.</i>	350
- Signa.	201	- Ejus exemplum singulare.	354
		Convulsionis Maxillæ inferioris descriptio.	543. Explicatur.
		- Ejus Origo.	542.
		- Cau.	



# I N D E X.

-- Causæ.	545
-- Differentiæ.	545
-- Signa.	546
-- Prognosis.	546
-- Indicationes	546
-- Cura.	546. 547. 548. 549
Convulsionum causa quæ? 342. 349. Ex-	<i>Ibid.</i>
plicatur.	
Corpora striata non sunt Sensorium commu-	365
ne.	
Corpus solidum, fungens officio Sensorii	
communis, non datur.	349
Correctio sanguinis in quo consistat?	236
Coryzæ causæ.	14
Crapulæ effecta.	416
Cucuphæ usus.	29
Cucurbitularum usus.	95. 118. 211
Cura Cephalalgæ. 21. 22. 23. seqq. — à Re-	
pletione. 33. — à Minori pressione.	<i>Ibid.</i>
-- Morbi Virginei.	26
-- Kagnægiæ febrilis.	31
-- Cephalææ.	35. 36
-- Hemicranææ.	37. 38
-- Vigiliarum.	57-79
-- Vertiginis. 91-103. Idiopathicæ & Sym-	
pathicæ. 102. Ejusdem cum Vomitu. 102	
-- Phrenitidis.	129. 130
-- Paraphrenitidis.	<i>Ibid.</i>
-- Melancholiæ.	141. 147-170
-- Inflammationis.	119
-- Maniæ.	177-188
-- Comatis vigilis. 202-212. Somnolenti.	216-220.
-- Cari.	227-239
-- Lethargi.	248-260
-- Hydrophobiæ. 272-278. Vulneris	<i>Ibid.</i>
-- Paralyseos. 318-339. à Mercurii vapore.	333
-- Sanguinis extravasati. 319. Vulnerum.	<i>Ibid.</i>
-- Ecchymomatis.	323. 324
-- Seri Redundantis.	331. 332
-- Ossium luxationis.	335
-- Malæ conformationis.	<i>Ibid.</i>
-- repletionis.	355. 450. 451
-- Inanitionis.	355
-- Irritationis.	<i>Ibid.</i>
-- Lumbaginis.	360. 361

-- Morbi Caduci. 428. 443. Tumorum.	439
-- Serosi laticis.	440
-- Defectus mensium.	441
-- Epilepsiæ febrilis. 450-462. Differentia-	
rum ejus. 459. 460. pedissequæ dolo-	
rum. 469-475. pedissequæ Repletionis &	
Hæmorrh. 479 483. Hystericæ. 502-511	
Differentiarum ejus. 509. Hypochon-	
driacæ.	526-531
-- Subsultuum in somno.	535
-- Spasmi flatulenti.	538
-- Motuum Convulsivorum.	558
-- Incubi.	565
-- Catalepsios.	586
-- Apoplexiæ.	590. seqq.

## D.

Dæmones carent Sensorio communi.	379
Defectus particularium alimentarium, causa	
est vigiliarum.	53
Defectus depressionis cerebri unde?	51. 52. 53
Definitionis nominum utilitas quæ?	558
Delirium in Melancholicis. 142. An melan-	
choliæ semper copuletur?	<i>Ibid.</i>
-- Ejus natura.	241
-- Est acutarum februm symptoma.	241
Denominatio suffocationis uterinæ unde.	
485. Epilepsiæ per Consensum unde.	487
Derivatio nominis Epilepsiæ.	349
Suffocationis hystericæ. 484. Uterinæ.	485
Despuere morbos comitiales quid?	340
Descriptio Cephalalgæ.	2. 15
-- Cerebri.	24. 46
-- Vigiliarum.	44. 49
-- Vertiginis, vulgaris. 78. Vera.	85
-- Circulationis sanguinis.	94
-- Phrenitidis, vulgaris. 105. Vera.	112
-- Melancholiæ, vulgaris. 130. Commo-	
dior. 139. Explicatur.	139. 141
-- Maniæ 170. Explicatur & confirma-	
tur.	<i>Ibid.</i>
-- Comatis vigilis. 203. Somnolenti.	213
-- Cari.	229
-- Lethargi, vulgaris. 240. Accuratio.	241
-- Hydrophobiæ.	266
-- Pa-	



# I N D E X.

— Paralyseos. 308. Explicatur.	<i>Ibid.</i>	— in Incubo.	366
— Convulsionis.	341. 350	— in Catalepsi.	387
— Lumbaginis.	359	— in Apoplexia.	396
— Morbi caduci.	362	Diaphoreticorum usus in Paralyfi.	331
— Moribundi.	401	Diarrhæa capitis dolori superveniens utilis.	21
— Febrium.	444	<i>Diascordium novum</i> est optimum in Epilepsi-	
— Epilepsiæ febrilis. 445. Ea explicatur.	<i>Ibid.</i>	is febrilibus remedium.	457. 458
— Doloris in genere.	463	<i>diavdias</i> à Caro.	228
— Suffocationis hysteriæ.	484	Differentia sensationis unde?	15
— Epilepsiæ hysteriæ. 486. Ea explica-	<i>Ibid.</i>	— Inflammationis à reliquis febril. sym-	
tur.	<i>Ibid.</i>	ptomatibus.	107
— Affectionis hypochondriacæ. 521. Ex-	<i>Ibid.</i>	— Philosophiæ & Medicinæ in quo con-	
plicatur.	<i>Ibid.</i>	sistat?	145
— Subsultuum in somno.	532	— Cari à phrenitide.	225
— Spasmi flatulenti. 536. Explicatur.	<i>Ibid.</i>	— hysteriæ passionis à Lethargo.	243
	<i>Ibid.</i>	— Lethargi à reliquis affectibus soporos.	
Incubi, vulgaris. 559. Commodior.			242
560. Explicatur.	<i>Ibid.</i>	— Spasmi à motu ordinario.	341
— Convulsionum in somno.	532	— Morbi caduci ab Epilepsia sympto-	
— Convulsionis maxillæ inferioris. 543.	<i>Ibid.</i>	matica.	248.
Explicatur.	<i>Ibid.</i>	— Mentis & sensorii communis.	393
Catalepsios	573	— Sensuum externorum & internorum.	
Apoplexiæ.	587		385
Determinatio spirituum animalium unde de-		— <i>Loci &amp; Ubi.</i>	386
pendeat.	391	— Motus convulsivi & voluntarii.	400
Deus est omnipræsens. 387. Nullum occu-	<i>Ibid.</i>	— Affectuum cerebri naturalium & præ-	
pat locum.	<i>Ibid.</i>	tern.	400
Diæta in Cephalalgia.	39-43	— Somni naturalis & præternat.	<i>Ibid.</i>
— in morbo Chronico.	71. 76	— Lethargi, Comatis somnolenti, &	
— in Vigiliis.	76. 77	Cari.	<i>Ibid.</i>
— in morbis Scorbuticis.	76	— Morborum soporosorum & convul-	
— in Vertigine.	104	sivorum.	403
— in Phrenitide.	129	— Morbi caduci ab Epilepsia febrili.	443
— in Melancholia.	166. seq.	— Epilepsiæ pedissequæ dolorum ab aliis	
— in Mania.	187. seq.	Epil. speciebus.	466
— in Comate Vigili. 213. Somnolento. 221		— Epilepsiæ hysteriæ à suffocatione hy-	
— in Caro.	239	sterica.	494
— in Lethargo.	260	Affectionis hysteriæ & hypochondria-	
— in Hydrophobia.	278	cæ in quo consistat?	514
— in Paralyfi.	338. 339	— Vomitus convulsivi à Vomitu post ve-	
— in Morbo caduco.	443	nenum assumptum.	542
— in Epilepsia sympt. 443. Febrili. 460. 461		— Motuum convulsivorum à convulsioni-	
Pedissequa dolorum. 475. Pedissequa		bus.	551
Repletionis & Hæmorrhagiæ. 483.		Differentiæ Cephalalgia.	13
Hypochondriaca.	531	— Vigiliarum.	54. 55
— in Subsultibus in somno.	531	— Vertiginis.	86. 87
— in Spasmo flatulento.	540	— Phrenitidis.	113. 114
— in Motibus convulsivis.	559	— Melancholiæ.	146
		— Maniæ. 176	Gggg — <i>drau</i>



# I N D E X.

— <i>ἀναυδίας</i> 228	— In virginibus pallidi coloris unde. 12
— Comatis vigilis. 203. Somnolenti. 213	— Ejus differentia. 17. 19
— Cari ejusque speciem. 238. 239	— Idiopathicus quis? 19
— Somni carotici. <i>Ibid.</i>	— Sympathicus quis. 19
— Lethargi. 246. 247	— Ejus signa 20. Causarum ejus <i>Ibid.</i>
— Hydrophobia. 269	— Differentiarum. <i>Ibid.</i>
— Paralyseos. 316	Dolor in genere describitur. 463
— Spasmi. 355	— An & quomodo in omnibus Epilepsia
— Morbi caduci. 349. 351. 421-423	speciebus habeat locum. 463. 464
— Epilepsia febrilis. 449. Pedissequæ	— Mulierum parturientium describitur. 491
dolorum. 467. 468. Pedissequæ Re-	
pletionis & Hæmorrhagiæ. 478. 479	
— Hysterica. 500. Hypochondriacæ.	
524. 525.	
— Subsultuum in somno. 534	
— Suffocationis syncopalis. 227	
— Spasmi flatulenti. 538	
— Convulsionis maxillæ inferioris. 545.	
546	
— Motuum convulsivorum. 556	
— Incubi. 564	
— Catalepsios. 583. 584	
Difficultas respirationis unde? 68	
Diluentium usus. 25. 122	
Dispositio cerebri duplex in Melanch. 140	
— ad tristitiam in quo consistat. 140. 142	
— prava cerebri est Morbi caduci causa.	
442	
— vasorum alia est nativa, alia adsciti-	
tia. 488. 489	
— Adscititia in quo consistat? 489	
— Scorbutica sanguinis quomodo tolla-	
tur. 539	
Dissipationi spirituum quomodo occurren-	
dum? 237	
Distensio est causa doloris capitis. 8	
Distinctio morbi caduci à speciebus Epilepsia	
sympt. 425. 426. soporiferorum affectum.	
196-198	
Distributio Spasmodum. 345	
Motuum convulsivorum. 551	
Diureticorum usus in Paralyse. 434. in Mor-	
bo Caduco. 434	
<i>Dolei</i> de Vomitoriorum usu opinio. 326	
Dolor capitis non est solutio continui. 4	
— quomodo soleat invadere. 4	
— Est periodicus. 5	
— Ejus causæ. 3. 5. 6-25	
— Origo. 5. 6. 424	
	— Efficacia pressionis sanguinis. 7
	— acidorum. 42. 71.
	— Furoris. 43
	— Opii. 57
	— pathematicum. 172
	— Salium volatilium. 357
	— Alcalium fixorum. 357
	— Emeticorum. 431
	— <i>Ἐμετικὰ σιγῶσα.</i> 229
	Emeticorum usus & abusus. 26. 97. 98. 235.
	431. 480. 504. 527
	Em-



# I N D E X.

E	improftotonus an inter fpafmos univerfales referendus? 248. contingit rarius. 353. Ratio quæ?	<i>Ibid</i>	— Causæ.	477. 478
Empyrica medicamenta in vigiliis.	73	— Differentiæ.	478. 479	
Ἐπιληψία quid?	343	— Signa.	479	
Epilepsia, an dicenda fit Motus Convulsivus?	551	— Prognosis.	<i>Ibid</i>	
Epilepsiæ derivatio.	349	— Indicationes.	<i>Ibid.</i>	
— Descriptio.	350. 445	— Cura.	479-483	
— Divisio in symptomaticam, febrilem & Epilepsiam per Consensum.	351	— Diæta.	483	
Causæ. 405-409. -Antecedentes. 415.	416. Procatactica. 417. 418. seqq.	Epilepsia hysterica unde derivetur? 484. Est sequela suffocationis hysterica. 493. Non differt à suffocatione hysterica 494. Eadem est cum Epilepsia per Consensum uteri. <i>Ibid</i>	— Ejus descriptio.	486
Differentiæ.	422. 423	— Causæ	496-499	
Signa.	423. 424	— Differentiæ.	500	
Prognosis.	427	— Signa.	<i>Ibid.</i>	
Indicationes.	<i>Ibid.</i>	— Prognosis.	501	
Cura.	427-437	— Indicationes.	<i>Ibid.</i>	
Diæta.	443	Cura in paroxysmo. 502. Extra paroxysmum.	503. seqq.	
Epilepsia febrilis in quo conveniat cum Morbo caduco? 446. In quo differat à motibus convulsivis.	<i>Ibid.</i>	Epilepsia hypochondriaca describitur.	521	
Ejus descriptio.	445	— Ejus Causæ.	520	
Causæ.	445-446	— Differentiæ.	524. 525	
Origo.	<i>Ibid.</i>	— Signa.	525	
Divisio in ordinariam, & extraordinariam.	446. 447	— Prognosis.	<i>Ibid.</i>	
Differentiæ.	449	— Indicationes.	526	
Signa.	<i>Ibid.</i>	— Cura.	526-531	
Prognosis.	<i>Ibid.</i>	— Diæta.	531	
Indicationes.	450	Errores in Medicina unde?	6	
Cura.	450-462	— circa Lethargum deteguntur.	245	
Diæta.	460. 461	— circa paralyfin deteguntur.	310	
Epilepsia per Consensum unde proveniat? 405	408. 409	— circa Sensorium commune unde?	376-380	
— ab aliis partibus.	408. 409	— circa Catalepsin unde?	571	
Epil. Pedissequa Dolorum, purg. Vulner. & ulc. unde?	463. 464	Essentia phrenitidis in quo consistat?	112	
— Ejus causæ.	466. 467	— Melancholiæ in quo?	139	
— Differentiæ.	467. 468	— Cari in quo?	230	
Signa. 468. Prognosis. 469. Indicationes. Cura. 469-472. Differentiarum ejus. 475. Diæta. <i>Ibid.</i> In quo conveniat & Differat ab aliis Epilepsiæ speciebus. 466. Venienti illi quomodo occurrendum.	472	— Paralyseos in quo?	289. 318	
Epilepsia pedissequa Repletionis & Hæmorrhagiæ sunt sibi mutuo contraria.	475	— Febris in quo?	543	
— Ejus descriptio.	476	— Catalepsios in quo?	568	
		Evacuatio nimia sanguinis quomodo sedanda. 471. Producit Epilepsiam hysterica.	497	
		Evacuationes solitæ suppressæ sæpe Plethoram producunt. 143. Ratio quæ?	<i>Ibid.</i>	
		Evacuationum uterinarum causa quæ?	416	
		Exempla Tetani.	353	
		— Epilepsiæ per Consensum.	404. 405	
		Expansionis nimia sanguinis indicia quæ?	90	
		Gggg 2	Fa-	



# I N D E X.

## F.

Fabrica cerebri.	399
Facies pallida unde?	424
Febris est causa vigiliarum.	55. 75
καρώδης.	231
-- continua non est symptoma Phrenitidis.	105
-- Ejus signa.	20
-- Effectus.	258
-- Causa.	444
-- Origo.	Ibid.
-- Cura.	75. 445. 550
Februm causa sæpe est Repletio.	444
-- Earum descriptio.	Ibid
-- Origo.	444. 445
Fermentatio in sanguine non datur.	5
Fernelii de Sensu communi opinio.	374. Refutatur.
	Ibid.
Ferocia Maniacorum unde?	173
Fibræ muscularum sunt duplicis generis.	288
-- Earum tensio duplex.	Ibid
Flacciditas cerebri unde?	311
Flatus an nervis contineantur?	535
Fontes errorum in Medicina.	6
circa Paralyfin.	310
circa Affectus soporosos.	194. 195
circa Catalepsin.	571
circa Sensorium commune.	376. 380
Forma substantialis & dispositio corporis quatenus differant.	377
Formulae opiatorum.	61
-- Electuarii panchymagogi.	57
-- Athanasia.	65
-- Aqua Theriacalis minoris.	65. 66
-- Aqua trium florum.	260
-- Diascordii novi.	457
-- Spiritus cephalici.	530
-- Spiritus Galbani compositi.	539
-- Aqua lactis nephritica correctæ.	559
-- Aceti bezoardici.	502
Frontalium usus in vitiis cerebri.	30
-- purgationis in Vertigine.	99

## G.

Gabelchoverus citatus.	202
Galenii de V. S. opinio.	21
testimonium de Emeticorum usu.	480

de ambiguitate vocum apud Hippocratem.	191
de Caro.	199
Generatio melancholiæ ab animi pathemate.	134. 135
-- à corporis dispositione.	136
-- Spirituum animalium unde?	139
-- Sanguinis quæ?	230
Glandula pineatis non est Sensorium commune.	364
Gravitas membrorum unde?	143
-- capitis unde?	424
Gummatum dissolutio indiget calore.	13
Gulielmus Rondeletius citatus.	284. 290
Gradus Vertiginis tres.	87
Sensus itidem tres juxta Cartesium.	375
	376

## H.

Hæmoptoës natura.	3
Hæmorrhagia est causa Epilepsiæ.	349
quomodo compescenda?	481
Hæmorrhoidum suppressio est causa plethoræ.	143
Hartmanni monitum circa Cephalæam.	35
-- effatum de V. S.	116. 121
Hellebori virtus.	151
Hemicrania.	17. 18. 37
-- Ejus causa.	18
-- Natura.	19
-- Cura.	37. 38
-- est aliquando vigiliarum causa.	72
Hemiplegiæ natura.	280
Herculis Saxonia descriptio convulsionis.	350
-- de Emproftotono sententia rejicitur.	352
Hippocratis effatum de Cephalalgia.	20. 158
vocabula ambigua.	189
κπληξίς.	227
ἀναυδία. 228. ἀναυδία ἐν πυρετῷ.	Ibid.
dici potest ἐκσασίς σιγῶσα.	229
ἀφωνία.	221. 231
κεφαλαλγία καρώδης. Ibid. νερκί.	221
Spasmus.	345. 347
Typhomania.	189. 191
Hippocratica Tetani curandi ratio.	355
Hieronymus Ochus Rizettus citatus.	203
Hirudinum usus.	22
effectus.	Ibid.
	Hol.



# I N D E X.

<i>Hollerii</i> de Affectibus soporosis testimonium.	193
Homo melancholicus <i>Gueneri Neuhausen.</i>	144
Homines an sponte in Hydrophobiam possint incidere?	268
— soligaudent Sensorio communi.	379. 396
<i>Houferus</i> suffocationis à musto meminit.	228
Humor melancholicus quid?	131. 133
— causa est Melancholiæ.	131
— excrementitius qualis?	132
— acidus in melancholicis unde?	138
— lentus quomodo præparetur?	155. 156. 157
Humorum illuvies est Lethargi causa.	244
Hydrophobia est symptoma horrendum.	261
— non est admodum frequens.	261
— Ejus descriptio.	<i>Ibid.</i>
— Nominis ratio.	<i>Ibid.</i>
— Natura.	262. 266. 267
— Causæ.	262-267
— Adjuncta.	263-267
— Differentiæ.	269
— Signa.	269. 270. 271
— Prognosis.	271
— Indicationes.	<i>Ibid.</i>
— Cura.	272-278
— Diæta.	278
Hydrophoboici potum averfantur, ratio quæ?	263
an in aqua imaginem canis rabidi conspiciant?	268
Hypnoticorum usus.	29
— effecta.	57
Hypotyposis morborum convulsivorum.	339
Historia Cataleptici.	567. 568. 582

## I.

<i>Jacobus Rohaultius</i> citatus.	392
<i>Idiotypia</i> canum.	263
Illuvies humorum est Lethargi causa.	244
Imago iracundi.	131
Imminutio Plethoræ per V. S.	162
Impetus sanguinis unde?	69
— quomodo à sanguine derivandus.	210. 211
Inanitio est causa Convulsionis.	342. Morbi caduci.
— quibus sit tollenda remediis?	413
Incidentium usus in Morbo virgineo.	435
	27

Incubi descriptio vulgaris.	559. Commodior.	560. Explicatur.	<i>Ibid.</i>
— Ejus Causæ.	562. 563. 564		
— Differentiæ.	564		
— Signa.	<i>Ibid.</i>		
— Prognosis.	564. 565		
— Indicationes.	565		
— Cura.	<i>Ibid.</i>		
— Diæta.	566		
Indicationibus specialibus in Vigiliis quomodo satisfaciendum?	74		
Inedia est Vigiliarum causa in sanis.	45. 71		
Inflammatoria sanguinis dispositio unde?	100. 108. 449		
Inflammatiō an semper adsit in Phrenitide?	106		
— quomodo differat à reliquis febrilibus symptomatibus?	107		
— an semper adsit, ubi sanguis incipit immutari?	108		
— ejus causa.	108. 449		
— effectus.	110		
— Signa.	114		
— quibus tollatur remediis?	119. 122. 123		
Ingenii imbecillitas in Senibus unde?	297		
Ingluvies causa est doloris capitis.	9		
— disponit ad Morbum caducum.	418.		
— producit Epilepsiam symptomaticam.	419		
Inspiratio vehemens producit motum voluntarium.	418.		
<i>Intelligere, velle, sentire, idem est quod cogitare.</i>	310		
Intemperantia est febrium causa.	375		
Intemperies non est causa motus perversi.	445		
<i>Johannis Bohnii</i> de Sede animæ opinio.	171		
	388.		
Iræ effectus.	392		
— Causa.	43		
— Comparatio cum Mania.	43		
Irritatio est causa Convulsionis.	170		
— ejus cura.	343. 466		
Judicium <i>Socratis</i> de Dolo & Voluptate.	355		
<i>Julii Claudini</i> de Enematibus opinio.	361		
	117		
	Gggg 3.		Kaz.



# I N D E X.

## K.

Καράδης somnus unde cognoscatur?	231
Κάρφ' apud Platonem quid?	195
— apud Galenum distinguitur à Caro morboſo.	195
— apud Suidam quid?	<i>Ibid.</i>
Καρωτική δύναμις.	195
Καρδιακὸς febrilis Origo.	4. 232
Ejus cura.	31
Κατόχος & Κατοχὴ vocabula ſunt generalia.	
196. probatur. <i>Ibid.</i> quomodo ſpecialiter poſſint determinari? 196. ſeqq. Catochus eſt Catalepiſis juxta vulgarem loquendi modum.	573
Κοίμηση quid ſignificet.	195
Κῶμα derivatur ἀπὸ τῆ κοιμῶ.	196
Ejus ſignificatio.	<i>Ibid.</i>

## L.

Laborantes morbo caduco, convulſionibus ceſſantibus, ad munia ſua redeunt.	413-
418. Ratio quæ?	<i>Ibid.</i>
Languoris ſigna.	90
Laudanum opiatum apud quosdam male audit, ratio quæ?	199
Lentor ſanguinis unde?	244
Lethargi effectus.	198
— Natura.	225. 241. 242. 244. 248
— Descriptio vulgaris. 240. Accuratio.	<i>Ibid.</i>
— Cauſæ. 243-246. Procatarectica.	246
— Differentiæ.	246. 247
— Signa.	247
— Prognofis.	248
— Indicationes.	248
— Cura.	249
— Diæta.	260
— Diſtinctio à reliquis affectibus ſoporofiſis.	242
Lienis uſus.	520
Ligatura capitis dolori affert levamen, ratio quæ?	10
Liquor nervoſus, à ſpirituibus animalibus diverſus, non datur.	2
Lumbago. 359. Non eſt Tetanus. <i>Ibid.</i> Eſt contorſio.	<i>Ibid.</i>
— Ejus descriptio.	359
— locus affectus.	359
— Cauſæ.	360

— Differentiæ.	360
— Signa.	<i>Ibid.</i>
— Prognofis.	<i>Ibid.</i>
— Indicationes.	<i>Ibid.</i>
— Cura.	<i>Ibid.</i> & 361

Lympha eſt paralyſeos cauſa	303
Lypothymia quomodo tollenda?	435

## M.

Majerne præceptum circa purgationem in morbo vertiginoſo.	100
Mania.	170
— Ejus cum Ira comparatio.	<i>Ibid.</i>
— Descriptio.	<i>Ibid.</i>
— An ſit morbus? an vero ſymptoma?	<i>Ibid.</i>
— eſt delirium diuturnum.	172
— Ejus cauſæ.	<i>Ibid.</i>
— Natura.	172. 173
— in quo conſiſtat?	172
— Ejus differentiæ.	176
— Signa.	<i>Ibid.</i>
— Prognofis.	177
— Indicationes.	<i>Ibid.</i>
— Cura.	177-188
— Diæta.	187. 188
Maniacorum natura.	172. 175
— robur.	173
— ferocia.	173
— mens ab objectis furorem excitantibus quomodo abducenda?	180
Maſaria de V. S. in morbo vertiginoſo ſententia.	21
— de Arteriotomia.	93
Medicamenta externa quæ?	34
— Univerſalia.	101
— particularia.	101
— Chyrurgica.	180. 181
— plegmagoga unde ſic dicta.	327
— chymica.	329
— antiſpaſmodica. 356. Unde ſic dicta. <i>ibid.</i>	
A quo primum inventa.	<i>Ibid.</i> & 357
— Specifica. 436. dividuntur in ſimplicia & compoſita.	437
— Simplicia ſubdividuntur in Galenica & chymica.	437
— Her-	



# I N D E X.

- Hermetica. 438
- Medicamentorum chymicorum usus. 329
- Medicinæ objectum quod. 145
- Medicorum de soporosis affectibus discrepantes sententiæ. 191
- Μελαγχολία quid significet propriè? 131. Quid improprie? *Ibid.*
- Melancholia an febrem habeat comitem? 124
  - Ejus descriptio vulgaris. 130. commo-  
dior. 139
  - derivatio. 131
  - significatio *Ibid.*
  - Causæ proximæ. 131. 134. 136. 137.  
138. Remotæ. 142. 143. 144. Sunt  
triplices. *Ibid.*
  - Origo. 131. 134
  - Differentiæ. 145
  - Signa. 146
  - Prognosis. 146
  - Indicationes. 146
  - Cura. 147-155
  - Essentia in quo consistat? 139
  - Diæta. 166. 167. 168
  - Divisio in Mentalem & Corporalem. 144
- Melancholici qui? 139. 149. Non ferunt  
medicamenta calidiora. 155. Ratio quæ?  
*Ibid.*
  - Eorum natura. 155
- Membra an possint esse resoluta, remanente  
motu integro? 281
- Membranæ cerebri non possunt esse causa  
paralyseos. 312. Ratio quæ? *Ibid.*
- Membranarum cerebri textura. 7
- Memoriæ descriptio. 396
- Mens est substantia à corpore distincta. 144
  - corpore extincto manet superstes. 144
  - non curatur à Medicis. 145
  - est Sensorium commune. 371. confir-  
matur sententiis Antiquorum. 371. 372  
373. 374. 376. 377
  - est διαθήσεων διαθήσις. 372
  - eadem est cum Sensorio communi. 377.  
393
  - differt nomine, & relatione. 377
  - est nomen absolutum & generale. 378
  - quatenus dicatur Sensorium commune?  
382. 393
- Non potest esse pars corporea. 377. 378
- est Organum organorum. 393
- nullam ad locum habet relationem. 378.  
386. 393
- agit intelligendo & volendo. 378
- Spiritus sola voluntate determinat. 380.  
383. 389
- Mentes separatae carent Sensorio communi.  
379
- Menstrui necessitas. 407
- Mercurii vis. 264. 304. 305
- Metus effecta. 43. 134. Signum. 79
- Mitigatio spirituum in Maniacis quomodo  
fiat? 183
- Mœroris effecta. 421
- Morbi signa. 170
- Morborum convulsivorum hypotyposis. 339
  - Soporosorum & convulsivorum diffe-  
rentia. 403
- Morbus virgineus causa est doloris capitis. 11
  - Ejus causæ. 11
  - effecta. *Ibid.*
  - Cura. 26. seq.
- Morbus caducus. 362
  - Ejus nominis ratio. *Ibid.*
  - Ejus descriptio. 362. Explicatur. *Ibid.*
  - Natura. 363
  - Origo. 403. 406. 407. 408
  - Causæ. 405-416. Antecedentes. 415. 416.  
Procatarepticæ. 417-421
  - Differentiæ. 421. 422. 423
  - Signa. 423
  - Distinctio à speciebus Epilepsiæ sym-  
ptomaticæ. 425
  - Comparatio cum Epilepsia hysterica.  
426. 427
  - Prognosis. 427
  - Cura. 427-443
  - Diæta. 443
  - triplex species. 438. 441
  - differentia ab Epilepsia febrili. 443
  - non est επιγενόμενον σύμπτωμα. 349
- Moribundi descriptio. 401
- Motus necessitas in Cephalalgia. 43. in Vigi-  
liis. 77
- Motus sanguinis duplex: Universalis & par-  
ticularis. 2
- est



# I N D E X.

— est causa doloris capitis generalis.	15	Objectum medicinæ quod?	145
— spirituum in Vertiginosis quomodo sedandus?	101. in Phreniticis quomodo?	Oblivio in Senibus unde?	298
	124-127	Obscuritas Veterum circa affectus soporosos.	<i>Ibid.</i>
— unde proveniat?	172	190. <i>Pauli Ægineta.</i>	
— quomodo aliò derivandus?	458. 459	Officium Sensorii communis.	371
<i>Montalti</i> de Spiritibus animalibus sententia.	415	Opiatorum usus & abusus. 26. 38. 57. 58. 59.	60. 61. 246. 457. 509
Motus Automaticus quis?	287	eorum efficacia.	207. 457
— Convulsivus quis?	<i>ibid.</i>	Opiniones diversæ circa Catalepsin.	566
— Voluntarius. 287. 291. Quando aboleatur.	398	Opium apud quosdam male audit, ratio quæ?	199
Motus corporei ubi terminentur?	377	— est Lethargi causa.	246
— convulsivi quomodo producantur?	301. 402. 534. 552. Quomodo differant à voluntario?	— ejus præstantia.	57
	<i>Ibid.</i>	— Efficacia.	57-59. 456
— musculorum unde dependeant?	406	— Natura.	57. 58. 59
— convulsivi in febribus unde?	553.	— Usus.	59. 60. 67. 456. 457
— quare periculum præfagiant?	554	— Formulæ.	61
Motuum convulsivorum in somno descriptio.	532	Opistotonus an referendus inter Spasmos universales?	348. 353
— eorum à Convulsionibus distinctio.	551	— ejus Causæ,	354
— eorum distributio.	<i>Ibid.</i>	— Origo.	<i>Ibid.</i>
— Causæ.	555	<i>Orestes</i> furis agitato.	174
— Differentiæ.	556	— correptus <i>ὥσπερ μανία.</i>	174
— Signa.	557	Organa quinque sensuum externorum propriè non sentiunt.	369
— Prognosis.	<i>Ibid.</i>	Orgasmus sanguinis in Carosis unde? & quomodo compescendus?	232. 233
— Indicationes.	558	Ossa luxata sunt causa Paralyseos.	305
— Cura.	<i>Ibid.</i>		
— Diætæ.	559		

## N.

Narcoticorum vis.	57
Nervi soli an possint esse causa Paralyseos?	312
Nomenclatura affectionis hypochondriacæ.	516
<i>Neubausii</i> Homo melancholicus.	144
Noxa sanguinis menstrui in quo consistat?	499. Seminis in quo?
Nutritio in quo consistat?	<i>Ibid.</i>
	444

## O.

Objectionum circa Paralyfin solutio.	322
— circa Sensorium commune.	82-386
— circa Catalepsin.	568. 569

## P.

Pabulum spiritibus nimium agitato cur, & quomodo subtrahendum?	115. 116. 117.
	118
Pallor vultus unde?	424
<i>Pauli Barbette</i> de Affectibus soporosis judicium.	194
Paralyseos natura.	287
— Causæ. 287. 297. 299. 306. -Antecedentes.	306. 313. 314
— Origo.	310
— Descriptio. 308. Explicatur.	<i>Ibid.</i>
— Essentia in quo consistat.	308
— Differentia.	316
— Signa.	<i>Ibid.</i> & 317
— morbus est ingravescentis ætatis.	297
— Prognosis. <i>Ibid.</i>	-In-



# I N D E X.

— Indicationes.	318	Eorum Mos & consuetudo.	<i>Ibid.</i>
— Cura.	319-339	Phantasma melancholicum quid?	133
— Diæta.	339	<i>Phil. Elian. Montalto</i> de spiritibus animalibus.	
Paralyſis eſt affectus ingraveſcentis ætatis.	296. 300. 301	ſententia.	415
— Universalis non datur.	280	Phlogofiſ. unde proveniat?	449
— contingit abſque rationis læſione.	310	Phrenitidis ſignificatio quæ?	105
— comparatur cum uredine.	312	— Vulgaris deſcriptio. 105. - Vera.	112.
— à Spiritibus ſolis non poteſt produci.	313	Explicatur & confirmatur.	<i>Ibid.</i>
— neque à ſolo ſanguine derivari.	<i>Ibid.</i>	— Origo.	107. 127
Paralyticus lue Venerea inquinatus.	305	— Cauſa proxima 108- Magis remota.	109.
Paraplegia ab Apoplexia diſtincta non datur.	280	— Eſſentia in quo conſiſtat?	112
Paroxyſmus Morbi caduci quomodo deſinat?	413	— Differentiæ.	113. 134
In quo differat ab Epilepſia hyſterica?	492	— Signa.	114
Pars melior hominis abſolute conſiderata dicitur <i>mens</i> . 372. Quatenus corpori unita eſt, <i>Sensorium commune</i> .	<i>Ibid.</i>	— Prognofiſ.	115
— Solida quæ Sensorii communis officio fungatur non datur.	394	— Indicationes.	115
Partes corporis triplices apud Antiquos.	295	— Cura.	117-128
Partes cerebri poſteriores non ſunt Sensorium commune.	366	— Diæta.	129. 130
— nec anteriores.	<i>Ibid.</i>	Phrenitis qua ratione ſoleat invadere?	105
Particulæ Narcoticæ an generentur in corpore humano?	253	— eſt ſymptoma februm.	105
Partium conſiſtentia debita in quo conſiſtat?	293	— an comitem habeat inflammationem?	106
Paſſionis animi ſigna quæ?	55	— Ejus natura.	106
Paſſionum, quæ conſtrictionem habent comitem ſequelæ,	135	Phreneticorum urinæ quales?	114
Pathemata animi Melancholiam produciunt.	169	<i>Pilula chalybeata</i> .	526
— Sunt Maniæ cauſa. 174. Et Epilepſiæ hyſtericæ.	498	Pituita in poſterioribus cerebri ventriculis putreſcens non datur.	245
— Eorum efficacia in quo conſiſtat?	172	— eſt cauſa Morbi caduci.	416
— Iis in genere quæ cura conveniat?	69.	Plethora eſt cauſa doloris capitis. 8. Melancholiæ.	142
In ſpecie quæ?	<i>Ibid.</i>	Ejus cauſæ. 143. Cura.	162
<i>Pauli Aegineta</i> circa affectus ſoporof. obſcuritas.	190	<i>Πνιξ ὑς πνιξ</i> apud Græcos quid? 484. Unde derivetur?	<i>Ibid.</i>
Peduliviorum uſus in Epilep. febril. 459. Eorum effecta.	<i>Ibid.</i>	<i>Pœnia</i> virtus.	437
Perceptionis mentis origo.	376	Potus <i>Thee</i> uſus & abuſus. 10. 25. 26. 46. 47	
Pericranii deſcriptio.	7	Prava partium conformatio eſt cauſa Paralyſeos.	306
Perſæ fragilia habent capita, ratio quæ?	41	Præceptum <i>Hippocratis</i> .	24
		— Stoicorum.	77
		— <i>Seneca</i> .	177
		— <i>Majerne</i> , circa purgat.	100
		Præparantia non ſunt ſemper præmittenda purgantibus.	325
		Præſtantia <i>Opii</i> .	57
		Præternaturales vigiliæ quæ?	50
		Preſſio ſanguinis producit dolorem capitis.	6. 10
		— Ejus efficacia.	11
		H h h h	-Ma-



# I N D E X.

- major & minor est Cephalalgia causa. 25
  - Ejus origo. 23
  - Signa. 50
  - Cura. 25
  - Privatio motus, an sit de Essentia Catalepsios? 569
  - Productio Convulsionis maxillae inferioris. 542
  - Motuum convulsivorum. 552
  - Progressus sanguinis per vasa capillaria quomodo reddatur facilior? 25
  - Tò πρῶτον αἰσθητικόν Aristoteli* quid? 373
  - Tò πρῶτον αἰσθητικὸν μορίον Galeno* quid? 367
  - Pudoris signum. 79
  - Pulsatio producit dolorem capitis. 8
  - major est in temporibus, & ratio quæ? 9.
  - Pulsus præter naturam frequentior est signum febris. 20
  - Purgantium usus & abusus. 24. 26. 68. 99. 148. 149. 151. 158. 178. 234. 235. 331-432 451. 463. 481. 505. 523
  - Purgationis formulæ in Vertig. 99
  - Pus in cranio collectum est causa Paralyseos. 303
- Q.
- Quies sanguinis quid in homine efficiat? 5
  - In morbis acutis est necessaria. 77
  - noxia est in Morbo caduco. 422
- R.
- Rabies canum frequentior, & quare? 262
  - Radii solares Cephalalgiam producant. 9. 25
  - Raimundus Vieussens* refutatur. 296
  - Ratio unum facile corripitur dolore capitis, alterum non. 9
  - unionis mentio cum corpore. 82
  - quare affecti morbo caduco, convulsionibus cessantibus, iterum excitentur. 413.
  - Inflammationis. 107. 108
- Realdi Columbi* de motu cerebri sententia. 412
  - שׁוֹנֵן* est sonare, tonare, sentire. 368
  - Relatio inter sensus internos, & Sensorium commune. 384
  - inter dolorem hypercatharsin producentem & convulsiones. 464
  - Remansio in eodem statu, an sit de Essentia Catalepsios? 569
  - Renatus Cartesius* laudatus. 375. 476. 378. &c. refutatus. 389. 390. 395. &c.
  - Repletio est doloris Capitis causa. 8. 424
  - producit vertiginem. 82. 424. Convulsiones. 342. Morbum caducum. 403-412. Gravitationem capitis. *Ibid.* Febres. 444. 446. Epilepsiam febrilem. 446. Subsultus in somno. 533. Convulsiones in somno. *Ibid.*
  - Ejus ulteriora effecta quæ? 449. 466
  - Ejus Cura. 450. 451
  - Requisita ad productionem somni naturalis. 52. 77
  - ad curam Vertiginis. 94
  - ad motum voluntarium. 287. 288. 294. seq.
  - ad motum muscularem. 341
  - ad Sensorium commune. 370
  - Respiratio an semper rara & magna sit in phrenitide? 115
  - an cita & parva in paraphrenitide? *Ibid.*
  - an cesset plane in Apoplexia? 242
  - Respirationis difficultas unde? 68
  - Robaultii* de Sensorio communi opinio convellitur. 392
  - Roborantia cerebrum & nervos. 335. 336
  - Robur Maniacorum unde? 173
  - Rondeletii* sententia de paralyfi. 281. 290
- S.
- Salivæ vitium in hydrophobia correptis. 264
  - Salium volatiliū vis. 357
  - Sanguis qua sanguis, non producit continui solutionem. 3
  - est liquor temperatissimus. *Ibid.*
  - est causa ordinaria capitis dolorum: 15
  - quo-



# I N D E X.

— est primum movens.	295	Sentire & sapere sunt idem.	374
— quomodo reddatur fluidus?	26	<i>Septalii</i> de Cauteriorum usu testimonium.	442. 443
— quomodo ad depressionem cerebri reddatur aptior?	70	Serum potest esse causa Paralyseos.	302
— glutinosior quomodo corrigatur?	219	— Ejus in cerebro accumulatio unde?	303
— menstruus, an sit admodum venenatus?	143	— Ejus copia producit Cephalalgiam.	314
— extravasatus est causa paralyseos.	300.	Signum pudoris.	79
Qua ratione sit discutiendus?	324	— Metus.	<i>Ibid.</i>
— Ejus orgasmus in Carosis quomodo compescendus?	232. 233	— agitationis spirituum.	109
— solus non potest producere paralyfin.	312. probatur.	— febris.	246
— Ejus tenacitas nimia quomodo emendetur?	514	Situs Glandulæ pinealis.	364. 370
Sanguinis copia producit vertiginem. 82. Epilepsiam hysterica.	496	<i>Σκιατογία.</i>	41
— Ejus impetus quomodo à cerebro derivandus?	299. 210. 211	<i>Σκότωμα &amp; σκοτίζινον</i> unde?	83
— generatio quomodo restauretur?	329	<i>Socratis</i> de Dolore & Voluptate judicium.	361
— evacuatio producit Epilepsiam hystericam.	497	Solutio continui est vulnus 2. Probatur.	<i>Ibid.</i>
<i>Saxonia</i> de Purgantium usu opinio.	326	— Ejus causa.	2
Segnities spirituum. 135.	Ejus origo.	— An adsit in omni Cephalalgia?	3
	143	Somni usus & abusus in Cephalalg.	42
Senes in Coma somnolentum non raro incidunt. 218. Ratio quæ?	<i>Ibid.</i>	— Ejus effectus.	45
— Eorum tremor & debilis incessus unde?	297	Somnium rei gravis incumbentis unde?	561
— Natura & mores describuntur.	267. 298	Somnolentia in febribus unde?	222
<i>Sennerti</i> de Purgantium usu sententia. 326.		Somnus morbosus unde?	108
de Sensu communi. 374. Conuellitur.	<i>Ibid.</i>	Suffocutio syncopalis.	227
Sensorium quid sit?	398	<i>Σπασμός</i> derivatur ἀπὸ τῆ σπῆς.	331
— commune quid?	368. 369. 381	— Ejus in genere descriptio.	<i>Ibid.</i>
— Ejus finis.	370	— An & in quo conveniat cum motu voluntario?	341
— Officium.	<i>Ibid.</i>	— in quo differat à motu ordinario?	<i>Ibid.</i>
— Non est organum corporeum.	372. 375	— Ejus vehementia describitur.	<i>Ibid.</i>
— sensuum externorum effugit aciem.	393	— An sit symptoma motus voluntarii?	350
— sola ratione pervidetur.	393	— Ejus Causæ.	542
— nullam habet relationem ad locum.	378	— Differentiæ.	355
	386. 393	— Prognosis.	<i>Ibid.</i>
Sensus, an ad tactum omnes queant reduci?	4	— Indicationes.	<i>Ibid.</i>
Sensus non aboletur in Paralyfi, motu integro remanente.	281. 314	— Cura.	<i>Ibid.</i>
— in quo consistat?	289. 292	Spasmus Flatulentes.	335
— communis unde dependeat?	396	— Ejus descriptio. 536. Explicatur.	<i>Ibid.</i>
Sententiæ Medicorum de affectibus soporosis	191. 192	— Causæ.	537
		— Differentiæ.	538
		— Signa.	<i>Ibid.</i>
		— Prognosis.	<i>Ibid.</i>
		— Indicationes.	<i>Ibid.</i>
		— Cura.	<i>Ibid.</i>
		— Diæta.	540
		Spasmodum distributio.	545. 346
		Species Morbi caduci tres.	422
		H h h h 2	- Epi-



# I N D E X.

— Epilepsiæ.	404.408
Spinalis medulla duplex.	309
Spirituosa contraria sunt Repletioni, & Inanitioni. 35. Ratio quæ?	<i>Ibid.</i>
Spiritus sunt causa Vertiginis. 84. dupliciter peccant.	<i>Ibid.</i>
— debiles quomodo roborandi?	102
— Ignei non dantur. 171. Excogitati sunt aqua stygia similes, & quare?	171
— torpidiores quomodo excitentur?	266
— animales soli non possunt producere Paralyfin.	312
<i>Spiritus Galbani compositus</i> describitur.	539
Spiritibus nimium agitatibus cur & quomodo pabulum subtrahendum?	116-118
Spirituum motus nimius ægrotos reddit feroces.	50
— Ejus causa.	51. 52
— in Vertiginosis quomodo sedandus?	102
— in Phreneticis quomodo?	124-127
Status cerebri prætern.	400
Stertor est Lethargi comes. 242. non constituit essentiam Lethargi.	242
Stoicorum præceptum.	77
Stupor membrorum unde?	310
— frequentissime præcedit paralyfin.	<i>Ibid.</i>
Subjectum affectionis hystericae quodnam.	512
Subsultus in somno.	531
— Eorum descriptio.	532
— Causa.	533
— Modus productionis.	534
— Differentiæ.	534
— Signa.	<i>Ibid.</i>
— Prognosis.	534
— Indicationes.	535
— Cura.	<i>Ibid.</i>
Subsultus tendinum in febribus.	554
— In affectu hypochondriaco.	555
Succus nutritivus in cerebro elaboratus non datur.	2
Suffocationis hystericae derivatio. 484. Ejus descriptio.	<i>Ibid.</i>
Suffocationis metus in hydrophobicis unde?	264
Suppressio hæmorrhoidum est causa Plethoræ.	143. 144
<i>Sydenhamii</i> effatum de febribus.	444
Symptoma quid?	170. 350

## T.

Tabula Spasmodum.	346
Tensio fibrarum muscularium duplex.	289
— Ejus origo. <i>Ibid.</i> Usus.	292
Terroris effecta.	43. 134
Tetanus an inter Spasmos universales referendus?	348
— Ejus Causæ.	354
— Origo.	<i>Ibid.</i>
— Natura.	358
Textura membranarum cerebri.	7
Timiditas <i>Joh. Heurnii</i> .	330
Tractatio Vertiginis à vitio solid. partium.	100. à colluvie ferola.
Tristitia an sit genus Melancholiæ?	139
— Ejus effectus.	43. 134
— Origo.	143
Tumor arteriarum unde?	449
Typhomania quid apud <i>Hollerium</i> ?	291

## V.

Vapor melancholicus non est causa Melancholiæ.	131
Vapores an dolorem capitis producant?	13
Vasorum dispositio duplex: nativa & adscititia.	481
Vehementia Spasmi.	341
Vena in Vertigine secanda.	93
— In Epilepsia hysterica quæ?	504
Venæ sectio potentissimum est in Epilepsia hysterica remedium antispasmodicum.	503
— Ejus adversarii refelluntur.	<i>Ibid.</i>
Venæ sectionis usus & abusus. 22. 23. 25. 26. 31. 32. 66. 67. 91. 116. 119. 121. 147. 162. 178. 102. 118. 232. 238. 248. 249. 267. 276. 319. 320. 321. 322. 323. 428. 429. 430. 445. 450. 451. 472. 479. 504	
Veneni natura.	410. 467
Venenum in pollice pedis, an sit causa Morbi caduci?	409. 410. 411. 423
Ventriculi cum cerebro consensus.	24
Ven-	



# I N D E X.

Ventriculus cerebri quartus non est Sensorium commune.	366
Venus nonnunquam excitat Melancholiam.	
169. Quandoque illius Medicina est. <i>Ibid.</i>	
Vermes dolorem capitis inferentes.	15
Vertigo, an sit imaginatio falsa?	78
— unde producat? <i>Ibid.</i> & 82. A quo morbo dependeat?	94
— Ejus descriptio vulgaris.	78. Vera. 85
— Causæ.	85
— Morbosæ causæ.	81. 82. 83. 84. 85. 89
— Ejus triplex gradus.	87
— Differentiæ.	86. 87
— Prognosis.	91
— Indicationes.	<i>Ibid.</i>
— Cura.	91-104
— Diætæ.	104
Vertiginosi erecti titubant. ratio quæ?	425
Vesicatoriorum usus.	95. 129. 181. 212. 257
Vestigia cerebri unde dependeant?	139
Veterum de affectibus soporosis opinio.	190
Vigiliarum descriptio.	49
— Causæ. 45-50. Falsæ rejiciuntur.	53
— Differentiæ.	54. 55
— Signa.	55
— Prognosis.	56
— Indicationes.	59
— Cura.	57-58
— Diætæ.	76. 77
Vinum Phreneticis est perniciosum.	133
Vires humanæ unde dependeant?	225
Vis Pressionis sanguinis.	7
— Sanguinis.	16
— Opiatorum.	207. 457
— Salium volatilium.	157
— Alkalium fixorum.	357
Vis illata partibus exquisiti sensus excitat dolorem capitis.	16
Vita unde dependeat?	396-225
Vitia cerebri quomodo corrigenda?	28. 29. 30
— solidarum partium causæ sunt extraordinariæ compressionis.	83
Vitium organicum, an vigilias protractas possit producere?	53
— solidarum partium an dolorem capitis queat excitare?	14. 15

Vitriolum narcoticum, an inveniatur in corpore humano?	254. Vomitus omnis an convulsivus?	541
— Convulsivus quomodo excitetur?	542.	
Explicatur. <i>Ibid.</i> Quomodo conveniat cum vomitu post venenum assumptum?	542. Quomodo differat?	<i>Ibid.</i>
Vomitorium usus?	97. 250	
Unio mentis cum corpore in quo consistat?	380. 389. 399	
— Ejus ratio?	382	
Untzerus laudat emetica.	431	
— purgationes.	432	
Urinæ Cacochymicorum.	20	
— phreneticorum.	114	
Usus Opii quibus in casibus suspectus?	59. 60	
Quando minus suspectus?	60	
Vulnera Epilepsias symptomaticas producentia.	464. 465	
— nervorum & tendinum in quo conveniant? In quo differant?	<i>Ibid.</i>	

## W.

Walsmidii monitum circa Purgantia.	180
— Vomitoria. 577. sententia de passione hysterica.	516
Wepferi de Causa Paralyseos sententia.	284
Willisii de V. S. opinio.	21
— Ejus corpora striata.	365
— Testimonium de causis morb. convulsiv.	447
Willisius laudatus. 483. 486. 514. &c. refutatus.	448. 487. 519. &c.

## Y.

Υπερκατάληψις.	229
— Ejus origo.	<i>Ibid.</i>
— Natura.	<i>Ibid.</i>
— Signa.	231

## G.

Zacuti Lusitani de Hirudinum usu opinio.	23
Hhhh 3	Er-



# ERRATA

Leviora circa distinctiones, *m. loco s. positum*, & vice versa, &c.  
Benevole Lector, facile corriges: de sequentibus, quæ cursim  
annotavi, te monere non inutile duxi.

pag. lin.

2. 33. *loco aptus. lege apta.*  
13. 30. *l. molestiam. l. molestam.*  
15. 31. *l. lui. l. lue.*  
14. 21. *l. cuius. l. &.*  
16. 33. *l. auferat. l. inferat.*  
36. 22. *l. die. l. dio.*  
40. 21. *l. à septem rebus, naturalibus dictis. l. à sex rebus, non naturalibus dictis.*  
48. 7. *l. Barometris. l. Barometræ.*  
128. 30. *l. g. v. l. q. v.*  
146. 13. *l. comite. l. comites.*  
162. 19. *l. sanguis. l. vena.*  
201. 12. *l. solita. l. solito.*  
234. 34. *l. somnum. l. somnus.*  
252. 34. *l. Zij. l. Zij.*  
10. *l. Fol. Pelon. l. Flor. Pæon.*  
282. 22. *l. vel. l. &.*  
288. 1. *l. ejusdem. l. cerebri.*  
302. 29. *l. quandoquidem. l. quemadmodum.*  
305. 6. *l. extincti. l. extinctum.*  
6. *l. ipsum. l. sese.*  
307. 25. *l. usum l. usus.*  
313. 32. *l. quæ. l. quas.*  
315. 9. *l. subsequatur. l. subsequi.*  
322. 37. *l. instituta. l. institutas.*  
331. 19. *l. ducente. l. ducentem.*  
346. 7. *l. Hi. l. Hæ.*  
363. 10. *l. specie. l. species.*  
365. 4. *l. extremitatus. l. extremitatum.*  
373. 4. *l. dispersa. l. dispersas.*  
375. 15. *l. coloris. l. colorem.*  
14. 6. *adde. viam.*  
222. 9. *adde. tractat.*  
291. 28. *adde. possit.*  
295. 13. *adde. continentes sive.*  
13. 18. *dele. circulationis.*  
40. 19. *dele. non.*  
222. 7. *dele. tractat.*  
352. 37. *dele. itaque.*  
399. 15. *dele. distinxit.*

pag. lin.

400. 25. *l. violentis. l. violenti.*  
410. 16. *l. Qua enim. l. Deinde, qua.*  
415. 14. *l. resurabor. l. immorabor.*  
519. 16. *l. θυχυροι l. θυχυρα.*  
421. 33. *l. motu. l. natu.*  
437. 7. *l. dicitur. l. dicuntur.*  
444. 10. *l. febrilli. l. febriles.*  
447. 15. *l. qui. l. quæ.*  
17. *l. grassatus. l. grassata.*  
17. *l. quia. l. quæque.*  
454. 10. *l. temperantur. l. temperando.*  
456. 22. *dele. fuisset.*  
465. 28. *l. modum. l. modus.*  
466. 21. *adde. posteriores.*  
21. *l. habeat. l. habeant.*  
476. 20. *l. commutâret. l. commutârît.*  
320. 33. *l. Εαρονόμενοι. l. Εαγυρόμενοι.*  
484. 37. *l. faucem. l. fauces.*  
486. *l. actuum. l. artuum.*  
*l. obnubilationes. l. obnubilatione.*  
487. *l. copulæ heterogeneæ & explosivæ*  
*l. à copulâ heterogeneâ & explosivâ.*  
494. 27. *l. prodoret. l. proderet.*  
32. *l. advocatum. l. advocatus.*  
495. 9. *l. occurrentium. l. occurrentibus.*  
496. 37. *l. hyste. l. hysterici.*  
509. 15. *l. ægrotos meos adjutos. l. ægro-*  
*tas meas adjutas.*  
520. 7. *l. Ipsa. l. Ipse.*  
532. 31. *l. Ignaris. l. ignari.*  
541. 25. *l. involuntarii. l. involuntariæ.*  
425. 12. *adde. &.*  
429. 31. *adde. sanguis.*  
443. 29. *adde. Epilepsiæ.*  
443. 28. *adde. quod.*  
479. 8. *adde. &.*  
401. 27. *dele. in aliqua parte.*  
404. 16. *dele. talis.*  
435. 30. *dele. autem.*  
536. 6. *dele. in tali refrigeratione.*



pag. lin.

543. 14. *dele.* iterum.  
23. *l.* efficiens. *l.* producentis.  
24. *adde.* & pertinax.  
25. *dele.* pertinax.  
544. 29. *l.* medullâ oblongatâ. *l.* eâdem.  
549. 12. *adde.* ubi.  
29. *dele.* ad.  
550. 10. *l.* Levi. *l.* ervi.  
551. 20. *adde.* aliquando.  
552. 37. *l.* qui. *l.* quæ.  
553. 2. *l.* qui. *l.* quæ.

pag. lin.

560. 36. *l.* conjunctas. *l.* conjunctam.  
561. 3. *l.* libera. *l.* omnino.  
562. 34. *l.* capillares. *l.* capillaria.  
562. 35. *l.* antepenult. *dele.* iisdem.  
566. 23. *l.* Catochem. *l.* Catoches.  
571. 14. *dele.* convenirent.  
7. *l.* solent. *l.* soleant.  
10. *l.* in. *l.* is.  
*ibid.* *l.* verissimum. *l.* verissima.  
28. *l.* Huic. *l.* Hoc.  
29. *l.* præoccupati. *l.* præoccupatis.

Temporis angustia me ulterius progredi vetuit.



Handwritten text in the top left corner, possibly a list or index, with several lines of cursive script.

Handwritten text in the top right corner, continuing the list or index, with several lines of cursive script.

Handwritten title or section header in the center of the page, possibly reading "List of names" or similar.

The main body of the page contains faint, illegible handwritten text, likely a list or index, spanning the width of the page.























